

重修海鹽縣圖經序



今上之初元

詔修

顯

光二廟實錄於是內諸司暨外



郡邑咸飭其掌故之籍俟詞  
臣采稽而海鹽令樊亢宗氏  
實先一歲有事邑乘至是適  
且告成謀未起功先集君子  
將於是乎覘全課匪獨一乘

已也蓋亢宗氏之言曰邑自  
曩乙亥講乘事筆爲不庚續  
餘五十年於茲匪前政有不  
皇昭慎重故余小子禱昧攝  
官沿革之弗紀而故實之靡



稽亡論廢隊謂何已事奚視  
矣余小子敢弗勉則謀諸邑  
薦紳聞人與為裁篇若方域  
若食貨若官師若人物若叢  
記仍厥舊而益之以海事若

成海若隄海篇又二焉曰余  
在海言海先所有言不得今  
無先所無言不得不今有爾  
嗟乎其斯超軼前聞以勒成  
一家言為取義之大者乎海



鹽在嘉靖壬癸中寇萬曆二  
亥中鹹潮矣邑於海患生於  
海也將民事與吏治無鉅此  
矣而往者成政與隄程載筆  
實闕難猝發何稽焉以決筭

也侯是用補書之岳來范則  
義取其大也者迺余所詫云  
大不第此邑有藩邑海又何  
藩矣鄉者倭登邑轉掠內地  
盡驛騷而潮之溢亦靡所不



浸淫幾令吳諸郡化為壑是  
邑之海東南與共海之邑亦  
東南與屏者也侯於鹽鐵鴻  
靡弗忘顧於海事尤兢兢百  
務之舉一務為攝凡所用止  
武於汛銷沴於溢者何一非  
東南百城芘而蘄以身所擘  
畫著程憲是又有戍若隄之  
補輯夫在海治海匪一邑之  
海之治也則在海言海詎一



邑之海之言哉以斯為大於  
取義洵義之大而非區區一  
家言比者乎嘗聞之孔氏作  
春秋虎牢不繫鄭沙麓不繫  
晉緣陵楚丘不繫杞衛若曰

地險則天子之守爾今

天子惠顧東南安危寄之一海  
守地寔在鹽矣義之大春秋  
取之亢宗何多遜焉夫亢宗  
尊人友軒公於余為同年稱



名御史御史古柱下掌圖籍  
方書官也亢宗紹其家學修  
其吏事詢其舊典所至舉方  
書聿新之守地之無忝司籍  
之不忘將忠孝又兼焉矣余

賈故勉為序且請質友軒公謂

王何似

賜進士及第光祿大夫柱國少

監傅兼太子太傅戶部尚書武

階英殿大學士同知



制誥

經筵

日講

玉牒提調

實錄總裁繡水朱國祚撰





海鹽縣圖經目錄

卷一

方域篇第一之一

一之縣圖 并說

二之縣表

三之縣建置考

四之縣治城 有圖

五之縣坊鎮鄉圖 有圖

卷二

方域篇第一之二



六之縣臧署

縣學 巡檢司 倉 鹽課司

公館 急遞舖 稅課局 陰陽醫學 僧道會司 漏  
澤園 秩祀 公署全圖 縣署圖 儒學圖

卷三

方域篇第一之三

七之縣名勝譜

山水總圖 永安湖圖 譜  
總論 海 山 諸水 古蹟

墓 祠宇 寺觀  
橋梁 附牌坊

卷四

方域篇第一之四

八之縣風土記

記風俗物產種稻飼  
蠶煮鹽捕海魚等事

卷五

食貨篇第二之上

戶口 附軍匠  
竈戶

田土 附水  
利

稅糧 兩稅舊額 今派徵條鞭銀米規則 附  
加徵蠲除賑恤及預備倉積穀數 貢

卷六

食貨篇第二之下

役法 歷年編審里甲事宜 歷年僉審糧役事  
宜 貼役 欽解 加徵減貼數 北運

條議 各糧聽儘緣由 塘長修塘事宜 糧長  
修城不用民七緣由 北絹改官解緣由

雜費人均徭未盡款  
附保甲火夫事宜

課程 附市  
船



鹽課

國初三場鹽課額 成化中二場本折額 嘉靖中一例折徵額 今鯉規兩場課額

并本縣包補銀行鹽 小票限獲私鹽等數

卷七

戍海篇第三

海寧衛圖 澈浦所圖 乍浦所圖 海寧衛海岸海洋設備圖 開設

卷八

隄海篇第四

歷年修築捍海石塘 事宜并塘圖料價

卷九

官師篇第五之上

令長 丞尉 學職 監鎮 監稅 市舶

巡檢 鹽司 倉職

卷十

官師篇第五之下

武秩 前代武秩 皇明海寧衛澈乍二所各世職 衛幕 備倭把總 浙西參將 附

記歷代有事茲土著勲績者 功臣封 帝女封

卷十一

人物篇第六之一

前代陸顧 二氏譜畧

卷十二

人物篇第六之二

晉 梁 陳 唐 五代吳越 宋 元

人物篇第六之三

皇明



卷十三

人物篇第六之四 皇明

卷十四

人物篇第六之五 儒林 文苑 孝義 藝術  
流寓 仙釋 列女

卷十五

人物篇第六之六 科 貢 國子生 承椽 武  
科 封贈 恩蔭 供奉 外

寓科目  
論贊

卷十六

雜識篇第七 祥災兵亂  
諸瑣說

初天啓壬戌秋邑侯樊公以志事屬余與彭德符

氏德符固謝余謝弗獲則引友人姚叔祥共事以  
叔祥淹博近又偕秀水屠君中孚編錄郡遺文多  
所摭稽也其冬叔祥草人物志明年春又草官師  
志各成十五六而侯復以邑藝文及志林屬叔祥  
及鄭思孟叔祥又轉客思孟所謝志事而去余念  
史乘家衆腕分撰淹歲月未若純出一手為易就  
遂杜門綴緝閱兩載得篇七卷一十有六合凡三  
十六萬餘言而志成其叔祥官師人物初稿更定  
蓋亦七八若夫軼聞瑣事採自叔祥者明註簡中  
無敢獵美以見余與叔祥同心探討其始末如此



是役也侯於文獻久湮後議纂撰洵屬曠舉而余  
謬承具草之托欲藉此存維桑故實亦未敢率畧  
竣事云敢告後之續修者甲子秋七月朔日胡震  
亨孝轅識

邑民 張祖易 周全 寫

海鹽縣圖經卷之一

方域篇第一之一

一之縣圖

凡土訓莫辨於圖土屢析尤非圖弗辨鹽故疆前泐  
汜後淞浦至寥廓矣五析之以有茲土日勤墉洫用  
啓我支社而本建之域聚闢之盛仍無改初封爲東  
南緊望諸城冠豈非秦帝舊山作鎮不拔海王大國  
衆坎習輸美哉德險在我故足未標形要雄視區寓  
者乎爰因代次各繪其境之圖而系之說俾開卷者  
晉曙合分之槩焉





縣舊境圖



劉濛春畫



按海鹽古揚州南境東偏地禹貢揚州三江既入周禮揚州其川曰三江三江松江居一今在縣舊境北以證縣地爲揚州最篤古矣春秋屬越舊志云屬吳非是初吳與越成封地百里後增封八百里其壯則平原平原者武原也卽今海鹽是蓋吳以越地還越猶未盡還之故吳王語文種曰越本與國千里吾封之未盡其國其事具國語越絕吳越春秋三書知海鹽爲越本境無疑爾

國語吳封越地廣運百里吳越春秋云初封地百里後增封東

至勾甬西至樵李南至姑未北至平原元徐天佑註云平原越絕書作武原今海鹽縣也戰國楚滅越屬楚太史公以爲楚有三此其東楚矣秦并天


下始置縣曰海鹽寰宇記云廣斥鹽田相望蓋取此義縣境兼今海寧平湖及松江全郡地圖具如右以漢志有縣互攷之南錢唐北婁西由拳東隔海岸餘姚上虞中更無他縣錯入從四郭測本域廣邈觀矣星土吳斗分越牽牛婺女分今以屬越當爲牛女分天文家州郡躔次會稽郡元入牛一度屬越於天星政不謬爾

漢志吳斗分野越牽牛婺女分野晉志十

二次度數自南斗十二度至須女七度爲星紀於辰爲丑吳越之分野州郡躔次吳越揚州斗牽牛須女會稽入牛一度諸家說總不出此



析鹽官縣境圖



吳郡

禾興

馬嘯


教義里

置田

具區

夾谷

上谷水





今海寧自赭山浙口西屬紫峽東竝海至黃灣烏龍  
間舊名鹽官亦名海昌者本海鹽南境故地其分析  
難確定何年但追檢前後漢志無鹽官縣名至晉始  
志之當是吳時割置明矣舊唐書鹽官漢海鹽縣地  
有鹽官吳遂名縣蓋有所據也吳陸遜傳載孫權爲  
將軍遜從權幕府出爲海昌屯田都尉領縣事此其  
析縣始證歟惟宋書以鹽官爲漢縣非吳置詳權之  
爲將軍在建安五年此時啓土江南尚襲稱漢名爵  
縣雖析自吳云漢縣宜也自臨安建外臺左輔欲無  
單子卽不可無鹽官割餘幘佐都會不腆下邑已前


爲効焉爾

郡柳志引地志漢獻帝建安五年割海鹽

置海昌又云吳大帝黃武四年析嘉禾海  
鹽二境置鹽官按吳之析海昌止以陸遜傳爲據於  
孫權之爲將軍遜之從軍府出領縣事約畧其時知  
在建安初定爲五年已是揣度云黃武  
四年此時入魏又已六年去之益遠矣



析前京胥浦縣境圖



信義郡


前京縣

胥浦縣

顧邑山

海

洲



吳郡

嘉興縣

海鹽縣

具區

長水

海鹽郡



前京地近京浦在今松江府治東八十五里實海鹽舊境之東北鄙也宋嘉禾志載其地尚有前京舊城嘉興圖記云梁太清中以海鹽縣地析今考宋齊志竝有海鹽無前京惟陳書武帝本紀始以海鹽前京竝稱其爲梁析似無可疑但陳紀以前京屬吳郡隋志則云信義郡所領有此異同俟博通地學者詳之耳又按梁時有胥浦縣今名胥浦鄉者在平湖東北華亭西南土人立祠浦上祀子胥故號胥浦其地有壇步平江朱涇花緒治宅義成浦曲海岸等名亦從海鹽析置俟景嘗以海鹽胥浦二縣立武原郡是也

事見梁書可考志家未經收入今竝圖之沈約云地理參差其詳難舉境土屢分名號驟易千回百改尋

校未易斯言良不誣哉

蘇州圖經云隋初罷信義郡所領六縣俱併入吳郡六縣

有海陽無海鹽其駁正蓋據正史嘉禾志則云海鹽前京竝併入常熟至唐復置海鹽則以前京仍歸焉按唐初前京仍歸海鹽無可疑者若隋之省海鹽入常熟則道里太紆矣當以省入鹽官爲是詳後建置考



析華亭縣境圖

華亭

嘉興

古湮三百

地口股水  
海鹽縣  
水曰福見

海塘

海

橫塘

蘇州

太湖

紫破雙峯

橫山顧况宅



析前京析胥浦縣境稍縮矣經隋氏并省唐復置後境又寢廣於是天寶十載以吳郡太守趙居貞言復有華亭之析唐華亭今松江全郡地也里東西廣一百六十南北袤一百七十三非盡海鹽地海鹽居多與地廣志云以崑山析新史寰宇記云以嘉興析未盡然元和郡國圖志云析海鹽崑山嘉興三縣地爲之說近實可據矣聞之長老云今華亭南門有甃井石刻海鹽縣字至今未泐松治城之爲鹽地尤證也松析而三江泖浦亦壑諸其隣鹽邑免陷沒如漢時始得壹意從事捍海蓋築塘之役已先天寶興開元


初爲備蚤矣

宋嘉禾志云趙居貞奏割海鹽之北境嘉興之東境崑山之南境置華亭縣今華亭四境與三縣接也姑蘇志雲間志並同但嘉禾志誤以爲天寶元年奏割當從新唐書十載置縣者

是爲



析平湖縣境圖





皇明宣德之四年邑人叅政臣春請遣官按行江南諸大郡上命大理卿胡槩偕春往槩乘傳到郡有所鋤擊以郡屬縣僅三不足於控察化有闕或坐此請增設縣四詔報可於是海鹽境東北山之爲雅爲苦竹爲高公爲蒲菜薺龍潭水之爲漢塘爲泖港爲石亭浦鎮之爲廣陳徐埭錢埭置平湖而縣於當湖之市乍浦蘆瀝戎鹽署并屬焉雖槩主其議春實佐之矣奏請在四年三月分縣在五年庚戌歲大抵縣前後不一析至今有定疆鹽官地隆起發脉未舒當湖迄全松宅下流尻尾會厥形歪寫若夫坦陀函行居中稱輿區今鹽境最剖之各爲域亦自然勢爾豈伊不懷人暮天啓偕我分邑從王將萬世無改也

### 二之縣表

志縣於縣必先志縣於所轄古曰郡曰州省今日府曰司均轄也綱維繫焉矣惡可無爲縣表夫鹽吳越介土也以之而越以之而吳惟所轄矣然而道里近教化行尤利西北焉則今之爲轄者宜彼夫涉江外赴歷壽爲匪民於漢轄也者儻亦有歎乎勞止也哉

代縣

郡轄

州省轄



秦

初置鹽

會稽郡治吳

時置監御史監郡未設州

漢

後  
惟新莽改  
曰展武

同前  
局六年荆國十二  
年至景三年吳國

揚州刺史乘傳周行郡國無常治所

後漢

吳郡治吳

順帝析會稽立吳縣因改屬

揚州治歷陽

漢官云治壽春通典  
云壽春是漢末移治

三國吳

析鹽官詳前說

同前

揚州未詳治所

蕭子顯云吳置持節督  
州牧八人不見揚州都  
督所治杜佑云治建業

晉

同前

揚州治建業

東晉京邑

宋

同前

揚州寄治京邑

大明三年廢州直  
隸南臺七年改屬  
南徐州八年復舊

齊

同前

同前

梁

析鹽官詳前說

信義郡治常熟

舊郡縣志同檢梁書  
侯景傳陳書武帝紀  
海鹽仍屬吳郡志疑  
誤未敢輕改又景傳  
海鹽管立武原郡

南徐州治京邑

郡屬南徐見陳九  
錫文侯景隸吳州

陳

海鹽郡治鹽官

永定二年置郡以  
海鹽與鹽官前京  
屬之見陳書

揚州寄治京邑

顧明元年隸吳州

隋

省鹽官詳後考



唐

復置析華亭

詳前蘇州吳郡治吳

大順初改屬杭州

江南東道治蘇州採訪使

五代吳越

秀州治嘉興

初為開元府晉天福十二年改州

中吳軍

宋

嘉興府治同前

初稱秀州軍事改和中稱秀州嘉禾郡軍事慶元稱府

浙西路治臨安

轉運使初兩浙路南渡後分浙西路

元

升州詳後考

嘉興路總管府治同前

江浙行中書省治杭州

初屬江淮行省治揚州至元二十一年移治明年改稱江浙

皇明

復置文萃湖

詳前

嘉興府治同前

浙江承宣布政使司治同前

府八十里

司二百七十五里

一由峽石出官塘一由長安鎮過壩並二百三十六里

南京水八百一十里陸七百一十八里

北京水四千一百六十五里陸三千八十二里

按郡縣大勢視京邑古京邑皆於西北故揚州

開治江北遠控江南諸郡縣六代都江表則揚

州治亦徙而南諸郡縣不復遠隸江北及吳越

立國臨安宋中興承而光宅江淮行省遂於浙

右開藩西三郡屬城古來半轄姑蘇者始皆改

轄益趨於南又與六朝之舊不侔矣此自關宸



宙一大變局非止我一邑鈐轄規制已也

### 三之縣建置考

圖敞矣表繫矣縣建置繇來迺得究論本舊文參臆見成一家方志言匪樂為異不離史正文近是矣遂為之考曰

惟秦皇帝定江南郡會稽始置縣曰海鹽實二十五年屠維單閼歲又十有三年皇帝來巡語具太史公

秦本紀云先茲五年置後茲一年置云析吳縣置竝

誤吳地記二十六年置縣永樂弘治二志二十年甲戌置本朝一統志秦析吳縣地置海鹽應與吳同

時置云析置未縣始置在今華亭縣橐林於古為華

亭鄉地矣班固曰縣十里為亭十亭為鄉秦制也以

湖移治知治地先蓋海鹽秦縣漢因之莽改展武漢

中興仍復故稱以前漢地理志後漢郡國志為據云秦名武原誤嘉

圖記云莽時陷湖移治武原改名武原亦又誤一統志郡

新舊志縣未樂弘治陷湖移治武原即在秦時莽時

第一改展武無陷湖再改武原事漢志海鹽故武原

鄉越絕書海鹽初為武原鄉宋書州郡志引吳記海

鹽本武原鄉秦以為海鹽縣越絕書出更始時吳記張勃顧夷並有其書可

據杜佑通典載不陷湖不縣武原鄉也秦而既縣於

武原矣華亭鄉湖之陷非秦時陷以何時陷得云莽



移治改名乎改之漢志宜志之胡展武改則志武原

改獨弗志前漢地理志止云莽日展武又吳地記云秦時有女子入湖為神此亦秦陷湖一

證詳治武原今平湖縣地也又陷為湖又移治故邑

山則計偕簿郡國志吳地記詳之事在順帝時非誣

矣後漢郡國志引計偕簿載順帝時陷湖不言移治吳地記載移治故邑山一統志謂安帝時陷湖吳

記謂晉隆安五年移治並誤嘉興圖記定為順帝未建二年陷湖出唐志似有據餘詳治城下獨云

改縣名故邑則誤同武原志固曰晉成帝咸康七年

復故稱云爾一統志及郡縣新舊志並云改名故邑郡志未樂弘治二志云咸康七年復故

稱本陸廣微吳地記也夫海鹽而故邑漢宜志故邑而海鹽晉

又宜志二史志竝弗志可疑矣無已求諸他紀傳在

順帝後成帝咸康前者則赤烏之龍見以海鹽書吳

帝本志大興之雨雹以海鹽書晉五行志元帝時其他縣令長

縣司鹽校尉為隲為誼為秀亦無不以海鹽書見後職官

篇又有陸穰者為漢海鹽令于恢仕晉諫議大夫見唐宰相世系表自漢獻初年至晉開國合七十八年

海鹽地俱屬吳今于為晉官父稱漢令定是桓靈時令也尤順帝後有海鹽確證晉書蘇峻傳亦有海鹽

並在咸康前矣有海鹽海鹽之未始改無疑有海鹽無故邑

海鹽之未始以故邑改益無疑郡柳志亦云邑遷而海鹽之名則未改尤

為有見宋王應麟氏嘗推校後漢郡縣更名異同甚夥

順帝朝獨有故索縣改稱漢壽無海鹽改稱故邑說書具在學者第弗深考或云晉咸康移故邑治治馬



卑城城為海鹽鄉地因訛傳改稱海鹽殆近之

詳治城下

又括異志云復改為海塘縣尤謬而不經方志多譌率如此附識 晉而後於宋於齊

於地志知置海鹽於梁於陳於其無地志於他紀傳

得海鹽知無弗置海鹽

宋志詳前齊志有海鹽之目梁陳書散見海鹽前圖表內

具引 云陳省入鹽官則又誤

一統志縣萬曆新志並云 陳以縣屬

郡鹽官非省縣入鹽官詳前表省縣入鹽官惟隋有

之隋志不載海鹽知海鹽省也隋志今蘇嘉二郡地

惟置吳崑山常熟三縣杭北偏惟置鹽官一縣知海

鹽省當入鹽官也縣之復置自唐始蓋武德之七年

以海鹽地隸故嘉禾置嘉興縣景雲之二年嘉興遂

以其地來還仍置縣為海鹽先天元年再議省則明

年縣百姓請之又三年太守張廷珪復請之是為開

元五年就馬卑置今治為縣如初迄五代吳越宋元

至今不改矣

舊唐書志武德七年平輔公柝始置吳郡縣吳地記云武德七年以海鹽隸歸

嘉興縣新唐書云海鹽貞觀元年省景雲二年復置舊唐書則云景雲二年分嘉興縣復置先天元年復置

廢開元五年復置舊書較新書為詳 縣於唐最置廢

不恒以故志多訛當縣之初隸嘉興也其明年為武

德八年而嘉興廢縣不隸吳即隸鹽官又九年為貞

觀六年而嘉興復縣亦即還隸嘉興

隸吳以嘉興省入吳故隸鹽官

以前此隋嘗省入鹽官故 乃新唐書志云海鹽貞觀元年省夫貞



觀元年縣未置何從得省也歐陽氏猶有此誤况他

乎縣萬曆志云武德七年即置縣嘉興圖記云復置在先在天二年吳地記括異志俱云先天二年廢縣

訛雜尤多凡唐縣分六等海鹽曰繁居三等唐分赤畿繁

六等本七而云六者赤一畿一繁望與上同為一中

一中下一下一共六等也唐繁縣僅一百一十一

宋縣等尤多海鹽居上等元元貞元年廼詔曰縣五

萬戶以上宜升州海鹽戶滿六萬其改為海鹽州居

中等見元志皇明有天下右丞華雲龍以州籍獻洪武

之二年上若曰海鹽州故秦縣也宜稱縣如秦初

遂仍為海鹽縣而縣等居上如宋云見隆慶元年詔定郡縣繁簡考

四之縣治城有圖





門至望吳門舖十二座敵  
臺五座箭樓二座望吳門  
至來薰門舖六座敵臺四  
座箭樓四座來薰門至靖  
海門舖十一座敵臺六座  
箭樓五座



邑人劉濛養馬

金華山

今治城因唐城具前考矣城在吳禦越城西北吳禦

越城亦名馬皞城名馬皞者何吳伐越道逢大風車

敗騎士墮馬啼皞夫差駭問子胥子胥曰風北來助

我越必敗後人因以馬皞名其城雅名之則為吳禦

越也事見吳越春秋越絕書矣

諸志云晉咸康治馬皞唐開元移治吳禦

越謂有兩城今詳縣宋志云唐於舊海鹽縣吳禦越城西北置縣指晉縣為舊指其城為吳禦越也知此城即馬皞城無兩城矣吳地記亦指晉治馬皞城為吳禦城可據客問此有吳禦越城子前簡定縣為越地得無矛盾曰軍行壘築豈問定疆勾踐伐吳吳軍三江北越軍三江南越溪入吳地吳侯城退處崑山之南武吳溪入越地城又何妨在茲土也要未可泥

後吳王濞置司鹽校尉居此城煮海擅鹽利

出寰宇記

其地亦即名海鹽鄉也初治



城在華亭鄉者山名橐山林名橐林陷為湖名橐湖  
初陷時有女子入湖名三姑神至今著靈響土人祠

之其事甚異王安石詩茲土久陷沒千歲嗟水濱不復吳鹽邑空有秦女神浩蕩吞海日曠

濶迷天津扁舟誰能往日暮逢漁人今治去祠三姑神處百九十里遷

武原鄉又陷為湖者其鄉迺今平湖縣十八都十九

都地十八都復分上下村上村在十八里堰接齊景

鄉界下村自當湖至界涇橋接嘉興縣界其當湖即

舊海鹽縣治也出括異記大旱湖竭城廓之處猶可識出後

漢志初陷時有婦人產一蛟蛟入水壞縣城從東北去

水成泖港又有白沃使君躍馬走不及以馬策指湖

留湖東南一角不沒其事尤異民至今祠之出一統志括異

志今治城去使君躍馬處三十六里再遷齊景鄉故

邑山新唐書所載故縣山是也山高八十丈周二十

里山下有舊海鹽城出嘉禾志又有橫浦通城下南入海

所以名故縣者後人追名之宋高祖與海賊孫恩戰

築城海鹽故縣有驍將剡人虞丘進被重創於城中

養創事見宋書時縣已於晉咸康時遷到今治故名

其處為故縣也晉治城在吳禦越城今治城因唐城

者在吳禦越城西北相去不遠去故縣虞丘將軍養

創處亦三十六里矣舊志唐開元五年五月內置縣



奉勅立表興徒功其年月可記如此夫縣非一鄉也  
獨此吳禦越城地得名海鹽鄉廼縣治歷華亭武原  
齊景諸鄉卒峙於此卽鄉爲縣名復巧符豈非今日  
鼎基實肇於千載命鄉之始乎城今周六里三十五  
步高二丈五尺池周一千三百四十丈濠一丈二尺  
廣六丈九尺陸門四曰靖海曰望吳曰來薰曰鎮朔  
水門南西北三跨壕門各有橋

惟北門壕以洪武十  
形家言未殊

七年設海寧衛於城司其管是年浙江都指揮使司  
以信國湯公命檄寧波衛指揮許能加築鑿永樂十  
六年都指揮谷祥復葺之嘉靖三十二年都指揮張

鈇有外墉之築徐泰記曰惟癸丑之夏四月海寇犯  
鹽戕民無算張公鈇以都閫督兵駐節鹽求防禦策  
乃緣城濠掘土築外墉其厚六尺惟其堅其崇一丈  
三尺惟其峻削不可涉四關外爲門門有柵柵置守  
卒自是城有重障益可守無虞海寇嗣今時加修葺  
無墜公功是則記者意爲詩曰崇崇外墉下瞰濠濠  
伊誰是築張侯孔勞崇崇外墉內障我垣伊誰是築  
張侯孔煩民之攸恃恃此孤城城有障蔽士有甲兵  
外墉之築計遠慮周桓桓張侯功垂千秋鈇天台衛  
人又明年知縣鄭公茂增築子城四竝城敵臺十有



八其制可三面瞰外施礮石易時海寇數來犯公率僚屬胥史暨士民晝夜乘城俱有法城賴以全功最著語具後名宦中歲承平久城多圯萬曆二十一年知縣王公臨亨又重築王穉登有記記曰千雉有翼守國之規遠百堵聿興慮始之謀大維此鹽官聿稱巖邑輔橋李而作鎮枕滄溟以奠域素車白馬之濤響荅鼓鞀鯁人鮫客之羣趾錯鄺市所繇烽燧時驚刁斗不輟王大夫心虞復隍謀先版築鳩工庀財負鋪先衆築城千三百丈女墻增高者三尺始於二月朔竣於三月之晦計費餘二千金盜財沒入者十九

餘則取諸贖銀罔由私帑言言若金登陴易守蕩蕩如添拔幟難上若霞丹樓焉事長康之喻凌雲碧樹奚煩明遠之嗟矣爰命紀成式彰不朽後歷政竝有葺今知縣樊公維城復繕完之隆厚如王公臨亨初凡修城軍三之民七之計丈尺各有分地成化間衛指揮徐黼議也仇俊卿曰戎伍貧役之苟且應城易傾不若全歸里甲責軍戍守財力分任便其議有裨

城守附著於篇

軍三派南門至東門扣軍糧修民七派東門北門至南門用里甲萬曆四



十三年知縣何早設修城銀於貼役中里甲始得息肩四十八年掌衛篆指揮彭宗周以窮戍月糧扣之非仁建議用本衛剩餘餉有申文候覆行



五之縣坊鎮鄉圖

有圖

坊圖





鄉鎮圖

齊景鄉三都  
乍浦

海鹽鄉十六都

砂腰

開濟鄉一都

縣城

甘泉鄉十四都

十五都

海

武原鄉大都

太平鄉十七都

開濟鄉三都

歙城

開濟鄉二都

永寧鄉四都

通玄

德政鄉十二都

梅園

半路

沈蕩

德政鄉十一都

茶院

德政鄉十都

長朶鄉六都

永寧鄉五都

德政鄉九都

澉浦

鮑郎浦

長水鄉七都

長朶鄉八都

德政鄉十三都

六里堰

峽石



析城以內地坊之宋凡十日海瑞日海會日海晏日

海清日海康日海安日海豐日海熙日海潤日海阜

元坊可記者亦十日字民縣治前日聞琴縣東門外以近縣治故名

日甘泉縣治東南六十步日熙春縣治南一百十步日起潛

縣治南七十步日喜雨縣治西南九十五步二坊近陳山龍君祠禱雨處故名日定民

縣治東北八十步日宣化縣治西九十步日衆安縣治西一百步日迎恩西門

外三里凡思霈於此迎之云坊者立木為表加衡木其上書厥名

示地界限洪武初盡去坊之名以城中央有衢衢從

衡四屬城根也為循衢四分之名東南西南東北西

北四隅民有質劑官府有召集各書其隅之名從事

地界限尤易辨不紊至今用之今以回子巷至縣前為東北隅南門起至

市橋為東南隅西門至回子巷為西北隅廣福橋南至管家橋南塊為西南隅中央衢蓋新

橋衢四隅之中也凡東門至新橋衢南通之巷三日

通海橋巷日興廉橋巷日遷善橋巷北通之巷三日

總舖巷日回子巷日雀衙巷通海橋巷子巷五左三

右二吳令步隲宋令魯宗道祠在焉興廉橋巷子巷

九左四右五有浙西叅將署巷口有魚市遷善橋巷

子巷十左五右五有張黃門故宅度橋西得巷為學

宮總舖巷即北門衢子巷六左三右三縣倉丞有分

署回子巷子巷七左四右三國初分滿刺降人隸海



寧衛居此巷滿刺俗稱回子因以爲巷名其俗禁食  
豕食牛其人遂業椎牛其地遂成牛肉市雀衙巷子  
巷二左一右一左通於慶壽寺右通於總司行署西  
門至新橋衢南通之巷亦三日倉橋巷日虹橋巷日  
新虹橋巷北通之巷五日楊家巷日戚家巷日混堂  
巷日局巷日大營巷倉橋巷緣城行東之得虎尾浜  
其地產人也多力未抵於城卽緣河行亦東之得橋  
緣河四周行西東向各有倉相背建橋名倉橋巷卽  
名倉橋巷以此虹橋巷卽倉之東向者巷分歧於土  
穀祠前其東衙之爲城隍廟巷其西從之爲小虹橋  
巷巷復得子巷七左三右四有朱氏之居門臨渠多  
芙蓉新虹橋巷通於城隍廟巷而西出緣河者復與  
虹橋巷通委巷也楊家巷子巷五左二右三戚家巷  
子巷二左一右一混堂巷子巷三左一右二三巷以  
近市多高薨局巷亦委巷也無子巷大營巷北抵之  
爲灌木菴劉少彝讀書處又北之爲獨寤園鄭端簡  
公讀書處未抵灌木菴而西王世廉之故居也有樓  
嘗藏書萬卷今燬左巷二右巷一蓋子巷三云巷所  
繇名大營者或云城初建衛卒於此列營故名或云  
昔金虜降下秀州零騎二百入鹽城遇賈機宜潰卒



爲管戰於此其詳見後簡未委孰是其新橋中衢之  
南出者子巷十左四合於遷善橋諸巷右六合於虹  
橋諸巷而南以屬於南門是爲南門之衢其北之衢  
屬於城下者子巷四左三右一舊有北門在此今塞  
兩園夾道西卽獨寤園後垣東爲百可園百可園者  
亦端簡公讀書處也城三隅屋鱗比炊煙如雲獨此  
地林木蒼翳有水沼居人稀禽鳥聲樂每步屨到此  
人亦意樂也城以外東多漁南多圃北與西多列肆  
之賈東偏海散處百家不成巷南門人家數百環濠  
居巷一二北門至包道亭支巷卽少而衢長煮雞巷

而北通於太子廟則邑蒿里而西門之盛夾河皆重  
屋臨水前可肆於衢後可肆於河自城外至西柵不  
絕也蓋四門外又各自爲坊以聽保甲之政焉

東東門坊

紋場坊西西門坊朝聖坊西柵坊南南門坊北北門坊太子坊中衢東而西極於末

祚寺之前舊皆碎石甃行殊苦及屺萬曆三十九年  
知縣喬公拱璧下令盡易以巨石之方且平者至今

可弗視地跣趨也爲歌曰周道如砥履喬侯所履

遠於城而民居聚焉者古曰聚名鎮自唐始今兼名

市邨墟百物於焉往來之曰市鎮矣鎮大者曰漵浦

有城與乍浦鎮南北峙並置戍詳後鎮戍中其次硤



石鎮鎮地隣轄也鎮山名東山者轄鹽鹽西南境數十里農父榜牒日集又其次沈蕩鎮爲大鎮去縣二十六里水四通如硤石鹽西北境民皆赴之列屋五六百家五穀絲布竹木油坊質店大賈往往有他如歟城去縣十五里砂腰場去縣十八里梅園去縣二十里通玄街去梅園又五里角里堰去縣四十二里村落稠密竝有小市百十餘家於縣鎮宜悉志而舊志獨載半路亭鮑郎浦茶院三謂從來最久半路亭者漢施延質作處延後官至太尉故市鎮半路亭始漢今在縣西北三十五里舊志云以縣至郡城七十

里此爲路之半故名非也漢時郡縣未置於今地或

從長水至馬皞城言之耳

徐秦志云俗訛爲半邏

鮑郎者晉令

鮑陋子嗣之與孫恩戰歿後爲神有鸞公者見其形狀如二十許人請於梁武帝立廟錢塘江此地有浦舊入海通江乃其戰處也

俗傳如此據宋書戰處又在滬瀆也

故鮑郎

浦有市鎮始晉今在縣西南三十五里周廻六里三十步有鹽場亦名鮑郎場矣

鮑郎鎮今俗名水關埭

茶院在縣

西南二十七里云是唐開寶己巳年吳越武肅王錢

鏐幸金粟寺令寺僧於此設茶施衆見寺碑記中故

此市鎮卽以茶院名之又始於五代時也凡諸市鎮



砂腰鮑郎近鹽場多鹽徒出沒歟城左右或隱屏鼓鑄沈蕩硤石間多湖湖多支港盜賊時見告澈浦近黃灣乍浦近滌闕皆隣邑有海徑可舶往所不可往尤不易剔防今知縣樊公維城爲保甲禁約二十章晉曰私鹽曰私錢曰網船曰下海船而弭盜之政如曰捕快各直信地哨船晝夜巡邏總甲稽查游棍隣里互相救援畫一精詳所用爲邑鄉鎮計安至矣

古之爲縣者必分鄉而治之秦漢縣十亭一鄉鄉蓋百里唐以戶口定里里五爲一鄉鄉分析寢多而鄉復爲都以轄里制又自宋始海鹽在唐十一鄉後省

爲十貞元十一年郡刺史于頔奏增爲十五

舊志是年八月

六日奏改記之

軋寧五年以戶不符額復爲十鄉宋元仍之

析都二十有五而都所轄之里元以前四十有二者今增爲四百一十二復併爲二百七十九而宣德中

有平湖之析海鹽編里實得一百六十一焉用備志之開濟鄉在治西百步舊里四歟城保壽合穗稟化

今一都里八二都里七三都里十

國初一二都里俱十二三都里十四

永寧鄉治西二十里

唐名永泰後改爲永寧也

舊里四秀岐崇毅

永昌崇仁今四都里七五都里十五

國初四五都里俱十四長

水鄉治西一十八里舊里四橫山徐涇招賢甘雨今



六都里七七都里九八都里九

國初六都里十四七都里十五八都里十

六德政鄉治西南二十五里舊里五金牛延德橋李

斤竹歸仁今九都里六十都里十一都里九十二

都里六十三都里十一十四都上里四

國初九都里十三十都里

十四十一都里十七十二都里十六十三都里十五十四都上里十五

甘泉鄉治西南

十五里舊里四永和瑞井馴雉東姜今十四都下里

四十五都里十二

國初十四都下里十六

海鹽鄉治東

附郭

舊志云唐有烏夜鄉後併入海鹽鄉詳見儒學及古蹟下

舊里四長年車城

聞琴大周今十六都里十一

國初里十七

其治西北一十

五里大易鄉舊里新晉陶涇擊壤蕭墓四今里十六

轄十七都者割十四平湖存二治北二十里武原鄉

鄉名見越絕書漢志蓋秦鄉也最古矣越絕又云覲鄉北為武原登海鹽鄉即古覲鄉耶

舊里永

福絃歌隣鶴馬廐四今里二十轄十八都者割十四

平湖存六里二十五轄十九都者全歸平湖治北四

十里齊景鄉

昔有人發得墓誌上載唐貞元十四年太子左贊善大夫吳郡陸府君夫人汝

南縣君周氏祔葬嘉興縣東界海鹽縣齊景鄉青墩原西北坐知此鄉之名舊矣嘉禾志云其地有齊景公廟有碑磨滅不可讀相傳齊景欲觀轉附朝儂遵海而南嘗遊此考史景無來會吳越之文此縣海與君所處北海政風馬牛不相及安得來遊吳地記載景公臣公孫挺田開強古冶子葬縣東十五里所謂二批殺三士者後人廟祀三人并及景公因以齊景名鄉耳詳見後各勝譜

安埭降

今名由義

下亭羊墅五今里三十四轄二十都者



割平湖外僅存一餘里二十三轄二十一都二十四

轄二十二都并華亭一鄉三都五十三里悉歸平湖

華亭鄉去今縣五十五里舊里五招賢新安魚圻谿里烏社今里二十三都一十九二十九二十四都二十一

平湖里數今平湖歸併里又少矣而海鹽治城四

隅自爲里四冠開濟海鹽甘泉三鄉

東郭里一屬海鹽鄉十六都南郭里一屬甘泉鄉十五都澉浦鎮城里三列德政

鄉十三都云里所以兼名圖者取版籍義編一百六

十一字別其里而名之使有辨故今人槩稱鄉圖也

編次用千字文自天字至女字止仍分東西某區某字圖不拘都分之舊其籍在縣掌故不以入黃冊也

詳後役法下大凡全邑之地東西廣六十四里南北袤八

十八里

舊志未析平湖廣一百五十四袤一百三十三四至東半里海西六

十三里南四十八里竝至海寧縣北七十里嘉興縣

八到東南二里海西南五十里海寧縣東北五十四

里平湖縣西北一百二十里嘉善縣而海中界郡圖

記以爲在寧波府慈谿縣之黃牛山里若干不易定

併識之再考







勅曰武帝時縣或戶數百爲令四五萬戶爲長無定率故會稽郡惟一吳縣稱令自餘海鹽亦稱長也後漢以來稱令沈約志海鹽志令其證矣唐令自五品上至從七品下秩凡六海鹽令秩從六品上以會昌四年縣陞緊在上縣一等故得第三等秩卽次赤畿秩也令稱知縣始於宋縣有戍兵兼兵馬都監元稱尹元貞後陞州稱知州縣州並有達魯花赤監洪武二年復爲縣復稱知縣丞二人漢丞一人晉以後省唐一人宋省復置國初置一人如唐永樂三年增置一人主農嘉靖二十三年又增置一人主倉合三人隆慶元年

汰農丞一人故今爲二人一主水利一主倉如故主簿一人古官也主監印今主盜賊案察姦宄典史一

人元官也主署諸曹掾史於古主盜賊案察姦宄署諸掾史竝尉職也今主簿典史蓋分主之元初爲縣時丞簿尉

三人典史二人陞州後州貳設同知一人判官二人州參佐設吏目一人提控案牘一人諸曹掾史今日六房司典史合凡二十七人吏房司吏一人典史二人戶房

二科總科司吏一人糧科司吏一人典史二人課程科支科各典史一人架閣庫典史一人禮房司吏一人典史二人兵房分二科科各司吏一人典史一人刑房分二科科各司吏一人典史一人人工房分二科

科各司吏一人典史一人承發司典史一人舖長司典史一人庶人在官者老人古曰三老曰耆老今鄉老人一百六十一人宣木鐸直



申明亭里長古曰嗇夫日里吏日里正今一千六百  
十人總甲古日游徼今一百六十一人皆不食餼諸  
食餼者以互見後賦役中猥雜不重敘縣署志唐以  
後遷今治城者則迄宋元竝署於今之海寧衛署在  
城東門西二十二步一石鼓瑩可鑑有松紋者卽其  
處也有廳事元名帥正堂華亭陸居仁記畧曰元貞  
乙未詔江南五萬戶縣陞  
州海鹽爲戶六萬厥等應中州是歲始革縣秩而廳  
治尚循縣制於所陞未稱是州東薄海不一里地無  
廳驛凡一使將命必館於廳之阿室訟庭敲朴喧囂  
褻君使泰定乙丑達魯花赤字蘭奚公欲改作之而  
難其成明年天寧僧梵芳與其徒率城之十上院僧  
請公曰公倡厥始某當裒衣鉢之美相厥終而州之  
同寅亦皆輟旣廩以助土木具興百工彳集始丙寅  
夏迄是年冬十月堂成衡者廣五間縱者滾二室廚

之廣數如縱室堂有寢處廚有泡福漫甃黝堊不侈  
不苟由是使之至者有館州之具瞻始尊僚屬相抃  
士庶咸悅公命斯堂曰帥正取仲尼子帥以正孰敢  
不正示身先之意云時知州奉議王協中同知承務  
張邁州判承事陳徵從事趙士元提控案牘范亨都  
日湯文質相與叶贊司吏余復敦匠有功皆得書蓋  
達魯花赤有庫有倉有監宋武原志備載可考宋志  
版帳  
監使廳也庫在縣西廊夏稅庫在縣東廊常平  
庫在縣丞廳傍鹽監支鹽倉在縣東 令宅有堂曰道  
愛又一堂曰景魯齋曰相隱蓋唐令姚南仲嘗僕射  
尚書省宋令魯宗道又入叅知政府先後皆大拜人  
傳爲榮故多用此爲顏惜文記竝佚不存相隱齋在  
西廡紹興  
元年令歐陽延世建景魯堂治東亦歐陽令元年正  
月建初名思魯紹興二十年令祝閔以秦師垣嘗肄  
業縣宇改名將覺紹熙元年令李直養重修值禱雨  
有應名喜雨後以魯公名不可沒仍易景魯元道愛



堂在治北前至元十五年令王澤立扁

惟唐御史劉長卿攝縣為攝令

詩官舍詩有潮聲來萬井山色映孤城諸句見本集

至今猶想見署中物色

久客田園廢初官印綬輕家憐雙鯉斷才媿小鱗烹懶慢

羞趨府驅馳憶退耕榴花無暇醉蓬髮帶愁縈地僻方言異身微俗累并潮聲來萬井山色映孤城滄海今猶滯青陽歲又更倘無知已在今已訪蓬瀛此攝令詩上浙西節度李公者碑本與集稍異錄之其海鹽官舍早春詩云小邑滄洲吏新年白首翁一官如遠客萬事極飄蓬柳色孫城裏鶯聲細雨中羈心早已亂何事而紹熙中令李公養直於後圃喬林間作更春風

茅亭下瞰清池取韓退之宰縣坐溪樾詩名溪樾亭

事風流尤可傳今采之與丞署清節軒簿署雙桂軒

綺川館柏泉并志

清節軒在丞廳東偏前有竹紹興初丞李益因名淮揚李正民客此

題詩云新種修篁翠葉稠凜然清節坐驚秋官曹成類雀斯立風味仍同王子猷後廢淳熙乙酉正民孫直養初為丞復之鐫此詩壁間雙桂軒簿廳南紹熙三年簿陳震之建紹興五年吳天民重修綺川館本移風亭舊址在縣東南尉廳之南景德三年令翁緯建夫子廟廟南鑿池池之陽作亭名移風臨之廟遷亭廢靖康元年尉黃唐傑以廟址建尉廳淳熙八年尉趙善沛以亭址建此館方瑜重修扁為綺川也柏泉簿廳旁古相覆井因名其以署授衛卜遷今署洪武十七年始

今署故按察司行署也去東門減舊署十步而近於

方左而尊矣治堂三楹中堂一楹後堂又三楹治堂

旁楹左典史廳右庫吏廊東西各七楹外為門若儀

門楹各三令宅十楹後堂左丞宅九楹儀門內左簿

宅九楹典史宅八楹儀門外左

官舍俱錄永樂志存其舊今增建多矣



儀仗庫土神祠獄竝知縣祝用宏於洪武十九年四月落成舊有碑記詳載厥後於門置樵鼓樓之立戒石亭之知縣左公璇也樓重修嵇公鋼也署通修之王公璽也後堂再建譚公秀也為堂於堂之北曰清心饒公廷錫改為雙瑞移清心名後堂李公當泰也關縣門地使益敞樹坊樹塞門樹左右兩碑亭亦李公及李公前政夏公浚也庫甃以石謹守藏吏多為之廨以居令無離次喬公拱璧也奉遷儀仗庫於習儀禪宮以遺地置賓館萬曆之四年倉丞之設晚縣無署別署於治西者嘉靖二十三年也李公所由名

堂雙瑞者公三年奏最日神芝產於靈祐又野人以

禾之一莖兩穗者獻邑人頌公因請公名其堂劉世教神

芝頌日於昭太清監茲下土奕奕神君惟民是怙春雲等潤朝曦婉煦五袴知廉三異邁魯於菟在檻遊魚在釜嘉績既成式歌且舞乃瞻靈祐芝產離梁竹園精舍檀山淨鄉六英並挺三秀聯行甘露為液卿霽為棠琉璃吐燄火齊粵苾光搖寶曆秀映星粧猴池散采龍窟分香丹鐙星煥黼帳雲藏靈宮不夜香域彌芳神超有色既出無量玄氣之精清和之幹象太微體參二曜觀蓮莆生虞華萍啓旦匪公神明天苻有煥紀茲芳  
堂本饒公請衛隙地為之實舊署地

矣今署形勝所據歷政營建增飾視舊署規模尤宏

壯云治堂今知縣樊公維城有記記日國家張官置吏以承天遞數而

至縣尹極卑矣然日今日長非卑稱之也請試顧名思義而為其說語不云乎其身正不令而行易不云



乎君子體仁足以長人斯言也天下之所習聞也雖然有辨所謂正者非夫矯情鎮物執法繩人不顧是非毀譽之謂也所謂仁者非夫汎愛無私兼容不擇不惜頂踵爪髮之謂也是故正而妨仁不得謂之正仁而妨正亦不得謂之仁天固有陰陽矣地固有夷險矣四時固有寒暑夜旦矣萬物固有榮枯生殺矣人情固有喜怒哀樂矣因之而自正正之而自仁也不仁不正皆不明乎自然之理者也故曰使同乎我者正之烏能正之使異乎我者正之亦烏能正之正也者不言而同然之心也今使人自言雖三王之世各欲富各欲壽各欲逸分天下而不足以供豈惟此也又將使曾史與盜蹠同名小人與君子同賜不仁之甚者也夫人何生生於情我情人情一也五寸之矩盡天下之方非物物而度之又非守一而不與易也不得已而各之日無我無非我也無我則仁矣仁則正矣鹽官邊海之邑也其風質其民饒而俗習犷悍地界三分盜賊多有不易與爲仁似難於行余然余以爲爲仁之致與令之行不可求之民也故廣其說以自省覽焉雖然余未能也今之縣傳舍也縣之尹過客也辟魯叔孫穆子所寓雖一日必治其宮焉可

矣敢言偷乎哉並以告後來之居此堂者天啓元年上巳賜進士文林郎知海鹽縣事黃崗樊維城撰

縣儒學在縣治西南二百五十步初唐有夫子廟

在縣東南吳越時廢見宋碑宋太平興國中主簿石知

一攝縣事始重建於縣東宋志云舊縣學在烏夜鄉

者是也景德嘉祐中凡再遷景德四年知縣翁緯以舊廟逼農田移建縣南

隙地緯自爲記畧云廣殿雲聳寰軒翼迴敞修廡而傍引呀重門而前達繚垣屏周巨塹環護正殿被衮之右偏亞聖在焉閔損以降九人左右行列其餘六十二人繪諸屋壁自炎漢而下鉅儒碩士別序餘堵嘉祐八年知縣褚瑄以舊祠壞久弗葺得地縣南隅遷置學官廟像尊嚴學舍闕邃講有堂齋有次賓位小學列於西偏膳饗泮沐處之東廡瑄自爲記其銜日朝奉郎尚書屯田員外郎知縣事兼管勾鹽場騎都尉賜緋魚袋褚瑄云紹興十六年知縣徐光實重修有記曰海鹽爲邑在州境東南百里而近地形



高仰潮汐之至不甚猛悍非有山谷隄防之阻而人居以安其土黃壤其井泉甘魚鹽之利既薄又溝澮之水不可瀦蓄故民皆服田力穡利於早熟而屢編戶往往在家給人足喜教其子弟以詩書士大夫之裔亦各世守其業地既斗絕一隅舟楫人迹罕至無奇貨異產動其耳目故能安習而不遷先是境內民物凋弊學校未修初建廟以祀夫子歲久廟壞邑人願易其地乃更築祠宇稍廣東西廡以處諸生而庠序之教寢興焉崇寧改元推三舍法於天下士皆由縣陞於州絃歌之聲洋洋盈耳狼負奮張生徒隳業不習俎豆之事垂二十年矣聖主中興躬濟大業文治蔚然復興紹興癸亥春既建太學爲首善之地廷臣獻言欲郡縣士由鄉校以進明詔從之守令承流各舉其職惟邑之東舊學斯在瓦裂桷腐將就傾圯知縣事左承議郎徐光實視事之初奉承詔旨靡敢違暇鳩工度材親督其役經始於夏五月至秋八月告畢然後堂殿門廡高明宏大職掌有舍肄業有齋土木之工頽聖之色圭潔崇麗奐然一新餼廩器用罔不備具明年春行鄉飲禮預者百餘人又訪求中朝畫本改飾先聖先師十哲及鄒國公像儀形克肖可瞻可仰與夫二三子侍側之容庶得如親見之丙寅春上丁行釋奠禮邊豆靜嘉盥薦嚴謹已事諸生願有記述以貽永久竊謂海隅小邦光被盛化得賢令宰夙夜究心修舉舊典可謂善矣故爲之書左朝奉大夫充徽猷閣待制提舉臨安府洞霄宮平原縣開國伯李正民記正民維揚人時寓居海鹽也 乾

### 道二年知縣劉銓始學於今地

是歲僅立宣聖廟及講堂明年縣令魏汝

功始蓋廊廡庖湍周備李大卞繼之繪七十二賢東西壁增學糧試補諸生淳熙十五年李丞李直養卽正民孫也哀力一新廊廡紹熙元年李丞遷令以月得餐錢修大成殿及重裝先聖十哲置書籍祭服立進士題

### 元陞州學設樂懸

至正二年翰林侍講學士黃縉大成樂記曰古之釋

奠折俎升觴而已其爲禮也畧故其用樂之始莫得而詳記曰凡釋奠者必有合也說者或以合爲合樂然則釋奠之有樂其出於古歟若其音節器數則自漢儒未嘗言之前史所載元嘉之六佾特施於太學開元之宮懸僅設於南京政和造雅樂名大晟始頒行於天下而紹興著令郡邑釋奠其樂三成蓋至是



而州縣學有事於先聖先師無不用樂者矣我國家  
有因有革存其聲音器物之舊而變其稱號以新一  
代之觀聽今所謂大成樂是也海鹽昔爲縣時既立  
學而廟祀孔子逮版圖入轍方朝廷以其地大人夥  
易縣爲州而廟學之制猶循其故禮具而樂缺有司  
以吏議所不責久置弗講至正元年夏四月陳侯某  
來知是州嘗務興舉學政問其籍則爲士者百家爲  
田者萬畝問其春秋之事則有牲幣而無樂侯爲之  
惕然與僚佐延諸儒共圖之僉言儀真有具君者善  
樂事老而不仕寓迹於雲間欲正雅樂非君不可矣  
聞之卽俾持書幣迎致焉侯躬率耆俊詢作樂之要  
君曰樂以導和不和不足以爲樂僕觀江淮間所用  
樂雜出伶人賤工之手器不中法音不中律左右高  
下參差混淆易足以致和哉苟徒捐厚費而飾虛文  
僕弗爲也侯曰作樂以和神惟君言是聽君乃爲考  
其數度齊量範金爲鍾而協以古律管彼此適均吹  
其律而鍾自應至於琴瑟亦率自制惟笙磬之屬擇  
善工使受指畫而爲之集諸生三十二人教之肄習  
而以明年春二月上丁合奏焉在列者無不欣豫於  
是教授陳陽翁以狀來屬予書於麗牲之石用垂永

久予聞帝王之設教莫重於樂非止用於釋奠也侯  
之於樂不但欲辨其鏗鏘又必求精其義者相與討  
論之不可謂知所本乎宜其能奉天子之命而爲民  
師帥也諸君子從侯修其時事周旋升降於堂序之  
間必有聞其樂而知其德感動奮發而鼓舞於鸞飛  
魚躍之下者矣蕭弗辭而謹志之 姚桐壽曰大晟  
樂宋徽廟時魏漢津造以徽廟中指三節三寸定黃  
鍾之律指旣加長而樂律遂高漢津亦私謂弟子律  
高則聲過哀國亂無日甲午州學春祭余以家藏崇  
寧大晟樂大呂無射二鐘持與州樂考擊則比余所  
藏聲益加高判不相合宜乎州之日阡危 明興仍爲  
於清河鋒鍛也時僞吳方尋兵於郊故云

縣學廟制中爲 先師廟左右爲兩廡啓聖祠在東

南前爲戟門又前爲櫺星門廟之西爲明倫堂堂左

右齋二日復禮日由義後爲講堂前爲重門門外爲

泮池左右各有坊廟祭器與所藏永樂正統 賜書



嘉靖中 御製敬一諸箴勒石覆以亭具如制 國朝 洪武

中知縣王文永樂中上官廉宣德中厲肅正統中曾  
昌成化中謝萬貫徐朴弘治中譚秀王璽嘉靖中夏  
浚何思謹李薦佳萬曆中饒廷錫李當泰喬拱璧今  
樊公維城及洪武中教諭孫復初正統中王恭宣德  
中海寧衛指揮郭獻並有修葺 明倫堂成化中知  
府楊繼宗重建記曰宋建學至國朝凡十一遷修歲  
月滋久典守靡常殘毀傾摧幾不可依息者非一日  
矣成化庚寅郡大夫楊繼宗盡撤故餘易以栢木中  
立明倫堂南徙中門北徙後堂東建復禮齋西建由  
義齋西北為饌堂東北為廩廩肆舍在西際南上寤  
宇在東際北上復宣公祠於廟東仍文昌祠於廟西  
重門翼廡庶垣屏周肅左殿右堂廟學均稱自經始至  
書成僅五越月而吾邑之士遂復有所歸矣嗟夫學  
校者士之歸也士而無所於歸其適也將惟遇而止  
撫世者知其然必先為之地陶以禮樂期以科目待  
以祿位使有定請所以收天下之材而一其歸也當  
周盛時鄉國有學賓選以時德行道藝天下皆若人  
焉及至戰國王政不行序廢息士始變故求通放

為遊說驚為戰爭流為異端聚為食客波流風靡智  
藏耄遜而莫之振皆由乎士之無歸也泛濫浮蕩及  
乎嬴秦厭苦縱橫之術一切焚書坑儒專尚法令士  
之所學益無嚮用絕於授受或就耨鋤或附刀筆或  
迫為卒伍或因為屠傭苟避時禁不復審義一旦倡  
謀起事由其智力相並動足致人大約皆出於無歸  
之士使其初不務除絕而務反古以居之則跋扈踰  
閑者固皆曩時之賓與賢能也何至于空國而速亾  
哉漢唐以下學校僅舉科目多岐士之功業與時相  
平因循遷合沿及五季儒者之門戶蕩然矣天啓人  
文誕敷宋治三百年來未嘗一日忘養士之地其後  
國步雖艱學制不廢官曹或紊士論常存建炎德祐  
之際天運改屬人心不移雖有外圖卒無內叛扶持  
運續百有餘年而伏節歿義與國終始者率多學校  
之士蓋由其養用兼隆安危相倚士至是則又壹意  
於所歸不以安危歿生貳不特不他適而已也嗟夫  
秦宋之國勢強弱不倫而其廢興失得之故乃爾士  
果可使之久無所歸也哉 聖明繼周邁宋學校偏  
海內海鹽雖地薄民瘠居無厚資然比之疇昔人皆  
安土樂文俗尚明達風化日臻而不可動以非義者



學與士之效也諸君子以士入官仰體聖意用能  
興敝起廢使吾黨終為吉士之歸他日少效國頑之  
用是豈獨一州之美雖達之天下可以善政稱矣寧  
故第子員竊復自慶因紀敘其事刻諸石邑人禮科  
給事中張寧記祭器大銅香爐一中銅香爐一小  
銅香爐九鐵香爐三大銅屬臺二中銅燭臺四小銅  
燭臺四木燭臺五十四大銅花瓶四帛匣一十三銅  
爵一百三十八銅酒壘三銅酒杓三銅簠簋十六銅  
籩豆九十五木籩豆二百唐博士助教各一人學生  
知縣喬公拱璧修補居多

四十人宋設主學官碑載四員知元設教諭一人陞  
州改設教授一人又設直學掌錢穀唐博士助教州

元教諭行省及宣慰司劄付或學生額十五人其盛  
命於禮部教授始受職朝廷

也至五十人人受餼於學見元今教諭一人訓導二

人司吏一人有記其文曰海鹽縣儒學記學生二十

人增廣生如學生附學生不限數諭宅講堂左訓宅

二一廟左一明倫堂右學田宋元畝一萬五百七十

八今五百二十九有奇元後至元六年應奉翰林文

陳旅記云州學故有田萬餘畝至元內附初民乘間  
據有之大德中教授丘世良始復田延祐三年鄧文  
翁典敘事田盡復至元再元之二三年單父呂德裕文  
饒為敘授剔蠹釐弊佃田自封者悉懲而徵之租入  
既盈於是繕大成殿築守神新祠作靈星門采芹橋  
故宋主學官廨距廟里許今買廟西民宅為廨增第  
子員至五十人皆食而敘之其畧如此碑陰載田一  
百五頃七十八畝租一千八百八十三石四斗六升  
九合田多而所入則薄殊未悉其故萬曆元年知  
縣范梅學田記畧云海鹽學田萬畝元社墟田沒豪  
右明建學無田有田自司訓高先生梓始隆慶辛未  
前令鄭君昊陟地官頗行捐捧四十金貽學資諸生  
高先生日益置田垂末世寅周吳二君暨亞令陳君  
各捐資貳守蔡公民望揖篆嘉之偕鄉大夫士庶咸



助予繼鄭君後復助之質成者亦讓田以入學始有  
義田云二十八八年知縣李當泰增置學田記云海  
鹽故無學田隆慶間師生自置田始有田僅五十一  
畝有奇一時義而入者七十二畝有奇歷今三十年  
沒而入者三百五十三畝有奇費而入者一百畝有  
奇訴而出者一百五十三畝有奇今實為田四百二  
十三畝有奇夫以師生之自置田也鄉人士君子襄  
之郡邑學憲共成之而豪有力者猶將旋入旋出以  
自解去予悲士之終不迨養而吏胥上下因緣為病  
無已時也故悉其額於下方而虛左以俟後君子用  
堅持其末三十一年生員張復貞丈實學田有冊  
在官今五百二十九畝有奇內二百九上腴官生鄭  
心材義輸也 朱元弼議日學田師生釀金自置原  
為學中公費貧生難辦中有朝夕不給者尤急待賑  
兼以月考供應無出號舍廢久應修此皆師生隱微  
至情總非有司所及體察故欲於前田既置不必關  
通有司租則本學自收費則師生公用辟則民間私  
房奩產父母不煩稽察子婦自有主持蓋松江諸學  
皆然不與官田同例不意中間議論異同遂有申報  
之舉師生既以避嫌而不敢強問縣官又以寄管而

瀆請為難需惠無由有因空設胥吏乘而侵牟大姓  
因之謀估為弊百端遂難殫述竊謂此田不如仍歸  
本學為便 射圃在櫺星門東南久廢宋有小學元有義塾

### 今城鄉各有社學有教讀附記

甲五方書計之事始知室家長幼之節十五入大學  
學先聖禮樂而後知朝廷君臣之禮後世小學郡邑  
不存其實併其名失之海鹽為秀支邑維楊李君直  
養既修治學宮羅致一邑之士而教之復仿古設為  
小學擇教諭朱沆主之於是里巷之間絃誦之聲相  
接無智與愚皆以子弟入學為美事棊濫吹主學實  
與李君相與維持之因據其開端之意刊之石紹熙  
四年六月修職郎監秀州海鹽縣砂腰催煎場施棊  
記 元砂腰村馮氏義塾記曰古之教者家有塾黨  
有庠遂有序國有學云家有塾者非家置塾也合二  
十五家為閭閻左右有塾擇士之仕而休者為之師  
以教其子弟其規模視庠序雖稍狹而教條之施庸  
導輔掖之具蓋亦初不異也自夫學設於州縣而二  
十五家之塾缺而不修遐墟僻聚非乏俊秀去遠城



邑莫知所向徒負願學之志君子病焉海鹽治之東  
十有八里地曰砂腰實斥鹵之處馮氏世居焉天曆  
中有號梅軒處士者諱某字某病其鄉間無講學之  
地創爲閭塾殿堂齋廡畧如學校而以田百畝入於  
塾擇勤敏者掌之以其所入延士之有學行者爲塾  
師使馮氏與其隣里之子弟入學於塾且給之餐使  
竟日不替於學後至元初知州事趙侯孟貫義之署  
爲馮氏義塾俟有成將請於朝如書院未遑也至  
正初塾燬於兵其子諱某更作之而禮殿未備會官  
府計田以賦而塾有田不能獨貸其長孫椿集其諸  
弟議曰塾之設吾祖義事也使田以塾用而充賦則  
塾無所入而已成之規隳矣吾其以家田所入當塾  
田之所輸則塾可存於是諸弟聽之而塾有教養如  
初椿且將與弟完塾之所未備以畢其初之志遂以  
記請余嘆曰嗟乎古之教人之法蓋甚備矣夫以二  
十五家爲塾則家無不學之人矣家無不學之人村  
惡乎而不美矧夫黨庠遂序之教又益詳哉後世不  
知本此其不古若也固宜詎意今茲乃有倣古學制  
以淑其人如馮處士者乎余見多貲之家不籍以縱  
其豪猾則用以莊嚴二氏之室以覲覲非望之福而

已遑及此哉若處士者其亦可以謂之知義者矣處  
士既創之於前而其孫又克承之於後使不至於廢  
墜既自今瀕海之土俗有慈讓之風人有君子之  
行有以見義塾之化底於成矣始豐徐一夔記

縣巡檢司二一日澈浦鎮巡檢司洪武初建澈浦鎮

十九年以鎮置千戶所徙秦駐山縣東南一十八里

巡檢一人司吏一人印曰澈浦鎮巡檢司印舊設牌

兵一百一十二人總牌二人小牌十人弓兵一百人

今汰爲弓兵三十四人堡高二丈一尺周一百一十

丈南北各有門巡檢愛頰築正統二年教場一一曰

海口巡檢司洪武初建縣東門外十九年以縣置衛

徙砂腰村縣東北一十八里巡檢一人司吏一人印



日海口巡檢司印汰存弓兵同澈浦鎮司堡高一丈五尺周一百八十丈東西各有門巡檢焚人奴教場築甃石同

一宋制沿海濶遠處置巡檢一人掌巡邏譏察事元

制州縣設巡檢司巡檢一人今澈浦鎮安德橋側有

宋巡檢廨舊址東浦有巡檢營基蓋澈浦鎮司仍宋

舊海口司之初設縣東門者亦仍元舊也乍浦鎮巡檢司在縣

東北五十里獨山南宋元俱名故邑巡檢司白沙灣

巡檢司在縣東北九十里海岸元名蘆歷巡檢司宜

德中並分縣軍儲倉三一曰廣儲倉以儲海寧衛軍糧在縣西

安仁橋南大使一人攢典一人記曰海鹽縣廣儲倉

記厥十有八楹一曰常積一倉以儲澈浦所軍糧在

澈浦城東門大使一人攢典一人記曰海鹽縣常積

一倉記厥十有二楹一曰常積二倉以儲乍浦所軍

糧在乍浦城北門大使一人攢典一人記曰海鹽縣

常積二倉記厥十有六楹三倉洪武初竝衛職領之

正統二年始隸縣設官初竝有副使一人今汰廣儲倉洪

武十九年指揮周鑑建九十九楹常積一倉洪武二

十二年千戶孫信建遷建西門則三十年千戶朱貞

也版二十四楹常積二倉洪武二其儲漕米兌運者

日便民倉初漕米輸郡倉正統六年始設倉於縣郊

外侍郎周忱奏改各縣嘉靖三十三年移今西門內



知縣鄭茂以倭亂移建買虎尾浜民地并裁廣儲倉  
西南空地為之邑人鍾梁記云郵侯度西關內廣福  
橋南空地一所計二十畝西向虎尾浜南北皆官河  
東接廣儲倉泉脉紆紆地勢豐厚前造一橋立大門  
三間二門三間左右倉廩各七十五間前後有堂息  
焚有所典核書算亦有處周遭疊石重垣足凌風雨  
有各一小門俾輸納紛至者無稽留焉經始於甲寅  
八月落成於十一月財取於羨餘力役於糧里祭度  
氣勢視昔有加董其事  
者少尹朱君光裕也

萬曆三十七年知縣喬公拱

壁增修為廩一百六十一楹如縣里數貯發尤稱便

增設倉廩申文云本縣便民倉廩歲久坍塌官旗交  
兌之際無敷可貯至臨時堆積空地寄頓廊下先期  
既難盤驗倉卒更易折乾荷簡參差弊端叢集今與  
糧里公同酌議各令出備物料除官戶廩房自行另  
造外其民廩照依額設里數每里一間創建一百六  
十一間十間一聯每間濶一丈二尺進深并廊二丈  
二尺高一丈五尺六寸各用字號編排類貯發運仍  
撥倉夫十名巡邏用絕前弊云 廳事後堂門樓更

鼓鄭公所建周垣之外開為通行路並始於喬公  
邑人給事中鍾兆斗記曰正統中周文襄公忱以鹽  
民漕粟負載輸郡不便始奏建便民倉於西郊令名  
各就縣輸納至嘉靖癸丑甲寅倭夷入寇郭廓廬井  
劫焚殆盡而倉卒歸然獨存時莆田鄭侯茂宰邑以  
終非便利度地於西城內其方隅向背營繕時日語  
在斗先大父南昌府君記中歷今五十餘蘓積漸摧  
圯不堪塗墍屢議更新因難其事不果戊申春夏之  
交霖霖肆雷蕩瓦漂椽夷為平土當是時喬侯下車  
甫浹月遘茲異災蒿日焦心方虞單赤葶藶之不暇  
安問輸將且謀積貯也力請蠲卹於上報可鹽是以  
獲免漕兌明年己酉大稔乃屬其里賦長而詔之日  
旬賦以實京儲較諸徭為最重余以貢稅吏倘不時  
不時余何辭焉若等固有終事之義者也與若約里  
分百六十一為楹如于楹以里計十楹為停繚以修  
廓四停為列左右各各南北向時崇庫溪廣丈尺齊  
一其門塾堂廡病皆窳者則以次易奈益棟周遭石  
垣延亘加完壯焉分地授工通力並作民大和會閱  
月事竣竣翼然煥然規撫軒整艾老子弟摩肩輸納歎  
未嘗觀環倉而居者且不知斤斧所繇成疑從地出



矣是役也財餼斃聖凡費中金千六百有奇然上不  
損縣官之帑下不罷百姓之力惟是因財於眾歎因  
力於眾趨下念其庸上因其說夫是以不動聲色而  
建此利民之舉以垂永久識者謂是倉之成一持籌  
不致隱即督儲大夫據几中坐而睨此陳陳山積者  
知無憂後時而畏簡書與共影射耗沮之為弊藪也  
則事坊而制周也斗不佞則以文襄之弛民負擔也  
始基之矣莆田之中徙慎蓋藏焉保民之主也喬侯  
之重建咸正罔缺百世利也民之天也成終之有焉  
而矣宏遠矣異日者侯之名位追駕文襄而併蒙鹽  
民不啻倍蓰莆田此七尺之珉所以志也矣名共達  
字穀侯上海人  
萬曆丁未進士  
儲贖稻備賑者日預備倉洪武二十  
三年建在南水門內為厰十有四楹  
本縣預備倉每  
年額積穀稻七  
百四十石春夏納銀秋冬積穀以備賑濟詳見食貨  
篇 舊有東廣陳倉在武原鄉十九都西開濟倉在  
開濟鄉二都南歟城倉在長水鄉八都廣陳割  
平湖開濟亦變歟城倉今改為常平倉見下 又常

平倉四一歟城一澈浦一茶院一白馬廟鎮萬曆二

十四年知縣李公當泰奉守道張公檄建歲久竝圯

天啓元年知縣樊公維城重建宋常平庫在縣丞廳

傍常平倉附於省倉省倉址即今廣儲倉地也其預

備倉在元名為際留倉云樊侯重建常平倉記曰言  
倉法者則義社倉與常平

並稱云常平昉於漢其法時穀價為糴糶未聞有所  
謂假貸也假貸焉而受息以備賑自唐若宋之義社  
倉始夫糴於所有餘價不益平矣糶於所不足價不  
減平矣既平矣安所不得穀而藉假貸為有假貸且  
無論有勒保有追償有賠賂即安然食上贏靡後苦  
也亦縣不過數家家不過數口止爾利之者狹不獲  
利者固甚奢矣何如以出納之權操物情之輕重用  
低昂之術調民生之縮盈若常平之普於緝融於施  
均齊灌滿我不勞而民共酌者乎今天下郡邑所在  
有常平倉惜有司者以義社倉法雜施之夫不虞之



蓄先胃於丐請之民則何以待市價和買之資并盡於倚閣之日更無以存糴本雀鼠未爲耗卜吾廩之枵如矣此非古法不可行行常平者不純以常平行常平則有不可行也何幸得之我樊侯已矣蓋重軫夫歲之不恒民之不易爲余鹽食政計長未也眠於倉之遺址頽構喟然興慨爲損月俸鳩工治之又爲發贖緩市粟貯之且盡準於常平之增價糴減價糴無輕假貸者之舊不敢以義社倉法雜焉蓋行之初年碩計千而贏莽倍之又莽三四倍之陳因積市易通農末俗穰穰浩浩穀價之平民果以食其利矣余聞之善理財者無挹注之勞善足民者民施受之跡夫豈不知家賜戶賚易以爲德乎哉以爲民有生無能代之生民有天第能足其天執大命以幹旋運微機而消息百貨自稟衡矣兆衆自取資矣此泉府遺意獨妙於周官爲不與私恩小惠沾沾煦沫者同也嘗攷昔人創設常平之始元因畿輔穀賤罷轉漕爲糴買而獲其利遂衍之郡國築倉行之當時省漕卒六萬人之費易關東四百萬斛之粟此之糴本蓋亦綦鉅挾不訾之重值爲之母何物價之不受攝以縣官之德意箝之衡何豪商之不坐詘言其作用真有

苞舉一世提衡四民之宏繫語其功能亦寓財成萬物培補天地之精意爲利豈曰小補聖人諒所不易以吾鹽蕞爾邑侯爲之勤勤拮据不三歲而具萬斛藏用以回互出納救錢荒於穰歲抑粟踴於凶年信可寬然有餘利無不被而侯且用治成擢拜天子耳目司一切中外蠹孔朝野利源有爲穀政妨與爲穀政禪者皆可建白罷典之酌大化於其本通衆美於其流該舉廣羣物自無偏枯旋轉隱六字并不見德總能爲平者之極施匪第從區區廩廩間見一日均調之畧者也若此者寧惟吾鹽拜賜天下將盡拜侯賜侯宏仁遐度視一邑如天下而治天下亦行如一邑余雅知足辦此也故不憚昌言佐之侯諱維城字亢宗楚之黃岡人萬曆己未進士邑常平倉凡四所白馬廟倉侯自有記云邑人胡震亨撰白馬廟重建常平倉碑記曰常平古之有也其法漸備於後世我皇明聖人起稽古定制詔天下郡邑分立四境載諸功令屢朝無改然自某總角時游於鄉見所爲四倉者徒有其名久矣其鞠爲茂草也問之父老曰此長吏所不省者其責成則關內某某數處是也稍長讀史書見長孫平戴胄之所行陸宣公考亭之



所說乃知其為利溥但不知易四境之散置而聚於一隅者起自何時夫先王之法莫不有意至今法猶在而不行者皆緣失其意而蒙其跡也常平之設以禦民灾民散處而重遷至於灾且菜色蛇行安能負米數千里外穀帶芒甲杵簋尤艱故至民需倉廩而發之者猶聽其自來必不得之數也每觀饑饉代有而哀矜全活者十不一二安可盡委天行與救荒無策哉某不敏奉檄來鹽官值春潦驟降訛言歲歉米價踊貴民食不飽執事詔之發粟庾開而遠民不稱便由是益信 祖制之不可更而亟欲復之也詢乎故老更置多年以修葺不敷檢閱難遍移在近地合為一區其於防奸誠苦心也柰惠民之意何其三半毀惟白馬廟則已墟矣乃捐俸庀材鳩工而新之匝月而告竣凡為費百二十兩為居再重為殿六間前門外屏中廳旁社一如其舊每至秋成糴遺乘以寔之贖緩之餘者亦以入焉民之樂輸者亦以入焉庶乎舊制之漸復也夫有其廢之莫敢舉焉駕言於廢而避舉之名非字吐之心也今鹽雖未荒不可不為之備自頃以來十年豐稔抱計然之畫者方各憂之而予不憂惡在為民父母也則時勢有更非擅改前

人之制以自彰也既已復其初將俟後之人勿廢遂因而記其故天啟辛酉知海鹽縣事黃國樊維城撰

縣鹽場二在縣西南三十六里澉浦西門外者曰鮑

郎鹽場凡四團大使一人攢典一人記曰鮑郎場鹽

課司記初在縣城西後移縣東北一十八里砂腰村

者曰海砂鹽場正統元年都御史朱鑑奏移凡十四團大使一人

攢典一人記曰海砂場鹽課司記二司並有副使今太有官使

擡鹽工脚有司民人內僉用有總催有頭目各團竈丁內僉公廨有

廳事有鹽倉初漢武帝遣鹽鐵丞竝海作官府鬻鹽

故漢志云海鹽有鹽官時多用賈人故鬻鹽家富者三國吳海鹽

亦設校尉司鹽唐置監嘉興遙領顧况嘉興監記曰正德利用阜財足



食國之本也天寶末天下兵起乾元初上司奏議宜以鹽鐵之職惣以社稷之臣幹平山海之利以富人賦實乎大內大臣奉法為事選人拔其賢幹昇於憲署以宜原隰光華之寵趨其署者如好鳥之棲茂林相國劉公嘗以大監小州不相若也故其職員不忝乎爵秩其刀布必倍於租入渤海高君日倫世以勳烈緩步澗視胸襟洞開中有方畧不循進級故一廷評于茲二紀傾酒定交擲金市義不餌不仁之粟前使張侍郎滂王尚書緯惣其卜式弘羊之計遂有采山煮海之役十年六監典課特優至是未暮從百萬至三百萬監人賈人各得其所故端介之節風彩自高繼夫漕運波委陸溢此天下之利器也可示人平夫以步光莫耶切玉如泥荆鍾無聲不以一割均其銛鈍君子以知人則哲無德不醉鴻飛九霄驥騁千里前秘書省著作佐郎顧况美使臣之得人貞元十七年歲在辛巳正月朔記

宋鹽官多兼職嘉定中始置額員

宋常令孫

鮑郎場題名記云鹽場初攝鎮務嘉定庚申言路上疏謂窘於兼二之冗詔典銓注額官毋與鎮稅事矣未又詔今後鎮官免以鹽場繫銜舊廡有秀野堂司場茗溪朱俯立姑蘇周應旂重修常棠作記云堂外青樹翠蔓妻神寒骨堂中設米老詭畫蔡邕焦琴苔陰上砌花影拂簾其時鹽官多用士人故風流乃爾俯亦中興勳相勝非曾孫也

元設司令司丞管勾典史各一人自

宋元以來縣有海砂鮑郎蘆瀝三場海砂場即砂腰

場宋又分為海鹽場在縣東一里元并之因名海砂

場至元三十一年并兩浙煎鹽地四十四所為三十四場鮑郎場有宋時舊廡

址在澈浦通江橋側碑記可考乃宋史地理志云海

鹽止砂腰蘆瀝二場失載鮑郎是知正史亦有紕漏也

惟元史備載三場蘆瀝場以宣德中割屬平湖不具載若稅課有局設大使初局有陰陽醫有學設訓術訓科五詳下



僧會道會有司設僧會道會惟局使以弛征裁局記

一則縣攝之

宋在城稅務安仁橋西四十五步舊彰慶館基也紹興五年監稅解榮建酒務

在縣西七十步激浦乍浦二鎮並有監鎮稅兼煙火

公事官激鎮稅解安定橋西紹定壬辰監稅羅叔韶

買地於丁家橋東建正廳川堂端平三年錢塘張思

齊繼至增造東廳東西小閣玩月亭肅賓倒屣二塾

廚庫諸室樹戒石銘榜示房左右廊廡吏舍宣詔亭

宋監稅多用甲科故其署亦非若今稅局比鎮又有

亭在海瀕收稅處紹熙間監稅葉懋建寶慶三年監

稅趙潛夫名之為弦風亭亭東鑿小秋遇嵩呼節於

此祝聖放生名放生池潛夫有弦風亭詩云怪他蟹

舍壕房地不是吟情住亦難數尺短墻圍畫寂半鈞

疎箔障春寒水生草滿蛙鳴合日薄花陰鶴夢安底

處青衫病司馬浩歌東望取琴彈風致亦可誦也元

在城敵浦當湖廣陳乍浦凡五務國初改為五稅課

局在城稅課局縣西二百步後移西關大柵橋纂節

五處歛城半邏市南新行北新行十八里堰敵浦稅

課局纂節二處通圍茶院乍浦鎮稅課局纂節無當

湖稅課局纂節一處徐家埭廣陳稅課局纂節三處

新倉塘橋顧施垵局設大使一人司吏一人攢典二

人巡欄每季十人惟廣陳攢典一人公廨有廳事并

奉旨牌坊又有乍浦河泊所所官一人攢典一人

網罟二人海洋網甲一十二人裏河網甲一十二人

船一百八十六隻內海船一十三隻裏河魚船一百七

十三以上局所今並廢陰陽學洪武十八年設就三

皇廟為署後御史凌漢奏革三皇廟末樂十六年建

學縣西二百二十步廳事三楹軒一楹今廢醫學縣

西南一百五十步洪武十七年設末樂十一年知縣

上官廉始建廳事三楹川堂二楹後樓三楹惠民藥

局在縣西惠人橋北二十五步洪武四年設立內外

科醫士二人在局正德中改建分司南僧道會司洪

武十五年一設於資聖寺一設於紫虛道院並有司

史一人典史一人以教僧而以奉巡使者署三國初

及正一道士輪年為之

按察司分司一所因改為縣治洪武二十一年知縣

即時翔復建於縣西南一百五十步其布政司分司

一所正統七年因倭犯乍浦勅浙江叅政一員提督海道知縣葉壽通於縣南一百五十步設立嘉靖



三十五年改為浙西叅將府矣府公館一所在惠人橋巷內其右又有公館一所今為三倉丞衙海塘公館在龍王廟右萬曆三年知縣饒廷錫建計本縣公署凡三所按察分司府公館並堂三楹川堂一楹後堂三楹東書房一吏書房三東西廚房各一東西廊房各三儀門南向向外門東向海塘公館堂三楹書房廚房各一堂東

**以傳郵命急遞舖九**  
在城總舖縣西向外門南向

田舖北至九里亭舖西至朱公亭舖各一十里西塘三舖朱公亭舖十里周墩舖又十里黃泥舖北接嘉興縣界馬涇舖南海塘三舖藍田舖十里常川舖又十里敵浦東門舖西南接海寧縣界談山舖北海塘二舖九里亭舖十里麥莊涇舖又十里接平湖縣界惹山舖其南北海塘浦係洪武二十一年知縣郎時翔增置每舖建郵亭一座正屋三間左右廂屋各三間繚以垣墻門道一座舊額舖司九人舖兵五十人萬曆三年裁十八人資磨工三十九年又裁九人今司兵止共存三十二人

**以示彰痺有旌善申明亭**  
永樂縣志云國朝二亭之設蓋以彰善痺惡故旌善善居左其址高申明居右其址低所以別善惡以宣其風化本縣計亭二十六所

在城一所每都各一所今止縣門左右二亭云

**以恤無告窮民有養濟院**  
養濟院舊在東門外一里洪武元年知縣王文建三

年知縣劉朝英重修嘉靖申移東門東北濠上正屋三間房六間今知縣樊維城增為二十六間每名大口隻身者月支糧三斗柴三十觔夏麻布三丈冬綿

布三丈大口隻身者月支糧五斗柴五十觔夏麻布五丈冬綿

布五丈

**以瘞遺骸有漏澤園**  
舊南北郊各一西郊田二畝五分零北郊倪光華捨田四畝一都歟城吳

繼生捨田一畝六分戴家堰吳廷佐捨田二畝五分

三都錢卿捨田一畝三分九都馮春復捨田六畝五分十六都姚潮捨田三畝並為漏澤園又秀水諸生

屠中孚善士也七邑各買田為義冢海鹽義冢七畝在北門外荷花池有記曰海鹽為秦舊縣武原鄉城

曰馬嗶村曰烏夜市曰鮑郎固足稱已至墟墓之奇秦皇駐蹕而葬美人于寶葬毋而父妾復生又袁山

松與孫恩戰歿李祥突亦收松歸葬鄉黨慕之名其地為教義里則葬固鹽人所重者柰何今之蕪骸以



從異教并吾人孝慈付之煨燼不可哀耶余家世當湖故鹽分縣猶縣人也輒捐礎瘦之餘使貧不能卜兆歟不能掩骼者得聚葬焉亦余推見同里重葬一念冀與耆舊共拓季慈澤於幽壤云爾非敢浮慕義舉也 宋紹熙二年縣令李直養以溺海之屍隨潮至砂磧間為禽犬所齧置叢冢湯山收瘞山在縣東北三十六里今析為平湖地以舊令仁政附此記曰邑東階鉅海每當濤風暴怒多有弱者之屍乘潮而上潮退暴露沙際須臾犬鳥啄齧以盡遺骸蕩折隨亦滅沒久矣余聞而哀之也昔歲六月人有以所見言於縣縣尹為之惻然目噫人孰無歿歿而不幸至於於是余職統一邑其獨忍聞此而不為之所可乎乃亟按官籍得縣治之東北三十六里曰湯山置家塋焉收瘞之浮屠氏師俊實願董斯役遂因山勢高下夷為三級廣踰五畝周以垣牆溪其壘穴俾安以固首以其事土屬部常平使者張公且請所為瘞埋之費期久之不以累縣計張公慨然從之帖縣之常平庫凡一屍給錢千置曆以稽其付受其他報發文移號集里伍等事悉據條令以行就命師俊專司之自始逮今未替年凡瘞一百四十六人矣念無以告

後來者不可屬予書而刻之石嗟夫仁人君子之心隨所寓而見顧今為邑者往往困於牒訴之紛委且瘁心於歛積以應大府之追須為急務日力常不給其屬意於斯者幾何人哉然則縣尹之賢於人遠矣奉議郎新知建康府江寧縣事陸峻記 皆職署之餘也得附志其秩祀

### 則先師祀於學

見前儒學

### 社稷祀西郊壇

元社壇在縣西南今社稷壇在

縣西門外西北一里開濟一都洪武十五年知縣張麓復加崇葺壇制四方二丈五尺高三丈四出陛各三級壇下前九丈五尺東西西南各五丈周以垣墻石主長二尺五寸方一尺埋於壇南正中去壇二尺五寸止露圓尖餘埋土中神牌二以木為之硃漆青字高二尺二寸闊四寸五分厚九分座高四寸五分闊八寸五分厚四寸五分分神廚房庫房宰牲房並三楹牲匣四案卓一十四篚二邊八豆八簋四篋四酒樽二爵七劍二香爐四鍋二盥洗盆一條牲桶四尊一杓一盃一幌巾二又有里社壇每里一百戶各立一所洪武初凡四百四十一所以祀五土五穀之神春秋祈報其祭用羊一豕一每歲一戶輪為會首祭畢



就行會飲先令一人讀誓詞曰凡我同里之人各遵守禮法毋恃力凌弱違者先共責之然後經官或貧無可贍周給其家三年不立不使與會其婚姻喪葬有乏隨力相助如不從衆及犯姦盜詐僞一切非爲之人並不許入會誓畢長幼以次就坐盡歡而退見永樂縣志中具錄以存古風

### 風雲雷雨

### 山川祀南郊壇

風雲雷雨山川城隍壇在縣南門外一里五十步甘泉鄉十五都洪武十

六年知縣趙公著復加崇葺壇制四方二丈五尺高三尺四出陛各三級壇下前九丈五尺東西西南各五丈繚以周墻如社稷壇制壇之東神廚庫房宰牲房亦並三楹牲匣六案卓十九篚三邊一十二豆一十二簋六簋六酒罇三爵一十二銅三香爐三鍋隍五滌牲桶四盥洗盆一尊一杓一盃一斝巾一

### 立廟於縣之西南

正德七年邑人饒州通判姚禎記畧曰海鹽城隍舊有祠在縣南五

十步元末燬於兵洪武三年知縣劉朝英遷於縣西南二百五十步爲風潮摧圮永樂五年知縣畢瑗重建景泰間僉憲馮公謁祠見其蕪穢不治命有司舉道士李嗣清爲道會以主之成化甲午分宜李公雲

來知縣事以舊祠淺窄前建爲廟爲兩廡廊外爲門道規制益弘於舊後三十年歲久屋敝弘治庚申廬陵王公璽宰邑值歲凶歉道士倪景暉領命修葺捐已資募義士漸治之歲丙寅始建前殿以尊神像後爲寢室以安神棲繼立三門兩廡外揭廟榜使人瞻仰起敬又開義井以濟人若景暉者亦羽流中肯構肯堂者歟人事既修靈貺斯荅歲時禋祭者其益嚴祇敬云 萬曆三十八年邑人河南副使沈季徵記畧曰城隍之靈與社稷儷官司之長朔望登拜惟謹下逮小民無不奔禱於神是瞻是依先丙申歲有挾旛幢去者再一日其人自投軒墀下以原旛結縛觀者解之始起又聖匠見夢而病加工亟完輒病已其他顯迹尤種種辛丑歲李公當泰修建後殿喬公拱壁以戊申至重建前殿與殿之前楹廊廡軒敞度越舊模起議於甫蒞竟功於考績爲

### 邑厲祀北郊壇

壇

縣治北門外一里海鹽鄉十六都洪武十六年知縣張麓重修壇前九丈五尺左右後各五丈庫房三楹廚房三楹俱在壇之南又各鄉村每里一百戶亦立厲壇一所歲三舉祭其輪流會首祭畢讀誓會飲與



前祭里社同制 **東海神楊憲使祀海上祠** 東海神祠亦名龍王廟永樂三年欽

差左通政趙居任築海鹽塘成建景泰六年僉事陳永叅政謝輔重建於東門外海上楊憲使公瑄成化

中官浙江按察副使築塘有功後陞按察司使卒民祀之東門海塘上與龍王朝並萬曆七年巡撫徐公

棻築塘功成疏請移建二廟於白洋河上地共九畝七分歲春秋及八月十八日有司致祭 三公祠祀

僉憲晉江陳公詔郡丞弋陽黃公清縣令進賢饒公廷錫並萬曆七年築塘有功在揚公祠旁 楊公報

功祠記曰捍海石塘之役余間關奔走者數年而楊公尤神應云公諱瑄字廷獻江西豐城人舉景泰進

士試御史再疏曹石之奸謫戍嶺表茂陵卽位復公官陞浙江按察司憲副巡視海道癸巳甲午風潮大

作乙未丙申繼之塘大圯公篤意籌畫定海城北捍海塘縣西走馬堤郭衢所裏外海塘健跳所海鹽海

塘皆公修築海鹽塘踰二千三百丈工最鉅捍患最法不及私俱載名臣傳中鹽民戴公德肖公像祀之

海濱萬曆乙亥之變祠宇漂沒而公神像泊二三侍

衛自移百步外踞高曠間儼如廟貌土人異之余自奉 命綜理塘務巡海上訪公政蹟率有司謁公禱

以默相比予督石桐江公白晝見夢授以修築之法出人意料塘既完余據典白之撫院疏請建廟賜額

蒙旨名報功祠有司春秋仲祭遂於白洋河內擇高爽善地負城面海創建神宇設以几筵侍以衛從環

以垣墻區區勅旨未鎮洪波與海神埒夫公直聲在朝廷勲名在史冊區區一祀胡能重公顧萬頃溟

渤一線隄防自非藉公情誠孰克鎮定遐思美報百代不磨宜矣然余復有感焉邇借少府張君增修前

績而張君內做縱橫樣塘外做荆公陂塘堅鞏可久覆之往牒鹽之有荆公陂塘自公始也其有縱橫樣

塘自蔡峯黃公始今第修二公之業兼而用之績以罕儷今公作之祀而黃未參一豆人心歌焉矧丈尺

段分次第字號迄今皆遵黃公法視公屬曠倦倦良亦無忝晉祀何疑余雅意欲請於朝凡捍災禦患法

施民勞定國一言一事苟合祀典皆乞侑食庶間用勸來者而黃公爲急乃匆匆滇南之行未果也書以識之蓋亦公所許矣萬曆八年管浙直 **名宦祀** 命李水利浙江布政司右叅議晉安陳詔記



諤魯宗道李惟幾何執中喬大臨劉銓趙汝愚李直  
養頌沫上官廉王璽嵇綱鄭茂蔡逢時王臨亨尉朱  
良訓導孫芳鄉贊祀干寶顧况常同常林趙孟堅沈  
嗣昌朱侃劉泰張寧鄭延倪頤朱祚劉瑋劉儼鄭儒  
泰吳昂錢琦鄭曉鍾梁錢薇錢木許相卿劉灼鄭履  
淳鄭履準許聞至二祠皆在學宮列文廟左右而錢  
公薇別有祠在資聖寺右竝有司典焉縣廨及儒學  
各署爲圖左方

天啓三年十一月邑侯樊公維城以先師廟祀今  
制得用樂設六佾舞而縣有未備非以奉王章示

隆重聖師意也請于上考律製器以羽流肄習之  
陰陽生佐焉明年春祭樂成侯與邑人侍御彭公宗

孟各有文紀其事詳諸生所撰福邦歛律中而藏樂

有庫則邑人胡震亨爲之記記曰令甲縣祀先師

來曰陋而不及考也人弗給於堵若佾也審音難也  
有重費弗克興也度閣弗豫戒耽瞻失虔卽興焉  
克久也樊侯曰夫陋也與費也惡乎病余哉堵吾取  
諸道流佾吾取諸祝人則給矣摩其侈弁焉副其旁  
崇馬饋且捷其肆怠者焉音奚弗審講堂歸如有楹  
若翼厥左久傾待余而飭于焉度閣于馬眠膝可久  
余器無蠶蝕余令甲是遵余必興樂矣於是蠲奉八  
十疋器樂器成復蠲百疋庫樂庫又成祀之日出而



宿縣擊拊有度間詠有節行綴有序肅雖魚雅先  
師若臨環橋聚觀莫不抃說侯廼爲文本樂均述教  
旨紀成事廸諸士而不賢者識其小則請記樂庫蓋  
君子爲政必謹蓋藏先宗廟次廡庫以府佗用物猶  
然矧庸器之守夫縣有宿也必有弛也善所弛者復  
於寂自樂義矣五音羽聚物而宇之角觸地戴芒焉  
十二律應鐘應氣該藏陽種傳黃鐘葦萌黃泉宣氣  
牙物焉皆此志也在庫言庫與言樂有二義乎無二  
也而教義亦備是聞之大樂正教弟子以樂舞以樂  
語以樂德德則中和祗庸孝友士恒心邇行在焉所  
該藏覆宇可思已夫人目察色不越墨丈尋常耳審  
聲清濁不能逾一人所勝事過其量用違其候心則  
赫炎而五官爲之震眩衆害產矣輓近士足高視遠  
言爽聽淫其思躁其習詭試之用喁然散越而無一  
當病在弗藏弗宇終日考撞未或解懸善復爾侯本  
樂均述教旨取象於車至足也諸士其必有興在多  
乎哉古之作樂者八風隅嚮有地布歷起筭有時百  
神庶尹四靈之感有物云庫樂於楹左其方陽方迎  
生氣是得地也樂始作癸亥之冬庫成甲子之春亥  
卽前所云該藏子卽黃鐘之孳生得天時也而多士

因以冶化濡澤樂正之教彬彬有成是又爲得人善  
乎侯之興樂也參三才以成樂一經觀莫大焉矣而  
余曰識小則猶二之乎言樂甚  
矣余之淺無以與乎希聲之音





公署全圖  
 余曰淵小俱醉二女平言樂甚  
 平刻文典樂也參三木以知樂一豎斷莫大焉矣而  
 因以谷外需戰樂五之萃林林有為長又為縣人善  
 矣余文對無以與平希贊之音也  
 余曰淵小俱醉二女平言樂甚  
 平刻文典樂也參三木以知樂一豎斷莫大焉矣而  
 因以谷外需戰樂五之萃林林有為長又為縣人善  
 矣余文對無以與平希贊之音也  
 余曰淵小俱醉二女平言樂甚  
 平刻文典樂也參三木以知樂一豎斷莫大焉矣而  
 因以谷外需戰樂五之萃林林有為長又為縣人善  
 矣余文對無以與平希贊之音也

# 公署全圖





縣公廨圖





教諭衙



儒學圖


敬一亭



訓導衙



先師殿



西

東

無

無

啟聖



鄉賢祠


廟門

名宦祠

橋星門




雙瑞堂




軍器房

清心堂



架閣庫

公堂



報功  
兵用

書




祠地王

儀門



鼓樓



盤殿

頭門



親民坊



橋梁 牌坊

寺觀

祠宇

古蹟 墓

海 山 諸水


譜 總論

山水總圖 永安湖圖


七之縣名勝譜

方域篇第一之三

海鹽縣圖經卷之三








邑人何其仁焉







海鹽最海爲勝海自金山乍浦度縣城至澉浦黃灣  
海昌縣界岸皆斜侵而南過赭山錢塘歷臨觀以及  
四明復斜出北東向大洋故此縣雖遠睨窮髮而實  
內屏越堦紆迴曲島風氣苞函與佗海故不同也相  
傳今浩淼迤東元有九塗十八灘三十六沙洲去彼  
岸只三十六里秦始皇帝東巡欲作一橋渡海石柱  
尚存雖繇祖龍奢想亦證汶嶼清淺後不知何年漸  
爾闢邈宋常棠云淳祐間有人於傍灘沙裏得古井  
并一大樹根驗井磚上字是東晉屯兵處則知洪波  
啗蝕積漸固匪一朝今約畧兩圻對處縣城正直餘

姚迤南乃漸與上虞相對舊志云天霽時東岸山歷  
歷可數溪夜籟寂雞犬聲亦遠聞當繇宇空故遠目  
不遮響曠亦風送易徹斯理非誣於今尤驗矣縣竝  
海北南兩頭多山惟近治城三十里海上無山爾其  
南頭澉浦山尤多莫址外堧旣得作其防塌分支內  
眦用復輸引泉滋又是一縣水所從出也今先以海  
中山言之曰白塔山以山有白塔故名唐至德初徐  
正字疑於此山沙渚上得桃核半片可貯米一升載  
北戶錄宋建炎四年海賊徐大刀登此見喬林下有  
兩道士對奕儵復隱形遂舍去山著靈異也白塔西



南曰小巫子大巫子山螺頂雙浮鬱然蒼翠又西曰石帆山山下有靈潭石立故疑席挂礁嶽遂淪沃渚乍浦海外復有黃盤山未陷滄波時是往越州間渡處人言今數年間水底沙洲復暴長又桑田欲登之論矣其緣海南頭山最高者當先從譚山說之譚山者有譚姓人自南宋族居山下故受其名或謂仙人譚峭字景升煉藥茲山居人卽其遺胤今山上有烏龍井龍神祠井比一小潭渟泓見底冬夏不竭灌田可百許畝一大嶺高削干雲故是邑中諸山發脉處矣嶺下卽永安湖環湖皆山孟姥瀑諸水分注之中

有長堤劃湖爲兩周望惟南一角山不盡遮海水正與湖平灘沙晶熒愈復益其漾瀆此湖野生白蓮紅蓼青蘋紫萼至多汎波刷羽棲茗命子之羣兼復嘯集中央有土高出正方意昔人游眺故基勝國時顧阿瑛嘗與劉孝章夏仲信同遊賦句云啄花鶯坐水楊柳雪藕人歌山鷓鴣大爲楊鐵史所稱後孫一元訪許台仲相卿詩述此酒酣台仲舉杯屬孫曰昔李

青蓮與

中渭遊漢陽湖改爲卽官湖公今到此

高士湖時在坐緇素藻客董雲朱朴陳鑑石

門秀公咸抃贊謂不辱斯湖也湖從荆山下置牖灌



田悟空寺正踞牖口水淙淙使塵耳自潔湖上山與  
譚山連者爲鹿山雖俯瞰獨庫體故圓秀東之得杜  
曲崗九杞山許台仲置雲濤莊於此傍有鶴田亦台  
仲爲孫一元供鶴糧田也又東有蓮花峯合掌石望  
牛石其山曰大山稍比伏獅山以形名復東之卽荆  
山置牖處又南曰鷄籠山曰颶山山下有石馬宋常  
氏及元楊宜慰墓在此曰葛母山山下亦有牖湖溢  
則引之入海矣而湖西南雲岫九勝雲岫亦名鷹窠  
頂其山峻插霞外磴道嶮曲策屢憇始上山腰怪石  
礙人盤轉名獅頭巖度此巖便得平地階基削成邁  
遭富擬篁楚舊有僧結菴其上名雲岫菴遙望雲表  
聞今空林而梵響時出其裏山有雪竇泉長水澗及  
觀日月竝出處山背黃沙塢呀然深谷面納雲濤洵  
湖濱奇矚矣湖從荆山牖合招寶塘水從六里堰旁  
牖流出其堰中水半是激浦城外諸山水也城外青  
山形如龜在正東長墻山形如堵墻在東南葫蘆山  
亦以形名之在南之稍西竝直據海上望見前所云  
大小巫子山矣青山傍舊有東浦今塞又有晉吳真  
君祠古老云宋時孟姓者夢見之因立祠非也真君  
名猛家武寧鹽有干慶令於其縣歿三日猛祝之生



慶翁實感其事又觀父妾殉灰復生撰搜神記因祠  
猛也寶父瑩墓舊志云縣西南四十里當亦近此矣  
長墻山有穿山洞龍眼潭山半黃道神祠昔年有兩  
大魚遊向此偏山址不能過掉尾激水一山盡濕人  
立祠上悉見之葫蘆山傍激墅村故吳越功臣右僕  
射朱行先葬處招寶牒亦在此前朝開市舶時於此  
牒進番舶穿城中市河到牒頭菴出柳橋然後引紵  
度六里堰故其水以招寶名也先是元時舶務受轄  
楊宣慰家代據金穴富甲浙右嘗於禪悅寺冶造大  
鍾建六丈樓懸之其銅倭產聲最鏗洪後鍾忽啞影  
現於海里人董穀聚大德呪之扣乃復鳴又海門寺  
有大悲閣舊是則法師道場其徒宗公復剏此層構  
憑高窻出鳥背也近大圯仄激人朱某用數槩咄嗟  
正之咸嘆般輪之巧焉宣慰故第卽今延真院是有  
樓十楹向貯歌妓俗謂之梳粧樓年久棲魅人無敢  
登正統初道士朱洞玄攀梯而上猶見故窻幕及鏡  
奩箏管諸物具爲人道之堰上鳳凰山竇家山月山  
吳家山竝相連吳家山下復有楊宣慰家墳有人發  
之見一棺鐵絙中懸黃金果實五器列前用魚籠裝  
出變爲土惟攜得一研賣郡中大姓獲高價凡瀕湖



諸山率繞城西峙澈迺瞰湖於東其西北是紫雲村  
東北礪頭門村也未至礪頭門有泊櫓山最高客舟  
到堰下望此泊櫓又有羅漢山山下有花婁井水甚  
甘冽過大路乃是礪頭門山及惹山陸墓隱馬諸山  
稍東之又大小步石塔馬鞍碧里葛山矣隱馬山下  
有文溪塢兩山夾峙如衙數十家居之竹樹中遙看  
炊煙與雲霧相雜宋志云有馬入此山隱形不見故  
名隱馬今石上多有人馬甲隊形未究厥理嘉靖三  
十一年二月此山東角忽出軍馬無數金戈閃耀邨  
人逐看竟無至八月尤盛始知相傳之說不誣紫雲  
村者唐建中時有村女出耕紫雲常覆其上後詔入  
宮備貫魚之選故山與村竝受其名也其南金牛山  
是陸華兄弟逐金牛處穴山被壓吳記又有會骸之  
目矣山北晉驃騎將軍烏程侯蘇舉葬處劉裕嘗夢  
其神贈平南大將軍建廟祀之廟中有梁大同二年  
所立碑今碎斷不存茶磨山卽許台仲隱居處山故  
培丘而高賢卜築增其秀特傍有石屋山山頂壘石  
如屋山下猶有濠塹故跡當是昔人營砦避兵處俗  
訛爲黃巢術云巢鈔掠到此巢寇浙僅至臨安石鏡  
何緣遠涉吾土點穢山經耶礪頭門諸山之水西一



支從鴉鵲墓中一支從金水堰及管山河東一支從雪水港竝合六里堰所出之水達於秦溪其紫雲諸山之水又西南受海昌縣袁花之水自斤竹橋過金粟月里夾山方達秦溪故此西南角山水且須特說斤竹橋一名石碑橋橋傍有二冢甚大可十餘畝許俗呼爲天子墓前有石碑二竝高一丈五尺詳其規制亦古王公隧道矣六里山亦有天子女兒墓犯者卽有毒蟲螫之未詳何人所葬六里山卽金粟山以山周六里故名之有寺亦名金粟寺康僧會所造江南名刹此爲最古僧會有肉身漆受供養時放光明元潘澤民有記寺先有宋藏數千軸皆硬黃複繭後人剝取爲裝贖用零落不存世所傳金粟山藏經紙是也或云唐藏矣寺久廢有蔡茂才聯壁割腹與復詳備兵使者趙公碑文中月里山形如螂蛆不甚高度此山卽秦溪矣秦溪者其源出秦駐山北流合藍田諸涇爲烏坵塘其西經豐山及通玄寺者合前諸水復由清通港與鷓鴣湖諸水合於古又通名谷水也秦駐山縣之主山體旣雄蟠拔峯尤復遠秀山脚半掛海中先所云秦皇東巡欲作橋渡海者正其處矣有五百童女避秦始皇難於此後竝得仙緣海有



秦時馳道今湖嚙爲患更築石隄直達縣東門矣豐  
山上有石室三亦秦皇屯兵處室東南九母冢亦如  
金粟山上冢不可犯也通玄寺初本吳大帝夫人建  
於吳郡唐武后移此卽法喜寺也僧良準有塔時顯  
光怪飛禽不敢棲止傍有石鐫秦溪二字樹水濱是  
宋時物鸕鷀湖其上亦有黃道神祠俗因呼爲黃道  
湖或云古賢令黃郎中名道者濬此湖亦猶史公鄭  
國之目矣諸湖惟此湖與賁湖爲大橫湖長湖及上  
谷湖差小岸曲彌望生菰葦淡秋白花雪映水色蕭  
遠人家插竹蘊水種菱芡游魚潛聚其下俗名曰魚  
叢冬月榜牒百數四扈網取之矣大凡湖水南近硤  
石北近橫山硤石本一山秦皇以其地有王氣鑿之  
今西山屬海昌東山屬鹽邑上有宋臨海太守沈景  
墓橫山是唐顧况故居劉長卿攝縣過訪處况詩家  
近雙峯正指峽石兩山與橫山近爾諸湖水西出沈  
蕩半路亭過金明寺羅漢應夢處入橫塘從郡城轉  
入當湖而東出苞溪歟城葭義里者一由伍子胥廟  
橋下出文星臺一由仙人徐孺故居東合烏坵塘水  
繞縣北流合文星臺水亦入當湖竝從松江入海矣  
水所繇通名谷水者其說出水經注及吳記諸書曰



谷水出吳小湖逕長水故縣此卽峽石山所出上谷  
湖水也曰谷水於縣出爲激浦此明六里堰斤竹激  
湖諸水亦應名谷水也曰谷水之右有馬嘯城馬嘯  
城卽今縣城此又烏坵塘文星臺城俯諸水皆得稱  
谷水之驗也以水出秦駐名秦溪亦以水合峽石谷  
中水益大名谷水矣唐時復號此水爲殷水陸廣微  
曰海鹽地曰殷水水曰福見殷盛也谷言地殷言德  
殷且福名莫嘉焉縣城自開元始基迄今餘千年無  
遷徙亦未或一中兵禍豈非徼靈水德海國所繇不  
振者乎城內外故蹟至多載前簡治城中者不重叙  
叙其未詮次者曰古伯牙鼓琴臺伯牙學琴於成連  
教令刺船居海中山見海水瀕洞林木冥杳大移其  
情琴遂入妙矣今臺亦在東門海上也曰孫吳天冊  
神碣古篆三十八字在縣廳後曰晉右將軍戴威井  
時現五色瑞光又城南半里散騎常侍何準有宅準  
女穆后生時有羣鳥夜啼之祥因名其村烏夜村宅  
與冢咸在也曰唐合李諤望城館在西郊友人處士  
張佑過之爲題詩曰宋郭樞密彰慶館邑士人登第  
始郭氏郭子三益又仕至使相有司爲立館中衢禮  
賓客以榮之曰常氏園常允邑世家多甲第園在城



西南中有滇茶一樹丹葩吐焰照耀五里外盡見之  
近來祚禪寺銀杏二株亦數百年外物天將雨輒出  
雲雨霽雲復歸氣吐欲與山澤同候也曰陳山龍神  
行祠龍有穴在乍浦行祠却在今南門勝園尹顧涑  
禱雨見一大龍將子來戲祠中又有接梁殿云是魯  
般所造矣曰鎮海浮圖亦西郊外其高二百四十尺  
孤秀異於他刹海外望如拔地而起琦公初造時感  
雨花之瑞有影從窻隙掛僧寮壁上是倒影也曰琦  
公傳法衣鉢衣是大幅白氎領微作襞積高麗國王  
所獻鉢紋似桡榔口徑九寸四分旁着當如股各以夷  
銅環綴作貫珠狀其杪復以銅冒之餘地黃金鑲香  
草四通髹之漆至今傳寶矣佗名勝可記者尤多髡  
穎未盡故須疏列後方惟所云海爲最勝者應畢其  
說譜之用抒宏覽海去東門外僅半里其近治城三  
十里無山處平沙允易衝嚙故時海月魯浦諸亭館  
盡蕩入波中勢稍灣環薄城門下矣然政以危嚙極  
浩蕩之觀言其壯狀搖軸故是影談寫其奇響奔霆  
更屬鈍語政當典矚蓋與之表領趣混濛之初庶得  
副其神對論此茫茫者爾大抵此縣潮頭奇猛絕異  
佗處候迺稍不殊爾日朔望子午再至餘日遞退半



月復月三日十八日至再王餘日遞縮亦半月復若  
夫天雲忽垂一海盡黑若有漚泡在釜沸泣土人以  
爲海啞啞萬喙聲言海發洪囂如萬喙齊喧也啞發  
時多在晚夜時恒有海鷗千百羣鳴助其愀惕便若  
崩濤已從空半瀉來元監州至欲登屋脊避無怪爾  
南啞句風多北啞句雨多土謠云其暴溢謂之海嘯  
蹙口出聲曰嘯蹙海水出之使溢亦應曰嘯也又雨  
後初霽海色氤氳如炊有海市爲樓臺人物車馬狀  
俗呼曰海現矣夜亦常有火光飛出海數丈許分爲  
碎小火忽又合併作一此則玄虛賦中陰火潛燃者  
是也又近年正月中忽見海中有火如燈者二後有  
衆燈百十隨行人盡立高處望之以爲此海舶所懸  
燈竟無有迺知是鯨魚將子出遊爾裴氏記云鯨魚  
目卽明月珠故其光如此今人家饌海物削棄鱗殼  
在地夜星星作白光斯可推矣海上無山處盡石堤  
本取捍潮以製作宏整更便振屨踏歌行遊樂事尤  
衆凡海色晝如空夜如合春如進冬如歸夏秋如驕  
日海平雪海深雨海悲風海怒月海樂致不一也彼  
九湘故水蠡澤洵鉅誰如此一杯在我家短堞下者  
吐納獨宏也邪海自龍王廟邸南頭澈浦多山處里



四十邱北頭乍浦多山處里亦同之乍浦山有雅山  
湯山觀山高公山益山獨山而苦竹山以海妃祠禱  
賽最盛陳山以前所云龍君尤顯靈異故邑山則漢  
晉間海鹽舊城在焉今人掘發廢基猶時得橋柱井  
碓諸物慨然引人長思然自析縣後諸山踞海上自  
作屏當湖傲然爲秦駐外臣矣譜之不盡譜以毋侵  
鄰邑掌故

總論形勝

吳郡記 海濱廣斥鹽田相望

宋武原志 本邑之地大海環其東南諸山踞乎左

右西引蒼霄北控吳淞河水百折縈迴甫田一望如  
掌觀其形勢亦可爲東南之勝狀也

徐泰志 邑諸山自杭州天目歷海昌分支而來勢

皆東趨海秦駐縣主山獨秀聳長墻石帆紫雲金粟  
又參差環列每登高南望翠屏青戟奇峭千狀而俯  
瞰雲濤浩然東際一碧萬里亦吾鄉大形勝也

仇俊卿志 大江迤南海鹽乃吳之陞越之晉地脉

結局入海之處故地形高厚觀境內秦溪麻涇長湖  
諸水皆從北流由松江入海則海鹽高於諸麗邑其

辨甚明



元姚桐壽樂郊私語 括蒼劉伯溫善形家言昔嘗  
於海鹽橫山把臂信宿謂余曰中國地脉俱從崑崙  
來北龍中龍人皆知之惟南龍一支從峨嵋竝江而  
東竟不知其結局處頃從通州泛海至此乃知海鹽  
諸山是南龍盡處余問何以知之劉曰天目雖爲浙  
右鎮山然勢猶未止蜿蜒而來右束黔浙左帶蒼雪  
直至此州長墻秦駐之間而止於是以平松諸山爲  
龍左抱以長江淮泗之水以慶紹諸山爲虎右繞以  
浙江曹娥之水諸水率皆朝拱於此州而後乘潮東  
出前復以朝鮮日本爲案此南龍一最大地也余問  
此何人足以當之曰非周孔其人不可然而無有乎  
爾吾恐山川亦不忍自爲寂寂若此也

### 總論山

太守柳公琰府志 海鹽沿海皆山其勢自天目發  
縱歷杭諸山至臨平達海寧金牛界首分脉至鹽一  
支遵海東北行五里者鹿山曰颺山曰廟山曰荆山  
皆臨永安湖又東北行六里曰鳳凰山又一里曰吳  
家山又一里曰茶磨山又一里曰邵灣山其東南一  
里曰葫蘆山東北一里曰青山在澉浦鎮一支北行  
十五里曰夾山北連金粟山東南行一里接紫雲山



東北行五里曰大橫山其北曰小橫山一支西北行二十五里逾長湖曰沈山一支東行十三里曰豐山又七里曰土山一自青山東行十六里曰小步山曰大步山又二里曰泊櫓山曰長墻山南行二里曰秦駐山十八里達海鹽縣其東南二十里曰白塔山又三里曰望虞山俱在海中又自海東北行三十里曰雅山曰故邑山在乍浦鎮亦古縣治又二里曰湯山又一里曰苦竹山又一里曰觀山又二里曰高公山又一里曰蒲山又東行一里曰菜薺山在海邊東北行一里曰益山又東行六里曰陳山東北接獨山皆沿海又遵海陸二十里逾石亭浦又二十里逾蘆瀝浦又東行三里許接松江界又十五里始達金山北接柘湖山卽海鹽舊治主山也

### 總論水

柳志 海鹽塘之水自海鹽澉浦諸山發源東北流至郡城瀦爲彪湖

徐秦志 吾邑諸水自杭州天目諸山歷海寧硤川分流而來爲溪爲湖統會於官塘官塘自歟城而北歷常豐閘至鼉城自鼉城而北附太湖入海其東則過雙溪橋五十里爲平湖橫塘東入當湖自歟城而



東分流入尚胥橋五十里北達橫塘其東流至西關而北者為淘涇塘五十里竝北注於當湖自當湖而東北則附吳淞江入海此境內水之大勢也

又永樂舊志曰

本邑水正流有二曰招寶塘曰漢塘招寶塘之水自杭州天目諸山發源歷海寧之硤川東流至本縣界支分為三一入上谷湖而達於清通港一入長湖而北流於官塘一入鷓鴣湖出軟城匯於官塘東流五里許又分為二一入尚胥橋北流五十里入於漢塘一入遠邑城而北入陶涇塘五十里注於當湖漢塘之水西自郡城東雙溪橋而來東注五十里會於當湖而達於東泖又東北五十里入吳松江東會於海此源流之大槩也按此乃未析平湖時全縣水脉今漢塘水一支已屬平湖矣徐志平湖橫塘即漢塘也非常豐閘之橫塘

### 海縣東半里南四十里

永樂志云海在縣城東一里今僅半里嘉禾志考證云與

明越二州相對往往深夜籟寂時越土鷄犬之聲相聞海瀕舊有崗十八條為潮汐之限漂蕩日久今皆為魚龍之宮無復存矣 又云縣東二里有橫浦澗一十二丈東北通故邑西通賁湖縣東南五十里有貯水陂今並淪于海 寧海鎮唐天寶十年太守趙居真置在縣東淳化二年移置近縣一里元時陷入于海 海月亭在縣東北一里宋令李直養大父正民題詩有光生銀漢疑無地望斷蓬萊別有天之句今其亭亦淪於海矣 宋武原志云父老相傳去縣十五里有望海鎮歲久淪于海紹興初知縣陳深于海上五里建望月亭今僅三十年亭基宛在水中每歲海岸洗蕩數尺縣治去海無三百步 董毅澗水志曰鎮之東南西皆匯於海南望則隔上虞之山西激則成錢塘之潮濤聲晝夜吞吐實賴青山葛毋葫蘆長牆諸山石根林立無善崩之患 宋魯應龍括異志曰縣治去海甚近而獨山一帶歲鹹潮透入可以晒鹵耕種者苦之前政史宰亞卿親督畚鍤移入數百步別築一塘古瓦盎及鐵劍役夫得之以為奇舉手皆粉粹秦始皇時有望氣者言東南有天子氣故東遊海上所至埋金寶以厭勝之今故邑近海居



民多掘得古物。按諸家言潮或云海鯀出入或云神龍變化或云天河激湧或云地機翕張槩無定論惟徐明叔傳墨卿高麗錄備極其理較諸家為長今抄錄其說附以此中四時不同潮候用資該覽錄曰天包水水承地而一元之氣升降於太空之中地乘水力以自奠且與元氣升降互為抑揚而入不之覺亦猶坐于船中者不知船之自運也方其氣升而地浮則海水溢上而為潮及其氣降而地沉則海水縮下而為汐計日十二辰由子至巳其氣為陽而陽之氣又自有升降以運乎晝由午至亥其氣為陰而陰之氣又自有升降以運乎夜一晝夜合陰陽之氣凡再升再降故一日之間潮汐皆再焉然晝夜之晷繫乎日升降之數應乎月日臨于子則陽氣始升月臨于午則陰氣始升故夜潮之期月皆臨于晝潮之期月皆臨于夜又日行進月行速應遲二十九度半而月行及之日月之會謂之合朔故月朔之夜潮日亦臨于月朔之晝潮日亦臨于午焉且晝即天而言之天體西轉日月東行自朔而往月速漸東至午漸遲東而潮亦應之以遲于晝故晝潮自朔後迭差而入于夜此所以一日午時二日午末三日未時四日未

未五日申時六日申末七日酉時八日酉末也夜即海下而言之天體東轉日月西行自朔而往月速漸西至子漸遲西而潮亦應之以遲于夜故夜潮自朔後迭差而入于晝此所以一日子時二日子末三日丑時四日丑末五日寅時六日寅末七日卯時八日卯末也且以時有交變氣有盛衰而潮之所至亦因之為大小當卯酉之月則陰陽之交也氣以交而盛出故潮之大也異于餘月當朔望之後則天地之變也氣以變而盛出故潮之大也異于餘日四時潮候春初一日十六日午末夜子正大初二日十七日未初夜子末大初三日十八日未正夜丑初大初四日十九日未末夜丑末大初五日二十日申正夜寅初下岸初六日二十一日寅末晚申末漸小初七日二十二日卯初晚酉初漸小初八日二十三卯末晚酉正漸小初九日二十四辰初晚酉末小初十日二十五日辰末晚戌正交澤十一日二十六日巳初夜戌末起水十二日二十七巳正夜亥初漸大十三日二十八日巳末夜亥正漸大十四日二十九日午初夜亥末漸大十五日三十日午正夜子初極大秋同夏初一日十六日午末夜子正大初二日十



七日未初夜子未大初三日十八日未正夜丑初大  
初四日十九日未末夜丑正大初五日二十日申初  
夜丑末下岸初六日二十一日寅初晚申正小初七  
日二十二日寅末晚申末小初八日二十三  
日卯初晚酉正小初十日  
晚酉初小初九日二十四日卯末晚酉正小初十日  
二十五日辰初晚酉末交澤十一日二十六日辰末  
夜戌初起水十二日二十七日巳初夜戌末漸大十  
三日二十八日巳末夜亥初漸大十四日二十四日  
午初夜亥末漸大十五日三十日午末夜子初大冬  
初一日十六日午末夜子初大初二日十七日未正  
夜子末大初三日十八日未末夜丑初大初四日十  
九日申初夜丑末大初五日二十日申正夜寅初下  
崦初六日二十一日寅末晚申末漸小初七日二十  
二日卯初晚酉初小初八日二十三  
日卯末晚酉正小初九日二十四日辰初晚酉末小初十日二十五  
日辰末夜戌初交澤十一日二十六日巳初夜戌末  
起水十二日二十七  
日巳正夜戌末漸大十三日二十九日午初夜  
十八日巳末夜亥初漸大十四日二十九日午初夜  
亥正漸大十五日三十日午正夜亥末漸大 仇俊  
卿賦口度望虞入海門兮閃一線而拖練白夾秦麓

塔滙而更進兮呀萬馬縱鬣而奔躡驚濤暴瀟乍關  
儵解側瀉橫馱直搗斜駭或衝湍之急驟兮噴石猷  
於吐納或縮浪之震撼兮拍危堤以歛擺疊雪翻翻  
橫壓地軸雷旋轂轉微波生穀悵鯤鯢不塞今津方  
諸之粼粼鷗鷺翀起兮顧瞻影之無垠 王文祿海  
上觀日出賦曰方虞淵之委照兮征回光于崑崙夜  
沈沈而寥聞兮若鴻濛其未分翳重陰之久晦兮肆  
太陽之通轉宵翰音之三號兮又譙壺之五點漬臙  
脂以浹梁兮紛赤縷之飛騰浩洗朗之巨冶今漾溶  
液之金精拂扶桑以奕燁兮湧火輪之將升感錦濤  
以冲激兮浴萍實乎青冥駿鳥翻其高翔今燭龍躍  
以噴雪彩霞絢而霏微兮紫電惘以列缺捲虹霓之  
哆侈兮森珊瑚之晶晶蒸浮浮之赭赫今爛昭昭其  
大明 王世貞海鹽石堤觀日出詩曰者萬物毋海  
為百谷王兩雄未蕩摩衆有皆摧藏天鷄警霄發波  
臣導余望窮絃露黝紫極際見青蒼回首顧中原破  
曉猶茫茫倏忽金輪升流光浴扶桑一髮界瀛溟萬  
巖競縱橫湛湛天酒晞燁燁雲旗張波將駭駿上焱  
與躡龍翔無復虞濛汜陽德熾方昌 黃國樊志張  
觀海篇曰大地川源來井絡勢逆銀潢下寥廓江河



東注海西迴取途吳越歸颺駱高下幾窮章亥步圖  
經莫攷玄圭鑿乘桴溟津孰從游萬回信宿曾行脚  
易性迷方總未知癡龍每遇張華博鹽池應在海東  
南漢廣江溪先向若阿戎父事真各世賦陋玄虛兼  
述作緩也呻吟亦復來欲沾重潤觀磅礪鵠飛皂蓋  
馬魚游海塘弦月爭鄞郭鞭石爲梁霸氣餘犀弩三  
千誰見曠陽戾不敢夾舟行子胥豈馬吞冤惡攝影  
交光吹帝網千門萬戶開珠箔銀闕參差頽不流銖  
衣拂石邊巡却鶴書欲度海天遲龍蛇競走聞瀨澗  
縱令乳海涌多羅大化密移無冶躍徒聞潮盛在秋  
分夜半捲天風雷薄更傳斗指姬訾晦平明日月同  
浮汨如此奇觀不可留蠡測水疑堪一噓炎荒莫是  
海西頭廿年投瘴才如昨父子相持泣楚囚楚客附  
載方談矍鯨翅障天鰲背滑倉皇直到星河落上峽  
迎兒又幾時灑瀟當關秋雨虐天際孤舟木不通抱  
書病骨猶咨度千里江陵被冢還丹成遽反遼城鶴  
鹽官小吏亦承志訟親北闕還章爵歷險瀕危匪一  
途師友功多扶履錯繫足無貽井甃羞勉旃小子勤  
丹腹海不揚波明辟新世清欲究餘年樂坐中達者  
發溪論海東萬鷲猶巢幕天刑在魯縱鯨鯢岷源幾

許潮陽鱷失水泥沙計日殲乘風破浪能無愕蹈海  
生應媿魯連過河歎欲呼宗澤掩耳風濤不可聞胡  
越同舟爭一壑越西最爾彈丸區萬井遺黎亦煩厝  
樂不可極繼以哀石塘月沒潮還涸驚魂雖定竟無  
寐前席屢移良自託浮遼隱蜀兩茫然一舸鴟夷原  
宛索海濱漁父定誰知儼月容尋題許借 郡太守  
徐公霖觀海詩魚蝦亦在生成內天地真如混沌中  
邑侯樊公維城旭日觀潮詩曰陽侯出遊旗沛艾  
素車白馬來天外羲和朝行浴兩駮金繩界道光如  
繪車輪驟雨倒山來樓閣重雲匝日會砰雷轉石躡  
赤蛇驚起眠龍走狼狽江洋萬頃莫可量倏忽似神  
千里汰魚蝦奔迸不能隨鮮食艱民資口膾餘波飛  
雪入平原都君吾子咸蒙賴坐見堪輿青復明何如  
宇宙屯還泰須臾赫日正中天遙看蜃氣浮山帶  
鄭曉秋日海上詩孤城海上若星基聞說三遷事更  
悲百谷東南空地力九秋潮洑自天時黃灣水落魚  
蝦亂白塔煙深草木遲馨鼓年來猶未息何人肉食  
抱長思獨立滄溟嘆禹功長隄隱見亂濤中鹽田何  
處蘆花雨茅屋誰家燕子風漂泊苔痕連水碧參差  
楓葉帶霜紅珊瑚樹底垂綸者豈盡天涯白髮翁



胡顏海上晚歸詩魚蝦入市水風腥海氣蒼黃雨脚  
晴天昏聽鳥音多怪野曠逢人面轉生毒霧濕衣蛇  
草暗育風吹浪蜃樓平黃蘆影  
裏南洲路遠屋欣看村火明

### 秦駐山縣南一十八里海上高一百六十丈周二十

里 輿地志云秦始皇東遊登此山因名 晉樂資九  
州志曰縣有秦逕山秦始皇逕此美人苑葬于山

上山下有美人廟是此山亦名秦逕也 魏酈道元  
水經注曰海鹽縣南有秦望山秦始皇所登以望東  
海故山得其名焉據此則山又名秦望海上山如雲  
間臨安俱有秦望之名不獨會稽及此縣有之 吳

地記曰秦駐山有五百童女避秦始皇難於此後並  
得仙 記又云山上有秦始皇廟事詳後 宋漱水  
志曰秦皇石橋柱在秦駐山背舊傳沿海有三十六  
條沙岬九塗十八灘至黃盤山上岬去紹興三十六

里風清月白叫賣聲相聞始皇欲作橋渡海後海變  
洗蕩沙岬僅存其一黃盤山邈在海中橋柱猶存淳  
祐十年猶有於旁灘潮裏得古井及石橋樹根之類  
驗井磚上字則知東晉時屯兵處 董穀曰石柱舊

有十二今尚存一没于沙中千八百年遺跡也山巔  
有石砦今廢相傳昔人藏兵仗其下有發之音輒錚  
錚作聲 仇俊卿志曰山下長堤沿海相傳為始皇  
馳道 宋漱水志又云山下有聚落俗名為秦駐塢

四明屠隆同蔡明府登秦駐山望海歌高秋立馬  
登秦駐海風蕭蕭吹海樹極目遙天不可窮赤縣神  
州在何處萬馬長驅巨浪來于鳧力挾浮雲去盤陀

石上坐微茫令我魂氣四飛揚閃閃金波騰若木高  
高赤日挂扶桑諸峰遠近青螺蠹大者如拳小如粟  
雷電碎鉤戲白龍風雲慘淡愁黃鵠方丈蓬萊近可  
降煙濤彷彿見雲璵瑤草琪花相蔭翳班麟文豹何

紛麗紅顏玉女褰珠箔綠髮金童擁繡幢仰天把酒  
三歎息安得此身生羽翼謁罷東皇大帝君石邊寶  
瑟花間奕龍旂翠蓋照潺湲聞道秦皇駐此山苦無  
靈氣通仙籍空有雄心出大寰三山福地尋難見干

古沙丘去不還海神之鞭亦杳滅龍鬣之梁猶嶺巢  
月色溟濛龍女珠露華凄冷湘妃襪山上荒祠被冕  
旒老僧香火幾春秋古今英爽真潮汐酒罷歌殘海  
水流 邑侯樊公維城過秦駐山詩秦駐峯頭問祖  
龍神山縹緲若為從穿崖酷似桃源宅到海誰為空



谷是暑過漸無蟬噪柳秋成欲獻鳥啣種暮翁散後  
留岩屋似覺梯仙有附庸黃岩方行登秦駐山詩  
此地曾經駐蹕來秦皇遺跡尚崔嵬採窮滄海無靈  
藥歸到驪山有劫灰萬里黑風迷鬼國一盃弱水隔  
蓬萊詩人吊古多遐思落日高丘首重回宜與俞  
安期秦駐觀海詩地盡危峰遠望開驚波直見海門  
迴翠華駐輦空秦蹕彩筆觀濤有漢才紛動楚音雷  
下震長驅山勢雪東來探竒不盡登臨興無奈狂心  
托酒杯湯外遙看接漢津浮槎真可犯星辰天窮  
島客西開戶水濶鮫人下結隣異鳥避風曾祀魯神  
鞭驅石想經秦桑田那接蓬萊上翠輦東南總浪巡  
彭紹賢詩水淺蓬萊歲幾更凡夫那解馭風行空  
教海外留徐福一片荒山浪得名翠蓋金支想像  
間昔時流水尚潺湲美人尚念今祠廟死作山花不  
肯還彭宗孟詩虛傳鞭石障滄溟猶自東南望不  
肩大壑樓臺春漠漠空山風雨晝冥冥三千只擁徐  
生去七十誰將御輦停莫道求  
仙終泯滅至今猶得記精靈

### 嚴家山

### 潘家山

### 荷池山

### 羊頭山

激水志云四山皆秦駐山支脉

### 白塔山縣東南二十里海中

徐泰志云在秦駐東北嘉禾志云山上有白塔

因名舊有港通魯浦名曰白塔潭海舟多泊焉浦塞舟皆歸激浦北戶錄云唐至德初徐正字疑於海鹽縣白塔山沙渚之上得一桃核片可貯米一升則知草木在山海間有瑰形殊狀者多矣永樂志云宋建炎四年春賊將徐大刀艤舟山下見林木茂盛有兩道人奕碁登岬就之不見遂不擾海邑而去

### 望虞山縣東南二十二里高九十丈周一十二里海

中徐泰志云在秦駐之南嘉禾志載舊圖經云以隔海望會稽上虞縣因名

### 土山縣南一十一里高十丈周一里



大步山縣南二十里高五十九丈周三里

激水志曰在秦駐山

西石馬山東北上有下山神廟蓋潮神也

小步山縣南二十里高五十九丈周二里半

激水志云與大

步山相連溪流一道間之其旁有音樂墩每陰雨夜靜時聞其中有音樂聲故名不測其何理也

青山縣西南三十五里激浦鎮東三里高五十丈周

四里

宋志云激浦鎮之主山也董穀曰其山磅礴蒼翠隱若龜形亦名為龜山山上置粉埃瞭海

望若白雲之巖巖

長牆山縣南三十五里激浦鎮東三里海上高八十

丈周一十九里其南有黃道山

嘉禾志載舊圖經云秦始皇東遊望海以

山形橫截海濤若堵牆然因名激水志云長牆山濱海其外有穿山洞有神曰陳都監黃道山與長牆

山相連下有龍眼潭舊名白龍窟乃宋時番舶所聚

國初沙漲潭塞嘉靖癸丑潭復開今出汛舟師泊焉

有黃道神祠見後宋志云長牆山後叢棘中有白龍毋冢每歲秋間白龍來視毋冢必風雨大作

云山下石帆村有古田畝名王家畝今廢為海尚存

數家生聚於浪花飛舞間宋時黃道山有水軍寨

造船塲山巔立烽燧統制官總領之山半有池曰良

澤記畧曰激浦之陽黃道山之麓曠而平繞而曲朝

汐所不及維天降澤掘地以積一勺之多可飲可汲

負山而居航海而來咸所仰給淳祐十一年夏秋不

雨均堂之上涔蹄之微潢潦無根溝澮其涸居者行

者罔不病渴路鈴邢子政迺約同時仕於此者監鎮趙汝洄船門朱南杰鹽塲俞損酒官李得基木官戴安節司警張思湛登山度地鑿池濶四丈深二丈有奇盡挈提之道以達者三十丈架屋四楹司啓閉處守護者委統領袁發主之經畫於秋半落成於秋杪其容廣其蓄深其惠博路鈴之功將與此山無窮矣不著撰人姓名董穀遊龍眼潭記龍眼潭在激之南二里許長牆山下黃道祠之前余為激人三十有四年矣嘗觀於錢塘又自潤州抵建業北涉彭城之



險旋滴逆湍蛟鼉所宮咸親試之獨茲潭在郭門外  
曾未一投是焉異哉余也乙酉二月望日同前峯少  
林二禪于登湖之颺山指點茲潭相去數里歸而語  
諸學徒期以暇明從事遂偕王生楊生周生拉李光  
德爲引導及僧秋林以往春風狂發午潮粘天雷奔  
鯨走來如崩山去欲縮地石崖林立洪濤吐吞雖魚  
貫却立俯視數丈而浪花仰激灑然着面大巫山去  
潭可百五十步址若積鐵亂流環射如沸湯然草色  
纖碧雜樹婆娑對視可枝數葉韜而不能飛渡也悵  
望久之聞前癸未六月有兩巨魚東西來適會於此  
僅容過之掉尾激水至於山椒業海者皆見偶憶之  
諗諸光德曰信小巫山在大巫之外相距尋丈其廣  
視大巫四之一頽然居乎泮泮之間正西一山去此  
如三十里者茫茫煙雲水氣中不見其麓的然純黑  
上平下均如帽屋者上虞縣下蓋山也白塔之左爲  
秦駐峯大巫之右爲葫蘆灣綿亘圍繞隱若金城而  
激之形勝盡矣嘗攷攷舊誌有仙人洞在長壻山之  
後是日由潭左遵海而東蹒跚捫歷至縹岡少憩而  
天吳簸盪海氣渺焉際空光德進曰洞尚遠風惡屋  
危往往沙魚變化成虎叵測請俟他日遂越嶺而還

### 大巫子山

### 小巫子山並在黃道山外海中

澈志云水甚湍險不可渡大巫子山在龍

眼潭百五十步外小巫子山又在太巫山外詳見董  
穀游龍眼潭記中一統志云秦駐山之東海口有巫  
子山此又是秦駐支山絕  
入海中者非此巫子山也

### 篠山澈浦鎮東南六里

續澈浦志云在南門外濱海

### 石帆山縣西南三十餘里澈浦城南三里海中

澈水志石

帆在長牆山外水中有立石如帆潮汐往來不爲增  
減山下有靈潭白龍母所居 宋志云石帆在靈潭  
右時有神現其上月霽則吐蚌珠陰  
晦則曜神火舟觸必碎人莫能涉

### 葫蘆山縣西南三十五里澈浦鎮西南四里高六十

### 丈周五里

宋澈水志元嘉末志並云四望絕在海中  
如葫蘆出沒狀不知何年沙漲山半却在



地

荆山縣西南四十五里激浦鎮西南五里高四十丈

周三里 激水志在永安湖開北占湖山之勝下有悟空寺 宋志云寺有靈官廟甚靈嘉靖初僧

法聚築精舍此山名玉芝菴聚有詩云無住生心未了空移家又入水雲中晴峰遠落晚湖碧寒寺半藏

秋樹紅董雲題湖海山居詩云鶴立衝湖石僧看掛壁泉即此菴也山上有宋常氏墳元楊宣慰墳

颺山縣西南四十五里激浦鎮西南五里高七十丈

周六里 激水志云在永安湖開南山上宋常氏墳華表墓道見存蔡神有颺坡石馬詩異代豪

故物埋荆棘風雨時聞半夜嘶

葛毋山激浦鎮南五里 激水志云山在永安湖東南下有渾水開洩湖水入海

伏獅山 激水志永安湖東北

鷄籠山激浦鎮西南六里 激水志云在永安湖東際地名徐灣俗傳有金鷄時

見故名一統志云以形似名

大山 激水志云在湖上左有蓮花峯右有合掌石頂際有望牛石山前地名唐家灣

九杞山 激水志云在永安湖子丑之位舊名杜家灣九杞翁許相卿買之置杜曲岡雲濤莊因以

名其山 許氏家傳曰孫太白山人寓南屏山蓄一鶴九杞先生入田數畝額粟若干石每歲輸南屏以

供鶴糧謂之鶴田券曰關中孫太白山人與許九杞善山人寓南屏山一鶴自隨九杞為買鶴田歲輸糧

於萬峰深處而納券曰太白山人鶴田在九杞山書院之陽倚山面湖左林右涂廣從若干步歲入粟若干石有奇以其奇為道里費而歸其成數於西湖南

屏山歎歲汰其半以九杞潤筆金取盈焉佃之者主人之鄰某輸之者主人之僕某董之者主人之弟某主人謂誰山人之友杞泉子許台仲甫也

鹿山縣西南四十五里高六十丈周四里 激水志云在中湖塘



西與譚山相連一  
統志云以形似名

### 鷹窠頂山縣南三十里

一統志曰石帆之東有鷹窠頂山沈友儒雲岫菴記曰南

陽山雄峙海堦下瞰南湖雲聚卽雨有菴各雲岫知此山俗各南陽今又名雲岫也雲岫菴志曰山下有長水澗由山麓至菴有九曲逕初憩亭三休亭獅頭巖合掌巖菴前有泉深丈許旱澇不加盈涸味甘列名雲竇泉山頂可觀日月並出山背黃沙塢有開元菴武塘孝廉沈煥墓澗水志曰仰天塢在鷹窠山下宋志曰望夫石在永安湖仰天塢之右山巔有石盤其傍有石立如人形相傳有海南失期不返其妻登石盤泣望因化爲石云郡太守車大任記曰山前臨澗湖後枕大海形旣壁立路更紆迴凡九折而上饒怪石及產竒茗其上菴曰雲岫菴松寮竹徑迥在雲表入其門律儀整肅非尋常衲子比許聞造序曰鷹窠山鳥道千尋懸崖十仞襟帶湖海吞吐日月而且絕頂峯巒靈源潛通萋草蒙茸僊芽軋茁可謂山川儷秀泉石兼資者矣姚開臣遊雲岫山記曰余嘗偕劉少葵方耆定陟雲岫山巔隔海

望見水光一片帶以長堤雲樹隱映問之僧人云是上虞夏蓋湖其旁綠影一線注海則曹娥江也度海面相去百里而近陳梁雲岫觀合朔記畧曰月與日隔金水二天日大二百倍許也人目蔽於近謂日月等方升自殊日光恒掩月匪先匪後兩不相掩惟十月一日之辰國語會于龍甍是也是日之前一日會雲岫快飲漏四下小憇促起擲沐則星爲霧掩寒氣逼人行溼草中達頂霧益昏重俄而見一二星又見霧如彈絮如車輪足下起頃之金光赤焰如線橫經于天自喜日升乃十百金線忽合而蜃城市萬家宮闕千門層層閣道復茂林崇山村居屋角聽櫛擘清楚傍有青色雲狀如龍鱗爪儼然口吐朱雲數丈須臾海底推出一輪色若丹砂心目晃晃稍見紅敷謂常日耳竊究合升必併見月今天氣如許佳月在何處方競猜擬而殘蜃忽送月印日心二輪合體雪裏丹邊相摩盪還轉不止海天俱動不可思議目中或作黑日千百或作黃日千百或作白日千百恒恐身爲所攝與山俱墮抱石凝眸噴噴又二刻許日光稍稍侵月漸不可逼視矣前令譚公秀詩澄波渺渺兩湖平春色蒼蒼四望明馬首山花向人笑林端僧



梵羅溪聲

樊侯維城詩秀嶺周遭疊翠屏臨崖喬

木幾千齡癡龍午避翻盆雨怪易朝為破柱靈僧止

林中曾九白鳥飛海外憶三青滄洲小吏羈心亂又

逐行春出野坳野王遺宅遠峰間翠岫紅花水一

灣石廩道書封蘇壁金丹神髓毓芝山龍湫夜掛幽

崖白鯨浪朝翻旭日殿此地好教栖阮老太平無計

木示青綸虞勳詩凌空怪石根半露巢鶴老樹枝相

纏層巒醉踏苔雲滑洞門長嘯蘿月圓許雲村雪

中斗笠長策乘黃犢登鷹窠絕頂釋戒囊為詩云牛

背披蓑上許孟山平高鷹揚發天風不損孤鳳毛

錢齋詩孤峰倚天碧側徑入蒼煙瓊屐還今日題詩

自昔年登雲生古木溜響落寒泉極目滄溟外蓬瀛

一點煙錢應晉詩秋林蕭爽碧山叢不道鷹巢有

路通側傍危崖當鳥道平臨孤嶼俯蛟官鍾聲杳靄

踈煙外海色蒼茫落照中相對一尊堪永夕竟忘沉

醉月朦朧彭宗孟登雲岫絕頂望海詩高高積翠

履痕孤一氣蒼茫迥自扶山勢西來全控越地形東

坵舊分吳白雲長護真人井曉日遙懸帝女珠安得

乘風吹萬里與君破浪遞相驅百盤歷盡絕芳埃

何處微茫曙色開駕浪蛟龍騎自在行空日月湧如

來虛傳大核無仙種欲證迷津有劫灰東望不須論

極際白雲天矯是天臺劉世教詩絕巘孤懸俯落

霞芙蓉倒影化城斜中霄忽湧扶桑馭大地都含若

木率法界三塗迷寶筏寒潮八月有浮查隱隱翠華

東幸處蕭條王氣委泥沙彭宗礪詩丹梯杳崑白

雲籠極目扶桑海氣紅大壑潮音雷鼓震諸天幻影

蜃樓空雪山勢挾神鰲去風御長驅萬馬同何必褰

裳凌宇宙新詩帝座可能通沈明臣詩海氣上僧

衣許敦稱詩幽襟冷逼晚峰瘦詩

思健射寒潮低並此山名句也

譚山縣西南四十二里澈浦鎮西十里

澈水志云山在永安湖西

紫雲山之南有高嶺過此入海寧縣界乃南唐仙人譚峭得道處

金牛山縣西南五十里高一百三十六丈周四十里

澈水志云山在永安湖西北上有金牛洞嘉禾志載吳地志云昔有牛糞金郵民臯伯通與弟隨之牛穴山而入二人鑿山崩兄弟俱死穴中故名金牛洞其山一名會骸山出寰宇記又唐陸廣微吳地記



云海鹽縣西五十里會骸山是陸華兄弟尋金牛之處不言阜伯通兄弟其說不同洞溪不可測當建炎初黃灣居民多避虜于此 海鹽舊圖經云山有蘇驃騎廟神名舉字子羽晉驃騎將軍烏城侯葬金牛山北劉宋高祖嘗夢其神贈平南大將軍舊有碑梁大同二年立今廢所葬墓亦無考 雲隱談異云洪武間會骸山中有老魅攝村中仇氏幼女夜珠去夜珠念觀音大士得救出事或未足信

邵灣山縣西南三十六里激浦鎮西八里高七十丈

周八里 激水志云有嶺亦名邵灣嶺在黃巢嶺之南

大旗山激浦鎮西八里 激水志曰山在邵灣村相傳劉裕勝孫恩于此

紫雲山縣西南三十六里高八十丈周九里 舊志在茶磨山

之南唐德宗時有村女爲兄嫂所惡嘗出耕紫雲覆其上朝廷聞之詔入宮因名

茶磨山縣西南三十七里高二十丈周三里 宋志云山在黃

巢嶺側周回山下有港港外周回有城塹昔人避兵結砦處激水志云山在獨匯溼前落星浜上山下有石相傳星隕所化因謂之落星浜也 嘉靖初海昌許黃門相卿棄官隱居此山山形圓秀盤旋如磨先生周植竹樹剔石引泉疏畦藝茗極山居之樂有高巖其上廣平可坐百許人下空洞可列十餘席石上有題曰天只峯曰星晶石曰弄月臺曰枕流巖後懸崖印首陟絕處題曰豐崖躡痕班剝皆古好事者所摹相卿有詩云病夫高卧星屋上野情幽事靜相宜晚山如揖抗塵表晴雲有時來坐隅閒身日月衣裳懶勝地禽魚造化私汗青尚論百世士栗里蘇門我得師 文徵明寄相卿詩云茶磨清風不可攀高人先我十年閑懶樵玉珮聯青瑣故擲銀魚卧碧山新水旋開田二頃紫雲深占屋三間若爲便置蒼生望見說青青 鬢未班

石屋山縣西南三十六里 宋志云山與茶磨山相接

時民避兵處山下有黃巢嶺夾道陰翳石壘濠塹猶存 嘉禾志云石屋山黃巢嶺皆巢屯兵舊穴其誤



辨前  
譜中

金粟山縣西南三十五里高九十八丈周六里一名

六里山 嘉禾志云以三周六里故亦名六里山 徐

地志王象之輿地碑目記云孫吳天册元年有人于

海鹽六里山發得石碣上書天册元年旃蒙協洽之

歲孟冬陽月日維壬寅朔石魯神遺忽自開發拾得

青石璽符文吳真皇帝共三十八字皆作古篆蓋符

命語也舊置知縣廳後至唐太和四年蘇州刺史崔

蕤檄縣取此碣攝縣程基送州 按吳志天璽元年

陽羨山山空石長十餘丈上有文亦云旃蒙協洽之

歲月次厥書之舍日惟重光大淵獻上天玉璽文曰

吳真皇帝與此正同元姚桐壽曰吳天册元年為晉

武帝咸寧元年是年七月甲申晦日有食之則孟冬

朔非甲申則乙酉也壬寅當在望後安得有壬寅朔

乎記此俟考 山有廣惠禪寺亦名金粟寺內有舍

暉堂詳載永樂舊志多名人題咏在焉 仇俊卿志

云弘治甲子前令王璽葬子其上輸俸于寺令內三

訖為官山東吳地南袁家閣大路北錢山西錢山脚

落至大路有碑記曰璽視篆之二載為弘治己未六

月四日生兒因名海生性頗慧璽甚愛望之壬戌冬

十月十有五日病痘遽不起璽哭之慟厝于公署之

東甲子璽陞知德慶州事乃葬之金粟山西麓山之

前故為寺托寺僧守之又其北有訓術河且南有部

民陳源其兩家子弟皆愛戴璽者豈無推愛海生為

徐

吳

徐

徐

徐

徐

徐

徐

徐

徐

徐

徐

徐

徐

徐

徐

徐

徐

徐

徐

徐

徐

徐

嘉禾志云以三周六里故亦名六里山

泰山志云山在紫雲西北上有秦皇劍池

孫吳天册元年有人于海鹽六里山發得石碣

上書天册元年旃蒙協洽之歲孟冬陽月日維壬寅朔

石魯神遺忽自開發拾得青石璽符文吳真皇帝共

三十八字皆作古篆蓋符命語也舊置知縣廳後至唐

太和四年蘇州刺史崔蕤檄縣取此碣攝縣程基送州

按吳志天璽元年陽羨山山空石長十餘丈上有文亦云

旃蒙協洽之歲月次厥書之舍日惟重光大淵獻上天玉璽

文曰吳真皇帝與此正同元姚桐壽曰吳天册元年為晉

武帝咸寧元年是年七月甲申晦日有食之則孟冬朔非

甲申則乙酉也壬寅當在望後安得有壬寅朔乎記此俟考

山有廣惠禪寺亦名金粟寺內有舍暉堂詳載永樂舊志

多名人題咏在焉仇俊卿志云弘治甲子前令王璽葬子

其上輸俸于寺令內三訖為官山東吳地南袁家閣大路

北錢山西錢山脚落至大路有碑記曰璽視篆之二載為

弘治己未六月四日生兒因名海生性頗慧璽甚愛望之

壬戌冬十月十有五日病痘遽不起璽哭之慟厝于公署

之東甲子璽陞知德慶州事乃葬之金粟山西麓山之

前故為寺托寺僧守之又其北有訓術河且南有部民

陳源其兩家子弟皆愛戴璽者豈無推愛海生為之禁

護其損侵者耶王公於邑有惠政備記之張寧重遊金

粟山詩溪深容小艇山峻露層臺木葉經霜盡河水近

午開閑雲僧出定舊雨客重來擾擾浮生路經過

知幾回

夾山縣西南三十五里高六十丈周七里

嘉禾志載舊圖經云

山居金牛金粟二山之間因名

澗水志云山在金

粟山後海寧縣界上俗謂之龔墳

山國初陶給事墓

葬此陶永樂

時松江人也

角里山在茶院市北

二里

海鹽縣圖經卷三

二十九



竇家山澉浦鎮西南三里

吳家山縣西南三十八里澉浦鎮西南三里高五十

丈周五里澉水志山後有慈竹灣

鳳凰山縣西南三十九里澉浦鎮西南二里高四十

丈周五里澉水志云在吳家山側形如翠鳳之展翅山前地名細米灣一統志云鳳凰山與

竇家山小山澤山相近俱列峙於澉浦鎮之西南

月山縣西南四十五里澉浦鎮西三里澉水志云在六里堰下鳳凰山

側澤山澉浦鎮西南五里澉水志云在泊櫓山前與鳳凰山相對

橫山澉浦鎮西三里宋志云在柵橋上

泊櫓山縣南三十五里澉浦鎮西北三里高一百五

十丈周四里澉水志云澉鎮惟此山最高在六里堰東輿地志云秦皇東遊候潮渡海泊

櫓此山因名宋志云昔海舟泊此山下後沙漲遂接鎮境云澉水志又云泊櫓山側有黃茅嶺六里

堰南又有鴨腳嶺矣

羅漢山其陰曰翠屏山澉水志云羅漢山與泊櫓山相連東抵禰頭門路山下地

名羅漢灣有花溲井水甚甘美古有長眉大士菴今廢

禰頭門山一名廟山縣西南四十五里澉浦鎮西北

三里高五十丈周五里澉水志云山上有禰王廟故亦名廟山與羅漢山對峙中

為大路山下有洗馬池意古昔豪貴家所鑿今莫考矣

沈氏山



半湖山並在澈浦鎮東北五里縣西南四十五里一統

志半湖山作半湖山云與沈氏山相近也

菴山澈浦鎮西北五里澈水志云與翠屏山相對宋志云上有普明院及朱令

廟公

陸墓山澈浦鎮西北五里澈水志云在菴山側宋志云以姓得名莫詳何人

墓也

石馬山一名隱馬山澈浦鎮西北澈水志云與碾頭門山相連宋時官

給亭戶煎鹽之所至今謂之官山宋志云山上有隱馬石舊傳有馬隱入山中今山石多有人形馬形

隊仗形等類董穀云隱馬山分支兩山如巷有村落名文溪塢音秀幽解嚴一桃源

東石屋山澈浦鎮西北五里澈水志云上有石屋故名此山又在陸墓山西

非前石屋山也

楊山

石塔山

馬鞍山

碧里山四山並在縣西南四十五里澈水志云四山相連東北去澈

鎮八里馬鞍山傍又有分金嶺

黃毛山澈浦鎮西北四里

葛山

龜山二山並在澈浦鎮東北澈水志云葛山東有石屋龜山其形低小

管山縣南九里澈水志云山低而小四週皆水東有石橋



豐山縣西南十八里高一百三十二丈周十二里

永樂

志云上有石屋三所舊傳秦始皇屯兵于此東南有九母塚山麓有覺林寺並詳後山產石色黃而堅土人採為甃築用坑塹彌谷望之故怪其峻嶒焉

黃山縣西南三十六里

一統志云有高王山與此相接

橫山縣西南三十里

嘉禾志云顧況所居山在峽石山北况有詩云家住雙峰蘭若

邊數聲秋磬發孤煙山連極浦鳥飛盡月上青林人未眠

沈山縣西南七十里高三十五丈周七里

徐泰志曰海寧縣陝

石鎮西有紫薇山東有沈山夾水並峙故名破石沈山俗名東山鹽滸也舊圖經云宋臨海南陽二郡太守沈景葬于此因以名其山杭州志云審食其墓名審山非是前令譚秀峽川晚泊詩隔水遠山藏古

寺近人沙鳥立斜陽

雅山故邑山湯山苦竹山觀山高公山蒲山菜薺山

益山龍湫山獨山車山龍尾山黃盤山鬪牛山並乍

浦山也今析屬平湖縣

雅山縣東北三十六里高五十丈周六里嘉禾志云山多

怪石俗呼為菑山又呼為瓦山地中得碑記知是雅山云山本產鐵烹冶者以不當鑪鑪費幸免傷鑿童無草木而遠望蒼翠意金氣故然故邑山縣東北三十六里高八十八丈周二十里唐志云海鹽舊縣治

在此漢順帝時縣淪陷為當湖移治此山下後縣治復徙於馬埠城因名故邑山也括異志云今故邑山居民掘地多得古器物蓋縣治舊址爾宋書高祖追海賊孫恩築城于海鹽故治恩來攻斬其大帥慮衆寡不敵開門使羸疾數人登城若已遁者復乘其懈

大破之城得全正其處矣湯山縣東北三十七里高七十丈周五里俗名龜山上有瑞祥菴宋令李直

養於此山置叢家詳見職署篇仇俊卿志曰嘉靖三十二年四月二十六日參將湯克寬率師禦倭至此問地名曰湯山喜曰此我家山也我得地矣列營殺



賊遂大勝 苦竹山縣東北三十八里高七十丈周  
一里山在海上去乍浦城二里防汛船泊其下每歲  
備兵使者登此閱武千帆飽風萬擄掉雪衝波激浪  
之士聲振空谷矣上有祠祀天妃神遠汎者率于此  
賽禱春月士女雲萃遺細墮翠或接路焉 觀山一  
各官山縣東北三十九里高四十丈周四里 高公  
山縣東北四十一里高八十八丈周八里 蒲山縣東  
北四十二里海上高三十丈周五里 萊蕪山縣東  
北四十二里海上高二十五丈周四里 益山縣東  
北四十四里高二十丈周四里 龍湫山一名陳山  
縣東北五十里高八十一丈周一十五里一統志云  
山半有靈湫是白龍所窟水旱不涸不溢又有龍母  
塚其傍有磐陀巨石相傳白龍以三月十八日生于  
吳之陽山歸藏其母于此故每歲是日陽山及此山  
多雲霧晦暝雷雨之變宋大觀中建祠賜額顯濟封  
龍君為廣惠淵靈威祐侯龍母為慶善薦福夫人  
國朝載在祀典亦以三月十八日致祭每禱雨先醉  
酒石上有物蜿蜒而見澍雨即應括異志云山頂龍  
穴深不數尺而春夏不涸遇旱禱於穴必有異物見  
因取其水祀之雨即滂沛每歲七月多風雨人謂龍

洗墓云龍王廟後有觀音大士殿曩年忽有雨石從  
半山相擊墜下一從殿後壁入大士座下一墜殿之  
西屋瓦無所損不知從何而入留題者甚多今秋月  
多東南風時有鳥大如鳩者忽乘風集此山信宿向  
內地分飛至春又復集此渡海歸味極腴美為時饌  
雅貴名曰秋鳥初來時割其腹有青胡椒因驗是日  
本來也山上有屠尚書勳墓林木甚盛 獨山縣東  
北五十里高五十丈周六里郡志云孤峰嶙嶒不與  
諸山相接故名獨山其上置烽墩以防海寇舊又置  
鹽場於此 車山縣東北四十里一統志云山形如  
車近此數里又有暈頂山也 龍尾山縣東北四十  
七里一統志云以形似名之 黃盤山鬪牛山並在  
乍浦海中與獨山相對黃盤舊本與海岸相連後淪  
於海今又沙長閘舟矣二山乃邑中漁人捕魚處聞  
牛山蜃氣不絕漁者  
言其狀甚可怪也

谷水

水經注引吳記曰一江東南行七十里入小湖  
自湖東南出為谷水又曰谷水出吳小湖逕由  
卷縣故城下神異傳曰由卷縣秦時長水縣也始皇  
時淪陷為谷因曰長水城水曰谷水也谷水又東南



逕嘉興縣城西谷水又東南逕鹽官縣故城南九州志云谷水之右有馬罽城故司鹽都尉城吳王濞煮海爲鹽於此秦於其地置海鹽縣故武原鄉也又谷水於縣出爲澉浦以通巨海

### 殷水

### 福見水

唐陸廣微吳地記曰海鹽縣在吳郡東南二百里地名殷水水名福見也

### 澉浦縣南三十六里

水經注云縣南有秦望山谷水於縣出爲澉浦以通巨海光熙

元年有毛民三人集於縣蓋汎於風也按光熙爲晉惠帝年號是時縣治在故邑又近乍浦矣本書自言集縣非的言集澉上爾浦今湮塞

### 東浦澉浦鎮東

澉水志引宋志云東浦在鎮東海水透入東北至頰頭門汲之煮鹽今不

可考矣

### 鮑郎浦澉浦鎮西北十二里

宋志曰古老云昔鹽塲初開於此有姓鮑者鑿

浦煮鹽因名其浦曰鮑郎蓋吳俗少年之通稱後沙漲移東浦側紹興中經界其傍地爲田中流接連招寶塘成河至今俗呼爲鮑郎浦又按南史載孫恩作亂事縣令鮑陋嘗遣其子嗣之追恩戰沒喪歸於此人憐而名之其說亦可據 澉水志云浦在鎮北十二里古通東浦後塞今浦水尚在頰澗

### 藍田浦縣南三里長一十八里

嘉禾志浦有藍田廟名藍田浦宋咸平六

年知縣魯公宗道重開通白塔港入運河以灌田民利之名魯公浦浦濶一丈七尺紹熙三年縣令李直養重濬又自藍田開十八里南抵鮑郎鹽塲以通鹽運灌農田久漸淪入於海 魯浦亭記曰昔史起決漳以溉遂富河內之民鄭莊引渭而灌益肥關中之地故仁人之言也其利溥循吏之愛也其思深令瘠瘳乎無窮豐功流于可久慮事經始豈徒然哉茂苑之東偏禾與之近鄙邑居之感海鹽在焉先是地非五達之郊物殊一都之會魚鹽攸產聚庸實繁城郭雖存居人無幾磽塽之田弗藝富庶之教未孚民將疇依時思俾又景德初今參政扶風魯公來蒞是邦實縮銅章公琰社稷之器誠謂屈材子游絃歌之聲



此焉靜治一日詢耆舊之說採溝洫之制得白塔占  
港于縣之西南隅層沙埋積灌叢紛翳剪為巖巖之  
徑寢阻潮汐之池脩利闕如因循孔甚倘然奮發濬  
復是圖相其方而有初諗其衆而宵悅先庚之令既  
下獻力之徒全集量期令役書以授師曾未越月洪  
波乃道自海口達邑中凡十有八里而遠其清可以  
流惡其潤可以蒙福祈之可以導其氣滯之可以鍾  
其美浸灌之益嘉禾惡種無不猥大也導涉之利浩  
商善賈無不駢集也向之編管把稗之陋販脂賣漿  
之微幸有廣廈之居間多阜財之積環邑之內變為  
豐泰厥後二十年間公入奉論思乃參袞政而負海  
之畔蒙賴乃利蔽棠之野風謠如新遂指其港謂之  
魯公浦焉天聖丙寅伍君佑由佐著局為縣大夫且  
嘉其陸社之風愛芍陂之饒衍乘斂政之暇鳩俸功  
之材作為新亭于浦之上因地而名識其始也觀夫  
華懷鏤檻麗丹腹之奇茂林修竹蔚澄凝之趣雖為  
造適之所實有清幹之機將俾夫登豫章者想孺子  
之風游魯山者懷紫芝之化斯亦凜凜庶幾仁智之  
用心矣乃落成之始監郡集僊李君昭詒書狀徵文  
刊記勤請之辱叙讓弗遑聊摭梗槩以附于民謠之

末昔天聖六年正月吉旦朝奉  
郎守秘書丞騎都尉黃鑑撰

### 乍浦縣東北三十五里

永樂志云水舊自官河出達于海歲久浦塞又蘆溼浦

在縣東北七十里嘉禾志云宋元祐八年本路提刑羅適開地中得古尼寺碑移置于松江白牛寺後於此地立鹽場石亭浦在縣東北八十里嘉禾志云浦通華亭縣東一十五里入海亦溼塞二浦今並析隸平湖附記此

### 永安湖周一十二里在縣南四十五里澈浦鎮城西

#### 六里

嘉禾志曰此本是田後濬為湖潴水以資灌漑置閘蓄洩雨久瀾漫則東入于海詳後田賦中

宋澈水志曰湖上四圍皆山中間小堤春時遊人

競渡行樂彌為小西湖續澈水志曰中有長堤分

為二湖羣山環之獨缺其南之十二海外越中諸山

羅列湖則南面全受之中央有土方數畝高出如臺

產紅白蓮蘋花芡實等皆野生朱存爵存餘堂詩

話曰余家舊藏顧仲瑛詩帖一紙乃次韻劉孝章治



中邀夏仲信郎中遊永安湖詩二首字畫絕工楊鐵崖先生嘗和之中有一聯云啄花鸞坐水楊柳雪藕人歌山鷓鴣極爲鐵史所稱許仲瑛家饒於財而豪俠不羈詩筆乃其餘事中吳楊禮曹支硎先生跋其後云吾家鐵先生平日豪氣塞雲漢未嘗輕易假人以稱可語今爲仲瑛拈出一聯低頭遜避乃知先生目中自有入也 許雲邨家傳曰正德十三年秋八月既望先生偕孫太初一元董從吾溧朱元素朴陳用明鑑僧石門明秀游永安湖湖景色大類西子以在海上人跡罕到是秋四美二難一時具并放舟中流先生舉酒屬太初曰昔青蓮居士與張渭遊漢陽湖遂改名郎官公今至此可名高士湖矣先生詩云一年好月是中秋向夕呼舟抱病遊大地清輝翻白晝良宵幽興屬滄洲湖山夜色孤蓬遠天水寒光兩鏡浮酣坐不知吟嘯永闌干北斗挂峰頭太初詩云中秋此地成高會山雨初收激壑隈望裏星河舟楫近坐中滄海酒杯開月明靜抱鼉鼉出樹色晴浮島嶼來爛醉長歌真自得回頭天地莫生哀從吾詩云青山影裏進扁舟海色湖光并作秋午夜雲濤悲玉笛九天風露濕瓊樓直凌牛斗同清泛應有魚龍識

醉遊萬里長空傳浩嘯冷然鸞鳳在滄洲用明詩云百年高會滄溟夜壁月鯨波萬里秋避地衣冠天下士旁湖尊酒水邊樓松杉谷應聞清嘯砂磧潮迴卷湯流不用乘風跨黃鶴人間隨處有瀛洲秀公詩云人物百年滄海上釣竿裊裊拂珊瑚前峰吹笛月在水中流放歌秋滿湖夜靜魚龍迴浦淑天低星宿動菰蒲山川勝槩自今昔天柱洞庭還有無 徐泰秋夜澈湖望月詩澈湖湖上桂花秋海月當年滿畫樓彷彿錢塘六橋夜至今人說小杭州

### 天仙湖縣西八里周二百步

元姚桐壽樂郊私語曰天仙湖急遞舖在城西

十里湖僅一大漾耳其旁相傳有徐鸞故居鸞得道者後委蛻仙去故以名湖然復有廟神稱徐王蓋誤以徐鸞爲徐王也廟後有老人甚縵縷問之姓郭氏乃宋樞相慎求之後曾無以資充舖長以自給因出樞相詰身像贊相示余攝衣冠拜之乃分粳糧之餘爲贈始知韓昌黎不見三公後饑寒出無驢之句爲不証也



橫湖縣西三十里周六里

徐泰志云璵城西有莊柴湖卽此湖也

賁湖縣西三十五里周四十四里

舊志云元名宋村湖今俗名宋坡湖

通練塘及沈蕩諸水

彭墩湖縣西北三十五里

鷓鴣湖縣西南四十里周四十四里

徐泰志云縣西南四十里有黃

道湖周四十餘里卽此湖也上有黃道神廟故俗稱黃道湖

長湖縣西南五十里周三里五百步

上谷湖縣西南六十里周五里

徐泰志曰鷓鴣湖長湖上谷湖俱西受碇

川之流長湖東北由支港入于官塘上谷東北會鷓鴣湖東過橫湖會招寶入于官塘

當湖舊縣治今析平湖縣

後漢書註云案今計偕簿縣之故治順帝時陷而爲

湖今謂爲當湖大旱湖竭城廓之處可識 吳地志云王莽改海鹽縣爲展武縣後陷爲湖亢旱水枯街陌髣髴湖周四十里 宋魯應龍云庚子歲夏旱湖間可以通軌有漁舟夜艤水許遙見有光燭人意謂必窖藏遂於中夜掘之得井磚一片長六七寸兩首各有方竅相入兩面皆有手掌紋極細宛然可見不知此磚始於何時竊意當時陶人手法爲之耳兒童爭鬻于市或取以爲硯清潤細膩可愛余嘗得之後爲好事者取去按湖在漢時爲縣此井磚當是漢物耳

柘湖舊縣治今屬華亭縣

雲間志云海鹽本秦縣淪沒爲柘湖移于武原鄉湖

中有小山生柘樹因名 吳地志記秦時有女入湖爲神湖周回五千一百一十九頃今湖塞祠西

秦溪縣南三十六里

澈水志云在鎮東北十里自秦駐山發源流至於此故謂之秦

溪北通烏坵塘南通豐山港又謂之鹹塘河 嘉禾志溪上法喜寺有石鐫秦溪二字

六里河

澈浦志云自城濠石灰橋下西抵六里堰古上河也兩傍之田實賴之堰傍居民造作小



舟搬運城中貨物并鑿賈引鹽若濬  
溪丈餘或可通下河而無事於堰矣

**招寶閘** 激水志云在今南門外近龍眼潭客舟番貨  
皆入此閘至六里堰今閘柱沒土猶上出可

也

**招寶塘** 縣西南三十五里 徐泰志云招寶塘長四十  
里自南境北流至璵城入

于官塘 嘉禾志淳化三年開  
淳熙九年守臣趙善悉重濬

**鴉鵲浜** 激水志云自張公橋進泊櫓山後經鴉鵲橋  
下沿山水道將至礪頭門而止又舊誌鴉鵲

橋乃古客  
船發貨處

**橫涇河** 激水志云自六里堰張公橋下  
過北從陸搭孫老橋入梅園路

**獨匯涇** 激水志云自六里堰下過東經  
茶磨水出根竺橋入紫雲村路

**清通港** 縣西南五十里 徐泰志云  
通招寶塘

**烏坵塘** 縣西三里 徐泰志云烏坵塘在天寧寺南會  
南境之水自涇塘橋東北八里至

寺前入于官塘 嘉禾志宋  
淳熙九年守臣趙善悉重濬

**古涇** 三百一所縣西境 新唐書地理志海鹽有古涇  
三百長慶中今李諤開以禦

水旱 嘉禾志云涇三百一所李諤開可通小舟不  
析其名今無考焉 徐泰云疑即今麻涇簡涇之屬

樊侯維城詩古涇通幽際桑條拂水濱鷄鳴聞里  
社婦饁祝田祠撫字慙無術催科復有期當來肥掾

坐馴雉  
愧芳規

**白洋河** 在縣東沿海塘下 徐泰云南自激浦北抵乍  
浦長七十里今多淤為草

蕩 萬曆五年自縣城南南至  
激浦者已開通見後隄海篇

**橫塘** 縣西北四十里 嘉禾志即常豐閘北通郡之南  
湖 宋何昌弼詩一舸凌風去

縈紆度幾村水清魚引子地美稻生孫路僻塵埃遠  
秋晴枕席溫悠悠迷處所疑入武陵源 樊侯維城



詩馳驅環澤國鎮日坐洪流畫艇安如舍清江狹似  
溝官程無樂事物態變虛游慣識風波險休藏夜壑  
舟歲序行將盡吾生會有涯勞人期稅駕俗吏也  
乘槎班鷺瞻天遠雙鳧逐日賒還愁捨筏處又復放  
蜂衙覽古吾誰適虛舟任自飄迅帆能破浪強弩  
可回潮遠志宜人處文無實我邀此生如露電隨分  
是道

### 陶涇塘縣北一里

徐泰志自北關外北流至平湖縣界一十二里朱祚志宋淳熙九年守臣趙善悉重濬成化六年參政何宜弘治元年僉事伍性知縣譚秀復濬之

### 漢塘今析平湖縣

新唐書地理志海鹽西北六十里有漢塘李和七年開

### 孟姥泉永安湖傍

澈水志云在鹽湖之西鹿山之麓自鷹窠頂來山厚而源深故有瀑

布如懸疋練四時不竭久旱稍微許相卿大雪攜鶴觀孟瀑詩初雪壓高帽羸駮揚遠鞭玉龍僵不起白鶴舞爭妍山僻地無主骨清吾欲伯長吟雜孤嘆歸路晚翩翩

### 宋義井澈浦市中

澈水志井石刻字猶存驗之是宋時所鑿

### 花漚井在羅漢山下

澈水志云在康氏墓前水甚甘冽

### 戴將軍井縣西資聖寺

宋武原志云威東晉右將軍也宅中井一日發五色光遂

捨宅為寺

### 澹井縣西天寧寺南

永樂志云邑中水多鹹此獨澹故名

### 馬埠城縣東南一百步高一丈三尺周圍二里二百

### 二十三步

越絕書記地傳曰馬埠者吳伐越道逢大風車敗馬失騎士墮歿疋馬啼嗥事見吳

矣外傳紀策考叙吳事曰昔者吳王夫差與師伐越敗兵就李大風發狂日夜不止車敗馬失騎士墮

死大船陵居小船沒水吳王曰寡人晝臥夢見井羸溢大與越爭孳越將掃我軍其凶乎孰與師還此時

越軍大號夫差恐越軍入驚駭子胥曰王其勉之哉越師敗矣臣聞井者人所飲溢者食有餘越在南火



吳在北水水制火王何疑乎風北來助吳也昔者武王伐紂時彗星出而與周武王問太公曰臣聞以彗鬪劍之則勝胥聞災異或吉或凶物有相勝此乃其證願大王急行是越將凶吳將昌也 酈道元水經注曰谷水之右有馬罽城故司鹽都尉城吳王濞煮海為鹽於此 宋武原志晉咸康七年移縣治于馬罽城唐并省至先天二年百姓以應奉金遠難於往來請置縣開元五年蘇州刺史前黃門侍郎張廷珪奏是年五月初勅置即於舊海鹽縣吳禦越城西北立定準而置縣今縣治是也詳此馬罽城即吳禦越城矣無兩城也 今平為民居

古城縣東南五十步

舊志云其址今平民悉廬焉

望海城縣南三十五里

宋武原志云唐開元五年置今廢

鹽城縣西北一十八里高一丈周一里

舊作歟城歷誌不詳築城

所自但云廢為民田耕種惟仇志云是袁崧所築蓋以其地有教義里意為崧築耳俟再考

故邑城舊縣治今析平湖縣

永樂志云在縣東北三十五里高一丈周二里

詳見治城及故邑山注中

教義里縣西一十八里鹽城南

吳地志云晉時里人李祥與內史袁崧築

壘滬瀆以禦孫恩崧為賊所害祥突白刃收崧歸葬繼人義之因以名其里

伯牙臺縣東門外二十步臺側有聞琴村聞琴橋

武原

志云臺基陔坡猶在相傳伯牙鼓琴于此丁麟琴臺村詩別鶴不聞空外語野鳥時向屋頭鳴胡顏過伯牙臺詩瑤琴久寂寞古意向誰傳一自鍾期沒那能整絕絃

熙熙臺縣東

嘉禾志云舊名月臺李直養易是名

文星臺

縣北九里縣城水與尚胥橋水至此合流入平湖形家以為去水口宜于關鎖萬曆十一年知縣蔡公逢時採諸生議築臺象羅星塞水口其傍建石橋橋外復築土墩水流紆曲風氣含孕自後

海鹽縣圖經卷三



科第益盛云二十二年王公臨亭建屋臺上增培基址二十七年李公當泰重修今四十八年樊公維城捐俸興造一新

秦駐館初在縣西半里後在縣南望城館在天寧寺

西宋武原志云按唐圖經古有秦駐館去縣西半里久而傾圮長慶間縣令李鏐于縣南立館仍是名

成紀張祐集有題南館詩云故人營此地臺館尚依

依黑夜山魘語黃昏海燕歸舊陰楊葉在殘雨禪花

稀無復南宮賞高簷紅燭輝蓋謂鏐也五代時已廢

本朝惟禪悅院西偏有望城館不知何人立建炎兵

火此館僅存紹興壬子歐陽延世撤蓋縣廳廢入寺西牆平治為園焉禪悅院今天寧寺地

彰慶館縣西安仁橋十五步永樂志云宋紹聖四年縣令閻建以樞密使郭

三益父瑒所居隘陋令對門蓋亭為延賓之所名彰慶館宣和間縣令徐盤立石國子司業朱登作記建

炎三年十二月虜二百騎自臨安循黃灣而來適有賈機宜潰卒數百與之遇戰于館前碎碑為砲石紹

興壬子縣令歐陽延世撤館以營縣治後五年監稅解廢以館基建稅務元末燬于兵無復存矣

秦溪館縣南十五里秦駐山下舊志云古津亭也宋紹興元年縣令陳祖

求修後縣令李直養立是名

弦風亭澈浦鎮東海濱詳見前職署篇

顧况宅在橫山宋志云宅在縣西南五十七里橫山禪寂寺側劉長卿集過橫山顧山

人詩云祗見山相掩誰言路尚通人來千嶂外犬吠百花中細草香飄雨垂楊間弄風卻尋樵徑去惆悵

綠溪東

舊時月色軒縣治東隅故宋裔趙公範兵燹後軒其故居曰舊時月色始豐徐一

夔記曰月色新舊一也子必曰舊時月色吾不知所以記範曰此自吾所見言耳吾嘗徙倚軒楹海雨初霽月行太虛中光彩注射地上瑩若霽雪徘徊顧盼中夜不怡蓋吾家盛時廩有餘粟籩有餘帛夷庭廣



廈涼臺煥館嚴邃親與如列仙所居天下無事上令  
下供有程不徵而集胥吏跡不及門戶司吾平者雖  
欲鷹擊毛鷲為治了無所施寧有謔呵之及吾父兄  
伯叔雍容閒暇討論墳典之餘第謀為樂良夜方永  
月色在戶庭薄具清宴醜有內法肴有珍羞廬兒按  
箏家姬度曲至夜分不寐自更多故觸心舉目皆非  
向日獨月色定宛如舊誠不能釋然于懷也曰嘻處  
憂患者不忘亨豫之時在荒閒者恒思宴樂之地此  
人情大較也吾試與子論月由歿鬼而至於盈弗繼  
之以虧則太盈矣太盈非天道也由生鬼而至於虧  
非繼之以盈則太虧矣太虧非天道也古之至人一  
歿生齊得喪而不物於物者有見乎此也子不謂然  
秋中之夜子開軒待我我  
將邀彼明月者醉而問之

### 楊宣慰粧樓在澈浦城西

澈水志西門內大街南有真武廟元宣慰使楊梓居

之建樓十楹以貯姬妾謂之梳粧樓

國初楊氏遠徙故居廢為延真觀樓尚有存今改

州少年多善歌樂府其傳皆出于澈川楊氏當康惠公梓存時節俠風流善音律與武林阿里海濱之子

雲石交善雲石翩翩公子無論所製樂府散套駿逸  
為當行之冠卽歌聲高引可徹雲漢而康惠獨得其  
傳今雜劇中有豫讓吞炭霍光鬼諫敬德不伏老皆  
康惠自製以寓祖父之意第去其著作姓名耳其後  
長公國材次公少中復與鮮于去矜交好去矜亦樂  
府擅塲以故楊氏家僅千指無有不善南北歌調者  
由是州人往往得其家法以能歌名于浙右云 張  
可久別澈川楊安撫越調小桃紅詞晚風吹上海雲  
腥山色秋偏淨了得相思去年病不堪聽尊前一曲  
陽關令斜陽恁明寒波如鏡分照別離情 陳金粧  
樓詩彩鴛飛去曲池荒朱箔依然繞綠  
楊春色不知歌舞盡野花猶學美人粧

### 方洲草堂

在遷善橋巷今廢 張寧自為記曰方洲草堂疊石為山山之上

有蒼玉峯東垣柱頰峰宿雨巖滴露巖歸雲洞蘭雪坡茶煙岫咏月嶠卓筆學洗硯泉映山池皆鑿石刻字周植小檜梅竹雜卉高曠未滿尋丈而欲擬諸大山可發一笑彼山之大小者非已所有亦非草堂所能貯此山可貯而有以其能小也山雖小而氣象景色生意畢具則亦自有可喜而笑者在名之曰一笑山其北有舍南向溪



僅及尋而橫廣以倍其上環竹爲覆蓬仰飾粉素牖戶內外皆漫堊一色通明虛白恍若一舟寄泊於湖山風雪間自念平生薄遊江海幾二十年早以衰病還家休臥蓬室譬諸剡溪夜汎苟未及門而遽迴則歸典當復不減名之曰雪夜歸舟揭諸簷楹所以志余之自得也寧有詩云一住溪山不記年幽居風景勝平泉茂林芳草無行轍流水桃花有釣船白髮人間將老矣紅塵夢醒益蕭然憑誰喚起王摩詰爲寫吾齋入

獨寤園

百可園並在北城

鄭端簡公園也詳前坊巷中公園居詩云吾

生已如此抱病對朝暉梅老花偏密桑柔葉正肥隔溪聽鳥喚倚檻看魚飛幽意那不愜誰云心事違乾坤長變化日月共居諸海內誰知己山中此舊廬榮光早二鳥憔悴憶三閭謝郗周公夢冥心混沌初今百可園嗣孫端胤改爲祠堂姚士粦記曰受城若垣而南距塵閭有蒼焉林水鏡焉池汪隣焉蔬畦者爲榮陽氏之園園謂百可蓋取汪敬民咬得菜根百事可做語此一可字本之東谷吾核兩公不究用以傳端簡公而端簡用之報國家以答兩公而貽昆胤者然皆以一不可做處其爲百可做也公登奮于嘉靖初元論定于丙寅末載跡其升沉出處實與世皇相爲終始當斯會也上有聖神獨斷之英主前有得君行志之永嘉後有媚主竊權之分宜使公而非新都命筆之不可大禮始議之不可薦改詞林啗移臺省之不可盡察言官內計自陳勢臣贈葬之不可相子有挾希晉符丞及三諫重假叛軍未減之不可以先立其大其能于四十年間雷霆之下任之而可詰戎典銓可潛餉填撫可殲捷保江淮可平讞無冤濫矯焉獨立爲社稷臣乎辱之可杖可貶可詰責可借肯投閑長往而無少顧藉乎終之可退勵饗競可著記千秋可使子忠臣孫廉吏諸曾玄人有才子稱名傳信史永永不朽乎此吾于公可悟得公之不可所謂以一不可做處其爲百可做也公一生作

用龕壓古今莫非從茲園可字推拓成就况堂塔其所遊憩林水其所蔭暎蒔藝甲柝其所啖茹則自公而上若東谷吾核兩公下若少卿比部京兆諸公精氣盼蠻雲旗往來莫不于焉棲託固宜思孟之孝感前契不園亭而堂寢用爰一可受授之神靈也想春



薦秋亭凜然對越思孟必將任受此一可  
字上證先公母嗚予不可爲是添足也夫

### 白鶴園管山

馮臯謨自記曰余謝粵中事歸爲園茲  
山繞山植松篁檜栢結屋二楹左右雜

蒔花卉日携書賦詠其中二鶴翩翩舞弄甚適因以  
各園而自稱白鶴園主人云余衰季意與盡屬之茲  
園前通水屈曲環流栽菱芡芙蓉藻門列佳樹數行編  
僅藤入門爲藥欄竹塢掃栢爲亭設石几可奕前二  
十武夷直可壺名其亭壺觴處西穿竹徑宛委爲庖  
瀉挑杏梅李郁茂而蕃東爲飲所曰浮白軒軒南累  
石爲山中開三洞窈窕敞豁夏涼冬煥攀蘿躡級延  
佇山巔村落縹緲原田萬頃秦駐金粟紫雲諸山悉  
來獻翠下憇小亭四座皆山東循牆而轉樹木歲莖  
又進爲太白居居臨石屏律翠壁削剪兩室斗大一  
貯丹經道錄一置龕牀余日面壁跏趺瞑坐間取證  
諸書爲養生助進西爲白雲阿余生墓處余間舉酒  
屬客笑而指曰吾以異日跨白鶴而遊壙垠之野宅  
茲玄丘之宮其將尋我於溪松茂栢耶抑飛鳴而過  
者我耶客大笑曰公善  
說幻亟爲樂無負茲園

### 彭氏園南城下

彭昭毅公紹賢園也公有水月居襟  
咏序云戊午夏日避暑家園高樹生

陰脫巾閒放玉爵同志及方外一二禪友皆銷除苛  
禮逸致蕭疎每一過從留連竟日花間竹下啜茗清  
談琴韻悠然碁聲落確觀游魚出沒聆野禽相和或  
散步城堞舒清曠于洪濤或幽尋古剎悟空諸於夕  
頃暢彼已之情極朝昏之趣斯亦樂矣爾乃客去掩  
扉嗒焉習靜則放眼開編微吟弄墨髮髯至人之導  
引西極之玄虛不知夏日之如年暑氣之熏灼也  
紅塵不近水雲居跌坐焚香懶著書閒看遊魚能解  
意不知吾樂竟何如閒來石几試楸枰靜院惟聞  
落子聲澗水風篁相應答總來勝負不關情相逢  
青眼有貧交誰浪狂吟信口嘲我是忘機海鷗鳥懶  
將枯思費推敲火雲飛散盡成嵐碧水奇峰上下  
含雲水悟來多是幻試參黃面老瞿曇彭宗孟家  
園雜言幽棲竟日掩桐關踈疎懶長馳午夢還蕉葉總  
騎湘管秃竹林翻愛酒杯閒到牕綠樹爲家具入檻  
清池湛客顏占得人間丘壑長不妨巢許買青山  
薜荔淡淡覆短垣縱非壺嶺不塵樊久無踪跡煩開  
逕小有生涯到灌園聊采溪毛魚共躍偶拋菰米鳥



爭喧由來海客機能息枉殺人稱養拙尊放劇園  
亭客有促余赴留銓任者賦答春來花信卽佳期况  
值君恩賜沐時池上官行爲白鷺林中鼓吹是黃鸝  
飛觴亂政調繁簡較局占材第正奇我自家園多闕  
閱肯容捷徑使人疑春日行園詩清池一曲化城  
隈與客看春信屣來據勝小亭偏曠朗誤人短逕故  
迂迴雲依柳浪穿簾入風落松濤淪茗催坐石莫令  
頻拂拭飛花片片錦茵開茅齋結構傍招提碧水  
朱臺夾路西寧爲避人心自遠曾因賭墅酒頻携遶  
牆歷歷榆錢小拂簡芊芊草帶齊兼隱若教能便穩  
貧家不讓浣花谿

### 義庄亭城西二里

俗呼爲頭亭子 邑季廉王文祿  
有頭亭子義社記曰亭去城三里

在下法司橋之傍初建自邑人馮本本當洪永間財  
雄蓋邑驕從擬都官每入城經此少憇人訝爲法司  
以故名橋亭自城西爲第一故以頭名之本後以事  
見法廢爲羽流居嘉靖甲辰居士王端入主之買田  
以贍其徒陳可真復拓葺之前堂三楹後寢如之神  
像一新庖厠咸具每月朔望必會其社之耆老焚誦  
焉庶幾古讀法講禮之遺因名之義社予嘗往游焉  
土厚水迴蒼藤喬木迥有山林風追想本之雄豪露  
泡剝那安及爲善之樂乃爲之記云

### 呂氏秀遠庄順寧橋南

邑人朱祚記曰距清瀨門西  
南郊牧間聞有宋常氏園其

中滇蜀山茶大若車蓋火樹亭亭可五里見也嘗與  
老友呂朴菴郊行想見其地而沉湮不復可問朴菴  
曰荒庄數椽循水而西亦堪小憇余因相攜入門見  
池光貯雲樹色含露一軒面陽顏曰秀遠峙軒左右  
亦有所謂滇茶雖不能尋丈亦足矧爛簷櫺更跨澗  
右轉有小樓出樹盡見諸山方洲先生以環翠命之  
遠樓以西竹萬竿矣主人斲筍煮茶圍丁罾得一鱖  
于桃花水中酌村釀爲之盡醉將出門顧滇茶囑之  
曰他年必如車蓋使吾兩人五里見無愧有  
宋常家可也時弘治壬子季春望後五日

### 何皇后陵

### 何準宅

### 烏夜村並在縣南三里

晉書  
何準

廬江瀟人女爲穆帝后后諱法倪以名家應選昇平  
元年册爲后元興二年崩年六十六晉志載準子琦



答問各版文云皇帝嘉命詔問臣名族臣族女父母所生先臣故光祿大夫雩婁侯禎之遺玄孫先臣故豫州刺史關中侯暉之曾孫先臣安豐太守關中侯獻之孫先臣故散騎侍郎準之遺女外出自先臣故尚書左丞曹之外曾孫先臣故侍中關內侯夷之外孫女年十七云云納采問各納吉請期親迎皆用白鴈白羊各一頭酒米各十二斛納徵羊一頭玄纁用帛三疋絳二疋緇二百疋獸皮二枚錢二百萬玉璧一枚馬六疋酒米各十二斛

宋武原志曰輿地志云海鹽縣南二里烏夜村晉何準寓居焉一夕群鳥啼噪乃生女後選入宮他日復夜啼推之乃穆帝立后之時也縣南一大冢耆老相傳爲何后冢近地有名喪靈浦者堙塞久矣謂穆后歸葬開此浦以通舟楫后崩於僞楚之時歸葬于此耶按晉書安帝元興三年七月何后崩八月癸酉祔葬穆帝永平陵邑中相傳何后陵者或卽準父子冢也

嘉禾志唐開成間劉府君墓誌云墓縣南二里地號烏夜鄉名海鹽又太和元年杜府君墓誌云墓其泉鄉烏夜原二誌皆文宗時以歲次考之前以烏夜爲海鹽鄉後以烏夜爲其泉鄉亦當時鄉分有政隸耶舊縣學在烏夜

鄉後併爲海鹽鄉在今城南矣 朱村烏衣村詩玉貌曾沾帝子恩故鄉環珮葬歸魂千年廢寢無尋處夜月啼鳥尚

天子女兒墓縣西南三十五里六里山下 嘉禾志云

之者蟲毒不可近仇志云晉恭帝女封海鹽公主者疑葬此公主郡縣多繫名封未敢定爲實據

九母塚縣南一十八里豐山石屋之東南

雙梓墓 三吳記吳荑龍中海鹽陸東美妻朱氏有容

食死合葬冢生梓樹同根二身相抱成一每有雙雁宿其上孫權聞之嗟嘆封其里曰比肩墓曰雙梓

于瑩墓縣西南四十里 瑩字明叔寶之父仕吳爲立

有嬖人竇毋至如葬寶父時因推著藏中經十年而母喪開墓其婢伏棺上就視猶煖漸有氣息輿還家終日而蘇說寶父常致飲食與之接寢恩情如生家中吉凶輒語之校之悉驗平復數年後方卒寶因作



搜神記中云有所感起是也

蘇驃騎墓金牛山詳見祠廟中

沈景墓縣西南六十里沈山嘉禾志元景劉宋時人也詳見沈山下

唐貞元開成會昌古墓宋志曰唐貞元十四年太子左讚善大夫吳郡陸府君夫

人汝南縣君周氏墓誌銘云附于嘉興縣東界海鹽縣齊景鄉青墩原西北塋王象之輿地碑日記亦云此碑在海鹽但未覩全文唐故彭城劉府君墓誌銘君諱源字文宗先帝王之苗裔也遠祖商漢中書侍郎祖一唐林泉不仕父與丘園放居君之孟子也周秦之世晉宋以來徙從吳郡海鹽勝邑樹德樹名不仕朝廷隱居丘壑嗚呼以開成元年十一月二十五日卒于私第乃以其年十二月庚寅朔十五日甲辰葬于海鹽縣南三里地號烏夜鄉名海鹽其塋也長松藹日青嶂連天其所也東流滄海西接甘泉南枕秦山之隅北抵武原之地君壽逾七十有二娶河內司徒氏生三子少悻少通少平其子立也雖未聞

闔之徒有抱臯魚之季日月逝矣歲不我留勒石記之用存今古其詞曰野霧蒼蒼寒郊茫茫倚歎芳馨俄遭夜霜潘圖撰唐故陳府君墓誌銘府君諱環穎川人也祖與父道清不求宦達君即清公之第二子也幼著才識長閒規矩克言理行鄉閭所欽何圖天不祐善以會昌二年正月二十一日終于私第享年六十有三以當年八月十八日窆于蘇州海鹽縣東二十八里齊景鄉雅山南二里祖墳南舊塋禮也君取吳郡顧氏有子三人長曰遂次曰師損三曰公甫並至謙至讓忠忠乎季乎泣血主喪絕漿逾利後恐日月久邁陵谷遷移刊石為誌永傳不朽銘曰山作田今田作海萬古存今誰不改青松新隴曉無年千載維留名記在不著撰人姓名括異志云昨於當湖得一石刻乃唐吳郡陸府君墓誌銘云葬于蘇州海鹽齊景鄉當湖里王象之輿地碑日記亦云陸府君墓碑在海鹽縣北五十五里當湖市

朱府君墓縣南十五里義忠國佐正匡國功臣故節度左押衙親衛第三都指揮使靜海鎮遏使銀青光祿大夫檢校尚書右僕射御史上柱國朱府君墓誌銘府君諱行先字蘊之吳

府君諱行先字蘊之吳



郡人也曾祖憑皇不任祖真皇不任父敬端皇不任  
妣陳留阮氏太夫人揚名立身充于祖宗者惟府君  
耳府君少親戎律長習武經有摧鋒破敵之堅蘊戡  
難濟時之策猿臂燕頷完備將材始隸職于建寧都  
從高公彥所在征討累有功績尋高太傅分符雲渚  
府君亦隨于治所太傅用為心膂或鄰境有寇總握  
兵柄仗劍前驅無不望風瓦解滅寇之謀投醪之義  
備盡其妙以是聞于聖聽豐被寵嘉荐歷珥貂累陞  
八座益為雲守所重自渤海公厭世高澧亂行府君  
奮臂一呼率眾歸國時天下都元帥吳越國王親統  
全師撫寧郡縣以有功者宜加爵賞遂封協力勤王  
功臣尋封佐正匡國功臣加封右僕射仍委之靜海  
劇鎮府君之屯細柳也鉏耰荆棘版築城壘不日而  
就不恃其寵不勞于民卒乘輯睦鎮縣和同商農工  
賈不改其業親載耒耜遍植桑麻以備祇奉使臣供  
承南北十五年內外無間言蓋恩威並行緩猛得所  
矣以寶大元年夏四月得疾弗興至秋七月二十三  
日終于靜海鎮之官舍享年七十有二府君娶汝南  
周氏隴西彭氏清河張氏三夫人皆肅雍和鳴內外  
婉順主喪祭者惟彭氏張氏居其右焉有子八人長

曰從訓曉味雲泉不樂仕宦侍膳于周氏之側次曰  
智紹在方袍之下次曰元晟節度使正散將為人溫  
恭尤尚儒雅娶諸賢鎮遏使楚牧韓章司徒愛女次  
曰元果節度正散將銀青光祿大夫檢校太子賓客  
兼監察御史狀貌瑰偉智畧出眾識量宏博不拘小  
節親族間咸曰有父風娶聞人氏次曰元昇節度下  
將獮得好勇真將軍之器娶鄭氏次曰元寶娶章氏  
次曰元勝元贊未娶皆堂堂之軀或親弓馬或閱詩  
書分掌家事無不幹濟女三人長適潁川氏西都軍  
將都都知兵馬使明川羅使陳師靖僕射之子某  
先府君逝次適清河氏建寧都虞侯張全尚書之子  
某次適上亭鎮遏使翁錫尚書之孫節度計擊使上  
亭鎮遏將元昉之子繼貞第三人行存行勤行忠初  
府君之寢疾也殿下遣中使三賜湯藥及啟手足命  
侍臣持祭奠厚加贈贈內外親戚莫不感泣有以見  
君親之道始終兩全矣明州鄒侯太傅莫贈尤異焉  
府君世墓在湖州烏程縣不克歸葬續致桑梓在開  
元府海鹽縣以其年歲次甲申十一月乙未朔六月  
庚子曆于本縣德政鄉通福里澈墅村之原禮也鸞  
與府君幸同玉事備熟德美泊有葬日令子元晟元



杲泣血而拜請予撰銘誌堅免不從遂命筆聊紀年  
代安敢飾詞乃擬實而為誌銘曰挺生英特邈爾奇  
形素蘊豹畧能精武經戈鋌再舉氛侵廓清從茲勇  
冠大播家聲盛績旣彰威名遂振靜守謙敬動知逆  
順惟此侯王賞其忠信不有殊功邗遷劇鎮匡吳志  
大佐越功全一人注意百辟推賢方務剖竹宜分重  
權孰謂梁木俄隨逝川生作忠臣沒留遺策眷彼令  
嗣恭承帝澤丹旒斯引玄宮已闢萬歲千秋芳壘永  
隔撰人謝鶚也董穀雜存曰按五代史載吳越國王  
錢鏐歐陽公得其封落星石制書稱寶正六年辛卯  
始知其嘗改元余家舊藏武原志內載土中所得朱  
府君墓銘則知尚有寶大二年在甲申乙酉歲又自  
稱為義忠國惜  
歐公不及見耳

### 屠氏墓

屠氏今居郡城為大姓吳越時屠瓌智同高

十六里澉川青山之德政鄉歸仁里開化村屠康傳  
公砧基手記云此吾先世祖也正德七年海鹽十三  
都人劓地得此碑碑今錄于後 吳越故忠義軍匡  
國功臣越州都指揮使前授常州刺史特贈武康節

度使銀青光祿大夫檢校尚書右僕射開府儀同三  
司上柱國海鹽屠將軍墓誌銘將軍姓屠氏諱瓌智  
字寶光其先河東人晉將軍屠擊之後也大父某避  
地於吳家於澉川之青山遂世為蘇州海鹽人太夫  
人吳郡顧氏夢抱璧有光生將軍遂以瓌智名焉將  
軍生而姿貌偉杰鷹揚虎視少負勇畧更善屬文累  
舉不第歷遊名山見疆宇幅裂復還故鄉吳越國王  
初起鄉兵拒黃巢將軍從之時時以籌畫進遂與幕  
府謀議董庶人昌僭號將軍首勸討賊昌誅以功授  
指揮使乾寧四年丁巳同顧全武王第鎮自海道救  
嘉禾生擒賊號將楊勝頓金等二十餘人計功將軍  
得中上遙領常州刺史職明年春再遷越州指揮使  
光化元年十一月衢州刺史陳茂叛將軍又同全武  
等討平之三年調守湖州授制於同郡高公彥天復  
二年壬戌武勇都指揮使徐縮許再思叛於府城將  
及內城刺史高公聞之遣子渭與將軍同赴難渭曰  
今日不利彥曰赴急難何以吉辰為將軍按劍曰違  
主之命不忠畏縮不前無勇畧忠畧勇丈夫分也借  
渭直抵靈隱山賊壘賊勢甚盛合圍數重二人自朝  
戰至于日晡身斃百處奮力一呼手搏賊魁數人即



馬上刃之矢盡援絕爲賊伏兵所害王念將軍徒步從戎卒歿國難以衣冠歸葬於開元府海鹽縣南三十六里澈川之青山德政鄉歸仁里開化村今天寶五年特贈忠義軍匡國功臣武康節度使銀青光祿大夫檢校尚書右僕射開府儀同三司上柱國將軍生于唐宣宗大中五年辛未歿事于昭宗天復二年壬戌八月庚寅享年五十有二娶錢氏子三長龍驤授澈川鎮遏使娶聞人氏次子昱節度使銀青光祿大夫娶都虞候鎮遏使鄭公良女三曰晟吳興刺史高公掌書記判官娶同里許氏諸孫皆幼公嘗有詠志詩曰輕身都是義狗主始爲忠至是竟符其讖云初未有誌至是龍驤屬余爲之而復系以銘銘曰河山毓瑞帶礪鍾英徒步奮跡赫聲濯靈么曆叛梗九首憑凌磨牙王國吮血蒼生公怒鸞發捷伐擊磨矢屠獾獠以身殉君功高盟府猷壯干城光啓前烈垂裕後昆忠存續襲勳土褒旌連崗崇寔妥綏義蒐桓趙世選焜燿貞珉丞相皮光業撰屠氏家譜云屠曾以元至治三年浙解隱居卒葬于州東北一里今演武場是也若康僖公墓又在乍浦陳山之麓矣

### 魯氏墓

按魯氏墓多在平湖魯應龍括異志云南林

地時高祖頗明地理將鑿池引水至墓之西南夜夢一婦人請曰妾有墓在正南所開池處君戒役夫勿傷吾墓當有厚報次日果於其地得金數塊遂用以營寺至今其墓尚存又云光嚴庵正議之瑩頰湖古勝爲一方冠東南皆枕湖遠峯列如筆架一塔屹於波心文鋒挺立登名仕版者每有其人視他族爲最盛淳祐間忽樹間出煙一道遠近莫不驚異有細視之者見其間有蠓蚋不可計從樹中出終日不絕蓋此煙卽此所成不知何異又云上舍伯祖巽舊葬惹山後忽卜兆於丁村遂遷葬焉其中紫藤蟠固棺上或云穴有紫藤此吉徵也遂斫藤遷之自後其家浸衰今按柳公郡志云魯壽寧墓當湖東南二百五十步壽寧字景修宋宣教郎致仕累官正議大夫魯文謚墓當湖東五里文謚字子順官至司理郎壽寧之孫括異志所云正議墓者蓋指壽寧墓也

### 常家墳

徐泰志云常家墳不一處南橫山荆山雪溪呂塚各各之今在涇塘橋西者不知何人所



葬相傳元季嘗爲苗軍所發後子孫徙居艷城遂成  
荒丘 董毅志云按常同七世孫所立碑云常氏六  
世顯祖少師謚忠毅公同邛州人也建炎南渡子孫  
遂居海鹽本末載存家傳高祖 令孫晦跡澈川

曾大父 營葬先人于入都平陸曾叔祖上舍棠

營葬先人于十三都 颺山之原本派乏嗣過 父宣  
教庶承繼恐後不知二塋初業之艱難故述各墳本  
末刻石以貽諸後云云餘皆破碎不可讀 常氏家

譜曰宋端明殿學士吏部尚書常長孺諱楸墓在五  
都常墳橋國學進士常世卿諱令孫墓在七都呂塚

二墓因雷州公士昌卒官失之至成化中侍郎公麟  
知州公龍查復至嘉靖四十年又爲隣人所據萬曆  
三年楚雄公文烱白郡太  
守李公始勘明給帖承管

陸尚書墓豐山 舊志未詳何人  
疑卽陸峻也

楊宣慰墳 澈水志曰宣慰墳有三所一在颺山一在  
荆山一在吳家山其在吳家山者弘治間

爲人所發夜入見以栢梁栢柱鐵索懸棺金果五盤  
以一大漁簾蒲裝之出天明視之皆土果也衆目夜

視甚真信變化矣止餘一硯甚佳形如  
風字賣于天寧僧舍今歸嘉禾項氏

陶給事墓夾山 見前

沈孝子墓豐山 澈水志云孝子名壽康墓久荒無知  
者正德末知府徐公盈考郡志嘉之

移文邑宰張公廉訪其墓已爲居民  
所佔求其後給還之仍進祀鄉賢

朱通政侃墓社稷壇後

葉侍郎春墓三都大易鄉平湖原 宣德八年 諭祭  
文曰爾以才選歷

事三朝官於中外克勤克慎繼授使命俾察除奸慝  
以安良善益盡乃心用稱任使爰陞貳于秋官曾未

久而告疾昇之醫藥踰時弗瘳命歸田里尚祈痊復  
詩音遽來良深悼歎茲特賜祭以示眷待 公墓子

孫失守今邑侯樊公維城贖而修葺之給其後人名  
曉若憲者奉祀爲文告之其略曰宣德去國初未遠

俗尚質樸居官者得獨行一意取其足達于王事而  
已矣不相責望以體面人情也常讀信史見先生自



請按浙一事此非處治朝遇明主必不能爲奉詔而行復命無距此固 聖天子見萬里之明而先生之直氣勁節真不可泯也先生以仁故能行其剛吾聞仁者必壽亦必祿及子孫聞之文貞公墓誌中道先生壽矣乃某訪先生子孫僅有存者皆農功客作者耳昔李青蓮不過文士慕遺風者尚猶爲祿其女行其書何況先生功德在人高山可仰謬謬清風巖巖喬嶽而可無以表揚之乎二人來見云係先生七世孫家傳聖諭墓碑徵之而信猶自掩面稽顙嘆墓田已更于他姓石碣亦斷于樵人泫然久之方謀脩復用布諸塋

### 張黃門寧墓順寧橋南

公自撰碑曰寧與先孺人墓南向居祖墓右際側室附葬

六穴皆循右東向北上以象生序頃見黃博士子婦有至節死無所歸寧亟求其遺骸爲歛葬已失一臂故六穴皆未歿而預爲壙宅所以虞不備皆未葬而先爲表著所以備不虞事難竟言勢難盡保寧豈耄讎至此亦自盡其心以聽乎天而已 又云海鹽潮

之以壤樹寧家素貧薄夙承先訓每葬惟謹具衣衾棺槨男束木帶女戴漆冠約髮削黃楊木爲簪喪儀用紙明器用木金銀珠玉一毫不附於體寧系出吳興身在老獨不可以不識 公絕後墓荒第吳公昂

諸生時建議修復之萬曆間鄭治中心材復修之天啓三年邑令樊公維城下令禁樵采捐俸重葺爲文以祭曰某嘗讀國史仰先生鳴鳳之高風栖鸞之善政而又慨先生之不容于時使大厦異材偏支于一隅數天霖雨但澤于一郡則宰相之過也當其時高位大祿者不知幾許人而至今唯稱給諫方洲張先生則信乎過眼之繁華不足據矣牛山同盡而向日之排先生者能與先生爭乎且將蕩爲冷風陰爲野土散爲蟲沙無知之物而先生在太虛之中靈光獨迸卽當時爲先生憐者同先生謫者亦有數人雖不能救而猶賴先生以傳其他唯曙躡嚙之夫非不免一時之謗而至今誰復知之者先生固非如而夫者取能不容也某于崇祀旣禮先生之主于修文又讀先生之書可以無憾獨今春有人稱先生墓垣頽廢且子孫皆零落無能存活者因召而問之慨然命駕循視碑碣雖無磷鑿而寢門果半岬其中亦鞠爲茂



草矣因令守祀者掃而拜之惡夫涕之無從也遂具  
特性兼助薄俸修葺其壞阨不知先生之來否也

**鄭尚書曉墓勾塍山**  
山在歙城南大數十畝土色黃中有小黃石後人取其土石存

僅十二三 隆慶元年諭祭文二 卿以端潔之行

闕敏之才發解鄉闈擢秀甲第職兵曹則飭戎懋績

任銓司則典選稱平官偶左遷名愈奕起久敷歷于

中外茂宣樹乎聲猷總務漕臺國儲允資以克裕兼

撫淮甸夷氛實賴以蕩除少宰貳天曹不著公清之

譽中丞理戎政益蓄撻伐之威特晉秋卿克協明允

倚任方切勤勞足嘉乃謝事以退休猶一德之不懈

向將召用忽報長終式念往勤之多用頒卹典顧軫

老成之逝爰贈官階既節惠以易名仍賜葬而諭祭

爾靈不昧尚克歆承 卿才能敏達學識宏深績著

兩京官歷四祀尚冀謨猷之畢究忽聞耆彥之淪亾

方切悼傷倏臨窆窆載申諭祭用示優恩英爽有知

祇承 渥命

**齊三士墓** 皇象墓 顧安饒墓 天女墓

唐吳地 記曰縣

東十五里有公孫捷陳開強古治子三墳俱事齊景

公勇烈有功晏子欲去之以桃二顆令言功三人同

日而歿葬於此今乍浦齊景鄉地也按諸葛亮梁甫

吟步出齊城門遙望蕩陰里里有三墳纍纍正相

似問是誰家墓田疆古治子據此三士墓在齊地矣

然搜神記載古治子拔劍斬鼃在蜀與長沙間水經

注以為並齊景所不至疑而存之則此地之有三士

墓亦不必深辨其真偽耳 嘉禾志皇象字休明吳

廣陵江都人善隸書墓在縣東北二十里高一丈周

四十五步又云顧安饒陳人也仕至鴻臚卿墓在海

鹽東北五十里高一丈三尺周七十步又云天女墓

在海鹽縣東北三十五里乍浦村人有侵犯者即有

土蜂黑氣逼人以此諸墓並析屬平湖又舊志載田

橫墓縣東南十八里徐泰云橫赴召未至洛陽三十

里自殺墓在偃師縣呂塚縣西南三十里仇志以為

呂蒙冢志之存疑云 又王文祿海寧衛志云本衛

墳瑩都指揮王貴俊軒臣勲國贊葬開濟鄉西古蕩

先公佐葬白苧待葑原指揮王信商允余鑑劉清王

憲彭玉千戶張雄封君徐昂義士仇必達必顯高逆

胡寬胡宏葬西古蕩指揮王方馬文方正嚴政衛鎮

海鹽縣圖經卷三

五五



撫張武千戶蔡暉黎勝陶炳封君張翥縣丞朱瑾子  
疎孫佐俱葬北古蕩指揮李安姚清采旺葬五里窰  
指揮尚鷹葬西停駕橋指揮彭輅葬尚胥廟後指揮  
竹喚葬南停駕橋指揮崔英葬豐山陽不能備述存  
其大者以例見安得有司能行周官之法存澤及枯  
骨之心遇造冊年令各都具報纂錄以附縣志免侵  
掘之慘 近有掘北門外冢得墓碑迺是宣德中廣  
文沈盛墓有誌銘莫用行撰莫布衣能文為張靖之  
所推樊侯罪發墓者為改葬之邑人鄭端胤有詩吊  
云古木彫殘陌上墳哀猿聲慘不堪聞憐君今日知  
名姓好事爭傳  
窰石文附記此

### 城隍廟

### 海神廟

### 楊公祠

### 三公祠

以上祠廟並詳見職署秩記內

### 聖妃廟

篇

一在縣西北二百五十步十字街北一在澈浦南門一在乍浦海口並衛所香火見成海

### 黃道廟

一在縣西南四十里鸕鷀湖上一在澈浦鎮黃道山上 宋志長牆山之阿有黃道神祠

初在石帆村因陷于海建炎二年僧若中遷之山寶慶三年都運諸大卿請到廟額稱顯應侯廟廟中有神曰揚太尉尤靈客舟渡海必禱之 續澈水志云顯應侯廟在龍眼潭之上宋時番舶皆聚于此廟神甚靈自國朝禁海之後潭湮塞為平沙不復可泊廟廢為荒基者二百年嘉靖癸丑倭奴入犯叅將盧鏜以舟師守澈方患無所灣泊有一卒登巖伐廟前栢為舵幹神忽憑之言曰汝設伐吾栢耶盧異焉乃祀之議朔新祠令揮使徐行健董役越月祠成俄而潮衝沙磧內徙里餘龍眼潭復其故迹古岸宛然測之無底戰艦畢集祠下矣其異如此

### 陳山龍君行祠

永樂志云在縣西南一里福業院廊右乃歲旱禱雨之所始於宋縣令李



直養建迨元至元縣尹顧泳重修今歲久摧圯而碑  
碣猶存 宋龔頤正陳山顯濟廟記曰秀州海鹽縣  
乍浦之陳山有靈湫居山之半水旱不涸不溢山椒  
有大石盤陀歲三月朔後十有八日吳之陽山及此  
山多雲霧晦冥雷雨之變俗傳爲白龍君以是日生  
於陽山而歸藏其母於是焉故有祠事甚嚴州邑旱  
潦致禱酌酒石上有物蜿蜒即見崇寧三年部使者  
以聞詔以顯濟名其廟宣和五年又以昭蘇旱虐始  
封龍君爲淵靈侯紹熙元年四月不雨至于六月唯  
陽李直養攝邑華亭部使者以才薦畀令事還入境  
潛河已斷流亟走祠下俄有蜿蜒舉體金色見神座  
上直養迎揖即循其左臂而上至巾幘因請歸醮祠  
復循而上如初奩中出四龍子如粟圍境驚異見所  
未有閱三日大雨霑洽溝澮畢通苗稿而興誕寘蜿  
蜒及奩子于石頃之俱無所見七月又早申禱旋應  
適如其時日是歲進封龍君爲廣惠淵靈侯而龍母  
爲慶善夫人命綽繼下神報益章明年三月直養以  
祠宇敗撓弗稱夫上命與神施遂哀衆力爲建二大  
殿鼎新像設且列四神像于後以表四龍子之異迺  
四月龍見于龍母殿自空而下其大如柱光彩奪目

觀者震悸不設仰視五月廟僧夢神人告將迎龍淮  
上有日計海邑之雨可支兩旬爾自是開霽復雨之  
日果再浹也又明年三月直養遣工繪於壁至則壁  
尚濕不可爲也念且歸其夕夢金冠白衣神人曰令  
俾爾盡龍龍實難盡工曰盡非難壁濕爾應曰乾矣  
工起視壁果已乾如戒而成有蜿蜒正白復見神座  
睨視壁間久之躍而入于花壺直養請于郡徙典福  
院勅廟之右以廣僧居而嚴香火以狀屬楚國龔頤  
正紀于麗牲之石夫龍之爲神變化無方與天爲仁  
孰能測識上古之世爲人秦擾有道之時遊其宮沼  
迨及後來雖渺焉弗覲而乘雲御氣開闔化樞呼吸  
風雷主持賜雨司民大命克配君德有不可誣者今  
茲龍君之神應暴著一時聳動觀聽春秋祈報斯民  
是估閱千萬禩宜無斃頤正不設沒其實姑彙括此  
次如右 元尹顧泳重建福業院陳山龍君行祠記  
曰海鹽爲秀之屬邑去縣東北三十六里陳山龍祠  
在焉實白龍君典雨之所今縣南福業院歸然猶存  
於廊之右者龍君行祠也余奉皇太子令旨勅試茲  
邑壬午之六月早魁爲雷農民相視待斃七月朔亟  
走陳山禱曰今日非特農民無一飽望朝廷公租苗



額七萬五千有奇尤令責也言甫出雲陣蔽天大雨沛然而下越一日雲漢昭回人心皇皇如昨遂帥官僚士友暨僧道耆老復禱於行宮蓋數日又詣陳山請于龍湫得顯蹟以歸安奉余曩得馬真人正印就私廨又作法檄雷霆以佐其神果雨民大悅既霑既足歲乃大熟癸未五月末尤旱余詣行宮如前禱不懼益虔大雨三日農民餘望未洽再禱復檄雷次夜雨若傾民望始慰載惟行宮初始邑令李公直養垂百年祠宇監圯因捐俸鼎新之明樓雲聳萃軒翼迴如嬪部從像式一一修舉復創二坊東以起潛名西以喜雨名七月十九日辛未立木之間日光赫奕後忽晦陰大雨若期而至二十二日甲戌亭午遣工爲龍君施塗繪不俄頃雷電以風大龍見繼而小龍又見儼然父子之在其上及上昇即雨水盈尺時邑人沈疇耆老孫時懋道正葉師純等萬目共睹莫不悚怖余之事龍君者甚至而龍君之報余亦不薄矣謹識歲月爲之記以永其傳元至元二十年歲次癸未仲秋吉辰勅授從仕郎海鹽縣尹顧泳撰文宣授顯武將軍管軍千戶鎮守海鹽縣張士特同建宣授通真靈妙宏教法師浙西道道敎提點住持西太一宮

兼元真萬壽宮事馬世良立石宣授太中大夫嘉興路總管兼府尹趙若秀篆蓋

**太公呂望廟** 初在縣東一百五十步吳地志云太公

淪于海今繩民立于甘泉繩去縣西南一十五里俗名三官堂邑人鍾梁有碑記

**尚胥廟** 縣西北一十里尚胥橋之北 徐志云晉段

與橋名皆及其兄尚其詳莫考 仇志云按嘉禾志

伍子胥入吳至此越絕書曰耕於吳之南鄙或卽此地也吳人以子胥不忘父讐爲孝不寒兄盟爲友盡

謀於吳爲忠傷其死之冤酷故併其兄尚祀焉宋初

封子胥爲清忠英烈威惠獻王德祐元年徐林爲之

記里社宋瑄詹智等立石元大德三年奉敕加封忠

孝威惠顯聖王 勅云上天眷命皇帝聖旨吳大夫

顯神真烈有若是哉褒崇豈容緩者汝平水土旣無



有欲得廟基爲墓者議別遷以筭卜之一片植地一片飛梁上因飭廟新其像云 張寧重修尚胥廟碑記古守臣鎮將大有功德於民歿而不能忘也則相與立廟以祀非若今丘墟叢薄間纍然土木瀆亂無文者之比若大夫伍公子胥以正諫被讒歿非其命史稱吳人憐之爲立祠江上命曰胥山海鹽開濟鄉去胥山三百里故有尚胥橋循橋而北有尚胥廟豈公將兵時伐楚破越嘗經行其間有按兵息民之澤或言諫素著民間梓里扶目之語憐而祠之不獨胥山而開濟之廟亦其類耶公兄尚實歿於楚今橋廟之名及尚又豈以奔吳之謀實尚成之而懷德推本耶夫名久者其行必碩報重者其施必深公正氣在天地間四方上下宜有浩然常存者此廟祀所以愈久而益不忘也廟故有田若干畝皆鄉人捐已業以奉歲祀者侵鬻始盡正統中邑處士張景一常脩復而典守非人尋踏故轍其子太學生彝嘏念存歿積十有餘年而廟貌田祀始復舊觀可

### 秦始皇廟

縣南一十八里秦駐山按吳地志云秦始皇廟失其建立年代時日 董穀澗水志

曰秦始皇廟在秦駐山上今廟前有飄松一株伐去復生時顯戈甲光怪之異 王文祿文獻志載秦始皇廟碑云前覽灼灼後聖茂哉始皇承天越受帝命業超上古殲周滅鄭七雄靡餘六國是併功齊太古道溪前王埒炎均昊美冠額黃道靈七代敬構商堂縱聖凝神將記百幾菴藹餘輝蜚聲萬祀梁天監二年八月二十三日右判史敬素立石今破碎不存按宋王象之輿地碑記目曰秦始皇碑在嘉興縣意卽此碑然不知何年移至郡城耳

### 秦皇美人廟

樂資九州志曰縣有秦逕山秦始皇

### 白馬廟

在縣北一十八里砂腰村西永樂志云舊無名義今不可考按宋魯應龍括異志云古老

相傳當湖初陷時白沃使君躍馬疾走不及遂駐馬以鞭指得湖東南一角水至不沒今此地獨高後人于此立廟一在砂腰一在乍浦皆稱白沃廟也

### 金山顯忠行廟

祀漢大將軍霍光永樂志云在縣東北九十里廣陳鎮元至大二年建一



在縣東北五十五里當湖市宋建炎三年將仕郎曾壽淵宣教郎致仕賜緋魚袋曾壽寧建朝請郎提舉兩浙路市舶司賜緋魚袋曾詹有記云我宋重熙百神受職宣和二年始賜廟額曰顯忠廟後三年誥封忠烈公公策名孝武擁昭立宣厥功懋焉生為偉人沒為明神民隨其所向奉之如大禹之于會稽泰伯季札之于姑蘇伍子胥之于錢塘馬伏波之于南海是文多不具載今並析屬平湖縣矣本縣行廟在東關外一里海上宋宣和六年建紹熙中縣令李直養重修吳越國史吳主皓嘗被疾有神降小黃門云華亭鹹塘風濤為害非人力能防海鹽縣治一旦陷為湖無大神護臣漢之霍光也臣部黨有力當鎮之可免翼日皓疾愈遂立廟小金山宣和二年賜額顯忠五年封忠烈公建炎三年辛道宗領舟師由海道護行在所奏加封順濟四年加昭應又金山神部有英烈錢侯配享雲間志云侯閩人行七嘗為商浮海至廟下歎息願事忠臣即叉手立化宋與金戰有陰兵旌旗著號華亭錢太尉字已而虜勢披靡因錫今封淳祐中趙孟堅碑畧云季夏月念二日侯生辰公海祭祠在在加謹鹽商海估寨伍亭丁社鼓喧迎香華羅供侯初非衣逢掖道先王者卒能效順佐拜殄醜虜使居廟堂職臣事殺身成仁夫豈難能切鄙夫身縻好爵畏事齷齪當言不斷口若置笄鼠計自營盼視同列苟利飲啄縮縮循牆鬼域斯靡何有何無若拜侯祠有泚其顙因述侯事夙心忠鯁不覺宣露云

### 馮將軍廟

在縣北一十八里宋端平三年建云是馮異也

### 太子廟

縣西北二里不詳所始邑人姚禎朱瑾以為祀皇甫嵩蓋太尉廟也錢薇有記曰皇甫嵩

漢中平間破黃巾官拜太尉角之起荆揚八州騷應鹽揚州屬地亦在角亂中則鹽亦太尉經畧地也太尉有功吾鹽顧不當廟食哉今楊龍金誠等捐金構宇廟貌一新予祖墓在廟東嘗因土人言進謁禮拜英風灑氣猶使人低回不忍去因廣究其說以告來者

### 關帝廟

一在城中紫虛觀今為海寧衛香火詳見戊海篇一在城北偏東嶽行祠中宋志云建炎

四年正月有關將領敗兵入海避虜過海鹽謁東嶽廟關羽祠見塑像卒持刀柄離地出舊塑尺許敬畏



之不敢為變而去又燬作二城並有廟為香火亦見戊海篇

**步公廟** 縣南楊橋下元大德三年建祀吳令步騭萬曆四十六年重建俗呼為步總管廟云

**陸司空廟** 縣西南三十六里圖經以為為陸四公或以為陸玩未詳

**醫靈道院** 縣西南三十六里澉浦鎮青山西南宋志云開熙三年里人孟毅夢神語曰吾聞中

吳真君當食此方福祐斯民晨見海中有一主浮至毅因捨基砌殿尊奉士人禱病多驗今春月進香者甚眾百里咸集呼為真君堂廟前有井水能愈疾人多汲之沈友儒記嘉靖甲寅歲倭夷縱火焚祠火不能焚遂駭去萬曆丁亥道上沈岐山重建殿

**蘇驃騎廟** 縣西一百五十步按嘉禾誌梁大同間立碑圖經云名舉字子羽封烏程侯葬金牛

山北宋高祖嘗夢其神因贈平南將軍明帝加賜持節都督征北大將軍廟今廢惟金牛山有廟尚存俗呼為阜蘇

二將軍廟

**吳越王廟** 澉浦鎮西南三里澉墅村宋崇寧間建祀吳越國王錢鏐以唐末錢氏據吳越地也

今俗訛為吳越二大王兼塑二王像非

**黃郎中廟** 宋志縣衙前相傳為古賢令生祠知縣何執中重建林仰李直養繼修今廢元姚

桐壽云州衙前有黃郎中廟相傳是前代賢令故立廟于此考之舊記惟紹興間有黃昱乾道間有黃綸然廟為何執中重建則何又先于二黃竟不知為誰何執中修廟碑記曰黃公不知何代不知何名亦不知何許人惟此中舊老云公為縣有善政入民民不解于心相與尸祝者又不知幾何年今廟且頽圯民復奉主環泣請余新之余惟人莫親于祖先然親盡則毀茲黃公以前朝一令世何遠也世遠則政隔澤無及也世與澤兩不可知則心所不屬也而民猶戀戀若不釋然者是豈人情哉我知其以前令勸後令耳以為彼善為民民亦不忘雖千百世不改則今之為牧者曷不盡若黃公使後世不忘若今日之不忘黃公也余亦勉承民志重為建祠以副其不忘黃公者余豈敢望民不忘如黃公也哉



**魯公祠**

在縣南思魯橋之左慈會寺之右北向祀宋令魯公宗道詳見宦蹟中元姚桐壽云魯

簡肅風範凜凜載在史冊每一繙誦未嘗不想見其為人余始至州謁公祠祠旁有思魯橋壁端有上箋詞州民有疑輒問凶吉如響公之精靈不昧更有如此者柱上有聯云鳥去古祠留鳥翼名從青史識魚頭是縣令蔣行簡所書永樂志云公祠并入黃郎中主亦名二賢祠高巽志有過二賢祠詩云思魯橋邊月較明二賢祠下水偏清如何水月無情物也重當年宰邑名後併為慈會寺祠遂廢萬曆中車公大任由郡太守擢兵憲采邑人議復之先此諸生馮志立憤公祠之阻於復為文吊魯公夜夢公于車上得相見至是果復於車公相距八年云

**岳武穆王廟**

澉水志云在千戶所公廨左嘉靖癸丑以後倭夷寇海上屢至城下官兵悉力

捍禦百戶余勳即舜臣默禱于王城上忽見神兵數輩約長丈餘金戈鍊馬出入雲端自是我師屢捷於是勳等因申請建精忠祠以答靈昭實戊午歲也

**閻史君廟**

縣東北一不步城壕上

**齊景公廟**

在縣東北三十六里今析屬平湖附記于此按嘉禾志云耆老相傳景公遵海而南

至此後人懷之故立廟焉詳鄉圖中辨其誤不贅舊有廟碑王象之碑日中載之今亦無考矣

**資聖寺**

永樂志云在縣治西五十步本晉右將軍戴威宅一日井中發五色光威異之遂捨為寺

名光興寺威為伽藍神事見吳郡陸崧塔記乾祐中改重光宋祥符中改普明院天禧二年賜改今各元末兵燹國朝定為教寺洪武十年僧法亮重建佛殿山門鐘樓永樂九年寺僧法亮又建方丈重脩觀音殿弘治志云洪熙元年僧會宗玘以寺基為隣所占方丈觀音殿宣德十年僧會宗玘以寺基為隣所占奏復之正統七年燬於隣火宗玘與汝鉅元瞻元暉重建鐘樓輪藏及彌陀殿山門廊廡方丈僧寮凡百十餘楹嘉靖中山門火萬曆初年復募建普明院舊記曰此寺有寶塔極高峻層層用燈點照東海行舟者皆望此為標的功為甚宏有海濱業戶其泛海入洋口接鮮風濤驟惡舟楫悉壞俱溺於海而歿



其妻日夕號泣一夕夢夫歸曰我未出海時先夢神告曰來日有風波之厄不可往吾不信遂歿於此初墜海時彈指隨波已去數百里神欲救我不可及今在海潮鬼部中極苦每月朔上皆我輩推擁而來他佛事祭享皆爲諸鬼奪去不可得獨有資聖塔燈光明功德浩大耳其妻因鬻家費入寺設燈次夕又夢夫來謝云今得升一等矣按此或卽陸崧記也王文祿曰資聖塔災後有遊僧欲重建撤基予齟齬猶及見塔心青石丈餘上鐫有經文可識云後功竟不成宋紹興十五年重修資聖寺記曰昔佛在舍衛國演說正法誨導群生時有給孤獨長者爲求祇陀園林欲營精舍諸佛居之祇陀未之許也長者乃顧左右輦金徧布于地祇陀驚喜卽以奉施然後精舍立焉按毘奈耶律云西域佛堂曰健陀俱脂此云香室未有堂殿之稱也然佛之闡化或居天上或在人間四眾歸依人天畢集有稱普光明殿者有稱善法堂者蓋神通變化梵譯所傳豈可得而擬議哉逮像教流通入于震旦白馬名於漢建初起於吳歷代相承益修齋戒緇流雲集列刹相望殿宇之制極於尊崇歷以鷓尾塗以丹雘巍乎無以加矣海鹽縣資聖

寺當邑之中晉右將軍戴威施宅爲之歷年滋久興廢不常皇朝承平再二百年其徒日加營繕凡所以爲浮屠壯觀者靡不備具建炎已酉兵革之難及於海隅屋數百楹一夕煨燼越三載有比丘茂實可舒請于其師履常曰是大伽藍乃古道場異時過門者莫不瞻禮今爲瓦礫荆棘之墟寧能弗恤邪常曰吾慮之久矣顧衰老不能藏事汝等共勉之於是二比丘奔走四方徧求擅越道俗傾心咸思喜捨乃以紹興乙卯秋八月丁未初建大殿軒楹前敞基陛隆峻又闢齋堂于其後爲屋合五十有四楹命東都孟道一造釋迦世尊一會七像於殿普門大士於堂自朔謀七年而殿成又七年而像設備凡爲錢三千一百萬有奇由一金一縷之施積累以成其視向之祇園精舍功與齊而力倍之於是儀相端嚴棟宇宏麗金碧輝映觀者肅然皆嘆其落成之速而莫知經營之勞歲月之久也如來教通幽顯道濟生歿爲苦海之舟航揭昏衢之日月以故人人悅歸嚮之而其徒又多才智強敏之士咸能勤苦服役忍辱謙下執心堅固不可爲奪宜乎所求必獲所爲必成矣余觀茲寺故迹墮廢者尚多使其至誠不息遲之以久則復



還舊觀因緣果滿歛忽變現若化城然何難之有予  
方僑寓於是邦庶幾及見之紹興十五年十二月辛  
未朔左朝奉大夫克徽猷閣待制提舉江州太平觀  
平原縣開國伯李正民記 寺有大隱禪室元末寺  
僧壽量有戒行嘗絕江浮淮以遊湖湘之間泛彭蠡  
過洞庭登祝融望大庾還至天目傳法于中峯大師  
行脚于四遠凡三十年于是歸隱于寺題其棲禪之  
室曰大隱時宣城貢師泰爲總管以張氏陷平江脫  
身易姓名爲端木氏嘗寓資聖寺與量相得甚懽因  
述其意爲作大隱記載師泰禮部集中 邑人彭宗  
孟重脩資聖寺并塑像建閣疏原夫神躍自然須達  
因之布地淡法冥契迦蘭所以施園坐摩竭之鉢羅  
成等正覺現閻浮之形體妙顯莊嚴建白馬之開綠  
分青鶯而闡化金篦前引道風扇江左之區寶筏南  
來琳宇接滄瀛之勝眺茲名壤枕彼化城閭閻當四  
會之衝井邑辯三分之舊有晉國將戴威者風根惠  
識早悟前因鼎建伽藍構拓陋衆封之號特表法相  
淨名遺十笏之基肘後解金童倩波斯而儔像庭前  
脫朱轂借茶柰以轉輪銀龕承宜壽之光石壁映貝  
多之業世衰未殺天啟 真人驅席豹而闢邪山宛

其師子之座勸鯨鯢而迴定水依然龍步之宮握寶  
鏡以維新重昏夜曉灑甘露霖之徧潤大宅晨涼大千  
逢 真聖之期四衆同祝釐之願爰開皇極上配天  
都紫殿雲漢綴金鋪而綸爛緝壇煙屬交玉鎖而氤  
氲奏鳴鳳于天歌和仙韶之合節騰燭龍于慧炬雜  
庭燎之昭回幡幢與 御旆俱飄纓絡借 宸旒散  
彩衣冠萃止道俗駢歸並發海潮之音以勅崗陵之  
頌 聖人不世等釋迦之悉達多 天子萬年比彌  
陀之無量壽豈特洛陽晉代傳譯之拜徒虔天保宋  
年報上之名空寄而已哉然而業災間值塵劫偶逢  
屬醉象之交馳感蒼鵝之上擊蕭蕭灌莽不聞蒼筤  
之林蕩蕩尼連莫覩蓮花之朶金繩委地而將絕寶  
刹倚空而就傾八解之遙源恍惚津梁無地三昧之  
廣路躊躇接引何年明府喬公以宰官身修佛地果  
抽禪山之紫玉恰表玉衣朗智水之玄珠旋施珠網  
事良緣于福地追勝跡于香城選命住持俾圖興葺  
沙門正禮定宣等熏持精猛願力宏深十指可燃期  
續長明之慧焰百齡何恹誓填胥溺之愛河衣鉢是  
捐金檀並供白鶴空中下集青龍夢裡長流窺列棟  
于神模則長虹繚繞仰飛慶于幻染則彩霧輝煌白



大雄而暨祖堂亦苟完矣由重塔以及閣像將有待  
焉尚須衆力之共成用告十方之知識力祛貪網早  
植慈根或給孤徧地之金或長者作花之樹果浮觴  
引俱成彼岸之階藥聚砂延卽是靈山之簣淨財雲  
委真衆波馳海聖彌縫拂燼衢而就址天童潤色迦  
雲寶以交疏重開月面星毫坐照邪毘之國直借蛟  
臺屋閣交騰震旦之墟龕龕勿利之天厨厨菩提之  
果庶三十二相載瞻佛日之中天八十四儀長禮  
法王之御世 宋令何執中寄題壽師塔南軒詩焚  
修七十齡內外已圓成教相論因果冥心契寂生紙  
總應自白花砌本無情燕生觀浮世誰非走利名  
王守仁幼從海日公授徒資聖寺寺有杏花樓守仁  
詩云東風日日杏花開春雪多情故換胎素質翻疑  
同苦李淡粧新解學寒梅心成鐵石還誰賦凍合青  
枝亦任猜迷卻晚來沽酒處午橋真訝灞橋迴 張  
寧資聖古杏樓賞花詩向處招尋泛羽觴高樓花近  
淨年芳荒村暮雨曾沽酒梵境春風不出牆老我重  
思曲江院是誰今卧午橋庄相逢盡是憑欄者莫道  
偷閑過  
竹房

### 天寧永祚禪寺

弘治志云在縣治西三里基九十餘  
畝前臨烏坵塘水四面繞之初名禪

悅院宋崇寧四年賜今額淳熙已酉僧長溪翔建佛  
殿山門寶塔嘉定二年永模建圓通殿 國朝洪武  
初梵琦重建佛閣法堂并塔七級三十年僧原偉重  
脩三十五年正觀建方丈可齋脩蓋佛殿宣德間僧  
惟軾建僧堂正統七年僧宗舉建西方殿山門道龕  
文勝繼建鍾樓輪藏殿廊廡成化九年德傑重建方  
丈二十年德瑋又復重修殿塔 嘉靖二年僧明秀  
重修寶塔十五年僧蕙與守純戒性修輪藏殿三十  
年僧浩大修正殿易木柱以石二十九年守村修寶  
塔易塔中版臺以石置守塔僧舍萬曆初真讓復修  
之先後塔工鄭端簡公及其子比部公出貲倡率尤  
多二十一年如印性元繼修三十七年僧思達修正  
殿轉藏殿鍾樓山門兩廊及建準提閣縣丞龔三台  
塑大像里人呂鳴治請大藏王應祥捨田飯僧一時  
樂施者甚衆云 元宣慰楊公報親齋糧記曰前浙  
西道宣慰少中楊公耐翁世居鹽之澉川孝行純篤  
根于天性考安撫總使公不幸棄養耐翁擗踊哭泣  
毀欲滅性至辛亥改任海道轉運萬戶督糧赴都太



夫人杜氏計聞棄官讀禮追慕劬勞之恩遂損捨寶  
鈔于杭之靈隱錢塘之萬壽姑蘇之承天餘姚之雲  
頂永嘉之江心普結善緣資薦二親而耐翁之心猶  
以爲未已也復損鈔米挽本州天寧住持永募訥翁  
補增大藏經文重建觀音寶殿于寺之東廡朱薨盡  
棟漏壁菩薩諸天聖像真然一新計其僧行之衆寡  
喜捨齋糧爲長生夏供選僧之廉潔者掌之每歲自  
結夏至于休夏瞻僧誦經永貽不朽耐翁之志非欲  
爲已求利益惟在資薦考妣二親莊嚴佛土而已其  
爲孝行庸有已耶訥翁少歷江湖戒行水潔實先政  
中丞榮祿公之所簡拔與余爲同鄉人予嘉少中耐  
翁克盡孝道又喜訥翁能成其事于是平書皇慶三  
年癸丑結制日勅授嘉興路海鹽州儒學教授徐思  
敬撰文將仕郎嘉興路海鹽州海砂場鹽司丞江正  
書朝散大夫嘉興路海鹽州知州兼勸農事朱維禎  
纂蓋 干佛閣在大殿後相傳僞吳取爲官殿遂廢  
宋濂碑云梵琦創大寶閣範銅鑄賢切干佛而毘盧  
遮那及曼殊師利普賢千手眼觀音諸像並真其中  
梵琦鎮海浮圖頌叙曰梵琦九歲出家便聞建塔  
功德最大往往默感於心天曆元年住持此寺時年

三十四矣至元統二年夢龍王獻寶因募塔緣檀施  
日臻後至元二年春龍化蛟變之形於艾室五彩畢  
備四方來觀之凡兩月而去其夏填築塔基三年丁  
丑九月二十三日起工建塔至辛巳歲塔成凡七層  
八面高二十四丈莊嚴綺麗見者無不頂禮瞻仰龍  
子復來隱現非一因祀爲應夢龍王越二十年兵興  
巴亥秋失寶款計白金爲兩者二百時謝事于郡城  
結菴衆請再領寺事而造輸石寶款以至正二十四  
年秋九月二十四日奉瓶修塔天雨寶花明年乙巳  
七月泥蓋方畢自丁丑至乙巳凡二十有九年矣  
碧里雜存云海鹽治在宋時去海稍遠後岬善崩漸  
薄城下而勢未已天寧寺僧琦楚石博學高才有道  
行各動朝野夜夢龍王獻珠遂募緣建塔以鎮海名  
之自是海岸不復淪徙迄今二百餘年巋然尚存高  
二百四十四尺制度比他塔殊勝正德間僧明秀修之  
余嘗爲之作記聞楚石初建時每一磚頂于首蹠而  
誦大悲呪一卷其愿力如此初成時勢稍偏忽一文  
滿城人聞空中語云天寧塔偏急往救之且乃正矣  
事在宋潛溪學士所撰誌中暨嘉靖乙卯二月寺僧  
一小暗室中忽有塔影在壁余往觀之乃倒影也五



層在壁二層并塔頂在地欄杆枋桷簷瓦分明如畫  
陰雨亦在晴則尤明余嘗睹野史中往往言塔影倒  
懸今乃親見云 萬曆三十一年重脩鎮海塔塔記曰  
若夫殷水各區武原舊邑天池浩漾于異維靈山從  
籠于南鄙化城遙控瀛壺之樹影依稀日窟高瞻度  
索之鷄聲咿啞屏茲雄堞枕彼洪濤寂寞打空城日  
聽奔騰萬馬喧逐侵古岸時驅戰鬪千群大地欲浮  
四封如筏非仗佛力之獲持安見神洲之鞏固郭西  
天寧古寺者勝關珠林境界依龍藏祇園金布寶蓋高  
寒淨界花飛精藍宵寤信足以廣利人天宣揚教法  
者矣勝國之季有楚石大師振跡緇流棲心白業五  
衍馳驟于口海三昧遊戲于心田爰創鎮海浮屠于  
斯旃檀淨域六時頂禮四眾皈依功匪聚沙誠堅摩  
踵娑竭聞經而變形波旬怖法而匿影青蓮的歷上  
蓋鬱藍之宮丹鷲巍峩俯瞰閻提之境天風與鈴鐸  
爭和日色共簷楹等麗阿育一十九處斯焉最勝舍  
利八萬四斗于此弢藏遂使蛟螭永遁衽席無虞緣  
啓一時澤流萬劫續有興壞代藉枝那語其歷脩碑  
記中不具論茲當萬曆癸卯零雨淋漓罡風激射漸  
消堵萃之霞標莫覩阿蘭之日彩不逢開土孰締淨

因寺僧涵碧元公募化邑人鍾祖保鍾祖述理學名  
英替裙華裔二慧競爽總擬南金三秀齊芬並屬東  
箭儒林屈指其先登內典服膺其兼贍悟感飄沫快  
同割錫喜捐白金若干鳩工庀材補敝易蠹欄楯之  
涯丹燦若暈飛塔卮之契合鏗然金注續紛集香花  
之雨嶮巖驚怖鵠之棲琉璃晃曜長明慧照于重昏  
黎庶駢闐永作登高之遐觀翬子之宮千村錯繡皎  
人之窟萬井恬熙事雖有漏福乃無壘敬致顛末勒  
之琬琰將使後來善信企景前修嗣續善緣云耳其  
未君元弼沈君儒宗並與佛門有願力此事多悉憑  
功得附載邑人吳中偉撰 西齋者在寺西偏其北  
與西皆有水縈之竹木叢生境頗幽勝琦師修西方  
觀念佛經行之處後琦召入金陵示寂天界弟子文  
屢奉骨歸葬即起塔於西齋宋濂立銘 古東林在  
寺東偏雪浪恩公爲涵碧題所構念佛處 天寧寺  
藏經碑記曰蓋聞如來宏憫顯化恒沙菩薩妙因轉  
輪濁界各隨根性開示方便故蘭臺石室之秘三乘  
九部之文莫不耀智炬於昏途浮慧舟於苦海俱傳  
心印接引聖凡祇以銀函東渡象負未勝貝葉南翻  
龍藏莫罄骨筆皮紙豈永其流刻玉懸針難窮其妙



今茲 聖王御世人天普覺廣布大都萬國同曉緣  
以人興斯焉有待海鹽天寧永祚禪寺者建自崇寧  
曾經劫火楚石嗣興昇成梵刹微言剩偈盡是津梁  
銀樹山花都爲說法浮圖插漢舍利騰光藏殿旋空  
香爐成蓋迄今業風傾墮奧義斯邈本寺比丘思達  
等領袖縮流誓弘大法爰請湛然大師闡揚聖教解  
脫迷縛琉璃大海如是潮音巖業秦峯都爲點石億  
兆雲集讚歎雷動爾時有善知識呂君鳴治者宿根  
上器廣布良因樹表月卿芥視天秩春秋六十有二  
道業彌崇精進匪懈即從大眾禮佛三匝致心皈命  
祈報四恩念色身之非妄追無始於本來父廸功郎  
觀光母王氏微現宰官未離生歿悲踈孺慕有同初  
歿願施三藏洞開十地從心田而出米復布地而成  
金鉢洗龍池閣飛鸞翥下蘭肖形破涕爲喜朱生覓  
母是血皆經不惜資裝遂傾大藏爰結道侶思達等  
涉歷山川精虔翻閱丹鳳南都頓迴鸞頌白馬吳苑  
遙現毫光凡印經二藏各爲卷六千七百十有四各  
爲函六百七十有七計費金錢纍纍鉅萬一供淨業  
寺一供本寺藏閣兩鎮名山長開覺路簷垂露滴氣  
氳常潤雨花輪轉雷音嗣響誰爲迦葉得悟亡言者

卽證菩提之果聞聲禮敬者均獲窮子之珠使彼有  
情超生歿海譬茲願力等功德林不藉十方霑濡一  
切信當勒之貞石用永護乎銀鉤萬曆四十八年孟  
春日邑人彭暉孟撰 朱朴集天寧寺前隄岸四十  
丈許王本仁者捨百金築成官道董實甫作記余爲  
之歌寺前古隄四百尺水激沙崩路欹側王君慷慨  
揮百金買石甃築陰功溪行人佇立驚且嘆有錢何  
不遺子孫卻與他人作閒幹積金遺子孫金多翻悞  
身一朝浪費盡赤手隨風塵何如王君石堤  
堅不壞百年千年鎮長在仗義散財心獨快

### 福業院

永樂志云在縣南一里舊華嚴庵焚化院宋  
紹興五年改福業院僧善孚開山元末兵燬

洪武二年僧善應重建觀音殿宇廊廡致之本院舊  
爲禱雨之處有陳山龍君行祠在焉別見祠廟類

嘉靖三十八年僧法霽明通建經閣請藏經四十四

年霽與文韶文淨葺正殿增建香花殿萬曆二十二

年僧文穆等重修正殿并建兩廊三十八年邑人朱

學忠鍾兆斗建禪堂四十五年劉祖錫補藏經 宋

常禁福業院碑記畧曰海鹽縣直社之南去廛市遠

岡阜綿延林壑蕃鬱地據爽塏有佛廬曰福業教院



釋氏所謂觀世音大士道場也故新華嚴庵紹興五年僧善孚開山住持請今額縣之早潦則禱於斯疾癘則禱於斯合妃繼似則禱於斯揭虔妥靈咸若有答麗合猥附俯偃旅拜日數十百人燭炬香篆繼晷連明珠幡寶幢續紘杳襲初院有道法師者膜拜像前儵獲舍利七粒神光陸離觀者堵集院沿庵舊住持淨堪及哲公嘗再鳩工締造視他精舍具體而微寶慶丁亥震風凌雨板檻楹梁既朽既拜級墁覆瓦既圯既壞智光主斯刹念欲經營而乃力弗贍前大夫丘公來蒞事甫三日至院欵款顧瞻爰昇院南漏澤園故地俾種蒔以歛其入院故有田若地白臺府獨其稅賦率餘佐邑民捐金施予大殿門廡齋堂庖湏輪乎與乎不愆于素役始紹定元年七月迄端平三年六月自院之立未有盛于今日充之力歟惟堪也哲也暨智光也俱學天台教于錢塘天竺寺寺亦大士道場錢塘今為行都上自朝廷凡有禱為群望先大士之惠斯邑其以靈于天竺者靈于福業乎則斯院也與宋無斁而充之力於斯院也亦無斁哉端平丙申重陽日 王文祿福業寺藏經閣碑記畧曰海鹽惟天寧寺有藏經久竊之盡嘉靖戊午夏仲福

業僧法霏明通欲請藏經募得金若干間予乞簡舊祠部平湖陸公陸公為移簡左覺義永寧印得之明年秋季十一日經至凡為卷六千三百四十三是日天宇澄霽涼風飄香幡幢招搖鼓樂闐奏用白馬負之追摩騰法蘭西來意僧耆從隨觀者贊嘆季冬經閣成廣三楹高三丈有二尺簷棟翬飛礎址苞固磚甃三面南豁六牕奉藏經置閣上法霏又曰有經不闕不講與無經同請天池延玉芝禪師以庚申春正望始講楞嚴經季春念六日訖講復延荆山湛溪諸衲留閱三年前後費金共若干云 大士殿俗呼為接梁殿其左楹有梁中接而負重不撓人以此異之大士是水沉所雕相傳海中飄至雕三像一供落伽之潮音一供武林之天竺其一留供於此常棊碑紹定端平間有僧智光自天竺受度後主此院大興脩葺雕像分供或即其時今萬曆四十七年寺僧忽感夢大士伸臂與看厥明瞻禮果見像移在地臂有微傷有村民任居草蕩見一婦人自稱臂疾須其脩治俟復隱形後尋訪知是大士現靈檀施因而雲集競施金錢重裝相好郡中大姓為施美珠額頂彌助毫光奉安之日緇素會者數千人共讚歎希有每歲六



月十八日號爲大士誕降之辰遠近俱到像前設供塗行三步卽下一拜匍匐至院極爲誠懇及觀禁碑記稱宋時香火之盛則知時嚮弘赫又匪始自今代矣

### 淨業寺

朱祚志云在縣南一里舊名無礙浴室宋治平元年改淨業院元延佑間僧原照重建殿

宇廊廡洪武六年僧得珉又建山門方丈正統間僧如雍重建山門殿閣方丈天順間請額淨業寺弘治元年祖昂重修葺之萬曆四十二年祖恩真廣廣賢再葺里人呂鳴治請大藏寘經閣宋葛繁淨業院結界碑記曰如來大慈建立三寶欲使其法久住於世在人以持戒爲入道之始在處以結界爲證道之基建大伽藍安止比丘念十方方法界皆土石瓦礫所成就不有妙法禁結其地衆魔外道得以乘間肆毒故重解重結卽穢而淨寓其法於四隅而隱妙相於秘密之中法之所照界之所立能使魔黨破潰若比丘處其間苟能精進明悟行道不懈嘗有神物念念護持有不能成就聖果者抑未之見秀州海鹽縣淨業院久爲僧坊而界相不具元照律師從衆請以秉持法事儀範既圓屬余爲之記於是書以告諸學者云元祐元年五月甲子通直郎知廣德縣事葛繁

記按雲棲宏法師云繁澄江人少登科第官至朝散凡公署私居必營淨室設佛像嘗入室禮誦舍利從空而下平時以淨業普勸道俗多服其化有僧定中神游淨土見繁在焉後無疾面西端坐而化

### 慶壽院

朱祚志云院在縣治西北宋治平三年僧弘教開山元末兵燬洪武四年僧永福重建宣

德七年僧碧潭建殿宇正統間僧惠馨重脩法堂成化八年僧如瑛復脩殿宇仇志云嘉靖四十五年僧仁懷重脩院有斷碑三十二年縣取築城用失其事萬曆二十八年僧慧霖重修四十六年僧恒憶募印大藏寘閣其年有芝產殿柱上疊生五臺色紫而黃邑憲副沈孝徵有歌紀其事

### 慈會寺

縣治西三十步思魯橋東陳善碑記畧云寺舊爲玄帝祠禱者立應于戶王鎮延天妃

宮道人陳善明居之起閣供設佛像善明復延金粟僧惠欽爲住持名廣祿禪院天順初元惠欽請額于朝賜今名七年成正殿其徒文寧復增飾天王殿樹石壁于門云



金粟寺

縣西南三十六里金粟山下吳赤鳥中建宋

尚無佛寺赤鳥中康居沙門僧會為吳大帝祈獲釋迦文佛真身舍利始創三寺一為金陵之保寧一為太平之萬壽其一即海鹽之金粟也此可據矣永樂舊志載此寺吳越有國因嘗施茶賜名施茶院以為在開寶己巳年武肅王時檢吳越備史此年當是忠懿時非武肅時也大中祥符初元始改為廣惠禪院紹興二十五年七月降下御書法帖一十軸于本院奉安原有康僧會真像在寺洪武二十年僧錄司移請大報恩寺供養永樂元年僧道雍重蓋法堂永樂七年住持僧宗尚建方丈宣德四年正傳大加脩葺正統辛酉宗源繼之終其工後至萬曆中寺久圯茂才蔡聯壁感夢鸞田偕廣道本彥重建正殿大悲閣禪堂方丈祖師堂及僧寮若干楹延雲樓高足大蓮開堂說法云 永樂志云舍暉堂在金粟廣惠院宋李正民捨維摩居士像記云余寓海鹽聞金粟之名久矣暇日從舟由曲港而入見此寺在山麓間松檜蕭森金碧輝映真伽藍勝處因念余大隱堂中曾命畫師作維摩居士像願捨此山中使遊觀者瞻仰

頂禮發大恭敬一念迴光同入不二法門也時宮使提舉中丞常公提宮太丞陸公偕遊紹興壬戌十月望日也 寺有藏經千軸用硬黃繭紙內外背蠟磨光瑩以紅絲欄界之書法法端楷而肥卷卷如出一手墨尤黝澤如髹漆可鑿紙背每幅有小紅印曰金粟山藏經紙後好事者剝取為裝潢之用稱為宋箋徧行宇內所存無幾有言此紙當是唐藏蓋以其製測之然據董穀以為紙上間有元豐年號則其為宋藏無疑矣 姚桐壽樂郊私語曰金粟寺有康僧會身像余于至正癸巳始得頂禮明年春余以伯兄見背到寺禮懺復與潘廣文澤民檢發唐代所書三藏然零落過半惟華嚴法華楞嚴寶積維摩長阿含及諸律論之半猶完整不壞翻閱踰旬忽于晡時作禮像前見像眉間有光須臾光若白線嫋嫋而出盤繞華蓋而上余遂鳴鐘聚僧稱佛名誦禮拜讚頌至暮而光復從眉間收攝人人嘆為稀有澤民因作放光記紀其事曰夫佛者覺也覺者靈照不滅也舍之可以內照六根放之可以旁燭三界此從七佛至于未來聖尊一光相續而常照者也第能葆光于無始常照而不斷則雖百千萬劫此光常若如新粵自漢年覺



光東度迄于吳代猶未該被于是康法師以舍利示感始闢法門于吳會傳像敍于江右是蓋以身光照攝東南四生之祖也旣而立化天禧騰身金粟靈像棲託實在于廣慧焉甲午之春三月十有三日前敎授餘于桐江姚桐壽樂年以孔懷之戚禮懺像前忽眉間若有白雲一線出于鍼孔者蜿蜒少時遂若朱蛇游霧欻閃盤旋難以名狀久之或若虹奉或如波曲或延袤長引或輪囷成暈時佛日朗映俄見大地樓閣皆成五彩似從放光石中看金碧世界也于時大衆驚歎此瑞爲世稀有余以爲此寧獨法師覺光常照而已哉要亦以廣文宿習圓滿今之虔禱發于天性故與靈契冥格若以鐵擊石以木鑽燧感極而光靈示現之耳此一光也更不特爲廣文感極之證而見前千萬善信莫不攝身神光之內各爲照徹因地使信心復萌此又法師了却過去劫中普照羣有之一大願力也余身被靈瑞五體投地援筆記此爲後學啟信 重建金粟寺碑記曰嘗讀元人樂郊私語有康法師像放光金粟一記甚異之後閱兵海上得至其處見殿堂隳圯一梵閣忽丹碧雲構是蔡茂才聯璧緣感異夢鬻田三十畝先爲募建者茂才名

士先與余文字相知余因野服造訪與謀新正殿始知茂才先所借建閣僧廣道者已行脚去余謂僧藍必行僧主之勝緣可就僉議惟慈會禪德本彥足堪住錫余固疆之乃携瓶鉢來詣香林罄所有長物率先檀施胼胝骨立茂才復不愛頭目腦髓以佐彥公前後五閭歲寶殿告成禪堂復啟經像莊嚴縉素萃止壤空過劫成住旋還矣余攷誌林具載慈會始創由金粟惠欽今日金粟再興亦由慈會本彥一似還報欽公昔緣於百七十年前者先是鑿焦穿土下得出生臺石雲篆剝落剩有丁巳之文閣之經始亦惟丁巳種種因緣皆非偶然余與樊令君正其方幅還其侵齧嚴飭禪規以居淨行以爲覺王禪宗得人卽付原非子承孫授當下不得等之應院今垂要約第當推擇名德住持禪堂使十方賢聖有所歸仰卽是康師肖子倘違茲禁使法眷傳承當藉雷音神杵擊之耳願蔡居士與彥公不負余言以不負金粟不負康法師爲佛真子是余所疊疊不能已者浙江按察司副使趙國琦撰 重建金粟山寺記曰世界建立總是因緣因緣之來不可思議初發一念累劫不忘念若未終塵塵相續猶木伐盡但有根存來歲復生



枝葉必肖又如行路未抵前途今夕雖休明當復往  
故教所銓謂之願力既堅所願業用是長諸業之中  
淨業第一淨則俱淨不揀有爲果雖人天報同尊勝  
從古竒特非止一端平等南庵位躋將相文人彥士  
高爵顯榮方冊所書不可枚舉由茲世俗實信神通  
正法雖哀持以不墜當其不念諸佛寂然念若圓成  
佛借其力有如果熟其香自飄香雖借風風無香故  
人念亦再具足衆靈佛雖不來業能使現祿位名壽  
倏爾變遷珠殿花宮空中湧出拈一莖草建刹已完  
布髮掩泥非圖作佛因非爲果果自同因幻卽爲真  
真原歸幻不得斷滅妄謂之無不得揣摩妄擬因想  
當知實有不似凡夫縱是原無豈參二乘百年一夢  
幾夢至今夢在夢中豈得爲夢傭人願鬻已作使君  
此念滿時報寧遽畢吾謂子穀信報信僧僧自何來  
無端示夢夢僧之語誰識其真再悟真僧恍然如夢  
十有四載旦暮不殊雖百四十寧忘福報是故子穀  
此願益殷不爲報興猶虞報盡宰官居士爰及沙門  
隨喜見聞咸來普施尚云氣類偶會行檀大士應真  
屢垂神異救護子穀及梁下人誰布地金急招舟子  
誰憂天澤急語避寒當由願中有此等等吾謂子穀

勿疑前生三世刹那刹那三世譬我昨食至晚不饑  
吾今恐饑還須作食日復一日以塞饑瘡莫憚其勞  
而止不作子穀廢箸得飽有期弘願既圓美報伊始  
當持此願直盡未來意口及身無有疲狀我觀此寺  
肇自康師後數千年放毫光相是故子穀亦攝彼光  
能以文章入禪觀地又觀寺額實表淨名示有妻子  
而不染着是故子穀此義亦知能以衣奩作伊蒲供  
吾謂子穀吾不妄言據子所稱而爲之記昔天啟三  
年歲次癸亥長夏小暑之吉真丹居士樊維城撰  
張寧詩南渡龍章千古在西來象法一燈懸 王守  
仁詩佛地移來龍窟  
小僧房高借鶴巢寬

### 法喜寺

吳地記曰通玄寺吳大帝孫權吳夫人舍宅  
置唐載初元年則天皇后改爲重雲寺舊通

### 玄寺

移鹽官縣東四十里鮑郎市 永樂志云寺在

縣西南三十里舊名通玄寺宋祥符元年賜額法喜

寺紹興九年改禪寺內有準高僧塔洪武三十年處

純重建山門方丈 嘉靖三十五年僧戒楫重修增

建觀音堂達磨院萬曆二十九年邑人顧所有捐貲

建閣五楹請大藏貯其上又六年前殿火所有復捐



賢鼎新之 宋李正民法喜寺改十方記曰佛教自少室曹溪以來多寓律寺雖居別院然于說法住持未有制度至百丈山大智禪師慨然嘆曰吾之祖道欲誕布玄化豈當與阿笈摩爲隨行邪乃創置規式別立禪居賓主問酬激揚宗要方外叢林由斯益盛聖朝廣設度門爲佛法外護凡大伽藍關律爲禪者多矣且著令云應甲乙寺宇其待衆有罪聽改十方住持所以澄汰沉流肅清海衆者也紹興九年春秀州海鹽縣始以法喜舊寺革爲禪林掃覬蟻之封疆蕩狐兔之窟穴開戶曠正堂與凡僧堂丈室鐘樓經藏庫厨舍寮爲屋一百五十楹皆因其故而鼎新之人不知斧斤之勞戶不聞版築之聲而金剛爲地衆寶嚴飾前日所有荆棘瓦礫坑坎今則忽然不見觀者駭愕莫不合掌讚嘆以爲未有堂頭和尚懷悟淡明實相善說法要不慕虛名晦迹藏用昔於此地曾種善根杖錫而來爲第一代凝神宴坐四衆歸仰于是襲方袍曳革屣者雲集于斯信參學之道場矣寺之建立久不可考自梁及唐題榜屢易聖朝祥符中始錫令名增崇像設代不乏人且載于舊碑今特記其改革之始俾來者有考云紹興十四年二月一日

淳祐重脩法喜寺記畧曰法喜實良準高僧道場梵行宗風于載可想寺舊有田二頃土磽間歲一稔開禧以來鍾魚絕響將爲瓦礫區姚江趙侯希字彌玉來宰是邑以上人文正及其孫行規勤能委以脩葺丘侯未李侯仁翰李侯謚相繼竟役會彌玉持常平節爲部使者遠近風靡走金樂施於是門廊樓殿經輪法堂留雲館宣明院下至倉庾溷溷無不一新鳩工于紹定改元考成於淳祐甲戌緡錢三十萬有奇云承議郎新權發遣南康軍兼管內勸農事楊幼度撰文奉議郎司農事主簿趙與弼書皇弟武寧節度使開府儀同三司克萬壽觀使剛榮王食邑三千七百戶實封一千四百戶趙與弼篆蓋 許相卿重修法喜寺記曰嘉靖三十五年冬海鹽秦溪之法喜寺工訖僧戒楫來請記茲寺創於梁斷石什幢蘚書隱隱暨觀楊幼度淳祐甲辰記石事大備矣今去二百九十年又九年寺大壞遺構日以荒蕪固事佛者所宜盡心也是役倡始於道心楫承任力終之肇工於門殿兩楹各輔翼殿偉麗惟稱殿旁對列修廊拱衛壯觀觀音堂在其東達磨院值其西安禪有房延賓有館法座齋庖井溷溷廁咸位置序列爰崇教本靈



山大像羅漢諸佛及以高僧良準秦溪所由寺也莊嚴肖貌生韻神觀如作欲語駭矚恍顧忘其爲粉繪矣費凡木石陶瓦冶鐵屨炭諸直計錢一百八萬而贏斧斤堊墁雕鎔繪畫負荷任力諸工計錢十又八萬而足備食稱是博植捏塑諸像飾以黃金丹砂空青水碧其值計錢二十八萬溢于數起工癸丑仲春丙辰仲冬告成事而後法喜光復舊觀矣是佛之祐也遠近檀越施捨之力也然亦道心之誠不二足以感人戒楫之勤匪懈有以集事斯其所以糾衆力歛鉅貲舉積廢而卒以有成也夫徐紹曾法喜寺重請藏經碑記畧曰子顧子建閣法喜禪寺請大藏教典六千四百餘卷度之乞余記余笑曰君儒也奚用釋典爲且君貧矣新其宇復崇其宮矣茲又何亟亟哉君曰不然聖賢生身斬於濟世長善不分儒與釋也儒者以有爲法化人而人化釋氏以無爲法化人而人亦化有爲者實於法申以禁諭嚴以刑威民畏而從焉無爲者空於法解去桎梏壹意慈脩以飯僧安衆爲朝廷大養濟院以說法演經爲朝廷大義學場民默而從焉二者作用雖殊令民去惡歸善究竟則一實何不空空何不實也君何歧而二之哉且本

寺舊有藏經予不忍其毀廢而終泯耳余唯唯謝不敏而爲之記良準大法師傳曰良準大師法喜之神僧也不知何許人失其姓族世系及出塵入道禮師授度年代時處或以良準稱之蓋其形迹隱顯不常疑爲聖賢之應化者焉謹按經幢石刻大中十四年庚辰咸通五年甲申俱有老宿良準題名復考景祐重脩寺碑云異人間出有如良準業四分律慧行精通併參諸武原圖誌所載陸伯鎮之言司空曙之詩若合符矣塔在寺之東廊距殿五十步飛鳥不棲遊塵弗立時時舍利放光現瑞宣和四年王春正月欲啓塔亭遷就西廡靈像袈娑騰掣遠去光惟燁煜貫穿戶牖衆懼祈誦方復如初然是寺也歷祀浸邈無所稽證創於蕭梁以前莫究始名修於大同之間錫號廣福楊隋踐祚更名延福武唐天授勅置通玄祥符改元始賜今額紹興紀曆肇成禪苑遺老相傳舊爲房院僧尼混止外觀侮焉政和歲聞有鄉媪持旛入施命僧掛揚僧索金錢媪佛而去至橋之西觀一窮衲貿貿然來請其吝心媪卽實告感額同歸忽引長臂高踰刹表懸所施旛飄颺天半媪大震誓修齋懺愆時會暑炎艱於徃涉僧乃取衣擲布虛空變



作蓋雲蔭被歸路遙覓是僧不見其處斯則準之出神以護教也逮今泥龕塑像作為擲衣之勢以旌厥異淳祐甲辰仲夏季望率堵流暉彌月竟夜姜氏子南苦風痺疾準為示夢授以藥丸夢中服之寤即隨愈喜捐橐金與新祠貌大德七年一女比丘拜瞻堂下摩撫相輪獲設刹羅五色交晶四眾肅觀僉讚靈貺若夫平居暇日示真闡幻尤多或踣踣仰梨而婆娑殿庭或遶旋絕頂而玩弄神機雖史失其書寺泯其記而鄉原老儒稱道頌述猶咄咄然不離口也吾佛滅度以來大法東漸得道聖師未容槩數如梁寶誌唐萬迴輩皆以神機列名青史較之準之遺事大率頗亦相類而乃僻墮海陬至篋沒無聞藉可惜哉讚曰先佛有言賢聖應身化度有情散入諸世觀行同事慎毋顯異輕泄密因唯除命終陰有遺付今觀良準竒蹤偉蹟潛德秘行近似聖賢然生不知其所自來歟不聞其所遺付嚴持一種身語秘密三昧超於聖賢境界遠矣大德九年

### 寧海寺

永樂志云在縣治西南二十五里法喜寺東宋紹熙六年賜額為寧海院國朝定為教寺

### 悟空寺

弘治志云在縣西南四十五里永安湖上荆山下舊名永安寺宋治平元年改今額國朝

定為教寺

### 禪悅教院

宋志云在政浦市中元祐二年僧惠林建名施水院建炎元年僧法粵請到院額乃

本鎮祝聖行香處也

續志云洪武三年僧善良建殿宇方丈庫堂

寺神鐘勝國時宣慰楊梓用海外銅五千四百八十八斤範鑄建六丈樓懸之聲聞數十里

忽無聲渡海者觀其影在波中浮屠用法攝之聲乃復成化初樓圯浮屠畜於財建之卑邑產悉侏儒焉

嘉靖之六年樓再圯鐘陷于地邑復病疴於是董隱君雲偕厥子進士穀進浮屠法聚氏相謂曰夫樓卑

而侏儒產焉樓圯鍾陷而病疴焉鍾之神其關於民之戚休也若此樓曷可弗興七年正月壬午始議樓

工庚子鍾忽自聲若扣百有八給事祀山許公宿茶磨聞焉於是鐘之神益顯夫鐘治物也而關乎民之

戚休將惟耶誕耶其諸山川之靈偶聚於斯耶吾皆弗得知從吾子學聖人之道而非惑者也而唯斯鐘



之神則倦倦焉民之戚休是計而已古之君子其學也凡以行其道也其於民喘息通焉故有呱呱弗子昧爽俟旦席弗煖突弗黔也者今之君子始不其然完簿書塞厥責斯良矣其有恣乎民之戚休者乃爲迂爲矯爲狂爲戾澤固未民逮而斥且去矣是以仕者其來也若夔寶其去也若弊冠民亦罔離厥裏下乃顧爲讐焉夫若此者將斯鐘弗若耶進士毅固將仕者也從吾子則固隱君子而弗忘乎民若此吾用益愧有位者

### 海門寺

弘治志云在縣南三十六里激浦城中宋延祐二年僧永固開山名佑福菴元大德六年

中峯干此說法重建殿宇至正癸卯僧惟則又建山門僧堂明樓廊廡洪武十六年僧永忠重建大悲寶閣方丈庫堂宣德十年僧宗福請今額 激水志云大悲閣規制宏麗結構駭目右前一柱年久撓側閣微偏矣嘉靖辛卯秋一夕大風雨居民聞閣上邪許聲向曉視之柱正復舊 又云寺有雪堂春社係明琇法聚二師集緇素修淨土之所有古栢二株三百餘年物也 永樂禪師惟則骨塔在本寺師茶毘之

餘獲舍利無數頂骨牙齒吾根不壞釋道原述傳立碑 張寧海門寺碑記畧曰激浦在兩山間相峙如門海潮汐所滙溜地多斥鹵不食居民鮮少無游觀勝槩鎮使官屬至輒止海門寺召寺僧爲客主少休舍而已寺相傳始宋寶祐二年甲寅永固禪師所建號祐福菴至元乙亥高林善壽禪師開廣故址構殿宇置佛世尊像演法授徒人用皈依一時善士如宣慰使少中楊公大姓顧氏文聰皆奉宅地以從弟子天真惟則禪師奧通內典超越宗乘行戒修潔無賢愚少長貴賤皆尊信向往雖倭夷險絕之國至有圖其像供養者永樂甲午其徒景南永忠禪師肇翔大悲觀音閣刻于手像於其中金碧交輝仰薄雲漢周堂翼室種種咸具人更號曰天真菴宣德乙卯天真第三世孫東濟宗福禪師杖錫走都下請額于朝勅賜海門禪寺仍給部檄命東濟住持寺至是始克有成矣寧尚憶二十年前從雪溪雲壑二蘇先生邂逅林間登大悲閣瞻天真像周覽山海笑語移日相去絕幾何二先生皆不作東濟亦化去緬想舊游往來于懷抱今年秋適其徒善祚偕總戎劉瑄廷器徵余文刻石將示久遠遂不辭而爲之記時成化四年九



月重  
陽日

### 覺林寺

朱祚志云在縣南二十里豐山東麓勝國時  
楚琦結菴于此各實相菴宣德戊申如性建

大雄殿

山門法堂輪藏殿佛閣天順二年請今額

呂原記曰嘉禾地多夷曠無山金刹寶坊往往闕闕

中襟建而屬邑海鹽之南可二十里有豐山焉秦駐

屏於左秦溪帶於右其地最爲幽勝無市井囂元至

正甲午歲浮圖師楚石琦公過而愛之因朔庵於山

麓洪武初琦公卽世繼席者敬中純公用愚哲公經

營綜理增其規制宣德戊申哲公旣逝住持虛席而

庵之廉隅摧毀圖像崩墜者過半衆以靈隱書記如

性覺軒行端望隆薦補其處覺軒蒞事毅然以興修

爲已任乃哀衆施益以已橐市材詎日召匠僦備首

成大佛寶殿次建山門樹法堂崇佛閣及新藏殿夾

廡庫庖齋庖溜圓靡不以次就緒而佛菩薩阿羅漢

以至護法天王之儀設皆雕塑藻繪如式妥奉而又

鑄大鐘構樓懸焉與凡供佛飯僧儀物器用無一不

備以宣德甲寅二月二十一日興役至天順戊寅十

月初十日厥工告成然後規制大備輪奐一新視昔

大不侔矣

皇上光復大寶畢舉庶務覺軒請于

朝賜額覺林禪寺寔天順二年三月二十有三日也

覺軒以非有登載則來者莫知所自求予記之俾刻

石昭示焉 陳善覺林夕照詩青山寂寂謝塵氛人

世光陰易夕 曛漁父短歌臨水聽牧童長遂隔林聞

天邊淡影明 鷗背松杪餘光認鶴群記得尋幽遇支

遁卧分禪榻半間雲 馮臯謨宿覺林寺詩幽棲何

處不安禪 戛耳潺湲漱石泉寺裏春風當浴罷雨中

山色屬樽前 林淡舊葉埋芳徑僧去空堂鎖

斷燵十載放歌憑兩屐 一龕長共白雲眠

靈祐寺 朱祚志寺在縣西南一十二里宋咸淳間僧

道暹開山名圓明菴紹興二年僧行翁重建

洪武七年僧得寬建佛殿廊廡僧堂天順八年道琳

請今額 寺歲久傾圯萬曆中有慈會寺僧斯學借

第斯道結庵寺旁名曰道林以戊戌之孟春捐衣鉢

貲重建佛殿興工之日殿梁忽產一芝光彩映奪邑

侯李公同士大夫絡繹來觀俱有詩美其瑞應道林

菴即本山隙地水通左右遠屋有古梅修竹景色甚

幽四方高僧往

往至此掛錫

海鹽縣圖經卷三

七六



鹿苑禪院

永樂志云在縣西北三十六里舊金明寺

應夢羅漢祠景德中魯肅簡公請為禪刹嘉祐八年仍改金明肅簡公諱宗道初宰此邑夢胡僧來迎參政及瞻羅漢像與所夢符合施俸修寺因榜曰應夢尊者後竟參大政何清源公為之立祠有無為楊傑留題今不存樂郊私語云余始至州舟過鹿苑廢刹時方溪秋紅樹扶疎隱暎敗椽破壁大足供客中吟眺因維梢登覽讀壁間舊記有魯簡肅公羅漢見夢事括蒼吳思齊題其旁曰是法本平等無息亦無敬如何證無生却來見參政余謂阿羅漢自敬正人非敬參政爾後寺廢其額為嘉興金明寺移立天順間僧惠正復于故址葺殿三楹稱為鹿苑寺餘址悉沒民間錢太常為贖還之萬曆四十年太常子端與孫陞捨田十六畝移建于舊址西南以僧正念住持鼎新佛殿及僧堂寮舍繞以垣墻正念亦齋瓶鉢以濟克復舊觀焉宋李正民題一擊軒詩本來無物可修治一擊當年何所知拱手問師都不語等閑拈起布毛吹正民弟長民詩我聽風篁是梵音如何俗耳等閑聞自來擊處無人會千古知心只此君

雷雲寺

朱祚志云寺在縣西北三十里元至正間僧妙用開山名瞻雲菴洪武四年僧存義景泰

中僧宗諒並重葺天順二年僧元諒復募緣修葺蓋令徒智清奏請今額

禪寂院

宋武原志云院在縣西南十里橫山舊名與福院宋治平元年改賜禪寂院祠顧况為伽

藍神以况舊居在寺側故也

碧雲禪院

縣西五十里沈山唐大曆三年俱胝崇惠禪師開山元末兵燬洪武二年僧懷忠建

殿宇齋堂

朱朴詩塔影蕭蕭夕照間碧雲黃葉滿秋山空堂夜冷無燈火惟有貧僧乞食還今萬曆四

十四年僧

募緣重建佛殿僧寮雄壯修潔遂擅一方蘭若之勝

實相寺

在縣南三十六里宋淳熙間僧禪悅開山本覺林庵也元末兵燬國朝洪武七年僧法

昇重建宣德三年僧子源成化二年僧惠源重修

包道亭菴

北門外半里宣德中里人王姓舍建供白衣大士延道人包姓者居之亭遂以名萬



曆中有當湖僧洪野達西掛錫憲副沈公孝徵偕其子茂才延銓捐貲首倡拓買亭後地建大殿經閣三官樓山門住持上人默印繼之益加修葺塑大士像及三十二應化身儼成雄刹顏爲通濟禪院云

### 雲岫菴

在縣南三十里鷹窠頂山 永樂志云元至正二年僧本原開山 雲岫庵志曰菴始宋

建隆中明天順八年毀于兵隆慶辛未杭州百法寺僧明堅主此山里人許鶻許懋捨山五畝重建堅之徒性靜復買山五十七畝萬曆甲午歲募貲一新之垂成缺二梁海上浮異材至分寸不爽凡爲殿十楹閣五楹右廡四楹齋堂靜室厨房共十楹又請大藏度閣中菴無常住產靜依乞食法供徒衆以其餘飯行脚僧布置有方而能與衆同其苦又前後得檀施許錢沈沈包吳數姓佐之乃所以興雲岫也 邑令李當泰雲岫庵藏經閣記畧曰鹽邑代有名僧振法莊嚴法藏若金粟若海門今雖散逸一時妙麗可想見也自天真化杳楚石雲歸貝葉旃檀盡在燼煨荆棘中時則玉芝法聚建閣福業院請藏京師鹽復有經藏此予至鹽之二年禱雨院中父老爲予數其事者若此也明年丁酉予行南境侍御許先生待於雲岫

庵庵據山椒九折而上松篁四合禽鳥亂啼海日湖煙曩夕作供顧安所得藏經者而盡讀其書也侍御謂余菴僧性靜已集檀信將走事京師矣予乃欣然寓書浪雪恩公而侍御亦復別爲介紹且要予損俸助之明年經乃至又明年閣成又明年而浪雪來鹽禮經屬予紀事而去浪雪之言曰君知海門金粟乎昆弟五人萬軸疾書如一手然無可分別菩薩化身也勝壓五天諸龍迴遶而前爲宦者某見匱而攜其數卷以去邑遂爭取相繼一空未幾邑困島夷某亦暴震以歿吾法甚密吾道甚慈吾聚甚堅洗罪一方爲邑請命君能無一言詔來世乎予聞斯言愧父母於鹽爲鹽植福未盡也直書其事而碑之閣云餘詳鷹窠頂山注 彭宗孟雲岫菴詩溪林絕嶂古珠宮策杖幽探一逕通石竹迎人當戶綠山花供佛上階紅鐘迴轉覺諸天靜月出真看萬品空便欲皈依尋了義閒雲無着與心同 春山石磴自紆斜一上蓮峰望不遮初地俯臨雲際樹香厨新試雨前茶徵心不染觀澄水喻法無生破幻華向晚經聲纏谷出懸知僧律 禮袈裟



**修隱庵** 邑城內去縣治西一里舊名西焚化庵宋紹熙四年立元至正更名 國朝正統間僧

德正重建弘治元年僧永壽立山門

**蕭庵** 在城內之西北有蕭昆者無子夫婦焚修建庵延律僧居此捨田十畝為常住業

**淨土庵** 縣東北二十里西塘橋下萬曆間里人吳希顏湯承憲建從當湖往來者多瞻禮焉

**普光庵** 縣西二里宋治平二年僧文富開山洪武三年僧宗滿重建

**新墳庵** 縣西一十里元至正十五年僧至心開山洪武九年僧原淨重建

**德雲庵** 縣西一十八里元大德二年僧至心開山洪武三年僧曇謨重建

**環秀庵** 縣西一十八里元至正十一年僧海月開山洪武四年僧法傳重修正統間僧宗廣任持

復葺 殿宇

**崇勝庵** 縣西二十里僧宗智建俗號包墩

**惠光院** 縣西二十五里宋淳熙年間僧本智開山洪武三年僧智裕重建

**妙光庵** 縣西三十里宋坡湖上元至正二年建嘉靖中毀于倭寇萬曆三十八年僧原朗重建俗

名南化 城庵

**陸庵** 縣西三十里元至正二年僧可觀開山

**福田庵** 縣西三十五里元至正二年僧得翁開山洪武八年僧思祥重建正統間僧宗班文勝復

建殿宇俗號栢婆亭內有關帝祠甚著靈赫近憲副沈沈原萬疏募建葺

**集福庵** 縣西三十七里俗名儲道庵

**鶯鷓庵** 縣西四十里洪武間僧覺和建

**新墳橋庵** 縣西四十五里俗呼寶成庵至元間僧宗淨建

**普照庵** 縣西五十五里橫山東



德雲庵

縣西五十里又名仙居庵元至正間建

達本庵

縣西南五里宋淳熙中僧法海開山洪武二年僧思定重建

于墳庵

縣西南一十里宋治平二年僧如松開山洪武六年僧大雲重建

普明院

縣西南三十里元延祐間僧滿月建

靈芝庵

在縣西南三十五里靈芝山上元至正初僧永照開山俗呼為馬墳庵即古圓通院也院

基十八畝洪武初僧永昶天順中僧宗盛隆慶初僧惟仁重修

潮音庵

縣西三十六里元至元二年僧得實開山洪武八年僧善性重修

延福院

縣西南四十里元至元二年僧福濟開山洪武六年僧宗復重修

法雲庵

在秦駐山頂刀鎗庫之右萬曆中僧靈修建

半潮庵

秦駐山麓初馮豐陽為居士張峰捨山建庵名積善庵僧廣賢廣佑重修朱元弼收今名

集慶庵

縣南一十八里元至正中建洪武初有虎聽塚曰虎墩其亭曰虎嘯今俗訛為火燒

亭地頗幽勝時有名僧掛錫題詠最多

幻住庵

縣南一十里元延祐二年僧得善開山洪武三年僧善敬重建

梵潮庵

縣南十六里初名萬壽庵不詳所始永樂中慈照重建改今名萬曆三十七年廣馭重修

法華庵

縣南十八里在豐山下元至正五年僧文敏開山萬曆中善士鍾以穀重葺焚誦於此

雲谷庵

縣南二十里元大德二年僧可行開山洪武九年僧思純建佛宇成化十五年性天德珍

重修萬曆二十四年正道重修

福惠庵

縣南二十里元至正元年僧文昱開山洪武七年僧至茂重修

觀音庵

縣南二十里元至正二年僧本然開山洪武二年僧處清重修

白雲庵

縣南二十五里元大德二年僧宗顯開山洪武二年僧原亨重修



資福庵

縣南二十五里宋景德二年僧允恭開山洪武三年僧智霖重建

德雲院

縣西北四十里元至正間僧訥翁建

莊慶庵

縣南三十里元至元九年僧德昌開山洪武六年僧惠實重建

法銘庵

縣南三十里宋咸淳二年僧至寧開山洪武中僧以祥重建

紫雲庵

縣南三十六里紫雲村

惠泉庵

縣南三十六里宋咸淳元年僧如玉開山洪武十年僧循理建佛堂

若山庵

舊名普明院縣南三十六里若山上周顯德六年僧寶強建宋治平中賜額今移山麓洪

武間僧文序宗正重建萬曆三十七年守如重修

水月庵

在茶磨山東南週圍皆水故名

達王庵

縣南二十六里至正三年僧永烈開山洪武九年僧普潤建佛堂廊廡

開元庵

在雲岫山黃沙塢池灣沈氏建闢地得開元錢數十因名

開頭庵

澉水志云今在北門內小街宋開招寶運河至此有開而庵臨之故名今開亡而廟存

崇福庵

縣西北三里宋建炎二年僧得實開山洪武七年僧克實重修

大乘庵

縣西二里曲尺巷西北萬曆間彭昭毅公捨建

西林蘭若

天寧竹西房下院去郭西北三里當湖陸太宰題為西林蘭若俗名墳庵

南陳庵

縣西北一十五里元至正三年僧永福開山洪武三年僧春榮建僧堂廊宇正統間僧志

全重修俗號西蕭菴

淨居庵

縣西北三十里元至正間僧德璘建俗呼勤工庵

博審庵

縣西北四十里

圓通庵

縣西北四十三里洪武中僧惠曉建嘉靖中定松重修



臯峰庵

在六都臯峰村舊普明院也正統十三年禪寂寺僧碧峰建

永慶庵

九都俗名劉家亭宋治平年僧月庵建元至正重葺有碑隆慶間立社學萬曆中志奇脩

大智尼庵

錢應晉菴記曰海鹽縣開濟鄉有庵名大智宋紹興間照律禪師開山後有姚訔言為

中順大夫者世奉佛四世女孫入菴為尼國朝成化間比丘朱善覺之母姚氏又出家此菴捨田二十四畝以贍鄉人因稱為姚菴萬曆初幾毀先君奉祖母夏孺人命令應晉請于郡給帖以前堂為先臨江公祠得不廢後先母李同鍾朱二氏母重建佛堂以尼僧廣定等守之朝夕焚誦戒律清嚴異于他尼寺云

紫虛道院

縣西南二百步元至正間全真道士彭圓隱建國朝洪武十年正一道上沈廷芝

增置玄壇武安二祠洪武十五年於院置道會司永樂十年道士曾守圓增建真武殿嘉靖二十年道士徐元勳李南山募修前後殿宇萬曆三十四年邑人鍾兆斗建三官明樓塑諸天佛像四十三年道士沈學道陳守默捐貲造兩廊山門修葺大殿明樓并募建戟門及改造玄壇耳殿郡趙志載國初本院

有異人周玄真其人自在郡城紫虛道院事見宋景濂集可考今刊去之

棲真觀

縣西北五十步按嘉禾志舊本真武廟宋軋道二年道士郭宗諒請廣陳廢額為之永樂

十年道會汪士真天順七年道士俞宗厚成化二十年道士蘇應玄相繼重修萬曆壬辰道士徐月汀盡撤而新之視舊制特為宏麗殿三楹東西耳殿各一楹塑三清聖像天皇星主上皇太乙配玉皇九天為九御至尊增高石座施神厨供設莊嚴左右為門通後殿殿前樹戟門繚以周垣石甃月臺甬道庭植檜栢立五丈剎懸幡燈殿東建土神祠其西設客坐為更衣肅容之所費頗不貲時方伯劉公灼憲副沈公孝徵為大檀施而月汀割腴佐之尤多月汀能詩工成為詩示其徒云諸事莫論他日後一心聊盡此生前至歿時猶囑諸徒善護持此山吾所興建工稍損敝即丞葺之他生當再來勿欺我也其一生希志如此朱祚贈蘇應玄詩鈞天清都上帝庭紫微勾陳環太清倏來下界幻化城龍車鶴馭隨鸞翮羽幢翠葆紛霓旌拱衛星斗驅風霆威儀儼肅光晶熒有美鍊師懷至誠星冠霜簡霞衣頽俯伏拜章朝玉京玄



天嘉悅錫百朋國祚萬年黎庶寧四海奠安五穀登時暘時雨多休徵萬戶千門歌太平邑令李當泰重建樓真觀記鹽官之棲真初自有宋之乾道于時僅因廣陳之廢額以葺紹聖之遺規而已國朝洪永以來有汪士真俞宗厚起敝之功成化以後則有蘇應玄徐碧爨鼎新之力然歲時于邁寢就頽湮道士徐月汀痛故業之日傾以興起爲已任覃誠乞募并割丹貲工始乙未至壬寅正月告成高棟巉峨金碧映紫霞之氣周垣繚繞粉塗流素魄之輝真像一新玄門再開左綏司觀之神居依葦殿右處探玄之侶徑擬桃源規圖大備經費不貲仍舊材者十一從鳩度者什九七年之內渥顏化爲槁木垂橐罄于茂材月汀之于斯觀苦心猛力良足多焉

### 玄帝廟

縣西北天妃宮之右初名文始道院元至正間道士趙守真建弘治中王以澄重修

### 東嶽廟

縣西北一百五十步宋熙寧中建大觀重脩有記曰五嶽各于其方配天作鎮靈粹所宅

亦各有攸司或主人民歿生罪福之事或主鬼神山川水土鳥獸草木之類是于覆載之間爲最隆最巨

者也然自古帝王告成受代升中紀德之盛必于泰山而四海之民朝獻祈禱皆不遠萬里不能至者各隨所處建立行宮以爲請命之也豈非神靈顯赫威德盛大爲生民宰制尤可畏而仰哉章聖皇帝東封申嚴帝躡以彰洪德允答元功順天休命典冊具存是于今日尤爲尊崇非諸祠廟所得擬議也或者嘗謂行宮散處遐僻而有禱輒應如在其上如在左右其理安在蓋不知人之精爽沒爲貴神則所謂聖而不可知者未始或亡寂然而感不動而通其疾僂仰之間而再撫四海之外猶風行于空招之則來而風實無體猶日麗於天有照則現而日不來此陽燧取火方諸取水從容掌握之間引類太清之上惠心之不精誠之不至爾况以天孫之貴方嶽之尊風馬雲車倏忽萬里杳冥之際盼靈斯在又何疑之有哉昔人有言心印神明發意動念猶如影響固其理也海鹽陋在一隅其民謹信而淳樂善而畏神前此歲有朝獻之社間以憚遠莫能至者熙寧中邑人相率始築茲廟殆今三十餘載迺克有成自三門兩廡前後大殿聖母眷屬凡爲殿五官曹司典侍從監衛塑像儀物莫不畢備是爲一方尊事瞻嚮植福依歸之境



俾善人是賴而愚者不敢爲非寔非小補又春秋祭獻咸以佛事薦羞惟素茹不宰牲牢而神亦安之豈非所享在誠而不在物耶故首讚神德備論響答之理以信斯民于不疑之地于千萬年無敢怠忘是不可以無紀也時大觀四年七月日奉議郎權通判杭州軍州管勾學事兼管內勸農事借緋陸周撰文將仕郎權海鹽縣尉管勾學事吳遷登仕郎行海鹽縣主簿管勾學事趙昌宗通仕郎監海鹽監兼管砂腰海鹽場煎買鹽貨晏述奉議郎知秀州海鹽縣管勾學事管旬勸農公事兼管旬鹽場徐嘉言立石紹熙三年縣令李直養重修嘉靖中道士黃如月重修邑人沈季帝劉真君二祠萬曆中道士黃如月重修邑人沈季徵有記 一在澉浦鎮市東北宋志云建炎間有白猿神馬爲祟毛巡檢夢神曰何不朔岳祠乃於營側立祠每歲暮春鄉民社會求稔其應如響續志云今廟在北門內嘉定三年所建萬曆中道士沈志遠重修 一在通玄市中法喜寺左

### 文昌祠

舊在縣學大成殿西後廢嘉靖壬寅王公文祿同比部府君買城隍廟道士張涵虛隙地

改建祈嗣凡三楹兩舍中塑帝君像及騎從前迎方塘後爲祈夢臺榜曰瀛陽紫府 萬曆三十八年道士夏近儒朱文華重建邑人賀萬祥記畧曰邑故有祠祀張仙神麗費宮舊矣嘉靖壬寅孝廉王君文祿進士胡君憲仲移建於城隍廟左次洎萬曆丙申貳守陸君鰲來復建樓祀魁星神殿前規制略備歲庚戌邑侯喬公念殿廡庫隘樓臺其前且神路紆回弗稱禋祀至意遂撤而庚新之殿拓如干楹門拓如干尺樓改拓殿陰如干武明年落成丹霞披藻翬翼高騫廣穆清嚴呼吸帝座始爲吾邑鉅觀諸所經營尺度規範陰陽惟我公爲政參戎董公永遂鍾給諫北斗王比部家相予兄鴻臚萬春暨諸士民之好義者咸醵錢以助割地者鍾茂才允文允武云

### 延真道院

縣西南三十六里澉浦鎮卽宋淳佑中真武廟址也元延祐三年里人楊樞重建萬

曆丁未里人吳中偉募修

### 全真道院

縣西四十五里元至正癸卯道士徐守誠建內設真武聖像國初道童王悟真重修



俗名仙壇廟

真武廟

縣東一里景泰中水利僉事陳永建今呼為藍田廟

青樓三相公廟

縣西南一百五十步宋紹興四年建

武寧威烈王廟

縣治西南二百步廣儲倉南今俗名尤菴尼僧居之

祠山行廟

在城東南濠上俗呼張王廟洪武初年建律僧安然居之增建佛堂僧寮焚修者甚衆其徒游致寂仁等能繼其遺規緇素法集益盛近孝廉張奇齡頌為普淨禪院云

三元廟

縣西武寧橋南成化間仇一清感夢建道士史時敬重修

福順大王廟

縣西一里迎恩橋東按蔡京修松江福順廟記云隋將陳果仁嘗以陰兵助錢

氏伐淮南有功奏封福順賢德王使諸郡皆建福順廟則海鹽宜有此廟也

歟城相國廟

在縣西十八里洪武三十年建嘉靖中里人錢琦重修

潘野廟

縣西十八里元大德二年僧至心建

張水堰廟

縣西二十五里

文昌閣

縣西三十里萬曆初里大家錢氏建

淡井廟

縣西南六里

二郎廟

縣西南十里宋延祐中建俗呼二丈廟

善墟廟

縣西南十里涇塘橋南元至正丁酉建萬曆中證慧圓相通曉屢增修之

韓名廟

縣西南一十五里元至正中建弘治中資聖寺僧文清居之增建佛堂同於寺刹

勾塍廟

縣西南十八里嘉靖四十年鄭端簡公重建萬曆壬午重修

六喜和亭

在縣西南二十里元至大二年建

新豐土地廟

縣西南二十里宋崇寧間建



道塘廟

縣西南二十里  
萬曆庚戌重建

袁家亭廟

縣西南二十五里  
宋嘉祐二年建  
正德十五年道士陳德昌重建  
萬曆辛亥邵明真

增建  
後樓

三郎廟

澗水志云在秦溪上  
故老傳云昔有兄弟三  
人生有德行及卒人祀之  
為土穀神三村各

分立廟疾病  
水旱禱之

秦宋二王廟

縣西南角里山下  
去城三十五里  
萬曆戊子重修

廣福土地廟

縣西南三十里  
元至正六年建

沈蕩廟

縣西南三十里  
宋寶慶己酉道士向一初建  
隆慶間重修  
廟祀水仙張府君  
每歲清明前

後三日土人裝  
龍舟為競渡戲

場歷廟

縣西南三十里  
金水堰

慕容廟

縣西南三十里  
德政鄉虎墩村祀土穀神  
名義不詳所始嘉靖中里人  
呂昂捨田重建相

傳有宦家欲以廟址營墓地  
夜夢金甲神執笏擊其首  
未幾其人至今敬畏之

倪塿廟

縣西南三十五里  
元至正六年建  
洪武四年道士郭守真嘉靖中  
道士康子真重修

呂塚廟

縣西南三十五里  
元至正八年建  
隆慶二年重修

聖駕廟

秦溪之西泥涇之北  
去城四十里  
宋紹興中再毀于兵  
至嘉靖四十年道士王起龍重

修萬曆中重修

潘市墅廟

在縣西南四十里  
元至正三年建

張王廟

縣西南四十五里  
橫山下 一在澗浦城

張塿廟

縣西南四十五里

橫山廟

縣西南五十里  
宋紹熙五年建



**壇墩廟** 縣西北二十里宋景定二年建 國朝永樂五年重修

**佑聖祠** 縣西北三十里元至正間建 成化五年道士董守真重修

**善安廟** 縣西北三十五里半路橋西

**練浦廟** 縣西北四十里

**董司廟** 縣西北四十里二廟並 錢儀部夫人孫氏建

**張府君廟** 縣北城腳下

**待葺廟** 縣東北十二里

**丁村廟** 縣東北二十里見永樂志不詳何年建

**馬祿廟**

**馮舍廟**

**橋梁還珠橋** 縣東門外舊名聞琴橋 **龍王廟橋** 縣東一百步跨白洋河萬曆五年

年 **思魯橋** 縣西南三十步宋紹熙四年建徐志云民思魯令故名 **楊橋** 縣西南一百九

十步元大德三年 **黃橋** 縣西南二百步宋紹熙四年建在分司南跨河 **駟車**

橋 縣西南二百一十步宋紹熙四年建在黃橋西儒學東 **廣豐橋** 縣西南二百

車之西其道 **塘橋** 縣西南二百五十步宋紹熙四年建在十字街南通南門 **永安**

橋 縣西南三百步宋紹熙五年建在學西 **永豐橋** 縣西南三百步宋紹熙四年建永安橋南

**朝聖橋** 縣西南三里宋寶慶二年建在天寧寺前東西跨河 **秀遠橋** 縣西南四

打橋成化 **南平駕橋** 縣西南四里相傳秦皇馳道 **淡井橋** 縣西南五里俗名天

間呂萱建 **涇塘橋** 縣西南十里 **永慶橋** 縣西南十五里 **安靜橋** 縣西

景德二年 **華師橋** 縣西南一十七里以上 **秦溪橋** 縣西南三



十里寧 廣濟橋 縣西南三十里茶院市 招寶橋 縣西南茶院市 石碑橋 縣西南

縣西南茶院市南有二石碑夾道而根竺紫雲橋 縣立高一丈五尺歲久字磨滅不能識

南茶院 仁和橋 縣西南茶院市西 金家橋 縣西南陸司空廟市南 西宋志云客舟入

激浦鎮者多於此泊 西石橋 縣西南三十六里激浦城市北 通江橋 縣西南激浦城市北

縣西南激浦 新橋 縣西南激浦城市南 望湖橋 縣西南激浦城市西南 惠人橋 縣西南激浦城市西南

即縣右平橋宋紹熙中令李通海橋 縣西南激浦直養今天啟初元樊並重修 步南北跨

河一名 興廉橋 縣西南八十步宋紹熙四年 遷善橋 縣慶豐橋 建在資聖寺前俗名寺橋 西

一百三十步宋紹熙 新橋 縣西十字街令王璽重建 再 安仁橋 縣西一里永樂志云元至大二

年建俗名管家橋 易名績魯今天啟元年樊 茸 紹興橋 縣西一里五縣西一里四十步虹橋徐志云紹熙年建

跨河俗名廣福橋亦名倉橋 西門外 順寧橋 縣西二里半望吳門外洪武二十一年天寧

寺住持僧裕建成化十八年重修俗呼葉家 橋葉侍郎 迎恩橋 縣西三里元丙戌年二

故居在此 月建今俗名小柵橋 天寧寺橋 縣西三里元至正乙酉建俗名 大柵橋城內外橋此為宏壯

西平駕橋 縣西四里 天僊湖橋 縣西五里元 尚胥橋 縣西十二里宋大德

年知縣何早重修相傳橋下有老蚌大如船月夜 吐珠其光暎燭數丈有泉眼水甘冽可以瀹茗 璵

城橋 縣西十八里宋紹興三年建弘治中知縣譚秀 重建張寧記日海鹽歟城橋建自宋紹興三年

國朝宣德中邑人金文富嘗修復弘治元年圯壞 既久有司方將舉事會按察僉憲伍公宗誠行屬區

畫措具仍勸富人贍其不足委成縣令譚秀監督以 海寧衛知事李慶閱四寒暑乃成其地河濶土疏二

水衝合貢漕負載交錯舊橋作三洞徑楫十虛一實 激衝多所今長十有九丈四尺兩垂入平壤并三洞

為一跨水六丈其崇半實倍于虛足以禦激撞下有 重附上有闌壓側有倚柱中勢正圓壁立龔琢累築

海鹽縣圖經卷三 全八



外內精密大致視昔不侔用石八丈環衛填塞者不與米三百斛鐵千斤銀千二百兩役夫與竹木薪炭諸瑣費不與宗誠周行吳越所至治水利民請予記立石刻有事者碑陰所以昭成績申大望也 嘉靖

中重 修 方橋 縣西一十八里 李冢石環橋 縣西三十二里元至正五年建

年建弘治三年縣丞徐謹勸民王清重建徐志作呂塚橋云橋北有廟廟後有冢相傳呂蒙冢也按苞溪

李氏居此久矣永樂弘治二志俱作 錢橋 縣西四十李冢安知非指元總管李公術冢乎

二十三 年建 圓通橋 縣西三十五里僧 文會橋 縣西北三十五里嘉

靖十九年建邑人錢芹記曰海鹽縣治西北三都舊有董家堰橋在官塘東水陸往來輻輳莫詳本始芹

自髫年即所親見大抵與圯靡常其初官令塘長召鄉民為堰橋以濟涉其既則上下苟且每歲夏秋間

風雨大作水暴漲堰橋倒塌民乃病涉溺歿者往往有之余家近是橋世父兩涯翁每有興建志不果嘉

靖庚戌僉憲石屏胡公以督水利行縣屬縣大夫雲溪張公倡帖下僧某募緣邑中好義之士施捨有差

余亦捐貲以成先志橋高三丈八尺濶一丈二尺長十八丈石砌環洞緣繞皆石欄經始於庚戌春二月

工訖于冬十月費蓋四百金云橋成海石子落之曰是橋南望秦山北通鴛湖西望硤石東走平湖煙霞

四會村塢綺聯名之曰會勝何如鄭子澹泉曰吾邑據三吳上游而是橋巋然當邑之中鍾靈發祥君家

贈刑部公前以文行著名而刑部之子若孫封諫議公太守公儀制公項背一時君與海石又以文章道

義益衍其慶名之曰文昌何如余謝不敢 南化城橋 當而重違其意乃約而名之曰文會橋云

縣西三十五里成化中建朱祚南化城新建東西石梁記曰海鹽邑治之西三十五里有瀟水之澤曰賁

湖湖心有庵曰南化城菴菴左右有土堰通行旅往來數潰圯人病涉庵僧德淳暨其弟子智昂謀諸里

中長者易土以石以為長久計為梁虛其中通湖水之消長以殺其勢庵之東以丈計者四十梁一十有

七其西以丈計者如東之數梁一十有九以成化己亥夏四月落成請記于予予曰為橋梁使民不患涉此有司事也有司未之及而異教中人乃能為之是

可尚已然則處事者於義之可為者則為之奚待諸



有司成化丙午冬  
十月邑人朱祚撰  
後東西  
跨河  
十步在回子巷  
橋下不通舟楫  
十五里元  
至正中建  
浚仲浚自瀾意名  
思仲浚  
治三年縣丞  
徐謹重建  
新塘橋  
縣北十里元至正中建弘  
治三年縣丞徐謹重建  
嶼堰弘治二年縣丞  
徐謹勸民王孟江建  
縣東北一十七里  
元至正三年建  
陸橋  
縣東北二十里  
洪武十七年建

疎石沈  
孝悌橋  
縣西北六十步通縣  
崇寧橋  
縣西北七十步  
仙和橋  
縣西北八十步  
錦繡橋  
縣西北九

半邏橋  
縣西北三十里  
元至正二年建  
鄉民以建橋出  
縣北九里元  
至正中建弘

羅星臺橋  
縣北九里萬曆十一年知縣  
蔡逢時建詳見羅星臺下  
白苧橋  
縣北九里元  
至正中建弘

鳳凰橋  
縣東北十  
里即馮  
照河橋  
今各  
縣東北一十八里  
西

潘淡水  
縣東北二十里  
洪武十六年建

十八里堰橋  
縣東北一十八里  
元至正二年建

東陸橋  
縣東北二十里  
洪武十六年建

偃大涇橋  
縣東北二十八里  
宋端平元年建

橋  
縣東北三十里  
宋咸淳八年建

壩子橋  
縣東北三十六里  
宋咸淳八年建

永興橋  
縣東北三十六里  
元至正六年建

八字橋  
縣東北三十六里  
元至正六年建

陶涇橋  
縣北  
門外今  
方募建

牌坊登雲坊  
縣東十步為永樂辛卯  
科舉人仲端立今廢

進士坊  
又名駱  
馬街縣

世科坊  
縣西一百二十步  
舊稅局前為正統

三朝直諫一代名臣坊  
即舊都諫坊縣  
西門外吊橋北

顯親坊  
管家橋南名  
諫坊右並為

名諫坊  
縣西南一百八十步  
禮科都給事中張寧立今惟名諫坊

進士坊  
七都為  
存萬曆四十二年知縣何早重修

重桂坊進士坊  
縣西二百步局東為景泰  
癸酉科舉人天順丁丑科



進士倪登科坊十三都為天順巳文元坊西清梯雲

坊縣西門外天寧寺左並為成化進士坊縣西七十

南為成化丙戌科接武坊成化甲午科舉人倪璠立

繡衣坊資聖寺左為御登科坊縣西一百九十步新

舉人朱奕葉登科坊七都為李景孟孫成進士坊縣

為弘治庚戌科進士坊縣西一百五十步新橋西

立今進士坊為弘治壬戌科進士顧正

錢琦新橋為嘉靖癸未進父子名卿兄弟司

寇坊天寧寺前為尚書鄭曉光祿寺少卿前刑水衡

錫命荆楚憲臣坊為嘉靖丁未科進士徐鵠及父華

### 省騰輝名藩著績坊

郎馮縣西門外迎恩橋東為福建左

學及父贈中書舍人舉人陳西曹鳴鳳左掖攀龍坊

言弟鴻臚寺序班陳所見立進士吏科給事中陳所

部郎鍾梁子封中書舍人教諭韶孫萬曆壬辰科進

士工科給事天寧寺前為萬曆戊戌科

中兆斗立進士沈奉徵吳中偉立

奉十六都成化中為榮節坊都成

化中為費蓮妻縣西南小虹橋南弘治十年

向氏妙蓮立為胡繼海妻駱氏玉潤立孫

顏重縣東南弘治中為海寧雙節坊縣西南







地記云以揚州漸太陽位天氣奮揚履正含文故取

名焉爾雅註疏

職方東南曰揚州其民二男五女其穀宜稻周禮

吳自闔閭春申王濞三人招致天下之喜游子弟東有海鹽之饒章山之銅三江五湖之利

楚越飯稻羨魚或火耕而水耨果隋嬴蛤不待買而足地勢饒食無饑饉之患以故皆窳偷生無積聚而多貧是故江淮以南無凍餓之人亦無千金之家史並

記

吳自闔廬舉伍子胥孫武為將戰勝攻取與伯名於

諸侯至子夫差誅子胥用宰嚭為粵王勾踐所滅吳

粵之君皆好勇故其民至今好用劍輕死易發漢興

高祖王兄子濞於吳招致天下之娛游子弟枚乘鄒

陽嚴夫子之徒興於文景之際而吳有嚴助朱買臣

貴顯漢朝文辭竝發故世傳楚辭其失巧而少信漢書

江南之俗火耕水耨食魚與稻雖無蓄積之資然而

亦無饑餒其俗信鬼神好淫祀父子或異居吳郡川

澤沃衍有海陸之饒珍異所聚故商賈竝湊其人君

子尚禮庸庶敦龐故風俗澄清而道教隆洽亦其風

氣所尚也隋志



地有魚鹽布帛秔稻之產人性柔慧尚浮屠之教俗奢靡無積聚而厚於滋味之奉

宋志

土膏沃饒風俗醇秀文賸人物之盛前後相望勤於

農務素誘魚鹽之利訟牒爲多

一統志

海鹽地形高仰潮汐之至非有山谷隄防而人居以安其土黃壤其井泉甘魚鹽之利旣薄又溝澮之水不可瀦蓄故民皆服田力穡利於早熟市廛編戶往往家給人足喜教其子弟以詩書士大夫之裔亦各世守其業地旣斗絕一隅舟楫人迹罕至無奇貨異產動其耳目故能安習而不遷

宋儒學碑記

本邑雖斥鹵之地士慕文儒民知守分然亦有鬪巧逞奸崇信二氏而習尚未盡歸淳者

朱祥縣志

海鹽面山襟海雖斗絕一隅古稱望縣漢以來顧陸

流風未泯歷唐而宋名世之士未嘗乏絕故今俗朴

而好文儉而知義有農桑之業魚鹽之利故安土而

不樂商賈士大夫婚喪率用古禮故閭閻多化之者

女子勤婦事故雖貴富不務爲容飾士耻趨競故仕

者尚勇退而賤乾沒舊志謂鬪巧逞奸崇信二氏茲

固習尚之未淳者然由今視昔亦漸變矣

徐泰縣志

澉川風俗宋常崇稱其好侈靡喜樓閣惟招接海南



諸貨販運浙西諸邦網羅海中諸物以養生水鹹地  
濕俗僭自禁海而後利源既絕往跡俱非不見異物  
亦無外慕男惟力穡漁樵女則緝蠶井臼而已迄於  
成弘之末百五十年雖以貧見擯於諸方實以拙自  
安於樂土

董穀漱  
水誌

國初民間有以生員舉者輒相怨詈如服重役蓋學  
規甚嚴諸生俱宿齋舍日夕課業有程不得休沐人  
以爲苦也其時師道亦甚尊嚴如前輩徐豐崖先生  
乃吾祖雲谷弟子少時豐崖飲於吾家語客曰吾輩  
遇先生於道未至二十家卽拱立將至五家而揖旣

去五家始起二十家而後敢行先生但目攝之未嘗  
與語以爲常其行也張拱端好如鳥舒翼故婦人孺  
子望而知其爲朱先生其嚴重如此今師道日替弟  
子視其師顧如儕偶相諧謔者有之矣

朱元弼  
家傳

虞氏姑生洪武戊辰年至成化丁亥始卒常出故衣  
服示人云是先世所遺者其製有雲肩合袖背子長  
襖間有龍鳳金織文者問祖姑櫛髮老媪云元盛時  
天下太平法度無禁凡有宴會非服此不預戴氏姑  
亦嘗出首飾鎔銷爲用長脚大花有所謂連二頭連  
三連五頭交股釵竹節釵煖筒涼筒飛鳳壓鬢大耳



環等類每事題工匠名花銀造等字云當時女子初笄時人家多有此物詢之親戚及我母夫人皆然不數年間時制既殊風俗亦異向之古意無復存矣

未詳

家語

巾帽之說成化以前予幼不及知弘治間士民所戴春秋羅帽夏鬃帽縐紗帽冬氈帽紵絲帽帽俱平頂如截筒正德間帽頂稍收爲桃尖樣其駝帽又有瓦稜者價甚高初出時有四五兩一頂者非貴豪人不用嘉靖初年士夫間有戴巾者今雖庶民亦戴巾矣有唐巾程巾坡巾華陽巾和靖巾玉臺巾諸葛巾凌

雲巾方山中陽明巾制各不同間閭之下大半服之俗爲一變近御製忠靖冠爲臣下燕居之服所以明貴賤別尊卑三品以上飾以金線四品以下飾以青線文職惟朝貴及在外二司官府州縣正官儒學教官武職惟都督以上許用今則武夫下吏亦槩用之無所忌憚矣

國初民間婦人遇婚媾飲宴皆服團襖爲禮衣或羅或紵絲皆繡領下垂畧如霞帔之製予猶及見之非仕宦族有恩封者不敢用冠袍今士民之家遇嫁娶事必假珠冠袍帶以榮一時鄉間富民必假黃涼傘



以擁蔽其頰僭亂至此殊爲可笑非有司嚴申禁例其何以革之

並徐咸西園襍記

吾鄉習俗儉朴自國初已然天順景泰以前男子窄袖短服裙幅甚狹雖士人亦然婦女平髻寬衫制甚朴古婚會以大衣俗謂之長襖子領袖緣以園金或挑線爲上飾其綵繡織金之類非仕宦家絕不敢用燕會果毅以四色至五色而止成化來漸侈靡近歲益甚越禮非分殆無紀極司教化者釐而正之可也

仇俊卿志

四方風俗皆本於京師故有廣眉高髻之謠吾鄉自國初至弘治以來皆行好錢每白金一分准銅錢七枚無以異也但揀擇太甚以青色者爲上正德丁丑余始遊京師初至見交易者皆稱錢爲板兒怪而問焉則所使者皆低惡之錢以二折一但取如數而不視善否人皆以爲便也旣而南還則吾鄉皆行板兒矣好錢遂閣不行不知何以神速如此旣數年板兒復行揀擇忘其加倍之由而仍責如數自是銀貴而錢賤矣卅年前吾鄉婦女皆窄衣尖髻余始至京見皆曳長衣飄大袖髻卑而平頂甚訝其製之異也還鄉又復皆然

董漢陽集



浙西之俗大抵相同冠禮不備三加婚姻不論門第  
惟從目前富貴六禮之外有知節跨鞍牽綵換寶坐  
牀喫糖飯等目特爲煩猥喪事尚佛老用聲樂人始  
歿以六輪經辯生肖所忌謂之批書殯之日雖主喪  
者犯忌亦避火葬成風官設義塚亦不能息祭用俗  
節大家行喪親友釀奠務以華靡相誇至有用綵閣  
優童爲前導簫鼓闐咽者疾病專事祈禱至破產不  
恤重五通之神家立小廟僧寺自占人戶謂之門徒  
此時印經疏書人祖先姓名其上與之焚化以資冥  
福人苦遠行商去家百里則有難色

雜志  
採輯

元旦雞初鳴男女肅衣冠拜天地家廟尊長前走隣  
里親戚交拜日賀節迎春日傾城看春三日爲小年  
朝東芻田間擊金鼓焚之日照田蠶以火色占歲白  
主水紅主旱燄烈主豐衰主歛四日設粉餌祀竈日  
接竈上元前後三日爲元宵節街市紮松竹爲架張  
燈少年合金鼓管絃爲樂日開元宵初城北天妃祠  
衛揮使戶侯有鰲山燈甚盛山前立一臺先期結錦  
綺爲行棚貯倡女妓童歌舞其上從西關外設祭禮  
花燈火樹導之赴祠下登臺演傳奇夜放火樹縱遊  
人觀燈遠近百里畢集酒食價爲高倭亂後遂廢清



明祭墓掛紙錢日標墓折楊柳插於簷戶是日沈蕩  
有龍舟之戲三月三日上巴士人多攜酒水濱禳除  
仇霧海取上已述日禳禳所以浣宿垢徽新社禮也  
古人於三月三日行之或偶值上巳因以上巳爲名  
耳此禮相沿六朝最盛今北京三月三日多出正陽  
門天壇或御河邊修禊南京在聚寶門外雨花臺由  
長干通道冠蓋相屬壺盞盃陳都中士女傾城而出  
華飾異香歌管劇戲雜逞所長然在北京者甚都在  
南京者近雅吾鹽修禊多在西郊永祚寺中取泉清  
林茂可濯可風今戊午上巳徐東賓拉余同鍾西臯  
胡春崖三四公杖履赴永祚修禊客有云連歲海警  
吾輩不暇春遊今得飛觴賦詩亦一幸也迺燕未畢  
訛傳麻陽兵過邑奪船欲渡人情洶懼復皇遽而歸  
諸老因談三十年前爲甲申上巳會燕於此景物豐  
殷人材備矧今之世態一變此極而詩翁亦多凋謝  
不知長育至何時可比於甲申之盛余更嘆曰此直  
據近所閱歷爾若追念 憲 季朝阜康熙肆時世  
真同唐虞又不止如嘉靖甲申間者因述之以俟後

三十年當此日不知盛衰  
循環之運又當何如也

四月八日浮屠作浴佛會

男女茹素者各立會誦經五月五日懸神符食角黍  
飲雄黃酒婦人製繒爲人形佩之名曰健人幼者繫  
綵索於臂以雄黃抹其頂日能免災疾芒種賽神蒔  
秧日發黃徽夏至後三日爲頭黓又五日爲中黓又  
七日爲末黓謂之惡月禁弔喪問疾及土木浣濯等  
事六月六日曝衣食餽飽云解注夏疾六月十九日  
福業院作觀音大士會禱賽者每三步一拜至像前  
獻供七夕陳瓜果於庭日乞巧中元以素食祀先謂  
之鬼節僧舍設齋爲人薦亾日盂蘭盆會施水燈兒



童以瓦爲塔燃燈効梵唄聲爲戲八月中秋食月餅  
賞月是月田家祀先農釀錢爲會日青苗會九月重  
陽士人攜榼登高尋菊花玩賞十月朔祭先於祠堂  
間有掃墓者十一月冬至祀先冠蓋者行賀往來如  
正旦儀小民則否臘月以麩釀秫作酒煮而藏之曰  
煮酒春糧藏之藁囤經歲不蛀壞日冬春米二十四  
日暮祀竈謂之送竈用糖粉團以竈神朝天言人過  
失用糖取膠牙意是日掃塵丐者飾鬼神儺於街市  
除日祀先易桃符寫春帖封井禁不得取水夜燔柴  
曰燒年爐報謝天地爆竹辟邪家置炒荳米元旦且

食且祈曰湊投湊投

去聲

老幼圍爐守歲五鼓陳香燭

糕果祝家神然後以次行事此一歲風俗之大畧也

仇志

農占元旦風自東南來則歲大稔東風次之東北又  
次之西則歉西北有紅黃雲則稔白黑則歉以瓶汲  
水日準之至十二日以定其月之水旱重爲水輕爲  
旱二月八日候西南風知有秋清明日雨百菓損四  
月十六日晴則水大雨則旱惟陰雲爲佳諺云天上  
有雲地下有穀芒種後得壬日爲徵入徵多雨夏至  
後遇庚徵止又夏至日起黓黓分初中末凡十五日



中黜有雷則雨仍多諺云小暑雷翻轉作微凡微時皆滋田之日也春夏甲申雨知米貴四月二十日爲小分龍五月二十日爲大分龍皆忌雨及虹見立秋日忌雷鳴秋後虹見爲天收言收數減也八月二十四日爲稻藁生日雨則雖得穀藁亦腐重九晴則藁乾小雪日雪則穀賤又三月三日聽蛙聲午前鳴者高田熟午後鳴低田熟唐人詩云田家無五行水旱卜蛙聲是也又有鰕荒蟹亂之謠占之多驗不能悉

載

吳中田家五行

鹽邑僻臨大海斥鹵之民率多煮海爲鹽田圃之間

所產者禾麥麻桑而已其它多資之有邑易之商於至若鳥獸草木果實蔬茹本邑之土又有高卑所宜非槩有也今據所實有者錄之禾之品曰早秔中秋秔晚秔早糯晚糯麥之品曰大麥小麥蕎麥菽之品曰黃荳赤荳豇荳蠶荳白扁荳菜之品曰菘芥葱韭蒜白菜青菜莧菜薺菜芹菜菠薐蘿蔔茄子果之品曰李杏梅桃棗枇杷櫻桃橙葡萄蓮房菱蓏之品曰甜瓜西瓜王瓜菜瓜絲瓜葫蘆地蒲花之品曰薔薇木香茶麩蘆蔔芙蓉鹿葱百合玉簪蜀葵鷄冠鳳仙菊花草之品曰茅蒲蘆荻竹之品曰淡竹篔簹竹筆竹



篾竹猫竹木之品曰松栢槐榆樸棟楊柳桑柘楮檀  
冬青烏桕梓柞泉之品曰苧麻黃麻黃草木綿花貨  
之品曰鹽苧布麻布木綿布黃草布絲綿藥之品曰  
枸杞蛇牀牽牛瓜萹苣蒲艾薄荷紫蘇葛根半夏蒼  
耳野菊花車前子地骨皮麥門冬忍冬藤香附子益  
母草夏枯草旱蓮草葦蒼草羽之品曰鷄鶩鴨鷹鷄  
鶩鵲烏鸛燕雀刺毛鶯鶉鷓鴣鴿雉鴉山鵲  
啄木百舌毛之品曰牛羊猪驢馬犬猫獾兔鹿鱗之  
品河有鯉鯽鱸鰻鮎鱸白魚黃頰鰻鱖鱖蝦海有黃  
魚鱉魚鱸魚鮓魚魴魚鱖魚鰱魚梅魚鮓魚鱖

魚馬臯魚比目魚河鮑魚青蝦白蝦黃蝦梅蝦及水  
母介之品河有龜鱉螭蟹蚌蜆蠔蟬海有蟹螯蚌白  
蟹澎湖沙虎瑟蟹煙白蜆白蛤黃蛤土鐵縣志  
凡種稻先擇種立夏糞秧田浸種浸五日始秧撒之  
秧田又五日秧始齊芒種後夏至前爲徵時多雨墾  
田平之又碌之且糞之乃拔秧栽之無雨則輟水爲  
之用桔槔其糞也以猪灰以荳餅或以草入之河泥  
爛而用之栽秧二十日乃盪盪以木板叢釘於上柄  
以長竹以疏苗之行令根易行也又五六日乃耘耘  
者去草也爬苗之肋置所去草於下助糞力也耘凡



三再耘爲下農一之多弗矣耘之服日馬日盪胷日  
臂麓日指籬皆以竹爲之苗葉利懼傷膚也跪而耘  
膝故無蔽多傷矣稻水種也天澤未易常微桔槔力  
居多惟立秋前十日宜稍乾之令根固餘日水晝夜  
不得乏絕收穫多寡壹視耨水勤惰凡稻處暑而胎  
白露而秀秋分而秀齊寒露而盡實霜降而黃立冬  
盡刈矣刈稻有鑿形如鉤稍潤打稻有牀以竹爲櫛  
取其易落磨稻有礮用木或用土而齒之輕則不能  
去穀重則懼傷米也凡田一畝用種七升或八升顆  
六爲肋肋八爲箇畝獲稻爲箇者三百六十上農遇  
歲箇可得米七合畝可得米二石五斗也近水者單  
車水稍遠者雙車悉用人力高阜者耨水間用牛車  
而耕仍用人云

地產木綿花甚少而紡之爲紗織之爲布者家戶習  
爲恒業不止鄉落雖城中亦然往往商賈從有郡販  
綿花列肆吾土小民以紡織所成或紗或布侵晨入  
市易綿花以歸仍治而紡織之明旦復持以易無頃  
刻間紡者日可得紗四五兩織者日成布一疋難脂  
夜作男婦或通宵不寐田家收穫輸官償債外卒歲  
室廬已空其衣食全賴此澉浦俗善績苧更以織苧



布爲業然地實不產苧市之他方布亦大不精非貴

人所御也

增定萬曆志

蠶之初收也以衣衾覆之晝夜程其寒煖之節不使有過過則有傷是爲護種其初生也則以桃葉火炙之散其上俟其蠕蠕而動澌澌而食然後以鶯羽拂之是爲攤烏其既食也乃熾炭於筐下并其四周剉桑葉如縷者而謹食之又上下抽番晝夜巡視火不可烈葉不可缺火烈而葉缺則蠶饑而傷火致病之源也然又不可太緩緩則有漫漶不齊之患矣編經曰蠶薦用以圍火恐其氣之散也束秸曰葉墩用以

承刀惡其聲之著也是爲看火食三四日而眠眠則擿眠一二日而起起則餒是爲初眠自初而之二自二而之三其法盡同而用力益勞爲務益廣是爲出火蓋自此蠶離於火而葉不資於刀矣又四五日爲大起大起則薙薙則分箔薙早則是傷而絲不光瑩薙遲則氣萎而蠶多濕疾又六七日爲熟巧爲登簇巧以葉蓋日貼巧驗其猶食者也簇以藁覆日冒山濟其不及者也風雨而寒則貯火其下日炙山晴暖則否三日而關戶日亮山五日而去藉日除托七日而采親爲落山矣每蠶忙時有小鳥連叫日撒山看



火蠶室用火育者倦極常患失火烏蓋警之也山者  
用柴帚以禾草爲之長尺有咫大可一握散布登蠶  
其上有至二三重者凡蠶之性喜溫和與惡寒熱太  
寒則悶而加火太熱疏而受風蠶房宜卑卑則溫蠶  
簇宜高高則爽又其收種時須在清明後穀雨前大  
起須在立夏前過此不宜也至於桑葉尤宜乾而忌  
濕少則布挹之多則箔晞之能節其寒煖時其饑飽  
調其氣息常使先不踰時後不失期而舉得其宜故  
所收率倍常數時謂得養蠶術焉

朱國楨湧幢小品  
按鹽邑素不習  
於蠶近三四十  
年中蠶利始興  
今則桑柘遍野  
無人不習蠶矣  
飼蠶法多學之  
吳興因抄錄其  
說記之見

有所  
本也

凡煮鹽俗曰趁海一則謂趁潮可漉一則謂趁天晴  
可曬也趁海先佃海場場一丁其橫九弓長倍之開  
潭貯潮鑿溝築塍爲界分場爲上中下三節近海爲  
下場以潮水時浸不易乘日曬也其中爲中場以潮  
至卽退夏秋皆恒受日易成鹽也遠於海爲上場潮  
小至所不及必擔水灑灌方可曬也凡潮汛上半月  
以十三日爲起水至十八日止下半月以二十七日  
爲起水初二日止潮各以此六日大滿故當潮大三  
場皆沒自初二十八日已後潮勢日減先曬上場次



曬中場最後下場故上中每月得曬二場下場或僅  
得其一也凡曬鹽俗曰曬灰言其土之細如灰也侵  
曉先合力用削刀削灰使鬆隨以碌扒碌碎更用篠  
竿攪使極細極平方擔潭中海水以木瓢灑潑如雨  
使之勻透曬至晡時仍以削刀收邊用板推夾灰成  
一長埂以防夜雨明早仍用翻扒推埂使平更用碌  
扒碌之篠竿潑水夾板推聚如前盛夏二日或三日  
秋冬四日曬力方足冬則西北風尤勝日曬也先此  
周築土圍如櫃長八九尺闊五六尺高二尺深三尺  
名曰溜溜傍卽開一井深八尺溜底用短木數段平

鋪木上更鋪細竹數十根復覆之以柴冒以草灰然  
後挑取場灰填實溜中用足踏實再以稻草覆灰仍  
挑潭中海水多潑草上使緩緩潛滲入井中成鹹鹵  
可汲煎矣大約一溜之鹵可得二十餘擔鹵之上者  
視水百觔加重觔三十上鹵沉下次漸在上以石蓮  
子最重者一粒次重一粒又次重一粒擲鹵中驗之  
上鹵則最重者浮否則最重者沉次重者浮也煎法  
用大鑊二具中鑊一具中鑊遠於火停頓冷鹵使熱  
逐漸添入大鑊取惜薪也俗呼鹵二大鑊爲一盪用  
鹵六擔可得鹽百四十觔云大較鹽之盈縮繫乎雨



場貴賤視乎薪價晴久得鹽多雨久得鹽少薪貴鹽

價貴薪賤鹽價賤必然之數矣

削刀長一尺五寸闊二寸一面口薄如刀

用方木一塊鑿口含刀木上着六尺竹柄用以削泥  
碌扒頭長二尺着齒十四柄長六尺用以碌泥條竿  
用細石竹爲之夾扒用杉木板長七尺闊一尺裝一  
木鏟子一人用力持鏟一人用繩提夾使成灰埂木  
瓢用以挹鹵弔子用竹爲柄  
以及鹵大鐵鏟用以鏟鹽鑊

海上業捕魚者約二百家名魚戶戶納魚課始得捕  
捕之法有罟有關網有石斷有退策及鈎墜等法遠  
捕用船遠捕用單竝櫓搖櫓亦能破浪行也單以大  
竹貫疊以篾絞草紮縛成之罟亦網類口闊二丈深  
三丈口周方緣着四竹先以大木穿竹索植入海底

二丈許索浮海面必長八丈方足繫罟與潮極滿之  
勢等潮至口東向退又西向隨潮迎物受魚最多張  
罟近者得魚少必遠置乍浦關牛山東大海中此山  
洋水至淡水族所聚魚船日乘潮一往謂之撈罟關  
牛之罟以十月始張六月乃撤海物着網卽秋夏秋  
道遠多臭腐不可市耳惟近海罟所得魚鮮好足赴  
人口四時不撤矣又有草罟但以草繩結罟張近處  
用捕海月關網以竹綴網簽着淺水處高四尺餘長  
百丈空其一面潮至網沒潮退截水得魚也石斷疊  
石如城高丈許爲費頗多大小惟人力是視所謂扈



矣得魚因潮猶之關網斷多在泰山左右惟關網在近郭三四里間家戶買鮮必問關斷則又勝於近海之罟矣取近罟之魚用筭退筭用竹織成口大底尖長二三尺千百連帶以竹插置塗泥上惟鱸魚嗜泥自入筭中尤多鈎用雙鬚者長三尺許以鈎煙墾用鐵鎔沙虎穴最深須田家大四齒鐵鎔蜆與蛤蚶黃蛤用小四齒鎔大較海物亦按時見美如正月則貴河鮑卽夷魚也往時人罕食者漁人得此弃不顧今則珍爲名饌價亦增貴蜆生沙塗中殼如蛤而薄惟春月肉圓肥無沙梅魚長不過五寸類小黃魚然別

是一種也二月鱗魚長尺餘有子者佳稍不及江產鮮蛤一云黃蛤形小味鮮入土甚深墾得捷捉遲卽縮入泥中至六月便不可食三月板魚匾薄類板一名箬鱮四月鰓魚馬臯魚二魚皆無鱗鮮而易潰馬臯多烘以爲腊貯罌餉遠此時白蝦以朱腦菊花心兒稱蓋子在腹間如黃粟然用椒酒烹口咋肉脫名酒發蝦五月黃魚雖盛自從洋山網捕鹽則不能多得漁魚犁頭燕尾有翅無鱗周身裹沙齒鋒利得魚必向空戲擲而後食嘗有嚙人一解一足去者土人罵筭戶曰漁魚殘最所嗜恨此魚入石斷乃爲人所



捕又有虎頭鯊身黑尾尖得之惟堪炙油不中食蓋  
卽江豚類矣鯀魚圓大如箕腥而骨嫩尾長端有鈿  
刺人以手提能運尾擊之中刺毒腐至骨乃已至鱗  
魚最稱上品但一二見不能與江產爭多六月黃甲  
卽蠃蚌兩螯極大得卽緊縛蒸食美緩縱則介裹腥  
水較讓明州殼中黃實也魴魚嗜雄白殊勝腹子者  
鱒魚鼻與身等帶甲愈佳而脆美黃膩不減婁東晚  
城七月白蟹形似蠃蚌稍白食泥而肥海蜇卽海  
一名水母身圓白頭戴壘塊而赤浮水蠕動得之易  
而且多質成於水乾之政復無幾八月青蝦隻有重

三四兩者漁者腊之曰對蝦凡蝦自四月至此爲盛  
人家烘貯以飢盤素有銀魚細短不若產於河者九  
月土蚨自八月至此月不復食泥吐白脂晶瑩塗上  
比他月稍佳貧兒手拾盈桶不過三四錢十月沙虎  
卽蟛蜞一類獨滾居沙土約一二尺故殼軟而肥然  
墾得不易至買錢隻四五也惟蜚蚶雖穴處而散出  
聽人攬拾十一月蛤蜊亦墾沙而取肥大少遜通州  
煙處滾穴故必鈎取以大者爲美十二月鱸魚狀與  
鰾相似味不大佳若四時皆有莫若鱸魚蛇頭鱖身  
味甘骨鬆俗稱海蕨子最細美薰制薄切明如琥珀



片比明海雜着他子散細腥黃美惡自判也他如鱖魚亦時時有大者與鯊鯪二種有重百觔者又比目與箸鰈彷彿不見貴重惟海鰻肥者可角河鰻其他若孱魚之軟爛瑟蟹之細碎封皮魚之瘠薄蝦塗之作醬蟹之多壳皆下品不足言也大都蟹蛤煙蜆月滿漸瘦月黑乃肥介屬陰類隨月之暗體爲消長耳又水族雖逐時見珍然春夏秋三時種種各具但冬春之際多食泥率皆色黑腹減不中盤餐也

並姚士  
彝見只

二編

海鹽縣圖經卷之四 終



海鹽縣圖經卷之五

食貨篇第二之上

凡賦役以戶口田土編里甲出稅糧與泛差其正也  
稅糧改爲增耗爲均則泛差改爲甲首錢爲均徭爲  
條鞭銀與今之爲均甲爲歛解其變矣而課程而鹽  
課又其餘焉凡此皆東南所同寧獨余邑法之弊遞  
相爲救而漸調於平者率漸斂於重數十年來有一  
釐改定有一增派征歛之日繁亦時勢所必趨也茲  
以款若數及諸所條議備著於篇雖籍在一邑乎佗  
郡國槩可推已儻亦經國君子所必采究者焉篇不



名賦役名食貨從諸正史例不敢異爾

戶口

海鹽在唐戶一萬三千二百唐吳地記宋戶一萬三百六

十四口二萬五千八百六十六宋嘉禾志一云戶一十一

萬七百一載宋武原志內主戶一十萬九千一百六十六客戶一千五百三十五蓋紹興後盛

時戶籍也元戶四萬二千二百五元嘉禾志

國初戶口最盛據洪武二十四年冊載軍民竈匠等

戶八萬四千九百二十八口二十六萬六千四百七

十九大明會典云洪武三年詔戶部籍天下戶口及置戶帖各書戶之鄉貫丁口各歲以字號編為

勘合用半印鈐記籍藏於部帖給於民責成有司點聞比對其法甚嚴故民版無一隱漏友人姚士彝家

藏有先世戶帖一紙錄後戶部洪武三年十一月

二十六日欽奉聖旨說與戶部官知道如今天下

太平了也止是戶口不明白俚教中書省置下天下

戶口的勘合文簿戶帖你每戶部家出榜去教那有

司官將他所管的應有百姓都教入官附名字寫着

他家人口多少寫得真着與那百姓一箇戶帖上用

半印勘合都取勘來了我這大軍如今不出征了都

教去各州縣裏下着透地里去點戶比勘合比着的

便是好百姓比不着的便拏來做軍比到其間有司

官吏隱瞞了的將那有司官吏處斬百姓每自躲避

了的依律要了罪過拏來做軍欽此除欽遵外今給

半印勘合戶帖付本戶收執者一戶姚福二在城十

四都人年若干歲妻沈貴二娘女一姐房屋一間一

夏右帖付某收執准此洪武三年十一月日周圍梅

花欄大不滿二尺號數處用部印合同半鈐年月日

下空處用全印後有一大部字印下花押直連者三

又橫並者三無官吏職銜姓名沿邊縣刊一小牽長

監宿印於其上分列縣官姓名有花押永樂十年

戶七萬一千五百五十九宣德四年析平湖縣戶一

口二十萬七百五十九



萬八千九百三十三口四萬四千二百七十九實計  
本縣戶二萬七十三口八萬一千四百九十六而今  
之丁口在冊者僅四萬八千六百五十九自萬曆初  
元以來迄無增減焉累朝在冊戶口數 天順六年  
戶二萬六千五百一十八口七  
萬五千七百七十一 成化八年戶二萬六千五百  
三十五口七萬五千七百三十八十八年戶二萬六  
千六百五十四口七萬五千八百一十 嘉靖十一  
年戶二萬九千四百四內新收戶四千六百九口五  
萬二千二百七十二內新收口八千一百三十八三  
十一年戶二萬五千五百八十四口五萬七千一百  
九十一 隆慶五年口四萬八千六百六十六 萬  
曆九年丁口四萬八千六百五十九十九年二十九  
年三十九年天 啓元年冊並同

今按會典敘戶口云 國初覈實天下戶口具有

定籍令民各務所業其後休養既久生齒漸繁戶  
籍分合及流移附屬并脫漏不報者多其數廼減  
於舊是知戶口隱漏爲當今宇內通弊不獨東南  
然也廼東南隱漏所繇獨多者又自有說 國初  
編審黃冊以人戶爲主凡一百一十戶爲一里里  
長之就役以丁數多寡爲次是賦役皆以丁而定  
丁之查覈安得不明也後漸參驗田糧多寡不專  
論丁而東南開墾益多地利逾廣其勢不得不倚  
重田畝以僉派里役於是黃冊之編審皆以田若  
千爲一里不復以戶爲里人丁之附田以見者盡



花分詭寄之人所捏造而非真名滋生者不入冊  
烏有者終游移至田去名存無人頂認而籍滋脫  
漏之姦民增賠賦之累矣此江北之以丁定差者  
今尚有真戶籍江南之以田定差者今槩無實口  
數弊所爲獨甚也萬曆三十九年知縣喬公拱璧  
審冊以里甲中所存虛丁多寡不同人苦偏累始  
用均攤之法派每甲各認納丁賦五口三分雖事  
屬權宜而人均其苦咸稱其便今天啓元年樊公  
審冊亦用其法潤色之焉  
初喬公建議照田均丁  
申文畧曰海鹽丁與田  
並徵起科而糧無增損丁有虧賠者此何以故皆  
緣人戶賣田得業人不與收丁遺下丁口或戶存

人逃丁盡不除故往往爲里遞賠累也里甲代賠  
止一二丁猶可乃有賠至三四丁者亦有他甲  
田連千畝無一賠丁苦樂不均如此欲消夙弊不  
過以荒丁均攤里甲包賠或責令里甲舉報新丁  
補額而已第報新丁開里胥賄匿之門而攤荒丁  
亦重里遞虛賠之累其惟限田爲丁如吳下之丁  
隨田轉應可行之永久而無弊蓋本縣實在人丁  
四萬八千六百五十九丁今以田地五十九萬七  
千五百四十畝內除原額優免仕宦舉監生員吏  
承等項共田八萬二千三百四十畝外實田五十  
一萬五千二百畝每田一十畝五分派人丁一丁  
蓋各甲俱有荒墳故絕不成丁人口留此五分以  
備盈縮而實十畝一丁每甲均該人丁三十丁共  
派人丁四萬八千三百餘丁另山蕩灘池浜澗除  
山一萬七千五百畝額有兵餉稅銀不派外其蕩  
灘池澗等項共一萬四千二百六十畝每四十畝  
派人丁一丁共派人丁三百五十五丁足前項人  
丁之數則凡業本縣之產者無論軍民匠竈寄庄  
人戶照依前分畝數派立爲丁每丁納銀七分此  
戶賣去一畝之產卽除去一畝丁糧彼戶買得一



畝之產卽陞納一畝丁糧若是則隨田之丁糧不足槩縣之口賦新丁不必報荒戶不必攤而國課不虧里甲無累矣時知府吳公國仕以爲田賦丁糧國制原分兩額倘以田十畝爲丁而槩縣丁銀皆照田毫釐分析則有丁之名無丁之實戶戶總歸虛設而他日益難清復於是仍用均攤之法取槩縣有人赤戶八千二百二十七口派每里五十一口每甲五口一分丁賦聽里長催納其虛丁故口合凡八千五百九十七口派每里五十三口每甲五口三分令里長照丁代辦云

### 附軍匠竈戶

軍戶自洪武來克發者七千二百八十二萬曆三

年起至今新軍戶又三十有三

舊規起解軍犯聽  
僉本軍該圖里遞

長解一名軍犯無妻者該解代爲之娶并在路一應盤費俱於該圖里遞派出津貼長解使用又於本軍親族僉伴解一名押解而盤費親族自出一軍之解計所費近者不下數十金遠者不下二百

金又軍戶在圖多寡不同甚有一圖解兩三犯者爲累不可勝言於是里甲以計極生規避之謀軍犯因乘機肆攀扯之術朝指甲爲親屬暮改乙作本圖隨叻變遷欲飽而後始定軍纜赴衛旋即逃回行伍無資於荷戈鄉井先困於倒橐矣喬公拱璧有條議二則載後一革伴解輪里長挨解以千里爲則每千里娶討軍妻與在路往還之價約二十金千里者定僉兩圖圖中二十甲每甲出銀一兩卽着於兩圖中各僉伶例一人爲長解一爲正一爲副收所貼銀爲軍娶妻盤費之用路有遠近計程有加每程多千里加銀二十兩每十兩加僉一圖槩縣輪差數年中不過一次軍犯難生詐端小民得均苦樂一定議軍妻以絕離賣之弊克軍者素非良藩一經到衛卽將本妻貨賣以爲盤用身復脫逃迨本衛勾補復累里遞再娶再解甚至有累娶數四者今議初次問軍無妻者買妻起解逃回再獲起解者例不買妻以爲本犯脫逃四十之資如是則軍亦不利於逃離賣之弊可絕

三年御史李公邦華清查應勾軍戶合新舊僅二



百有奇

公通行浙省將軍戶分爲七款一爲有軍

軍產一爲丁盡戶絕向存戶名未除一爲原註奏  
豁近經辨豁一爲新軍全家赴衛本籍並無戶丁  
一爲新軍雖有戶丁在籍不係在衛所生以上六  
款備將畧節刻爲書冊銷除遇勾照冊回覆其有  
軍在衛有丁在籍者自爲一款另給循環簿稽查  
以備勾補其檄文曰勾補軍丁在國家爲必不可  
廢之法在民間爲大不忍聞之事 祖宗朝嘗遣  
清軍御史巡行天下專勅清查民間紛然不勝困  
累 今上二年允廷臣奏請始罷專遣而并歸本  
院蓋欲與百姓休息德意四十年間確守成憲非  
奉單不行勾非造冊不歲清似若令小民去湯火  
而奠衽席而惡知本原之地未經搜剔名爲休養  
仍滋蠹蟲老奸巨猾盤據爲害弊淡於下而澤不  
究於上所從來矣試舉其畧國初法意主嚴事率  
引例故遣戍獨多每一州縣無不以千數計積傳  
至今有一邑而萬計者此爲千爲萬之家相傳二  
百五十餘年子孫之消長家業之興費滄桑不知  
幾變乃按籍而稽軍丁者如故也當未奉勾單之

日人以其爲於衙門無相涉也然孰意十年則有幾  
底冊之攢造乎五年則有繼丁冊之攢造乎此二  
冊者紙張筆墨何以出患花派之無名乎抄寫工  
食何以給患需索之無術乎有派有索而民擾可  
知已然此猶論於無事之時也一奉勾單所勾多  
不過三四名少不過一二名耳然部檄一下縣票  
隨出追呼臨門舉家驚懼巧者百計營脫悍者徒  
足竄避展轉結勘乃得一丁起解而軍裝之措置  
軍妻之僉娶長解之路費卒然科歛紛紜告擾一  
家之人肝腦塗地矣然此猶論於有丁之家也其  
有丁盡產絕無從勾補單到之日有司漫難申覆  
不得不行查取結於是無親房則問族屬無族屬  
則問里長產業指東畫西姓名移花接木得錢卽  
姑爲回銷無賄仍不與除一番嚇詐何異劫擄  
然此猶論於勾單之有據者也甚至單中所載有  
姓名而無住址有縣分而無都圖事涉渺茫莫可  
窮詰則乃遍行搜查此都盡復尋之彼都一里完  
又覓之他里捕風捉影沿門挨戶究竟終是烏有  
初發不勝株連徒飽差腹何益行伍然此猶係奉  
勾之不能已者也至若積年奸書通同清軍縣丞



衙老蠹家藏底冊世傳衣鉢自恃慣熟幾如狐之  
憑城民畏歎弄恰似羊之見虎歲時買求各有定  
額即無單勾之事亦非造冊之年又不必縣官之  
片紙點墨而歲歲一度下鄉索取常例小民見之  
尊如神明奉若祖考上則銀錢布花下盡黍稻鷄  
犬爭先獻納莫之敢後其實此事原為祖宗門戶  
見丁科派富者不加貧者不減富者措處猶易貧  
者出辦殊艱本院為諸生時親見寡婦孤兒之家  
苦無立錫朝不及夕僅畜一母雉亦為軍書常例  
奪去仰天悲號頓足痛哭言之至此令人哽咽乃  
有司何嘗得知天高難呼窮民無告種種情狀有  
更僕不能悉者嗟嗟世之大逆不道率服上刑然  
一命既了別無蔓延其子孫安然無恙鄰里豈曾  
受累乃問軍之家雖罪犯深重然視死刑猶下一  
等倘世世被害無窮是法反加於刀鐮之上豈立  
法之本意哉吾儕拜官於朝食土之毛身在地方  
要以勤恤民隱為急即法不可廢柰何令吾民有  
此椎骨剝髓之患根深蒂固之憂本院為此日夜  
思所以剔法之蠹濟法之窮因而博訪故實斟酌  
事宜今特與諸有司之實心為民者約將此事立

一成規可使一定之後貽百姓以安枕之利世世  
無清軍之擾但願各有司查照後開條款如治家  
事細心料理不使中間再有遺漏則無量功德各  
屬任之本院職掌攸關得免於瘵曠之譽為榮多  
矣於是本縣入循環簿聽勾補軍戶止存二百  
有奇向來清勾之累解發之苦不祛而盡甦矣

匠戶初一千一百九十一今故絕者多僅餘戶三

百九十七內除織染局匠及弓張匠本府執役外

餘匠徵銀解京代班共一百八十四兩九錢有奇

國初籍諸工匠更番赴京工作名曰輪班匠原籍  
有月糧工所有直米成化末年始有出銀代班之  
例其定為每名每年出銀四錢五分自嘉靖四十  
一年始蓋舊規班數少者一年多者四年以四年  
一班當出銀一兩八錢計之故年徵銀四錢五分  
也 木匠七十八戶 石匠一十四戶 瑯匠一  
十九戶 鉛匠一十三戶 銀匠二十四戶 熟  
銅匠三戶 錫匠八戶 鐵匠三十六戶 雕鑿



匠一戶 粧鑿匠四戶 鍍金匠一戶 搭材匠一十四戶 黑審匠二十七戶 船木匠三戶 總匠二十六戶 裁縫匠四十九戶 雙線匠三十戶 油漆匠五戶 傘匠一戶 洗由匠二戶 擅匠三戶 熨皮匠三戶 櫓匠一戶 提紙匠二戶 裱褙匠一戶 五墨匠一戶 綿匠五戶 彈花匠二戶 蒸籠匠一戶 木桶匠一戶 土工匠二戶 竹匠一戶 染匠一戶 弓箭匠一十五戶 按匠戶所存者三百九十七據萬曆初年舊冊耳今冊中故絕者戶又九十有二以遺產代輸班銀名在實亡而織染弓張執役本府者去三十餘戶則輸銀者止二百七十戶爾自均甲行後匠戶已入緊縣戶口中納丁賦班銀不豁匠戶日有逃亡不數十年且盡矣

**竈戶** 海鹽原派海砂鮑郎蘆瀝橫浦四場竈丁一千九十三戶今海鮑二場竈丁充發者居多

**田土**

**宋農營職荒等田九十六萬七千五百四十二畝一**

**角二十三步** 農田八十一萬五千三百畝三角三十分步 營田四萬三千四十三畝二分五

釐 職田二萬四千一百二十四畝三角 荒田逃

元 元嘉禾志 夫載

**國朝洪武二十四年實徵官民田地山蕩灘港池塗**

**河漚水面一萬三千七十八頃四十一畝五分三釐**

**五毫五絲** 田九千八百七十六頃一十四畝三分四釐二毫五絲內官田四千六百九十二頃

八十七畝八分八釐六毫五絲民田五千一百八十二頃二十六畝四分五釐七毫

地一千八百五十五頃一十畝一分五釐九毫內官地一千一百一十七頃八十畝一分七釐五毫民地七百三十七頃二十九畝九分八釐四毫

山三百六十一頃八畝六分三釐內官山一百一十八頃九畝二分八釐六毫民山二百四十二頃九十九畝三分三釐四毫

蕩九百六十八頃七十五畝六分六釐六毫內官蕩八



百七十七頃二十三畝五分九毫民蕩九十一頃五十二畝一分五釐七毫 灘六頃九十一畝二分九釐五毫內官灘四頃八十八畝四分九釐民灘二頃二畝八分八釐六毫 官灘田四畝五分二釐 洪五頃三十六畝一分五釐內官洪二頃二十一畝五分二釐民洪三頃一十四畝六分三釐 官池六十六畝二分 官塗二十二畝 民河一十三畝一分六釐 官漚五畝八分二毫 民水面三頃九十六畝二分 永樂十年官民田地山蕩灘浜池塗河漚水

面共一萬二千八百九十四頃二十五畝七分九釐

五毫五絲 田九千七百四十九頃九十五畝九分二釐三毫五絲內官田四千一百二十九頃

一十四畝五分一釐九毫五絲民田五千六百二十頃八十一畝四分四毫 地一千七百九十八頃六

十四畝二分三釐一毫內官地九百八十八頃六十二畝二分五釐民地八百一十頃一畝九分八釐一

毫 山三百六十一頃八畝六分二釐內官山一百二十四頃二十八畝七分六釐六毫 蕩九百六十

七頃二十四畝四分七釐四毫內官蕩八百七十七頃九十二畝六分八釐一毫民蕩八十九頃三十一畝七分九釐三毫 灘六頃九十一畝二分九釐五毫內官灘四頃八十八畝四分九毫民灘二頃二畝八分八釐六毫 官灘田四畝五分一釐 洪五頃三十六畝一分五釐內官洪一頃七十七畝三分六釐民洪三頃五十八畝七分九釐 官池六十六畝一分 官塗二十畝 民河一十三畝一分六釐 官漚五畝八釐二毫 民水面三頃九十六畝二分五釐

宣德四年分析平湖縣官民田地山蕩灘塗浜六千

五十頃五十六畝一釐六毫五絲實計本縣官民田

地山蕩浜漚灘塗池河埂共六千八百四十九頃三

十二畝八分一釐一毫 官田七百七十六頃五十四畝九分九釐八毫 民田四

千五百七十一頃六十五畝四分九釐 官地一百二十頃八十五畝九分三釐 民地六百三十五頃



九十六畝七分三釐五毫 官山七十六頃八十二畝六分九釐一毫 民山二百二十四頃六畝四分六釐二毫 官蕩三百七十四頃二十畝二分八釐八毫 民蕩六十八頃二十六畝七分二釐二毫 官灘一頃一十七畝六分四釐 官浜一頃四十四畝九分一釐 民浜三頃五十畝四分四釐 官池六十六畝一分 民河一十三畝一分六釐 官漚五畝八釐二毫 民水面三頃九十六畝二分五釐

成化十八年黃冊官民田地山蕩灘浜池塗河漚水面共六千八百四十九頃三十二畝八分一釐一毫

田五千三百四十八頃二十畝三分九釐七毫內官田七百七十六頃五十四畝九分八釐八毫民田四千五百七十一頃六十五畝四分九毫 地七百五十六頃八十二畝七分五毫內官地一百二十頃八十五畝九分七釐民地六百三十五頃九十六畝七分三釐五毫 山二百九十頃八十九畝一分五釐三毫內官山七十六頃八十二畝六分九釐一毫民山二百一十四頃六畝四分六釐二毫 蕩九百八十二頃四十六畝九分一釐內官蕩三百七十四頃二十畝一分八釐八毫民蕩六十八頃二十六畝七分二釐二毫 官灘一頃一十七畝六分四釐 官池六十六畝一分 民河一十三畝一分六釐 官漚五畝八釐二毫 民水面三頃九十六畝二分五釐

十二頃四十六畝九分一釐內官蕩三百七十四頃二十畝一分八釐八毫民蕩六十八頃二十六畝七分二釐二毫 官灘一頃一十七畝六分四釐 官池六十六畝一分 民河一十三畝一分六釐 官漚五畝八釐二毫 民水面三頃九十六畝二分五釐 嘉靖十一年黃冊官民田地

山蕩灘浜池塗河漚水面六千四百三十六頃八十五畝三分七釐七毫三十一年黃冊田地山蕩灘浜池塗河漚水面共六千八百四十九頃三十二畝八分一釐一毫隆慶五年黃冊田地山蕩灘浜池塗河漚水面共六千二百三十八頃四十八畝一分五釐

六毫 田五千一百三十四頃九十三畝六分六釐一毫 地七百三十六頃七十七畝八分七釐一毫

海鹽縣圖經卷五

田五千一百三十四頃九十三畝六分六釐一毫 地七百三十六頃七十七畝八分七釐一毫



毫 山二百八頃五十二畝三分四釐四毫  
蕩灘浜一百五十八頃二十四畝二分八釐

今萬曆九年奉例丈量通縣田地山蕩灘浜池澗水

面共六千二百九十三頃九畝一分一毫七絲而衛

所之屯田場司之竈山荒蕩蕩不在其數焉田地五十九萬

七千五百四十四畝三分九釐四毫六絲二忽內田

五十二萬一千八百六十一畝六分八釐九毫六絲

二忽地七萬五千六百八十二畝七分五毫 山蕩

灘浜池澗水可三萬一千七百六十四畝七分七毫

八忽內山一萬七千五百三十八畝一分三釐六毫

五絲蕩一萬三千一百三十三畝二釐四毫五絲八

忽灘一百一十七畝六分四毫浜四百九十五畝三

分五釐池六十六畝一分澗五畝八釐二毫河一十

三畝一分六釐水面三

百九十六畝二分五釐

國初田土分官民中又各分高下等則蓋悉仍宋

元舊制觀宋志縣先有營田職田吳元年本府抄

報偽吳版籍內有功臣還官田及云官田原科若

于者此可證矣按宋制民用工本耕種係官空閒田曰營田給與文武官養廉地民佃起糧曰職田見王文恪公蘇郡志其合官民田為一則一切以直

截簡易之法行之則始自嘉靖中太守趙公瀛語

具後徵額中草昧民習淳簡凡事易分等差承平

奸偽漸滋畫一始絕蠹蔽不獨田土然爾後數十

年為萬曆辛巳江陵初國又有丈量之役其法將

田土分段立號算實弓口畝數備書坐落都圖里

分業戶姓名及田計四至挨編入冊藏之縣庫蓋

海鹽縣圖經卷五



一準 國初魚鱗之舊而益核之吾鄉田土自趙  
公均平來此番丈算尤爲一大清楚迺議者猶謂  
宣德初祖縣田額爲畝六十八萬四千九百有奇  
今閱 累朝之久開墾實多而丈實田土六十二  
萬九千三百有奇反縮原額五萬餘隱漏殆亦不  
少然約畧其數爲二十中之一視丁口之全脫者  
弊稍殊矣必人僞之靡蒐將坤輿亦失廣識政體  
者或無庸瑣瑣而問畝間嘗謂吾鄉田地丈量以  
後經界旣正潤色無難若於每冊推收過割之年  
清查在甲之總散抽對舊籍之號數無心差誤者  
聽改有意裁除者必罪尚可支持四五十年不至  
於大紊惟是時當生齒極盛有限之方幅難供野  
罕寸壤不耕無窮之利源易盡習成侈俗而桑田  
多稻田爲之漸窄屢遇豐年而穀價貴田價因而  
逾高風氣無留餘之象世界有囂偪之憂斯則方  
升之盛際翻似極重之末流爲可深慮耳聊因則  
壤抒斯激論亮司土者必有以維之已

附水利

海鹽地勢南高北下水皆北趨夏秋之際十日不  
雨則耕者憂之故水利視佗邑尤急唐長慶中令



李公諤始於縣西境開古涇三百一廣可通舟徐  
泰謂卽今麻涇簡涇之屬此則余邑水利之始而  
西境田土於今獨爲上腴者皆食李公賜也諸涇  
之水竝入官塘官塘者一名運河東自天寧寺前  
上承招寶烏坵二塘之水過歟城半路至橫塘以  
入於郡城之南湖而東北一支則由陶涇塘入當  
湖以入松江橫塘口去水甚迅宋嘉祐元年令李  
公惟幾於其處植木爲牐中闊一丈二尺兩塊各  
高一丈六尺五寸以時啓閉蓄官塘西瀉之水名  
其牐曰常豐元祐四年令何公執中易牐口以石

淳熙十五年令李公直養重治牐板且爲屋覆之  
由此水有所儲連歲獲稔後以舟楫通行不便牐  
竟廢今俗猶呼其地爲橫塘牐是也先是淳熙之  
九年宗室趙善悉知秀州有善政而孝宗皇帝流  
虹郡廨素悉一方民艱中夜下金字牌親札與善  
悉曰海鹽地高病旱豈有水利可興者乎於是發  
工一萬濬官塘迄於橫塘三十三里二百七十四  
步并濬招寶塘二十五里烏坵塘二十餘里陶涇  
塘十二里而鄉底各堰前令李惟幾嘗置三十餘  
所捺水善悉復增爲八十一所每歲二月築塞九



月始開通漕洩有時水利大興焉

善悉事見宋史及葉適撰墓誌

中弘治志云古堰八十一白分平湖在本縣者

四十有二廢者漸多矣按堤堰興廢不常今採歷

志所載入鄉堰名備列以存舊貫開濟鄉周墩

馮孟家堰張泥堰新水堰錢涇堰周大堰計家堰

徐涇堰洛漚堰朱莊堰未寧鄉白塔堰宋涇堰

陳浦堰丁漚堰干涇堰錢家堰陶涇堰孔家堰

長水鄉大土堰板層堰黃泥堰小華家堰西吳市

堰東吳市堰鐵城堰徐涇堰黃涇堰嵩峯堰談家

堰棠成堰德政鄉孫家堰沈家堰六里堰北橫

涇堰彭村湖堰八楞港堰馬家堰勝家廟堰倪家

堰龐家堰楊家堰衛家堰三里堰湯馮堰武原

鄉馬廐堰十八里堰白馬堰李家堰孫堰馬駝堰

孫三堰齊景鄉曹溪堰王道堰紀家堰清水墓

堰方家堰鹹堰陳家堰瓦石堰金賣線堰周家堰

俞家潭堰黃泥堰楊李堰土山堰小山涇堰鍾磬

堰湖口堰代峯堰李塔堰沈墓堰東裴塔堰西裴

塔堰丘沈堰馬梁堰東閭堰墓蜂堰華亭鄉顧

施東棚堰顧施北棚堰桃星堰沈福莊堰新帶堰

方塘堰朱洞堰羅漢堰西閘堰祗園堰俞家堰大

芒塘堰余家堰夏角堰麥塔堰西黃泥堰楊蕩堰

翁莊堰志公堰大孫堰大易鄉沈馳堰許國朝

洞堰馮奧堰錢家堰月河堰戴堰馮河堰

洪武初命所在有司遇圩岸壩堰坍缺溝渠壅塞

不時築治開通用備旱潦本縣三十一區向有田

圍築之備水者每歲區各以糧長正副一人督圍

長典工葺之其最低圍田則末樂三年遣左通政

趙公居任治農官知縣畢公瑗令民沿堤栽桑柳

菱蒲蔽其岸俾之堅固凡一千六百四十圍云

縣末

樂志載高阜圍一千三百一十八低窪圍三百二

十有二開濟鄉一都田圍四十八二都田圍六

十六三都田圍六十永寧鄉四都田圍五十七

五都田圍八十八長水鄉六都田圍七十八七

十四

海浦縣圖卷五



都田圍五十二八都田圍四十六 德政鄉九都  
田圍六十都田圍四十一 都田圍四十八十  
二都田圍四十四十三都田圍一百 甘泉鄉十  
四都田圍一百二十五十五都田圍二十一 海  
鹽鄉十六都田圍六十六 大易鄉十七都田圍  
七十 武原鄉十八都田圍二十高阜一十三低  
窪七東十九都田圍二十八高阜四低窪二十四  
西十九都低窪田圍八十三 齊景鄉二十都田  
圍七十七二十一都田圍一百十二高阜八十三  
低窪四十齊二十二都田圍五十六華二十二都  
田圍五十一高阜二低窪四十九 華亭鄉二十  
三都田圍四十九高阜四十四低窪九二十四都田  
圍四十八高阜一十一低窪二十七零二十四 成  
都低窪田圍七二十五都低窪田圍五十一

化六年水利叅政何公宜以陶涇淤壅督民濬之  
弘治九年僉事伍公性知縣譚公秀再濬至萬曆  
五年巡撫徐公棧築塘海上因有白洋河及澉浦

上河之役白洋河者北起閱武場而南屬之常川  
舖長三十里初鑿時以運塘石而河成海上荒土  
得灌爲良田者萬餘上河者又起自常川舖西南  
屬之澉浦城下二十里地形稍高於白洋河則築  
爲土壩以捺之所灌田視白洋河再倍初澉人多  
病疴自河鑿而人多秀雅富文風科第且聯綿起  
風氣一變利不獨在田疇矣其議蓋創於鎮之百  
戶余騰蛟工初與人盡怨之至不能安於家匿避  
江右以免及今享其利人又頌余不置也事慮始  
難樂成易類如此今閱武場之北屬於乍浦尚有



白洋河之半淤塞未鑿惜未有迄其功為惠於北

境之民者

徐公栻疏畧曰海鹽縣秦駐山南至敵浦所地方原有河一帶在土塘之內舊

連縣治商旅輻輳田畝歲收稱為沃土近皆淤塞坍塌舟楫不通赤地徧野原設敵浦稅課局因而裁廢旱乾無備糧運艱苦乙亥海溢之變敵浦軍民被災尤甚以石塘一帶外無擁護內無分洩故也臣時營度海塘親履其地見田廬荒廢間里蕭條目擊流離所不忍言適塘工告竣一方軍民呈詞懇切誠可憐憫若將此河因其舊跡再為開通卽以濬河之土築塘則該所至該縣內河上塘一體高厚濶廣聯結鞏固縱有異潮之來不能衝突而田疇得灌溉之資一水相通糧運直達貽惠軍民實為無窮矣疏下部覆動支海塘餘剩銀開濬詳具隄海篇邑人吳徐開濬白洋北河議曰本縣與海寧衛司一城池南四十里有敵浦所設立海砂鹽場衙門俱在海濱脈絡共相聯貫所恃通行其間使防汛無虞鹽貨不阻者專藉沿海舊有白洋河一帶

為之來往也祇因陵谷屢更以致涓流盡斷地方受病非止一端幸於萬曆初撫院徐修築海塘奏准水利道駐劄海鹽溪獨利病將南路至敵浦鹽司四十里地開濬白洋上下河一帶南行水路盡得流通其北路白洋河正擬興工值水利道陞任而止因循至今未終前局南北有偏枯之澤商竈合匪民之悲非一日矣愚謂前開南路河道種種利便備載本縣新修海塘錄中可據若今北路之河為便亦可枚舉土塘捍海在北最低每當潮溢之時鹽場竄蕩民田盡被其衝所損不少若開河取土築塘令之高厚內河可以分洩其流外塘可以捍禦其患縱有非常民不受害此為一便乍浦所至海寧衛城俱是陸路不但彼中糧餉器械搬運為難抑且官兵分番調守往來不便今開此河則船隻通行聲息易達以之守望防汛更為得策此為二便海砂場司正處河之中途兩頭鹽運頗費搬移河開則舟載不難涇河遞相灌注脚價既省商賈因而樂趨不藉招徠鹽課自益此為三便土塘外為鹽場內卽竈蕩今開河築塘攔阻潮頭則塘外零星灰便盡可由引鹹流開陸漉鹵塘內



荒蕪草蕩亦得蓄積淡水墾作田疇四十里之內  
所增鹽課又不知幾何此爲四便先此敢浦河道  
未通之時民病疴腫士鮮文學今開河後不但民  
無疾病亦又科第聯綿今乍浦一城何止萬家乃  
發科從無一人皆云氣脉之不通致使天荒之難  
破若得開濬河道將見風氣默回人文日盛不獨  
毓秀祇在鹽城行見與文徧於二所此爲五便惟  
茲五便衆所咸知祇因錢糧之難辦姑俟時勢之  
可爲竊計興萬年之永利者不吝小費成天下之  
大事者不阻旁撓苟有利於生民又何難於工役  
查得南路自洋河四十里上河費銀三千六百一  
十九兩兩下河費銀五千有奇俱有卷案可考今比  
照銀數亦應相同本府海塘銀每歲徵貯七千兩  
在庫專備捍海之用屈指十年之內萬曆三十九  
年支銀四千八百兩天啓二年支銀二千九百兩  
菜塘外其餘存積尚多此河開濬原取土造塘備  
海似應於此項錢糧支用或謂河通有裨鹽課則  
傍河竈佃皆可照田派工鹺司羨銀不難破例設  
處總之出自民力大工終屬畫餅措之官帑何事  
不可立臻邑之商竈軍民望此舉已久在大有爲

者立斷而行之爾矣

又澈浦鎮西六里有永安湖者瀦傍山

之水以灌三村十六保之田周十有二里莫詳陂  
築所自宋志云舊本是田爲畝三千七百後隄之  
爲湖灌田八千二百餘而均稅於田故稅額雖重  
民卒賴以無旱乾患元時爲豪有力者決壞民以  
失業有寓公安撫使王濟者始奏復之洪武初鎮  
民張小五請於朝嘗遣官開濬至正統十年縣  
丞龔潮復請旨重濬竟以工大倚閣稍患淤淺  
矣湖舊濶一丈五尺置牖引灌具有法雨久水多  
則東南洩於海所灌田產穀甚美租亦倍入爲海



邑腴產最湖水宜稻種輒多收故也

元大德十三年六月初一

日結勘本湖責說 德政鄉十三都敵墅石帆村  
住坐社長張千五等今蒙本都里正奉海鹽州指  
揮該爲照勘本都未安湖有無違礙公事今來干  
五等從實照勘責說得本里古有未安湖三千七  
百畝積諸山之水灌溉敵浦敵墅石帆三村官民  
田八千三百餘畝此湖原係民田爲湖其稅均於  
湖側田上輸納就湖東際石砌斗門木板爲閘以  
時啓閉每遇天旱開閘放水下流灌救田苗或天  
雨連綿湖水漲溢御有東南葛母山下古置渾水  
閘放泄入海是以三村農田稅雖繁重歲無水旱  
之憂百姓均受其利見存亾宋武原誌書詳載分  
曉至元十三年歸附初鎮守管軍官王招討分付  
駱百戶監督隅保塘長起差鄉夫將未安湖西南  
際湖面築捺圍裹成田三百八十畝於官司投告  
文憑虛指湖面御作天荒昨草地段卽非有主民  
產亦非係官地土白此作駱興名字抱佃送納官  
糧二十八石於後至元二十六年有王招討男王  
四萬戶將上項湖田過佃敵浦鎮楊招討召業之

後卻於湖田南際掘開海塘初造石閘連年每遇  
春水泛漲之時不顧此湖積蓄救田水澤以備天  
旱但恐淹損湖田菜麥却將湖水賣夜放泄入海  
及至夏旱要得湖水灌田又被管佃戶朱六十二  
與塞不容水源通流致有三年兩旱田禾不收百  
姓賠納官糧并老小口食不給與妻賣子流離亾  
亾爲是豪勢畏懼不敢言告民受其害冤抑不能  
上聞若蒙官司將上項湖田仍舊開掘爲湖積水  
灌田實爲民便今蒙體問所責是實伏乞詳情備  
申年月日縣押司吏余志遠押 復未安湖碑記  
日因以民食爲天而民食又以潞水爲先務最重  
也皇元撫育人民興舉水利無遺亦盛矣哉海鹽  
本嘉興屬邑比陞爲州州南四十五里有湖曰未  
安週迴十二里潞水灌溉敵墅敵浦石帆三邨農  
田潦則東南注入於海旱則水澤仰給於湖遂變  
斥鹵爲膏腴時和歲豐家給人足茲有禩矣歸附  
初至元丁丑敵浦鎮守王招討憐假軍權而濫毒  
縱已欲以誅末力逼鄉夫圍湖成田三頃八十畝  
令駱興立戶每秋輸糧三十八石至元巳丑歸之  
揚招討思諒未幾瀕湖居民效尤盡欲決而田之



是以三卹屢經旱患民食不給多流徙四方者大德已亥里人王仁狀具於州雖鞠治焉猶未削誅也幸賴澈浦寓居宣威將軍前南寧州安撫使王君濟勇於爲義聞之朝廷由是省臺委官公同蒞政日擊斯害昭然孔彰大德乙巳秋七月浙江行省平章政事徹里榮祿偕都水監官及本路本州官親臨糾惡廉明公正遽令疏濬爲湖開除元立佃米一畝而正之於是狼吞虎噬之徒爲之斂迹斯湖得以復舊噫不有廢也成之名不彰不有壞也立之功不著今廢而復立使斯民享悠久無窮之利得遂仰事俯育之願顧不偉歟茲刻於石庶來者知斯湖源流有自云爾至大四年二月日前權東坡書院山長趙若源撰從事郎鮑郎場鹽司令金汝礪書承務郎嘉興路同知海鹽州事趙泰篆奉政大夫嘉興路兼勸農事朱緒立石 天順三年海鹽縣委官主簿樊公佐估勘湖工申文畧云勘得本湖通行三千七百四十二畝中有官塘行路一條古分南北二湖二湖周圍俱係山海北湖口原有古閘一座樽節水利遇旱起開放水閘下四畝入河港車蔭官民屯田八千三百餘畝本湖

并河港自洪武年間有老民張小五奏准起夫開挑各溪五尺三時不旱田禾有收到今八十餘年其湖河港浜濃俱各淤塞淺窄偏生野草遇旱俱如平地湖底與田彷彿高低無水車戽似此荒多熟少連年虧欠稅糧民食不給流移逃竄後於正統十年得蒙本縣縣丞龔潮達奏奉工部堂字三百七十一號勘合行仰委官踏勘起倩七縣人夫一萬八千五百餘名開挑至今未蒙起夫興工田禾愈加荒旱今蒙勘得本湖南北二處俱各平淺開下通湖河港高如湖底如蒙查照原奏勘合事理起夫將開下河港浜濃急當先濬通接六里堰下河港接開北湖開掘之際倘有雨水不常先將閘下河港瀝去水漿庶不失悞工程以後方開南湖若得開完河湖田禾有收糧無拖欠人民利益逃者思歸又澈浦千戶所軍餘屯田俱得利便今勘得永安二湖古該三千七百餘畝今量計三千七百四十三畝南湖一千三百三十三畝每畝用夫五名共夫六千六百六十五名開濬五尺北湖二千四百一十畝每畝用夫五名共夫一萬二千五百名開濬五尺開下河港浜濃量計五千九百



七十九丈五尺闊狹不等每丈用夫一名共該夫  
五千九百七十九名開濬五尺俱計工二箇月可  
完董灃與吳南溪論未安湖水利書曰灃頽朽  
之齡惟存餘氣於身家事去心久矣獨耿耿於垂  
盡之年者惟不忍地方民生凋瘵長利未與欲圖  
挽回耳激之水利莫大於未安湖自歲丙子移文  
開濬經今十有八年竟成畫餅言之可嘆竊詳斯  
議其來已久自洪武二十七年老民張小五奏准  
開挑之後正統間有本縣縣丞龔潮奏奉工部勘  
合起夫重濬停歇至天順年中纔蒙布按二司臨  
勘起夫二萬開挑竟以連月雨雪不能施工而止  
後至成化間有本區里老徐信弘治間有民人盧  
孟斌正德間有掌印千戶楊北嘉靖三年七年連  
早有軍民耆老陳縉陳紳湯沐或申詳或呈請俱  
被捺歇嘉靖九年軍餘胡鑽爲衆建言被責幾歎  
竟亦無成民情如此上人只作故紙奈之何哉夫  
以百六十年大患屢經勘催而竟抑不行者其故  
何歟一則地方僻處海角府縣隔遠上司不到危  
苦之狀不能上聞二則吏胥之弊非錢不行而地  
方公務錢何從出三則間有數輩姦黠細民侵佔

填塞浚懼顯露多方陰阻四則糧塘里老明知疏  
濬於已有益但懼供給因小失大見當身役含糊  
稟歇及至交替便望舉行逐年延捱以此墮誤殊  
不知圖大事者不惜小費建大業者不辭小怨位  
高望重之賢加志斯民折枝而已寧復有難事哉  
竊惟先生於此一十八年之間於當道屢嘗言之  
有志未究今克終初議非其時邪灃老矣敢人數  
舉不効無肯言者矣先生而弗任弗圖也灃之望  
且絕惟俯察幸甚董毅議曰人皆知激之貧豈  
知貧之自哉食之所資者農農之所資者水激之  
山四塞而水無源故西南皆膏腴之田而取足於  
一湖東北多斥鹵之地而仰給於天雨湖旣淤淺  
雨復不時則環鎮秋成皆失望矣疏濬之議起於  
天順迄今又百年顧未舉斯民如之何不寔也  
湖開四座南湖開一北湖開一轉水閘二激水志  
云成化間水利通判張岫親詣湖上相視高下置  
建至今民受其利其沿海浦港如宋時所濬藍田白塔元

至正之鹽河 國初之夾塘潮牖用蓄泄內水與



外潮通者並爲海沙壅塞或被衝嚙去久廢不存

矣藍田浦通自塔港者宋咸平中魯公宗道開紹熙中李公直養重濬詳見前山川類宋史河

渠志秀州澱山湖自蘆漚浦入海常湖自月河南浦入海敵浦口亦達海乾道二年守臣孫大雅奏

請于諸港浦分作牐或斗門其兩柱金口基址並以石爲之啟閉以時民賴其利

永樂志鹽河牐縣東北九十里蘆漚場前元至正間本場司丞于

原明建夾塘開縣東南六里洪武二十七年十月海寧衛指揮僉事趙鎧置潮關縣東北三十六里

乍浦城南洪武二十七年乍浦千戶所置按夾塘牐與潮牐皆於海岸鑿之通潮以收海船潮至

則開潮平則閉鹽河牐則因鹽場地高置牐引潮以便鹽運與藍田港浦專主灌田者稍有不同然

當時海口不知何緣能使鹹潮不倒灌內地無損禾稼若今時則隄而禦之猶恐有害敢復引之通

耶或言數百年前潮頭尚低今則却高丈許以地準之似亦非誕意海潮乘氣衰旺非必一海盡平從古無異也

### 稅糧

唐稅四萬六千五百八十一貫五十八文

載唐陸廣微吳地記

兩稅及茶鹽酒課俱在此數年遠無考難以分別

宋夏稅一萬三千一百九十六疋兩三丈七尺三百

九十九丈秋稅苗米六萬四千二百四十七石二斗

九升九合九勺

載嘉禾志又宋武原志云夏稅八萬六千六百五十四貫一十九文秋苗

六萬四千二百四十七石二斗九升九合九勺

元額管糧八萬一千六百七石八斗三升五合八勺

除公田歲減外實徵糧七萬四千二百六石四斗二

升二合一勺六抄

元嘉禾志云額管糧八萬一千六百七石八斗三升五合八勺內米



八萬一千五百九十一石三斗九升二合荳一十六石四斗四升三合八勺公田歲減二分計米七千四百一石四斗一升三合五勺四抄實徵糧七萬四千二百六石四斗二升二合二勺六抄內米七萬四千一百八十九石九斗七升八合四勺六抄荳一十六石四斗四升三合八勺

國朝洪武二十四年實徵夏稅麥九千七百四十八

石九斗一升五合七勺絲一萬九千七百六十兩七

錢七分二釐九毫六絲綿九千二百三十七兩一分

三釐三毫鈔五千八百四十貫九百三十三文秋糧

二十一萬四千三百七十七石二升四合

永樂十年實徵夏稅麥九千一百四十五石三斗二

升二合五勺絲一萬九千三百五十二兩三錢一分

一釐叁絲綿八千九百五十三兩八錢五分九釐八

毫鈔五千八百七十貫七百八十二文貨房鈔二百

一貫二百五十文秋糧一十九萬三千二百五十三

石一斗三升五合八勺 舊志載本年徵收等則附後官田每畝科糧計二十五

則一則七斗三升一則六斗八升四合一則六斗三

升一則五斗八升一則五斗六升一則五斗五升一

則五斗四升一則五斗三升一則五斗二升一則五

斗四合一則四斗八升四合一則四斗六升一則四

斗五升一則四斗四升一則四斗三升一則四斗二

升四合一則四斗四合一則三斗八升一則三斗六

升一則三斗五升一則三斗三升一則三斗二升一

海鹽縣圖經卷五

二十一



一則糧二斗一則錢一則糧三斗五升絲五分綿五分一則  
麥二斗三升一則錢一則麥一斗三升一則麥四升一則麥二  
斗一則麥二斗五升絲五分綿五分一則麥一斗二升一  
則麥二斗綿一錢一則麥三升絲五分綿五分一則  
麥三升一則鈔八十五文一則鈔六十文一則鈔四十  
文一則鈔二十五文一則鈔二十文 民地每畝科  
糧麥并絲綿鈔計八則一則糧二斗六升絲一錢一  
則糧二斗四升一則糧三升絲五分綿五分一則麥  
五升絲五分綿五分一則麥三升絲五分綿五分一  
則鈔八十文一則鈔二十文 官山每畝科糧并鈔  
絲計五則一則糧二升一則鈔八十文一則鈔四十  
文一則絲一錢一則糧四升一則鈔八十文一則鈔六十  
文一則絲八分 官蕩每畝科糧并鈔計七則一則  
糧三斗五升一則糧一斗三升一則糧一升一則鈔  
二百文一則鈔六十文一則鈔二十文一則糧一文  
民蕩每畝科糧并鈔絲計七則一則糧一斗一則  
糧三升一則糧一升一則鈔一百文一則鈔八十文

一則鈔二十文一則絲八分五釐 官灘每畝科鈔  
計二則一則鈔六十文一則鈔二十文 民灘每畝  
科糧并鈔絲計四則一則糧五升一則鈔七十文一  
則鈔二十文一則絲一分 官灘田每畝科糧四斗  
五升一則一斗三升一則五升 民灘每畝科糧五  
斗 官池每畝科鈔三十文 官塗每畝科鈔二十  
文 民河每畝科鈔二十文 官漢每畝科糧五斗  
民水每畝科鈔二十文 又農桑舊額 桑九  
百八十八株科絲四十七斤二十一兩三錢每絲二  
十兩折絹一疋共折絹 三十八疋五尺三寸

宣德五年夏稅麥三千三百五十五石三斗七升一

合二勺絲一萬一千二百九十五兩九錢九分九釐

九毫綿三千二百二十兩三錢九分九毫鈔五百三

十二錠四貫八百五十八文秋糧米六萬六千九百



九石三合九勺

是年分平湖縣夏稅麥三千五百九十九石六斗八升六合九勺絲八千

五百六十八兩三錢二分八釐六毫綿五千二百二十一兩三錢五分二釐四毫秋糧米六萬九千八百

十一石二升二合五勺馬草五萬七千六百八十五包九觔一兩此據郡柳志所載其本縣弘治志嘉

靖志並失載

嘉靖十一年夏稅麥三千三百五十五石三斗七升

一合二勺絲綿一萬四千五百一十六兩三錢九分

九毫鈔五百三十二錠四貫八百五十八文秋糧米

六萬六千九百九石三合九勺馬草八萬八百二十

四包一觔七兩

嘉靖徐志 前求樂弘治二志及郡志並不載馬草原額脫誤無攷

萬曆二年夏稅 起運京庫麥二千二百七十二石

六斗三合

每石折銀二錢五分共銀五百四十三兩一錢五分七毫五絲每兩外加解京滴補

路費銀二分共一十六兩二錢九分四釐五毫二絲二忽解省費一兩三錢五分七釐八毫七絲六忽八

微七塵 京庫折絹絲綿三千二百二十兩三錢九分

九毫

每絲綿二十兩折絹一匹共絹一百六十一匹五寸八分六釐二毫解京路費銀一兩九錢三分二釐二毫三絲四忽五微五塵省

費銀三錢二分二釐三絲九忽九塵 存留本府織

造局荒絲一萬一千二百九十六兩

每兩價銀五分共銀五百六十一兩

四兩八錢解省路費銀一兩四錢一分二釐

本府軍資庫鈔五百三十二

錠四貫八百五十八文

每貫價銀二釐共銀五兩三錢一分九釐七毫一絲六忽

本縣廣儲倉夏麥折正米一千一百八十二石七斗

六升八合一勺

秋糧

起運北京供應庫等衙門



白粳糯米四千三百六十三石四斗五升三合五勺

每石准正耗糙米一石一斗共准糙米四石七九升八合九勺 京儲折銀

糧一萬七千一百八十八石四斗二升二合一勺六

抄 每石折銀二錢五分共銀四千二百九十七兩一錢五釐六毫每兩加解京滴補路費銀三分共銀

一百二十八兩九錢一分三釐一毫六絲六忽 京倉

兌軍正米三萬二千四百石 輕齎三六耗米折銀五千八百三十二兩內解

淮三四銀五千三百四十六兩扣留給軍三升米銀四百八十六兩松板楞木銀四十二兩九錢三分

南京供用庫白粳糧二百一十四石三斗七升五合

每石折銀九錢共銀一百九十二兩九錢三分七釐五毫 南京各衛倉糙糧正米

五千六百六十三石七斗七升七勺 每石加船夫耗米六斗五升實

該起運正米二千七百五十九石七斗七升七勺 派徐州廣運倉改兌正米

一千六百二十三石 內本色正米一千二百九十八石四斗折色正米三百二十四

石六斗每石連耗席折銀六錢共銀一百九十四兩七錢六分 徐州永福倉糧七百

五十八石 每石折銀六錢共銀四百五十四兩八錢 存留本縣兌軍秋

鹽行糧正耗米三千二百四十石本縣常積一倉米

四百三石八斗三合九勺 馬草起運京庫草六萬

六百包 每包折銀三分共銀一千八百八十三兩 定場草一萬七千五百

八十包 每包折銀一分一釐共銀三百一十六兩四錢三分 本縣廣儲倉二千

六百四十四包一觔七兩 每包折米五升共米一百三十二石二斗七合一勺

八抄七撮五圭 本縣儒學倉糧二百五十石每石折銀八



錢共銀二百八十兩本縣廣儲鹽糧正米四百六十  
五石六斗七升四合三勺

萬曆  
仇志

萬曆九年丈量後至今天啓二年額徵 夏稅麥三

千三百五十五石三斗七升一合二勺絲綿一萬四

千五百一十六兩三錢九分九毫租鈔五百三十二

錠四貫八百五十八文秋糧米六萬六千九百六十

六石六斗六升一合三勺馬草八萬八百二十四包

一觔七兩

細數見派  
徵規則內

國初江南正賦止有兩稅而轉輸之費俱不入額

蓋其時與鼎金陵地近易達故卽以運納借之民

力不稱厲也迨改宅幽燕道里艱阻小民遠運抵

京正糧一石率用米至于三石財殫力罷勢須釐

改宣德五年周文襄公忱始於額外加徵耗米用

以兌軍支運而漕政因之漸定其法正糧一石加

耗七斗而支兌遠近就中伸縮有差於是民得免

遠漕之苦法行至今所謂稅糧改爲增耗者此也

然是時田土起科尚分官民等則民田以已業稅

輕輕之極畝止三升而耗之增也無幾官田以承

佃稅重重之極畝至七斗而耗之增也愈極雖嘗

調劑其間重者准折金花輕者盡派白糧而則之



名目既衆下之姦弊自繁鬻業者既減額以求售  
豪強者復行賄以游移版籍同彼絲茶訟牒幾至  
山積於是嘉靖二十六年知府三原趙公瀛創議  
田不分官民稅不分等則一槩以三斗起徵而山  
蕩灘浜池溲水面瘠薄之地亦各自爲一則以出  
正耗之征焉至今百餘年間田冊截如稅額井如  
雖三尺童子可按畝輸賦不至爲豪里猾算所欺  
則趙公之遺法存焉矣所云增耗復變爲均耗者  
此也當趙公議均耗时宦室富家慮輕則田不免  
一例加稅蜚語撓之不置先外王父方伯劉公言

邑孱廉嘗旅見於公有同儕某者語囁嚅欲言斯  
議之未便公嗔目視曰子云何吾手办子矣其疆  
毅不奪矢必舉行若此所繇克湔積弊永著良規  
要非易易者卽文襄公耗米之頓增亦賴三楊當  
國夏忠靖在戶部相信之深故其議得就而身歿  
後且有言餘米之濫設如崔文敏洹詞所云者故  
君子欲變法矯弊則一時利害與身後毀譽總不  
必逆計如周趙兩公斯真得救民之術者爾

彭韶  
撰周

文襄公傳曰公宣德五年巡撫江南正統六年兼  
撫嘉湖二府前後二十二年住時裏河運糧軍民  
相半軍則官爲打造淺船分長短中三運長運於  
淮安常盈倉中運於徐州廣運倉短運於臨清廣



積倉支米一尖一平下船民則自行雇船裝運正糧一石該平米二石又船錢一石經年往返多失農月公先創立耗米之法亦日平米每正糧一石收平米一石七斗候起運時酌量支撥至是奏令民與軍於淮安瓜州等處水次對船交兌衛所出給通關付還銷繳在淮安正糧一石兌與平米一石五斗瓜州兌與平米一石五斗五升各處并南京衛所運糧官軍未曾過江者抵倉交兌加與過江船錢米二斗豐年米賤兌與加七五升凶年米貴兌與加六五升襯墊蘆席折米五合支撥羨餘存積在倉號日餘米次年餘多則令加六徵收又次年益多止令加五除依前撥運外有附餘乃令各縣造倉一所名曰濟農將遞年撥運剩米運入以備賑濟及農民缺食運夫遭風被盜者北京文武職官俸糧舊皆支南京米賤時銀一兩得米七八石公請江南重額官田極貧下戶兩稅准折納金花銀每一兩准米四石解京折支京官俸民間馬草每年運赴南京上納若北京每包草一千束該用五百料船一隻人夫十五名草束在船十壞六七所費不貲公奏於通州草場設立官庫每束

折收白銀三分一千束止用三十兩若南京則輕齋赴彼買納人皆稱便趙公均則議日照得所屬官民田地糧自三斗起科至於七斗者總計五百五十則地蕩山灘等項輕者一升至一斗重者三斗至五斗總計二百七十六則夏秋稅糧內坐派北京者有內府白糧京倉兌米金花草麥折銀絲綿絹匹坐派南京者有供用白糧各衛倉米定倉草銀餘撥徐州并附近府縣沿海各倉歲支官吏師生軍旗局匠孤老俸月軍儲等糧其額運京師者原議船夫車脚之需撥給邊儲者亦有脚耗修倉之費每年會計驗畝起耗以克前費於七斗六斗官田甚為繁重所以原議將金花折銀每兩准米四石儘派重則少甦民困其五升民田似覺輕省故以兩京白糧均派輕則以分其害此亦救偏補敝之意使能守而行之未為不可奈緣田則太繁法久弊滋糧里收白糧既一斗勒至數斗奸書派金花又輕田改為重田賣田者以官作民存虛糧而遺累於里甲造冊者收輕推重飛正米以灑派於細民間有不才有司派送金花折銀於勢要以為希恩之地亦有奸貪下愚召認他人存



糧爲告騙產戶之謀每每有力者置田無糧而追納之夫多無立錐之地至今逋負蠅積而國賦日虧訟獄頻興而卷案堆堵地方之害有不可勝言者再如民間田地每畝租米歲收約可八九斗者姑以六斗田額計之該納正耗七斗之數此外尚有糧長之私增則一年所獲盡輸於官矣雖免均徭丁田派以金花神補其實原則本重弊孔潛移未見末減彼五升則田每畝該納正耗一斗五升所取之租與重相若也雖有白糧之徵徭役之編而納官之糧甚爲輕省如三升等則麥地糧地多係腴田住基其收租獲利與輕田重田相等也納官之糧視諸五升者尤爲簡易是田之利多者蒙薄賦之恩利少者盡錙銖之取故富豪多麥地民田益肆其貪併貧民皆重額官田日就於逃亡往時科則本意潰壞殆盡苦樂不均至此極矣求今之所以便民而濟時艱者無如不動版籍合官民田麥地一例牽難耗米庶得裒益宜民之要蓋因其田之畝數定以耗之若干約彼此而平施無復科則之繁布方策而較然無可推移之處雖三尺童子可以入官輸賦積算猾胥不能左右其手積

習之弊可清於一旦因時之政少裨於疲民矣按均則之議始於湖州知府劉天和先行於嘉興縣知縣盧榘舊志載嘉靖十年里父老具呈御史端願比照湖州均田事例悉以三斗起科御史下檄本縣知縣夏公浚議覆矣而未行徐泰所云上吏按籍稱故事旋議旋罷者是也當時不利於均者借紛更名箝制之至取上旨申飭如會典所載六年九年詔令一云不許改科立新法一云將則例更改者通行禁革此必有大力者爲之主持矣趙公此舉更不奏聞朝廷只申都院歐陽公必進按院裴公紳詳免便行尤爲有見

### 今派徵條鞭銀米規則

夏稅額徵麥三千三百五十五石三斗七升一合二

勺絲綿一萬四千五百一十六兩三錢九分九毫租

鈔五百三十二錠四貫八百五十八文



起運

京庫折銀麥二千一百七十二石六斗三合

每石折銀

二錢五分該銀五百四十三兩一錢五分七毫五絲每兩滴硃路費二分五釐續加二釐該銀一十

四兩六錢六分五釐七絲二微五塵折絹絲綿三千二百二十兩三

錢九分九毫准絹一百六十一匹五寸八分六釐

三毫五絲 每匹絹價連墊庫路費銀一兩八分該銀一百七十三兩九錢一釐一毫八忽

六微俱解府轉解

存留

本府織染局荒絲一萬一千二百九十六兩 每兩折銀

五分該銀五百六十四兩八錢奉文加銀一百四十二兩八錢三分一釐四毫五絲共銀七百七兩

六錢三分一釐四毫五絲解府轉解軍資庫鈔五百三十二錠四貫

八百五十八文 每貫折銀二釐該銀五兩三錢二分九釐七毫一絲六忽解府支銷

本縣廣儲倉麥一千一百八十二石七斗六升八

合二勺 本折中半該本色麥五百九十一石三斗八升四合一勺每石加耗四升該耗二十

三石六斗五升五合三勺六抄四撮運倉上納折色每石折銀五錢五分該銀三百二十五兩二錢

六分一釐二毫五絲五忽內支本縣知縣縣丞主簿典史共五員俸糧每石折八錢巡檢場官倉官

共七員及司吏俸糧每石折五錢共銀一百五十八兩一錢九分六釐餘銀槩以五錢抵石同本色

米兼給官軍并孤老一百二十名及重囚月糧閏月官俸於缺官銀內通融支給農桑額

徵絲一千四百一十三兩八錢二分四釐八毫七

絲五忽准絹七十四匹二丈二尺一寸一分九釐八



毫

內本色絹一十二匹每匹絹價連墊庫路費銀九錢五分該銀一十一兩四錢織解南京折色

絹五十八匹二丈二尺一寸一分九釐八毫坐派銀四十一兩八分六釐五毫七絲六微二塵三渺

解府轉解

秋糧額徵米六萬六千九百六十六石六斗六升一

合三勺馬草八萬八百二十四包一筋七兩

起運

京庫折銀米一萬七千一百八十八石四斗二升

二合一勺六抄

每石折銀二錢五分該銀四千二百九十七兩一錢五釐五毫四絲

每兩滴珠路費二分五釐續加二釐該銀一百一十六兩二分一釐八毫四絲九忽五微八塵折

銀草六萬六百包

每包折銀三分該銀一千八百一十八兩每兩加路費一分二

釐該銀二十一兩八錢一分六釐俱解府轉解

供用庫白粳正米二千二

百二十九石八升八合二勺三撮准糙粳米二千

四百五十一石九斗九升七合二抄三撮三圭酒

醋麵局白糯正米六百一十七石五斗一升三合

二勺一抄六撮准糙粳米六百七十九石二斗六

升四合五勺三抄七撮六圭

二項每正米一石連耗并春折水耗拋撒

篩包斛面准徵糙平米一石八斗共正耗米五千一百二十三石八斗八升二合五勺五抄四撮二

圭徵運戶部交納每正米一石另加折色船錢米四斗貼夫米五斗車脚米七斗共米四千五百五

十四石五斗六升二合二勺七抄四圭每石折銀五錢該銀二千二百七十七兩二錢八分一釐一

毫三絲五忽二微內減五關稅鈔銀四十兩五錢實徵銀二千二百三十六兩七錢八分一釐一毫



三絲五忽二微俱給解 光祿寺白粳正米一千一

戶雇船車夫包索支用 百九十八石七斗四升四勺准糙粳米一千三百

一十八石六斗一升四合四勺四抄白糯正米五

百三十石七升一合四勺八抄一撮二圭三粟八

粒准糙粳米五百八十三石七升八合六勺二抄

九撮三圭六粟一粒八黍 二項每正米一石連耗并春折水耗拋撒篩包

斛面准徵糙平米一石八斗共正耗米三千一百

一十一石八斗六升一合三勺八抄六撮二圭二

粟八粒四黍徵運戶部交納每正米一石另加折

色船錢米四斗貼夫米五斗車脚米八斗共米二

千九百三十八石九斗八升一勺九抄八撮一圭

四粒六黍每石折銀五錢該銀一千四百六十九

兩四錢九分九絲九忽五塵二渺三漠內減五關

稅鈔銀二十四兩三錢實徵銀一千四百四十五

兩一錢九分九絲九忽五塵二渺三漠內減五關

漢俱給解戶雇船車夫包索支用 京倉兌運漕

糧正米三萬二千四百石 每石加隨船耗米四斗共正耗米四萬五千三

百六十石交給官軍領運外蘆蓆米一升折銀五

釐該銀一百六十二兩內三分給軍銀四十八兩

六錢其七分解淮銀一百一十三兩四錢每兩加

貼役銀六釐該銀六錢八分四毫又輕齋米三斗

六升每斗折銀五分該銀五千八百三十二兩解

淮安府每兩加淮費六釐該銀三十四兩九錢九

分三釐 南京供用庫白粳正米二百一十四石三斗

七升五合准糙粳米二百三十五石八斗一升二

合五勺 比照北自事例每正米一石准徵糙平米

一石八斗共正耗米三百八十五石八斗

七升五合徵運南京戶部交納每正米一石另加

船錢米一斗貼夫米一斗脚用米二斗一升共米

八十七石八斗九升三合七勺五抄外加貼役米

二斗八升八合該米六十一石七斗四升俱徵給



解戶夫船貼役支用折色年分遵照 各衛倉正米

部單徵解每兩仍加貼役銀五釐

七千三百二十六石五斗五升八合三勺九抄九

撮七圭三粟八粒二黍內實運南京各衛倉水兌

正米六千二百四十三石七斗二升四合五勺一

抄一撮一圭三粟八粒二黍

每石加耗二斗五升 該耗一千五百六十

石九斗三升一合一勺二抄七撮七圭八粟四粒

五黍五顆連正運赴南京戶部交納每正米一石

加船夫脚用米三斗三升三合四勺該米二千八

十一石六斗五升七合七勺五抄二撮一粟三粒

四黍七顆五糶八糠八批外加貼役米六升二合

五勺該米三百九十石二斗三升二合七勺八抄

一撮九圭四粟六粒一黍三 派剩米一千八十二

石八斗三升三合八勺八抄八撮六圭

係改撥光祿寺之數

每石折銀七錢該銀七百五十七兩九錢八分三

釐七毫二絲二忽二塵解赴太倉銀庫交納每兩

加路費一分二釐該銀九兩九分五釐

八毫四忽六微六塵四渺二漠四埃 定倉折銀

草一萬七千五百八十包 每包折銀一分八釐該

四分解府轉解每兩加路費五釐 徐州廣運倉改

該銀一兩五錢八分二釐二毫

兌正米一千六百二十三石 每石加隨船耗米四

斗共正耗米二千二

百七十二石二斗交給官軍領運外蘆蓆米一升

折銀五釐該銀八兩一錢一分五釐內三分給軍

銀二兩四錢三分四釐五毫其七分解淮銀五兩

六錢八分五毫又易耗米二升折銀一分該銀一

十六兩二錢三分俱每兩加路費六釐該銀一錢

三分一釐四毫六絲三忽隨同三六輕齋銀兩解

淮安府 永福倉正米七百五十八石 每石折銀六

聽用 錢該銀四百

五十四兩八錢每兩加路費七釐該銀

三兩一錢八分三釐六毫解府轉解



存留

兌軍行糧正米一千九百九十八石一斗一升五

勺二抄

每石加耗五升共正耗米二千九十八石

一千二百五十八兩八錢九釐六毫二絲七忽六

微徵完歛解司庫聽候支給上運官軍并修造船隻等項

支用 本縣廣儲倉折米草二千六百四十四包

一斛七兩

每包折米五升該米一百三十二石二

該本色米六十六石一斗三合五勺九抄三撮七

圭五粟每石加耗四升該耗二石六斗四升四合

一勺四抄三撮七圭五粟俱運倉上納折色每石折銀五錢五分該銀三十六兩三錢五分六釐九毫七絲六忽五微六塵二渺五漠解府

常積一倉秋米四百三石八

斗三合九抄 本折中半該本色米二百一石九斗

一合五勺四抄五撮每石加耗六升

該耗一十二石一斗一升四合九抄二撮七圭俱運倉上納折色每石折銀五錢五分該銀一百一十一兩四分五釐八毫四絲九忽七微五塵解府

隨糧帶徵

兌軍項下楞木松板米八十五石八斗六升

每石折銀

五錢該銀四十二兩九錢三分內銀六兩四錢八

分以銀四錢准楞木一根共准一十六根二分餘

銀三十六兩四錢五分以銀二錢五分准松板一

片共准一百四十五片八分奉文楞木每根加銀

一錢五分松板每片加銀二錢共加銀三十一兩

五錢九分通共銀七十四兩五錢二分隨同兌運漕糧交給官軍領運 修河米折銀二百二十八兩一錢八分

三釐二毫

徵解鎮江府聽用

過江脚米銀三百四十兩二

錢三分

每兩加路費六釐該銀二兩四分一釐三毫八絲隨同三六輕齋銀兩解淮安府聽



用 水鄉竈丁鹽價不敷銀三千五百九十四兩六

分一釐一毫 內解京銀一千一百九十八兩二分三毫六絲六忽六微六塵六渺七漠

每兩加車脚路費銀一分五釐該銀一十七兩九錢七分三毫五忽五微正銀二千三百九十六兩

四分七毫三絲三忽三微三塵三渺三漠俱徵解運司 包補海沙鮑郎蘆瀝

三場竈丁優免銀三百九十九兩四錢六分二釐

二毫八絲 徵發各場領解運司

抄 鹽糧額徵米一千九百三石二斗七升八合七勺五

存留

免軍行糧正米一千八十七石六斗四合四勺八

抄 每石加耗五升共正耗米一千一百四十一石九斗八升四合七勺四撮每石折銀六錢該銀

六百八十五兩一錢九分八毫二絲二忽四微徵完欵解司庫聽候支給上運官軍并修造船隻等

項支 本縣儒學倉鹽米三百五十石 每石折銀八錢該銀二百

八十兩聽給 廣儲倉鹽米四百六十五石六斗七

升四合二勺七抄 本折中半該本色米二百三十石八斗三升七合一勺三抄

五撮每石加耗四升該耗九石三斗一升三合四勺八抄五撮四圭俱運倉上納折色每石折銀五

錢五分該銀一百二十八兩六分 有閩加米一百

五十八石六斗六合五勺六抄二撮五圭 每石折銀五錢

該銀七十九兩三錢三釐二毫八絲一忽二微五塵派作預備解司克餉

鹽鈔額徵



起運

本色鈔一千四百四十一錠四貫該銀八兩二錢

三分九釐八毫八絲七忽折色銅錢一萬四千四

百一十八文該銀二十兩五錢九分七釐一毫四

絲二忽八微五塵七渺一漠俱每兩加路費一分二釐該銀三錢四分

六釐四絲四忽三微五塵八渺二漠八埃五織二沙有閏加鈔一百二十錠

七百五十文該銀六錢八分六釐六毫五絲七忽

二微五塵銅錢一千二百一文五分該銀一兩七

錢一分六釐四毫二絲八忽五微七塵一渺五漠

二項共加路費銀二分八釐八毫三絲七忽二塵九渺八漠五埃八織俱解府轉解

存留

本色鈔銀八兩二錢三分九釐八毫八絲七忽折

色銅錢銀二十兩五錢九分七釐一毫四絲二忽

八微五塵七渺一漠有閏加鈔銀六錢八分六釐

六毫五絲七忽二微五塵銅錢一兩七錢一分六

釐四毫二絲八忽五微七塵一渺五漠俱解府支銷

均平

額辦銀三百一十兩一錢九分五毫二絲八忽五微

七塵一渺

貓竹銀四十兩一錢九分四釐三毫自硝麂皮折



色價銀三兩四錢一分六釐四毫

本色年分徵銀二兩六錢六分

七釐藥材正料并津貼路費銀五十兩七錢二分

八釐七毫二絲八忽五微七塵一渺弓箭弦條本

色銀一百六十一兩五錢八分五釐一毫

折色年分徵銀

一百六十四兩四錢六釐五毫一絲辨料年分徵銀二百一兩三錢七分九釐八毫

鞋本色銀五十四兩二錢六分六釐

折色年分徵銀五十八兩

一錢四分一釐一毫四絲以上解府轉解

坐辦銀一千八百二十五兩三錢二分四釐三毫七

絲 遇閏加銀二十八兩一錢九分八釐三毫內

牲口銀一百二十兩四錢果品銀五十六兩蠟茶

銀一百一十七兩四錢六分九釐九毫加派銀二

百兩四錢七分九釐二毫共銀三百一十七兩九

錢四分九釐一毫

內本色蠟茶銀六十五兩四錢二分六釐二毫折色蠟價銀二

百五十二兩五錢二分二釐九毫築笋銀一十三兩二錢加派銀

三兩五錢五分共銀一十六兩七錢五分南京并

布政司曆日紙料銀二十八兩九錢六分五釐五

毫三絲

遇閏加南京紙銀二錢五分五釐五毫

淺船料銀五百五十

一兩一錢六分一釐七毫漆木料銀六兩一分五

釐二毫九絲四司工料銀四百一十七兩七錢一

分八釐軍器民七本色銀一百三十七兩六錢九



分一釐四毫料銀年分徵銀一百三十歲造段匹

銀一百七十二兩六錢七分三釐三毫五絲遇閏加銀

二十七兩九錢四分二釐八毫以上解府轉解

雜辦銀三千三十八兩九分七釐三毫一絲八忽八

微九塵內扣省城募夫夫馬小盡銀一十八兩五錢一分七釐一毫遇閏加銀一百一十二兩八錢一分八釐

四毫二絲

本府拜進 表箋綾函紙劄寫表生員工食委官

盤纏銀二兩二錢八分四釐三毫解府辦用本縣拜賀

習儀香燭銀四錢八分本縣祭祀合用猪羊品物

銀一百七十六兩三錢二分內文廟二祭共銀六十兩啓聖公祠二

祭共銀一十二兩社稷山川壇各二祭共銀三十

二兩邑厲壇三祭共銀二十四兩鄉賢名宦祠二

祭共銀八兩土地祠二祭共銀四兩五錢英烈陣

亾指揮馬呈圖姚弘滿朝采煉春秋二祭共銀一

十三兩五錢海神廟楊公祠共四祭每祭

五兩五錢八分共銀二十二兩三錢二分鄉飲酒

禮年該二次銀一十五兩迎春芒神土牛春花春

鞭三牲酒席銀四兩上司并本縣門神桃符銀一

兩五錢以上俱本縣徵用科舉禮幣進士舉人牌坊銀九

十八兩六錢一分九釐六毫三絲八忽武舉供給

筵宴盤纏銀六錢六分八釐三毫四塵以上解府轉解歲

考生員試卷菓餅激賞花紅紙劄筆墨并童生菓

餅進學花紅府學銀六兩解府聽用縣學銀四十三兩



九錢二分七釐

本縣徵用

提學道歲考搭蓋蓬廠工料

銀二兩五錢

解嘉興縣

季考生員每年量計二次合用

試卷菓餅激賞花紅紙劄筆墨等項府學銀一十

四兩八錢八分

解府聽用

縣學銀五十兩

本縣徵用歲考銀不敷准

於內通融動支

起送科舉生員酒禮花紅卷資各官陪席

銀府銀一十兩

解府聽用

縣銀五十二兩六錢六分六

釐六毫

本縣徵用照名儘將所派銀兩通融均給

迎宴新舉人合用提

報旗扁銀花綵段旗帳酒禮各官陪席府銀六兩

解府聽用

縣銀六兩

本縣徵用如無中式及有盈餘俱解府庫俟下科支用

起送

會試舉人酒席盤費卷資府銀三十五兩縣銀二

十兩四錢

俱徵解府庫照起送名數申請動支

會試舉人水手銀五

十六兩

解司庫聽給

賀新進士合用旗扁花紅酒禮府

銀二兩三分三釐三毫二絲縣銀四兩

俱徵解府庫照中式

名數申請動支

歲貢生員路費旗扁花紅酒禮府銀八錢

五分七釐一毫四絲二忽八微五塵

解府聽用縣銀三

兩

本縣徵用

孤老一百二十名每名年給布花木柴銀

六錢共銀七十二兩

本縣徵給內有事故許將續收挨補有餘作正支銷三

院司道按臨并本縣朔望行香講書紙劄筆墨香

燭銀四兩

本縣徵用

三院觀風考試生員合用試卷菓

餅激賞花紅紙劄筆墨府學銀六兩

解府聽用

縣學銀



二十兩本縣敬用按察司交際公費銀一十兩水利道

交際公費銀二十五兩俱聽各司道取用三院查盤委官

駐劄合用心紅油燭柴炭吏書供給造冊紙張等

銀四兩五錢上司各衙門并府縣及查盤取用卷

箱架扛鎖索棕單白牌等銀六兩俱本縣敬用部運南

糧北絹白糧委官水手并船夫銀二十三兩三錢

八分二釐四毫三絲解府聽給省城上司各衙門新官

到任隨衙下道家火等項銀九兩五錢九分三釐

三毫一絲八忽解杭州府貢院雇稅家火并募夫等銀

二兩五錢七分一釐四毫解府轉解本縣新官到任祭

門猪羊酒菓香燭銀二兩六錢六分六釐六毫七

絲本縣應朝官員起程復任公宴祭門三牲酒菓

香燭等項銀一兩三錢三分三釐三毫本縣陞遷

給由官員公宴祭船猪羊等銀二兩八錢俱本縣敬用

府縣心紅紙劄府銀三十四兩解府聽用縣銀一百二

十六兩本縣敬用軍器路費銀一十兩九分九釐一絲

解府轉解如軍器改折路費停徵戰船民六料銀三十六兩二錢

二分五釐解府聽用課鈔銀三兩六錢六分八釐遇閏加銀

一錢五分三釐雕填漆匠役銀三兩九錢四分六釐三毫

遇閏加銀三錢二分二釐九毫省城募夫工食銀一十五兩六錢



三分一釐一毫

扣小盡加閏以解府轉解

經過公幹官員下

程油燭柴炭銀三十六兩八錢一分

名七兩二錢共銀一千二百六十兩

內給府學聽役夫一名二

分八釐二毫銀九兩二錢五分七釐扣小盡加閏

馬八匹每名匹工食連

草料銀七兩二錢共銀五十七兩六錢

扣小盡加閏雇

船銀三十兩

以上本縣徵用

修城民七料銀二兩二錢七

分九釐八毫四絲修理本縣城垣銀二十兩修理

府縣廳堂公廨監房土地祠等處并新官衙宇府

銀五兩二錢三分八釐縣銀二十四兩修理府縣

公所衙門銀三十八兩九分五釐二毫修理儒學

教官衙宇府學銀一兩四錢四分四釐縣學銀八

兩修理府縣公宴家火器皿銀一兩六錢

以上府銀解府

縣銀貯縣遇修各申請動支

司道衙門書手工食銀一十四兩

八錢七分九釐五絲

加閏解府轉解

督糧漕務道兌運造

冊紙劄路費等銀五兩

徵貯聽候取用

書算紙劄工食府

銀五兩七錢一分四釐三毫

解府聽給縣銀三十兩

本縣

徵預備雜用府銀五十二兩

解府聽用

縣銀四百八十

兩內扣人役小盡銀六十五兩三錢五釐九毫抵

用外實徵銀四百一十四兩六錢九分四釐一毫

內以七分聽上司行文取用三分聽該縣公事支銷俱明立文案造送查盤有餘存貯報司以備緩



急之需應支項款開後 加增表箋通數銀協濟  
昌平州銀四兩五錢七分一釐四毫三絲三院司  
道取給舉人貢生路費卷資銀獎勸激賞孝子節  
婦善人米布銀布政司進 表水手銀恤刑按臨  
合用心紅紙割油燭柴炭并吏書供給銀上司經  
臨并過往公幹官員合用門皂銀修整使客鋪陳  
銀其有事出不常數難定  
計俱於內動支開送查盤

附載銀五十兩六錢八分九釐三毫

龍袍解扛路費銀四十八兩九釐七毫部運龍袍

委官水手銀二兩六錢七分九釐六毫

均徭

額銀三千七百六十四兩九錢三分五釐一毫七絲

內扣各衙門人役小盡銀二十一兩五分五釐五毫  
毫遇閏加銀一百五十六兩九錢六分六釐一毫

南京額班直部柴薪皂隸五名每名銀一十二兩

火耗銀三錢共銀六十一兩五錢 遇閏加銀五兩 南京直

堂把門看倉看監隸兵八名每名銀一十兩火耗

銀三錢共銀八十二兩四錢解京富戶八名每名

銀二兩共銀一十六兩 本項解府轉解 布政司解戶三名

每名銀三十兩共銀九十兩柴薪皂隸一名銀一

十二兩 加閏 皂隸一名銀一十兩八錢 扣小盡加閏 分守

杭嘉湖道皂隸一名銀一十兩八錢分守寧紹台

道皂隸一名銀一十兩八錢按察司水利道甲首

轎傘夫各一名每名銀一十兩八錢共銀二十一



兩六錢兵巡溫處道皂隸二名每名銀一十兩八錢共銀二十一兩六錢總兵員下轎傘夫一名銀

一十兩八錢以上俱扣小盡加閏兩浙運司馬丁九名每名

銀四兩共銀三十六兩嘉興分司皂隸一名銀一

十兩八錢扣小盡加閏以上聽各衙門取給本府柴薪皂隸四名

每名銀一十二兩共銀四十八兩加閏皂隸七名每

名銀一十兩共銀七十兩甲首六名每名銀七兩

二錢共銀四十三兩二錢司獄司獄卒五名每名

銀一十二兩共銀六十兩以上三項俱加閏扣小盡聽府取給新官

家火銀五兩一錢五釐八毫歲貢生員赴京路費

銀八兩五錢七分一釐五毫預備倉經費役銀二

十三兩二錢內倉夫一名銀七兩二錢扣小盡加閏餘克倉費海塘夫銀

六百一十五兩七錢五分七釐八毫七絲海寧衛

首領官員下柴薪皂隸二名每名銀一十二兩共

銀二十四兩加閏聽府取給本縣柴薪皂隸一十一名

每名銀一十二兩共銀一百三十二兩加閏馬丁五

十名每名銀四兩共銀二百兩門子二名每名銀

七兩二錢共銀一十四兩四錢扣小盡加閏皂隸三十

名每名銀七兩二錢共銀二百一十六兩扣小盡加閏內

縣堂一十七名佐貳耳房庫役銀三十六兩給管庫吏



雇人守庫并辦筆墨油燭查盤造冊  
紙劄工食及夏冬卓幃坐褥等費  
獄卒六名每

名銀八兩二錢置辦刑具燈油在內共銀四十九

兩二錢扣小盡加閏巡鹽應捕一十四名於民壯內總

編每名除工食外給賞鹽課銀一十五兩八分五

釐七毫一絲四忽共銀二百一十一兩二錢責令每歲

更番巡緝新官家火銀二十兩歲貢生員赴京路費銀

三十兩預備倉經費役銀三十八兩八錢內倉夫一名銀

七兩二錢扣小盡倉書一名銀三兩六錢俱加闕

修倉銀一十六兩風車籬單家火等銀四兩籬夫

銀六兩紙劄銀二兩俱徵貯庫遇用請詳廣儲倉

動支如有盈餘聽抵盤量折耗裨補之費

常積一倉倉夫工費等銀七十九兩二錢內倉夫四名每

名工食銀七兩二錢扣小盡加閏倉官看守布按

二員心紅紙劄工費等銀五十兩四錢二分司門子各一名每名銀二兩共銀四兩加閏看

守海塘澈浦鎮二公館門子各一名每名銀二兩

共銀四兩加閏澈浦海口二巡檢司每司實役弓兵

各三十四名共六十八名每名工食銀七兩二錢

共銀四百八十九兩六錢給賞鹽課銀四百二十

二兩四錢通共銀九百一十二兩役銀扣小盡加閏海沙

場工脚六名鮑郎場工脚八名每名銀六兩共銀



每名銀七兩二錢共銀一百二十二兩四錢扣小盡加

開偏僻五舖藍田舖常川舖九里舖麥庄涇舖澈

浦東門舖司兵各三名共一十五名每名銀六兩

共銀九十兩扣小盡加本縣儒學齋夫六名每名銀

一十二兩共銀七十二兩扣小盡加膳夫八名每名

銀一十兩共銀八十兩扣小盡加門子三名庫子二名掃

殿夫三名啓聖公祠門子一名每名銀七兩二錢

共銀六十四兩八錢扣小盡加教官家火銀一十二

兩以上本縣徵給

附載銀四十八兩內扣小盡銀三錢三分三釐三毫遇閏加銀四兩

織造府柴薪皂隸二名每名銀一十二兩共銀二

十四兩加閏轎傘夫二名每名銀一十二兩共銀二

十四兩扣小盡加閏俱解府轉解

兵餉額銀五千五百四十七兩四錢一分七釐九毫

五絲

田地山銀四千六百六十二兩八分七釐九毫五

絲均徭克餉銀一百三十八兩內扣布政司解戶三名每名銀三十三

兩按察司紅櫃庫子二名每名銀二十四兩民壯克餉銀五百六兩一

錢三分遇閏加銀四十九兩一錢九分九釐九毫叭喇唬船民壯餉銀

二百四十一兩二錢俱解府轉解



民壯

實役二百五十四名內撥克鹽捕一十四名每名

銀七兩二錢共銀一千八百二十八兩八錢

內扣小盡

銀二十五兩四錢遇閏加銀一百五十二兩四錢本縣徵給

驛傳

額銀一千七百四十八兩九錢四分九釐二毫五絲

五忽

本府站銀一千七十四兩一錢二分九釐二毫五

絲五忽

解給支銷項款載驛傳成規

外省馬價銀六百七十四

兩八錢二分

解府轉解

收零積餘米一十六石一升八合九勺銀四十三

兩九錢四分八釐九毫

存貯本縣聽備新增優免有餘作正文銷仍置簿查

盤

外扣人役工食五日小盡銀六十五兩三錢五釐

九毫

抵克備用

有閏年分共加銀五百八十七兩七錢二分一釐

每正銀一兩加徵銀一分三釐二毫

額外歲徵

課程折銀三兩六錢有閏加銀一錢五分三釐

派徵總數



戶口人丁四萬八千六百五十九丁口每丁科米五合銀七分三釐七毫該米二百四十三石二斗九升五合銀三千五百八十六兩一錢六分八釐三毫

田五千二百一十八頃六十一畝六分八釐九毫六絲二忽每畝科米一斗一升三勺銀六分九釐七毫該米五萬七千五百六十一石三斗四升四合三勺六抄五撮八粟六粒銀三萬六千三百七十三兩七錢五分九釐七毫六絲六忽五微一塵四渺

地七百五十六頃八十二畝七分五毫每畝科米一斗一升三勺銀六分六釐七毫該米八千三百四十七石八斗二合三勺六抄一撮五圭銀五千四十八兩三分六釐四毫二絲三忽五微

山一百七十五頃三十八畝一分三釐六毫五絲每畝科米五升三合銀一釐該米九百二十九石五斗二升一合一勺三抄四撮五圭銀一十七兩五錢三分八釐一毫三絲六忽五微

蕩灘浜池澗水面一百四十二頃二十六畝五分七釐五絲八忽每畝科米五升三合該米七百五十



四石八合二勺四抄七圭四粟

以上共科米六萬七千八百三十五石九斗七升一合二勺一撮八圭二粟六粒銀四萬五千二十五兩五錢二釐六毫二絲六忽五微一塵四渺內除優免徭銀二百五十兩六錢二分三釐實徵銀四萬四千七百七十四兩八錢七分九釐六毫二絲六忽五微一塵四渺合前稅糧均平均徭各款銀米之數

嘗讀洪武令甲凡十年編審人戶分上中下三等大小雜泛差役照所分等則點僉所謂雜泛差役者卽今均平中額辦坐辦雜辦各款均徭中各衙門人役工食衆諸委瑣之費爲兩稅中所不載者自有此不得已之徵索也但兩稅出於田畝一按籍而數定雜役僉自丁力非精衡則等清輕重稍或失平苦樂遂至偏畸故事里甲應各辦之次年卽僉均徭民頗病其數天順中改爲上下五年名曰兩役其役之在各辦者則里長歛錢從事稱甲管錢提牌承應計日而輪無事或不破一錢事繁至立費千鎊既有此不均而均徭之役於各衙門者遠則爲銀差雇值費猶有限近則爲力差身家



累更無窮巡攔斗級傾產於官物之包賠應捕巡  
鹽亾軀於讐對之報害而弊叢法窮又不得不改  
絃而別調矣嘉靖之四十四年南海龐公尚鵬來  
巡浙土洞晰兩役爲民大害廼始總核一縣各辦  
所費及各役工食之數一切照畝分派隨秋糧帶  
徵分其銀爲兩款一曰均平銀一曰均徭銀歲入  
之官聽官自爲買辦自爲雇役而里甲之提牌輪  
辦與力差之承應在官者盡罷革焉此雜泛差役  
改爲一條鞭之始民至今得保有田廬婦子者皆  
龐公賜也兩役外尚有驛傳一款先亦選丁糧殷  
實者發江北養馬及克本府水站防夫正德中改  
入秋糧而民兵之設其工食卽照里配入秋糧者  
亦在嘉靖五年之初是皆先龐公而作法爲行條  
鞭者之權輿矣當併識之胡震亨曰余觀於計籍  
而不能無愾歎也往龐公均平款及丁田料銀三  
千五百有奇今三辦銀五千一百有奇矣均徭銀  
四千二百有奇今合之民兵五千五百有奇又合  
之驛傳兵餉則一萬二千一百有奇矣內府供辦  
之額尚仍其舊有司宴饋之禮非遠於初或冗役  
之失裁及兵額之漸溢絜成繁浩之費盡從田畝



而徵雖前弊得清於歸一而後害又伏於偏重矣  
昔并賦之丁丁猶能自恕其難供今盡賦之田田  
安能自辨其無出此兩役未罷之初民猶有籲減  
之路條鞭一設之後民日受例增之累也誰其節  
省以慰吾老羸之望乎則以俟持籌之君子

舊志  
泛差

俱不載惟嘉靖徐志載均徭款總數云歲調力役  
雇役凡四十有三共役銀三千四百八十二兩八  
錢而加僉不與馬京料解海塘夫南部柴薪皂隸  
織造府皂隸織染局庫子布政司柴薪皂隸門子  
按察司獄卒門子鹽運司馬丁本府柴薪皂隸獄  
卒庫斗公館門子本縣柴薪隸兵獄卒馬丁門庫  
斗級巡關巡鹽夫儒學齋膳夫門庫斗級巡司弓  
兵舖司兵鹽場工脚海寧衛經歷司柴薪其里甲  
各辦不載 又徐志載丁賦民兵一百六十名名  
役銀六兩計銀九百六十六兩正德八年以前八

百名後減為三百二十二名嘉靖五年改議里一  
名役銀秋糧帶徵江北驛馬一十九匹上馬七匹  
匹價銀四十二兩中馬八匹匹價銀三十八兩下  
馬四匹匹價銀三十二兩五錢三分正德八年以  
前類僉馬頭發驛養馬副馬頭年解馬價今改議  
馬價秋糧帶徵類解本司給雇役驛遞水站防夫  
七十八名并船料廩給舖陳支應共折銀一千二  
百二十二兩一錢九分正德十二年以前征於丁  
田今改議秋糧帶徵給雇役觀此則一條鞭派徵  
其法先已畧行矣及考周文襄公傳云各處走遞  
馬匹及舖陳等件效損多被馬頭科逼民財買補  
公創法每田一畝收米一升九合隨糧帶納另版  
貯之遇有效損驗馬上中下價直給米備用則驛  
馬之編入秋糧自文襄始裁革馬頭則在正德間  
耳 仇志載一條鞭款則內丁田料銀一千九百  
八十五兩三釐二毫一絲四忽四塵漆木銀八兩  
六錢三分二釐均平銀一千六百一十八兩二錢  
五分七釐九毫二絲七忽五微七塵一渺均徭各  
項色役銀四千二百五十兩七錢八釐田地山兵  
食銀二千九百三十二兩三錢二分八釐三毫此



萬曆二二年元額也 張元忭麗公祠記畧曰天順間朱御史英所疏行兩役法籍縣民分爲十年而統於坊里之長每一坊一里長率十人令民按丁若田五年而率錢與長爲吏辦公私費坊主宴里主饋日甲首錢又五年而長率民詣縣庭審諸役日均徭歲環遞以爲常蓋五年而一用民也時頗稱便其後吏肆而長饕所云甲首錢有一貧男子出白金四五兩者即富者按田而率有如畝滿千金不數百不已於是貧者走徙往往以錢累其長富者不免詭其畝以逃役至若均徭一不幸得館庫或捕鹽諸役其雇役不過七八金而富民承之則誅攫百出不數百餘亦不已又不幸富者兼得兩重役貧者或分得十之一二則身家亦破碎平生構聚至百千朝居而暮空貧者至不有其妻子與籠雞柵豕互牽引鬻市中相聚以畏邑里郊墟色懣懣若在冬秋於是每書榜則老胥黠史巧播弄以網罟與詭者相唇齒而民之病極矣南海龐公尚鵬爲御史來按浙因革奪予悉掃故常知前兩役爲病旣大且久乃一破其法調劑有司百所需費若諸雇役不縮不盈與民之丁土相釐合凡

丁一田畝率出錢若干與秋租歲並輸於邑吏明年百所費與所役亦歲出庫中錢擇其人掌之且買且顧又刻情入給一紙令曉然無所謂甲首錢長不得濫索無役富者入館庫役最重且若若鹽捕等者不得勒富者募而且歲所輸至眇細易辦受詭者不得行胥史無所用其播弄蓋自詔下行之至今農始知貴田而櫃擔而食者亦重去其土閭閻熙熙畧始甦息旣十餘年矣諸父老子弟乃釀金構屋以祠公而屬言於余云

### 附加徵蠲除賑恤

嘉靖中倭變每田一畝加兵餉銀一分三釐後漸減

萬曆三年築海塘以七縣塘夫銀不敷田地每畝

加徵銀一分明年罷徵

詳見畏海篇

萬曆三十九年鹽運司壓欠邊商庫價派民蕩出



稅賠補初派一百五十五兩五錢四十二年減半  
爲七十七兩七錢五分本縣民蕩九千二百七十  
七畝每畝加徵銀八釐三毫八絲九微四塵二渺

一漠一埃五纖

據兩浙漕規海鹽縣蕩稅六十四兩五錢八分有此異同不知何故

邑人彭宗孟與胡鹽院辨民蕩不宜加稅書兩浙蕩地有竈有民竈蕩額課籍在漕司民蕩額糧統之兌運其哀益盈縮截然不通者也先是萬曆三十九年以清丈竈蕩有所加徵乃漕司混行緊加遂及於民蕩近奉恩例竈蕩所加悉減仍舊獨民蕩尚隲隲未蠲百姓何辜加則陰附於竈中減則陽推於竈外萬口嗷嗷莫不怨覆載之偏而不知此漕司奉行之無爲非漕臺軫念之未周也茲澄清伊始羣情仰望不啻膏露乞俯賜細核蠲除毋令影侵牟蠹地方幸甚按本縣舊有水鄉竈蕩乃國初派與水鄉竈戶者成化間水鄉竈戶消乏歸民其蕩歸縣徵價解運司此都御史彭

紹議也後蕩價逋欠難徵給與濟竈以抵優免耗米價則仍於秋糧內包賠解司此又嘉靖九年知縣夏浚之議御史陳世輔允行者也今萬曆三十九年鹽院張公查理蕩稅檄云水鄉竈蕩向有屬縣徵者應令加稅彼時房椽失查給與濟竈一段不曾分說明白却據成化中在縣徵價事誤認民蕩卽是水鄉竈蕩議稅申覆致混入題疏因而加派耳今欲除豁但行令場司查出水鄉竈蕩坐落在何地是何竈戶管業誤派自明不求豁而可豁矣詳見後鹽課中

萬曆四十六年遼東用兵始加派遼餉銀本年四

十七年俱二千二百九十七兩三錢六分八釐八

毫四十八年增爲三千六百一十四兩二錢九分

九釐天啓元年又增爲五千九百一十一兩六錢

六分四釐二年三年徵額同其改派爲餉米者附



漕船運納

初田每畝徵銀三釐八毫地三釐五毫山二釐八毫一絲七忽今加派田每畝

九釐七毫八絲地九釐山七釐二毫二絲五忽天啟二年改派派米田每畝米七合九勺七抄一撮

三圭餘徵銀四釐二毫七塵地每畝米七合九勺七抄一撮三圭餘徵銀三厘四毫二絲七塵山止

徵銀不派米三年米三千四百二石三斗係扣銀官糶每年拖欠在民者樊公設補不下數千金云

本朝遇 國慶俱有蠲除不能盡載茲載 今上

登極恩免數以昭

皇仁

詔自萬曆三十五年起至四十一年民間拖欠

錢糧盡行免徵計本縣共免銀五千七百六十二兩有奇

累朝賑恤恩典前乘闕載今載萬曆中災傷頒賑

數并預備倉積穀歲額備考

十六年大饑賑銀四千兩奉 詔給事中

楊文舉頒至 三十六年水災賑銀一千兩 本縣預備倉每年額積稻穀七百石奉例贖罰改積

稻穀四十石共七百四十石春夏納銀秋冬積穀以備賑濟今奉文銀兩借克遼餉稻穀改支火夫

孤囚 月糧

貢

唐書吳郡貢絲葛絲綿八蠶絲緋綾布白角簞草

席鞵大小香 旣柑橘藕鱮皮鰕鰾鴨胞肚魚魚子

白石脂蛇粟杜佑通典吳郡貢絲葛十匹白石脂三

十觔蛇牀子三升鱮魚皮三十頭鰕魚腊五十頭壓

包七升肚魚五十頭春野五升嫩藕三百段鄭樵通

志畧蘇州貢紅綸布按余鄉唐隸吳郡海上僻縣所

貢或鱮皮魚子等物耳今亦不可考矣

宋 舊志云遺 缺無考

元 舊志云元嘉 禾志不載

國朝歲進野雞十隻 永樂志云 黃魚九十九尾 永樂志云



增二百九 歲造黑漆角弓二百一十張正副弦一千

十九尾 九百條錐箭一千九百八十五枝 永樂志弓五百張 弦二千五百條箭

四千五百枝 歲辦麂羊等皮四百張鴈鳶翎毛一十萬根

今天啓元年以東事告急令縣官入覲獻甲仗火器

各有數三年以妖寇嘗阻漕復令縣官製刀仗給漕

艘防不虞非歲額也用附志 按歲進等物改折色於 均平銀內帶徵錄存舊

額其採捕黃魚及停進緣由載後 仇俊卿志黃魚 產羊山去鹽邑海洋遠 國初乍浦河泊所管領此

貢在縣城南開口出海每年小滿風汛原編魚戶內 輪七名採捕官選如式者三百三十尾用水置硃紅

桶驛舟上供前途遇有冰窰衙門取水添換正統七 年倭犯本縣難於出海奏改太倉州劉家河出捕嘉

靖十三年海賊施天泰董琪等為梗海道檄令從杭 州府錢塘江赭山外洋採捕時漁戶仍往劉家河而

出十六年海賊秦蕃等劫掠魚無所獲委官漁戶俱

逮於辜次年復議於赭山港鯨子門出海三十二年

漁戶賀天佑等六船出洋遇海寇擄船五隻止存一

隻收港僅能克貢三十三年河泊所具申改於乍浦

就雇蒼山守哨船出海而小滿潮汛已過狀申嘉興

府知府劉公慤具題次年補貢三十五年仍於乍浦

出洋三十七年始復於本縣龍王塘出海採捕雇福

建守哨兵而行四月二十八日開洋五月初四日薄

暮即捕魚回初六日知縣楊進道至海上臨船選魚

將水同置硃紅桶中用黃旗鼓樂導迎至裏河驛舟

上進聚而觀者如堵父老言此地出洋已逾百數十 年矣今復得魚進貢莫不嗟歎冰窰原在海塘開口 人猶能識其處也 隆慶元年邑人致仕永州知府 錢芹具奏云黃魚採捕乃在大海洋中又正立夏小 滿風汛時候往年漁戶出洋或至通番啓慶 國初 法令嚴密以故海上無警承平以來海禁漸弛船商 貿易交通有宋素卿王直徐海之事嘉靖壬子以來 倭寇猖獗多因採捕黃魚之船至大海洋中與倭船 相遇格鬪致啓禍端又或商船假以黃魚為名飄至 彼國彼以利餌之為其嚮道侵犯邊境俱倚採捕黃



魚爲麩也 國初建都南京故進貢爲便今抵京師  
三千七百餘里往年四月初旬採捕直至九月十月  
乃抵京進貢雖沿途有冰凌供換然海鮮易壞味饒  
且敗以享 宗廟亦爲有褻臣請下禮部議停此貢  
海濱可靖民力得蘇疏奏中格尋以撫按言 詔罷  
勿進 天啓元年知縣樊入覲解部軍器藤盔二十  
頂紙釘布甲二十領腰刀五把三眼鐵鏡五門角弓  
十張鐵頭箭一百八十枝硝黃一百觔 天啓三年  
給漕船軍器鯽魚長鎗五百十把腰刀三百四十把  
角弓一百七十張鐵頭箭一千七百枝分發漕船八  
十五  
隻

海鹽縣圖經卷之五 終

海鹽縣圖經卷之六

食貨篇第二之下

役法

唐縣以百戶爲里里設正一人掌按比戶口課植農

桑催驅賦役三年一造戶籍

按唐有坊正村正土督  
察姦姦非里正亦兼掌檢

察非遲似又有保甲  
之責與今里長稍異

宋以第一等戶爲里正第二等

戶爲戶長督賦稅其克衙前者主典府庫及輦運官

物

按典府庫卽今里長之僉庫子斗級輦運官物卽  
銀米解戶也宋鄉戶又有耆長弓手壯丁承符人

力手力散從官諸役則力差  
之入條鞭中徵銀僱役者矣

元邑居之民有坊正其

在鄉者爲里正並掌賦役之事

按史稱英宗至治間  
浙右病於徭役民乞



坊里正者皆破家朝廷令行省召入郡集議以屬縣坊正為僱役里正用田賦以均之僱役與今之均徭銀相類似均田賦亦或均甲均役之類歟但史志不詳無可考

國朝以一百一十戶為一里里分十甲設里長十人歲役一人主一里賦役十年一周海鹽一都八里二都七里三都十里四都七里五都十五里六都七里七都九里八都九里九都六里十都十里十一都九里十二都六里十三都十一里十四都八里十五都十二里十六都十一里十七都二里十八都六里二十九都一里縣城坊廂四里澈浦城三里凡一百六十一里里長一千六百一十人未析平湖前里分詳前鄉圖中不贅後法

壞弊生戶消長不齊不可據萬曆九年始行陞里併

里及均田之法改一都東區十一里以天地玄黃宇宙洪荒日月盈

十一字編為圖分西區七里晏辰宿列張寒來三都區十五里暑往秋收

冬藏閏餘成歲律呂調陽雲五都區十三里騰致雨露結為霜金生麗水玉出六

都區十一里崑岡劔號巨關珠稱夜光果七都區十五里珍李柰菜重芥

薑海鹹河淡鱗潛羽翔九都區十五里龍師火帝鳥官人皇始制文字乃服衣十

三都東南區五里裳推位讓國西南區七里有虞陶唐東

北區七里罪周發商湯坐朝西北區九里問道垂拱平章愛育黎十四

都東南區五里首臣伏戎羗西南區五里遐邇一體率東北區

十三里賓歸王鳴鳳在竹白駒食場化被西北區九里草木賴及萬方蓋此身



十六都東區七里

髮四大五  
常恭惟

西區七里

鞠養豈敢  
毀傷女

亦

一百六十一里而編僉里役則以田畝爲主田多者爲役頭田少者爲甲首通縣田地除優免額八萬二千三百有奇餘田五十一萬五千二百畝分派里長一千六百十名每名田三百二十畝於是里甲無偏多寡役賴以均

按里長以人戶編僉不取齊於田糧自是 祖宗定制蓋緣黃冊各戶下明註田糧多寡役輕重照之差撥政無患不均也後來百姓規避役色將田糧花分詭寄向別圖巧自隱匿又或因里有頑戶

欠糧荒田賠糧及解軍等累較量利害轉展別竄去者所避里分人相戒不復入所就里分人衆差輕投入者轉多於是丁糧多寡愈失其平同一里長苦樂天壤懸絕有司縱費盡心力審役役亦無繇得均勢自不得不就田畝取齊另編里甲盡廢以戶僉審之舊而後病可救矣此是百姓自將前法蠹壞非法元有弊復須更改也但均田議嘉靖間已有之至萬曆九年始克舉則自有說一則以照田編里則田多里分須陞田少里分須併甚有都分亦須銷併者成規頓改難免非常之懼未到



勢窮理極時有司尚未敢做一則以此時士夫優  
免尚無限制但有田地借蔭在戶下並不克役若  
行均甲勢必先將免額刪定然後可將餘田分配  
令無縮虧人卽不爲阻撓我自嫌其刻薄有此種  
種難調之情事亦未易卽舉一則以自 國初到  
今各里田糧偷漏漸多坐下虛額向係本甲卷納  
今若均田將里分銷併此糧屬之何人取報陞者  
裨補旣數不相當就槩縣田攤賠又情未通允必  
待丈量清楚豁盡虛糧然後均齊畫一之政可行  
此均甲美政直待二百餘年積弊之後合縣士夫

帖然無議之日又適奉明例通丈田土機會種種

湊合可以有爲前令蔡公方能成就此大功德于

鹽民也

公諱逢時詳  
後宦蹟篇

先是嘉隆間建此議者有邑

民陳允武李絢沈愛涇爲富家巨室所不悅中害  
被箠朴者屢屢孝廉王文祿常憐而護持之當蔡  
侯審冊時王引見此三人具陳均甲之便與不均  
之不便侯立決懸議於通衢矢在必行王性慙而  
氣俠至舞劍於侯側佐之曰我一老孝廉無子絕  
後何思於邑豪有撓我侯令者我卽以老命博之  
蓋昔人成事之難如此後萬曆之十九年王公臨



亨二十九年李公當泰三十九年喬公拱璧今天  
啟元年樊公維城並有事編審悉規隨蔡公之遺  
有條章可紀迺樊公當科甲寢盛免額難盈之日  
復割士紳三之一以無失小民役田舊貫力持之  
功爲大而同儕彭孟公諸君欣然以減免首倡無  
負公爲民德意上下相與有成尤見吾鹽一時之  
盛不可不併識者

萬曆九年前任知縣蔡初行均甲事宜

按蔡侯均甲文卷已

燬於資聖冊房之火從民間錄得當時士民覆呈一紙附後存當時仁政大畧乞均里甲以除積弊以甦民困事遵奉按院批發陳允武李綯沈愛涇等所呈前事蒙本縣着令某等逐一議報以憑

轉申某等勘得里甲既均非特一時之便乃萬世之利非止貧民之幸亦巨室之福非惟細民之樂亦官吏之慶蓋往因里甲不限田故奸民竟將田地詭寄富里以致富里之民雖田盈千畝一役不沾患里之民雖戶無立錫且克數役貧民不其往往苦板大戶或將吏書裝頭或捏重情騙准經年累月煩瀆官府吏書因而陷害大戶亦復喪家今若里有定額則詭寄者無所容丁產適均則編役者無偏累照田認役則里長不審而自定有產當差則富家充役有何難賦役得均則貧民安生而息訟審官拱手而役平吏書不致於牽累其便誠不可勝言是以鹽民仰望百年而科道前後交論嘉靖四十年蒙鄧給事題准嘉靖末年又蒙龐巡按題請隨奉 欽依行縣原議造冊之時舉行今該造冊已蒙縣主揭申撫院准批分守道令陳允武等所呈却與前議相同合行申報但優免之數不定役田難以取齊陞里之法不行各甲何從均派議將鄉宦田地科甲出身者各免田若干貢士生員吏承各免田若干其餘田地通融均派於一千六百一十名里長甲內每甲限田若干先行准



收次行均甲又次編審編審之時以三百餘畝之家編里長一名必不得已以二百畝之家為正撥小戶助之仍照嘉靖三十年按院林有行陞里併里事例以從民便如一都三都七都十四都西北區此富里也聽其將一里陞為二里如十三都十六都十四都東南區此皆沿海患里也聽其將兩圖并為一圖仍不許增減原額里數如此則法可變通利垂永久

### 萬曆十九年前任王編審事宜

侯編審悉用蔡侯均甲法而其意專

重役頭並以田多人戶充之蓋今日之僉審里役即他日僉審解戶之張本若聽其花分姓名朋充串充只取齊三百二十畝之數將來大家巨室俱埋沒難查白糧絹折等重差着落無人而小戶必受病矣此王公最有深意用補前政所未及也

### 萬曆二十九年前任李編審事宜

先是前冊因外

額不充將三百一十八畝僉里長一名李公以役田漸減非均甲初議詳外縣鄉紳一槩不免仍

以三百二十畝為役田定額勒石縣門永守其列款凡六 一均里甲本縣通計田地五十九萬七千五百四十畝有奇該僉里長一千六百一十名每名役田三百二十畝計共田五十一萬五千二百畝酌為定則餘田八萬二千三百畝均派縣士夫舉監生員吏承等項優免 一僉審里長以田多者為役頭田少者為甲首先期刊發議單令該里區甲人戶公議照田認役獨充朋充串充明註單內臨審的確即准僉充 一酌定優免槩縣甲科免田三千鄉科半之貢途又各有差監生免田六十畝生員免田四十畝異途出任免田三十畝吏農免田二十畝通計免田八萬二千三百畝各戶免外餘田與齊民一體編戶當差如後人文漸盛即在縉紳免田中多寡通融不得侵踰八萬二千三百畝之數虧損小民役田 一外縣士夫彼處自有優免毋得混入本縣縉紳一槩叨免即有田產原隸本縣圖籍一體當差 一衛所武職既受世祿難侵民利如果祖遺居址墳墓查實量免此外續置田產一體編戶當差不得槩免 一故宦如端簡公著書立言有裨世教向係優免不



得一槩借以爲例如科甲士夫物故在于册前二  
三年內者仍量免一架以示優恤之意 又條議  
四款 一大造之年豪民乘而避役奸胥借以撰  
錢遂使推收互異總數不同此皆起於源之不清  
耳夫縣有縣總區有區總圖有圖總此舊式也今  
約每圖之中按甲造數如一甲原田幾何原地幾  
何原係何號段先册何人得業今册何人得業分  
爲舊管開除新收實在四款各詳註其下一甲之  
數總數相同至於十甲莫不同然後以甲合圖以  
圖合區以區合縣總撤之數亦莫不同庶可以杜  
花分飛洒匿名吊隱等弊 一海鹽百六十一里  
有總筭矣分爲十七區又有區總矣及至小里又  
有書筭二人又共三百二十二人是不亦過多矣  
乎及查里書半出營求而筭手乃出公報徒多生  
弊孔以愚良民而騙其財是黃册中一大蠹政也  
今除總書總筭區總照舊存置外其筭手一槩不  
用其有花分異姓攤田詭寄別圖影射投靠士夫  
優免並責成里書如受賄容隱坐罪不恕 一里  
長所苦無過役頭役頭之定總以田地多寡爲差  
有等奸民賄申書手將一戶分爲數戶一甲洒派

數甲以致作爲畸零巧避役頭此等奸民本縣所  
甚惡許十甲互察投首賞罰如詭寄劄決不輕貸  
一縣內有等無籍棍徒戶無寸土兜攬鄉愚產  
戶田地每畝先索落甲銀一錢認作甲首包當里  
役及輪該見年或糧長上卯每畝復索幫役銀每  
年收糧米筭加三銀筭加二收侵入已竟不完官  
累糧長比較後有侵欠告拔甲戶代賠最可痛恨  
今當編審之初務爲百姓求一清楚日後後輪亦  
便如有此輩願認或有大戶包倩許卽  
時首明有容隱保結者定連坐不恕

### 萬曆三十九年前任喬編審事宜

條議五款 魚鱗册乃原丈之

根其中號段賣者照此號而除買者照此號而收  
號內有分收若干者俱照除註明有何差訛重造  
之弊自賣主或寫號不明或記號差訛或此戶已  
收而彼戶未推或此圖已推而彼圖失收或一號  
而兩主重收或兩號而誤歸一號或有分收不爲  
註明而一併除去或祖舊册而訛以傳訛又或有  
方收此甲復收彼甲頃刻而兩三轉移者致使里  
長無處辨糧里書亦忘其源派大造差訛良由於



此今本縣照每圖原丈冊籍刊刷推收冊票如一  
圖天字一號起至幾百號止即照區圖多寡挨號  
填實推票印發里書每里照圖原丈分發收田者  
應收某號即與該書揭票此據以爲除彼據以爲  
收分收者里書另寫一號票用私記合同印鈐于  
官票之上仍付區總處掛號方准推收如此揭一  
票去一號矣焉有重收之弊一推一收照號造冊  
焉有增減之弊此圖有推彼圖無收不准作除此  
圖有收彼圖無除不准作收有田之家應收田畝  
毋論十號百號俱許揭票總釘交與里書立戶有  
何差訛其中如有方行新收入甲又復轉收別區  
別圖以希規避者查出即行究罪里書同坐大  
造推收版籍既以收亂若源頭不清何能總撤合  
一故一縣有一縣之總一區有一區之總一圖有  
一圖之總然各里自爲推會而不由于區總掛號  
則里書作弊日後點會何由而清是以里書收除  
必要經由區總掛號即圖內有差而區總之數瞭  
然會名杜訛莫善于此如有圖書擅自推收致有  
差錯點會之日重責究罪其區總如有科歛各里  
書津貼使費及勒措掛號許被害人面稟以憑重

究 編役起自田畝故自萬曆九年定爲三百二  
十畝而成一甲迄今三十年無改稱便然奸戶惟  
知花分詭寄可避田多之名不顧幾處納糧幾處  
承役之不便又有里書倡爲挨里之說新收者留  
甲舊存者推出鵲巢鳩據大非人情本縣推收之  
法大都以本圖田多爲主客圖田少即將客圖之  
田收并本戶如一甲有餘即挨順割補二甲十甲  
有餘方挨順割補隣圖寧割有餘里長之田不許  
分割零星人戶如果家道殷實田多花分飛酒詭  
寄別區別甲以張易李陰設陽施本縣查出毋論  
田畝多寡處處僉役與其規避而僉罰多役孰若  
歸併一甲充一名之爲便也就得孰失必能辨之  
里役有田掛各區兩頭充役不必具呈竟自與  
該里書歸併如本名之田前冊或以原戶立籍或  
另立鬼名者俱許及今改正其有虛號田畝飛糧  
洒派多增者有原賣主勒措不與推收立戶者有  
未經賣絕而偷收者有甲田推盡而又得空甲之  
錢買收入甲者如斯等弊悉行痛革 首陞田地  
原無字號難以查考今冊內查有首陞田地係某  
字號之傍者即寫某字號首陞盈田若干以便立



戶輸納 優免條議 照得審編里役須先定免田而後便于僉撥計本縣田地五十九萬七千五百四十四畝為里一百六十一每名均田三百二十畝共計五十一萬五千二百畝餘田八萬二千三百四十畝留作優免此萬曆二十九年申詳定例也今又十年于茲版圖如故而人文日盛僉役之田三百二十畝之內一畝既不可割優免之田八萬二千餘畝之外一畝又不能增計無復之惟有通融一途可使紳民兩利勦終厥事條例開列于左 一舊冊甲科免額三千畝外加三百二十畝立里長一名名雖三千實三千三百有奇春元免額一千五百畝加三百二十畝立里長一名實一千八百畝有奇今魏科日增田無旁拓將襲額於舊無以待後來之彥將借資於民又難紊已定之規今議免數仍照舊額但于額內分立里長一名編審之時仍聽優免庶里役無虧而原額不廢此亦展轉之術非故抑簪紳以悅齊民也 一例選優免舊冊元有等差蓋均為例選中不無已選未選清班外任之分亦遵往例非私有軒輊也 一國學鄉校同稱舉髦舊冊監生免額六十畝生員

止免四十畝今止宜一視可成兩便但難於驟更稍裁量於季孟之間云 一異途之有免額廣推類也今除府縣初納農民不免外自一考至二考勞有淺淡免亦差等其原納兩司六房農民為費少重准如一考例免至叅遊衛缺及兩司首領一如府縣以實歷為準初納者不得潤叨優恤以滋倖門 一故宦鄉賢舊無免例惟鄭端簡公立言立德千古景行不妨優異其他骨肉未寒踐更旋至亦不無少恫于衷今議冊內告殂者准照舊免其餘甲科故宦惟及事 今上者用舊衙序編排年一名聽輪審之年照同官戶免豁以示存恤微意倘命煩在堂者准以受封名色別立排年一名蓋身膺章服遺澤未亡似不為濫及也其節嬾孝子准照舊免以勵世風 一武胄無免例享世祿者不宜有世田定論也惟是封疆之臣瑩域所在不有優卹無以慰妥先靈今據揭開全衛揮使十八人准充名立戶共編里甲五名許免歲差其加級及優給未襲者勢難混及惟發武會本名有田准照例優免 甲科七戶共免田一萬八千九百畝鄉科出任九戶共免田一萬八百畝春元一十



四戶內寄籍二戶僅免其半止作一十三戶共免田一萬五千六百畝官生出任一戶免田一千二百畝封官二戶共免田一千一百八十畝歲選教職一十二戶共免田一千七百七十畝監儒出任一十一戶共免田一千五百五十畝監生儒士五十六名共免田二千八百畝府學儒學生員五百二十八名共免田二萬一千六十畝衣巾生員四名免田四十畝節婦二戶共免田八十畝故宦鄭尚書免田二千三百畝劉方補免田六百八十畝雜職縣丞儒官九戶共免田五百六十畝雜職省祭等官二十七戶共免田八百一十畝候選省祭一十六戶共免田四百八十畝三考兩考吏七十三名共免田一千四百六十畝一考吏并加納司道農民六十七名共免田六百七十畝儒學義田五百三十畝免額外仍僉官里緣由照得官里之名非創為新法以病民緣舊冊官戶免田在里役之外今冊科第例選日增而免額有限既于木宦舊免之數扣出里役一名似應別立一名候命解之日優免以補原額本縣均役申詳原揭出每年優免官戶一十六名不過就中取足初非有關

### 天啟元年知縣樊編審事宜

冊條議五款一核原

民里磨役田以益之也但數止十六勢難濫觴且十年之內鄉會六科俱應預為之地是以酌量年分裁定名數實無軒輊其間知罪聽之矣

前架實在編冊為舊管查得各遊田畝人丁悉有差那明係弊藪應着原經書手逐一清纂一本務要總撤相同限十日內當堂交發新書使日後查有弊端不得推諉舊書一有不則坐贓究遣一備親供以杜飛詭里役定於田畝於此不實則對民猶胥交相為弊致累善良今各官民人戶俱照新刊供狀事款逐一註明交與圖總類為一本投縣其區總圖總亦照前式開明本區本圖舊管田地山蕩浜漢若干今某圖某甲新收若干推倭此實在其若干務要戶合甲甲合圖圖合區區合縣如有絲毫不對即係飛詭究罪不貸一明推收以稽虛實十年之內人戶消長有買有賣則有收有推今每遊置立推收二簿業主查明號段畝數眼同里書登簿仍至圖總掛號以便核數一嚴



書筭以會丁田書筭計會丁田責任靡小在以猾棍鑽做弊竇相仍間出糧里催募不外此輩營求漢熟故套諸弊多有本縣一一勘破無暇盡言今爾各里具呈務得誠實家殷者充之已有明示凡一推一收必要業主同在兩書當官對面登簿絲忽與親供不差田畝號段與鱗冊不差少有不清里書業主并圖總一體究問其有細飛細灑此那彼移本縣定將本里各戶親供原冊親自檢查筭出坐賦究遣不恕一均優免以郵役田免田自八萬二千三百餘畝之外悉屬役田雖本縣人文日盛科甲漸多勸未有益於役田三百二十畝之內猶可減者且冊經四架確有注規卽鄉縉紳諸先生諒有心體無煩贅詞今與鄉士大夫約親供內務註舊管田若干實係已業新收某田實係契買免田若干役田若干聽本縣酌免冊局榜約一查新報里書多以舊役鑽入難以辨識但前冊諸弊尚未深究今又窟穴其中以恣奸蠹本縣極爲痛恨如再踵前弊定以積害申處各宜自揣毋致後悔一各里推收刻期報完單書不得需索業主慢延時日如有違抗以致遲悞報冊限期責

罪申究一里書報冊務與區總會召清楚田作田開地作地開山蕩浜淩做此甲甲總撤相同戶戶總撤相同以憑清筭如有朦朧混亂重責不恕一區書之設原以會計圖田各里書推收既畢役田或多或少或以數送區總開明粘貼在外聽餘田業戶自願於某處圖甲內承役酌盈量虛挨圖順補不許寫遠分撥以候議單編審毋致臨時告擾一區總推收既畢仍纂造區冊一本前開本區舊管若干今某圖某甲某戶共收過若干推過若干實在若干務與圖冊相合如有不對責罪不恕一里書往與區總交通得人厚賄於未審里長之前將田吊起不作實收待編審既定田方入冊本縣久聞此弊今於推收既畢查有戶數不合甲數甲數不合圖數者責罪不恕一各里田有荒號皆由賣主多推買主少收及里役推收不明遺來日久今有前項許呈明查照丈冊改正一外縣鄉宦寄庄舊不優免如真有買本縣田地者以時各起戶與民一體當差雖怨不避一里有積棍戶無田土包攬里役侵收入已徵解無完今臨審先給議單仍要十甲彼此互結毋致取罪



優免條議

海鹽縣為酌議優免以甦役累事

查得本縣碑額田地五十九萬七千五百四十畝里長一百六十一名每名派田三百二十畝通計該田五十一萬五千二百畝餘田八萬三千三百有奇留為免田此萬曆二十九年申詳定例自甲科以至流品免額各有差數餘田與民一體僉差三十九年前任喬又以人文日滋版籍如故曲體同類裕國恤民之意就中稍稍裁損人情亦允當矣乃今辛酉天子元始之年復當大造本縣承乏茲土毋亦兢兢成規是守而斯文之盛較往昔益多計不敢為額內之減亦不能為額外之加向為諸鄉老商確於原額免田內通融均派咸不欲外侵役田一畝此不惟幸使本縣克終厥事而鹽民祝頌永保子孫世世榮顯矣特列為條議以布告諸民一甲科前屆每位免田三千畝內僉里長一名實得二千六百八十畝比之二十九年為減今計甲科多前數倍以緊縣通融均派該實免田二千畝雖三分損一本縣似難為情然官民之數止此亦所共諒者耳一鄉科春元免額半於甲科此往例也前冊內僉里長一名已從殺矣

然近日魏科益增猶難殺中取盈今議每戶實免田一手畝非本縣視往例獨薄有限之田不勝疊起之彥也一誥封免例從來未有惟上冊始免及一人創為三百八十畝之派今褒錫漸多義固難廢量為裁酌每位議免田三百畝以為朝廷弘孝治云一歲貢貢官俱照舊例免田一百五十畝納貢一員免田五十畝一例選雖同然有京班外任之異前屆酌議已妥今復量減京職議比歲貢免田一百五十畝外任六十畝一監生生員學分鄉國其為諸生一也往例監生免額稍多今援例者衆難遵舊額議與生員一體免田各四十畝大儒士同一吏員官及省祭每員免田二十畝京司道府縣三考吏每名免田一十五畝一考吏每名免田一十畝一故宦免例奉文裁革惟鄭端簡劉方伯二公申詳恤免端簡公况近奉按院檄縣別其里為各賢永免踐更蓋由千載景行歷冊優異其餘本縣任內曾經奠祭者量免以示不忘餘則比之親盡則祧節婦孝子照舊例免以勵世風內故宦鄭端簡公前冊免田二千畝今實免一千畝劉方伯前冊免田一千畝今實免



凡糧長每歲每里役一人爲之其里長之值年者曰見年與糧長分上下五甲督催倉糧櫃銀在官聽比糧長仍充解銀米差役見年修理民七城垣并充塘長築捺土塘水堰今銀差用官解以空役出銀貼之他役色亦設法多所減革止餘米解在民糧長役大省而城垣復用空役銀官修見年之役并省矣

洪武初州縣糧萬石例設糧長一人主徵收運納之事已復增設糧長正副各都區二人每年令赴京面聽宣諭關領勘合事竣仍親賫奏繳有犯雜犯歿罪及流若徒者止杖而貰之其待之厚如此是時全浙糧長僅百三十四人而鹽一邑可知矣父老相傳古有大糧長聲勢赫奕如官府者是也後民貧不能充其選區或分三四人正德中遂有串名法至嘉靖間吾邑額定糧長大抵四十二人爲常均平事例行後始照里分每歲輪一百六十一人爲糧長徵收秋糧其運納銀米諸差亦僉其人爲之復名之曰解戶蓋其役與國初之糧長同而其人之分任者較之國初不止數倍矣又里長十年之中充糧長者一次充見年者亦一次



見年者卽直日提牌歛里甲錢以奉各辦之役者也條鞭行而見年無所事事遂取十甲分爲上下令見年亦催徵五甲糧稅兼任城垣圩堰等役以分糧長之勞其法意甚善而行之旣久繁費漸多僅僅三百二十畝之家十年中迭支兩役欲產業不耗且破不可得矣大率今民役糧長最重見年次之調劑之使重者減而輕則歷政具有條議存焉用悉志之令後之民牧者有所采酌云

### 隆慶中糧役事宜

邑人馮阜謨有議曰吾鹽役賦不亦重且困乎一變於郡守趙

公瀛而賦均再變於侍御羅公尚鵬而役均然有一二未盡者以糧額言之前此斗則不等致弊孔

百出今除山蕩外通共三斗至五升田而均一之又并合三升麥地亦作田數均之無非取齊一而塞弊端也然議載緣海高阜之鄉地作田科者許免力役重差今者悉置不論且如近歲鹹水灌溢旱躡頻仍高鄉之民麥菽鮮收卽正賦不能供之矣查原議而寬其役差此一議也以糧里言之前此糧長者解頭里長苦供億今糧長徵銀解司里長徵納均平豈不甚寬但糧解最苦者北京白糧今每役議銀百兩似矣而止兩人共充設有不測則兩家賠賊難矣舊例每役正貼戶僉四名或五名無事則衆擎易舉有事亦衆攤易破此一議也里長稱苦差者曰斗級曰造船夫里長旣納均平矣此二役者非役外而又役乎然不得不役里長者勢也斗級每役費銀百兩初議五十兩今減至五兩且又未必給也紅站船屬居民矣而府縣船皆如故也大約皆估一而賊十估者見爲節縮不覺破而病實在民也二役者何不實議實估免於執役者之浩歎哉此又一議也以上爲龐趙二公所未備者姑識之以備採擇



萬曆二十九年僉審糧解事宜

知縣李公當奏議曰百姓之所慮者

惟糧解糧解之最患者惟絹折稍次則北京南京白糧及南京糙糧其餘各解亦有差等本縣反覆思維役重則費亦重而眾舉則重者亦輕今也首論絹折議該五人共充其次北白一十蓬南白一蓬每蓬該三人膺之又次南糙一十二蓬每蓬該二人共當其餘南京農桑絹折與夫各倉斗級米解金花三四灶丁兵餉馬價直部雜辦等項銀解或應一人或二或三或五六各量銀數多寡程途遠近計其所費配之以人總計年該糧長一百六十一名通融截編應役並不留下空役使重者共備輕者獨充役有重輕而費無差等庶平均民之差通民之力以保民之家而已

萬曆三十七年以前糧解名役

押運北京白糧二

名糙糧二十名織解北絹八名南絹二名解京庫米折麥折派派剩米折淮三四徐州倉折南京草折柴薪兵餉竈丁荒絲馬價商稅襍辦等銀三十三名府預備倉斗級二名縣廣儲倉糧解三名斗級

二名常積一倉糧解一名斗級一名預備倉斗級

一名勘合一名出糧總筭二名協濟上司公費并

空役聽幫十名修理衙署碼頭

二十五名餘二十名優免官戶

萬曆三十八年設貼役銀事宜

先是糧里徐文煥等具呈稱本縣役

繁不均議欲徵銀公貼銀差亦貼官代解蒙司道撫院檄縣查議間隨蒙布政司將銀差行令官解空役已多本縣知縣喬拱璧議僉名役六十四名優免官戶十六名及貧難下戶十六名外所餘空役六十五名令其出銀幫貼各役并備官解雜費不加徵而役自均其審戶之時仍將貼戶分上中下三等註名配貼令其對支庶民受實惠官絕他嫌內開 北京白糧解戶二十五名本縣白糧北運舊例運船十蓬今併二蓬為八蓬僉解役二十四名又念批頭煩重加僉一名朋役將所裁二蓬車夫水脚均攤八蓬其貼役銀兩除舊貼銀一錢八分新議再加一錢七分共該銀七百七十七兩八錢二分是每石正米共貼銀三錢五分役可無病矣僉空役二十八名共辦前銀每名該出銀二



十七兩七錢八分 北絹解戶四名本縣絹一百  
六十一疋向內官交納需索最稱繁苦每絹一  
疋絲價鋪墊路費銀七錢八分貼役銀三錢今議  
每疋再加絲價銀六錢二分又貼役銀七錢每疋  
連價扛使費共銀二兩四錢除舊外通該加出銀  
二百一十二兩五錢二分僉正解四名另僉空役  
七名出貼每名計銀二十六兩五錢七分 南京  
白糧兼帶農桑南絹三名白糧正米二百一十四  
石三斗七升五合係內監交收每石所費不下五  
六錢頗稱煩苦今議僉解戶三名兼帶南絹一十  
二疋每正米一石除舊貼役米二斗八升八合外  
再加貼役米四斗一升二合折銀二錢六厘該銀  
四十四兩一錢六分五厘共成每石正米加貼七  
斗又僉空役二名每名出銀二十六兩九錢二分  
共五十三兩八錢四分內貼南白四十四兩一錢  
六分農桑九兩六錢八分 南糙解戶二十名本  
色正米六千二百四十三石七斗二升舊規糧船  
十二蓬僉解役二十四名向因散派各遞官戶以  
致稽延短少今仍聽坐儘准將所裁船夫貼役均  
幫十蓬起解地近不為煩苦不必議加 本府預

備倉斗級一名向來縣雖僉役係嘉秀二縣人戶  
包充舊例有役銀三十五兩二錢今議僉一名  
令其出備銀三十兩并原貼役銀共成六十五兩  
二錢解府當官給貼嘉秀兩縣役人庶亦彼此兩  
便 本縣預備倉斗級二名舊僉一名今加僉二  
名其舊給役銀四十四兩裁省 本縣廣儲倉斗  
級四名本倉存貯海寧一衛四所軍儲原僉斗級  
二名額派役銀一百零八兩又僉解戶二名今議  
裁去解戶總僉斗級四名兼收兼解止給倉官心  
紅紙張公費銀二十五兩二錢餘銀裁省 本縣  
常積一倉斗級二名本倉存貯激浦一所軍儲舊  
僉斗級二名原派貼役銀七十二兩又僉解戶一  
名今總僉斗級二名兼收兼解止給倉官心紅紙  
張公費銀二十五兩二錢餘銀裁省 各鎮常平  
倉斗級四名本縣所屬激浦茶園歙城白馬朝四  
鎮各有常平倉貯穀備賑仍舊點僉斗級四名管  
守不為煩累不議貼役 運司龍了蕩價并馬丁  
分司阜隸貼解二名額解銀三千六百六十一兩  
零舊僉解戶四名今議官解僉空役三名共幫貼  
銀八十三兩一錢三分每名出銀二十七兩七錢



一分 解淮三六河工項下貼解七名額解銀六千三百七兩零舊僉解戶六名今議官解僉空役七名共幫貼銀一百八十九兩二錢二分每名出銀二十七兩三分零 徐州永福倉糧貼解一名解銀四百五十四兩八錢舊僉解戶一名今議官解僉空役一名議貼銀二十二兩二錢八分 南京定場草折兼直部柴薪貼解二名解銀四百六十兩三錢零舊僉解戶一名今議官解止僉空役二名共幫貼銀三十七兩八錢六分 監銷發兌貼解十名本縣共該解司府金花兵餉等項銀一萬八千五百餘兩舊僉金花解戶四名兵餉解戶二名草麥折解戶二名派剩米折荒絲修河米折解戶二名廣儲常積一倉解戶三名雜辦解戶十名管解前項銀兩今俱蒙本司議改委官欽解但中有傾銷火耗及京庫滴珠解官盤費等項勢所難免仍僉空役十名聽辦前項每名約費銀二十餘兩度小民可無納耗之加而收役并絕勒贈之弊 聽備零解并織造稅銀天平勘合等項貼役四名本縣應有解京賦罰鹽船稅契匠班魚膠麻鐵門攤課鈔商稅各道紙劄等銀一千六百餘兩

舊例原編前項雜辦解戶十名商稅解戶一名天平勘合斗斛解戶一名今俱議改委官領解中有傾銷火耗解官盤費等項最為煩瑣點僉空役四名聽備津貼每名約出銀二十餘兩 貧乏零星不堪充役下戶一十六名本縣編審里役上戶點充糧解中戶點充幫貼其有貧乏無賴不堪充役者有五六月朋名零星難任者十中不無一二議作空閒餘役以寬卹之本縣倘有修理工作酌量點幫亦往役之義所難辭也 優免官戶一十六名本縣士夫優免編里業有定額外有鄉會新科舊無優免者有鄉紳的名子戶優免未盡者有故宦子弟義當存卹者有歲選例選當均免者凡此宜有以處之今議虛十之一以待第毋令渝額以開俸門庶士紳沐休息之恩小民安力役之征矣 又本縣總筭錢糧會計造冊由票榜文歲會京邊報部年終格眼號紙等項并筭派漕糧條鞭銀米極為繁雜每年例編上戶二名克當僱倩書筭紙張工食以槩縣之事偏累二戶似為未安今議裁革聽各里出僱僱募工食本縣點選誠實書手二名聽理其事



萬曆三十八年通行欵解事宜

布政司為議立委

以清弊蠹以省津貼事照得兩浙為東南財賦之區亦為奸猾積弊之藪然而浙西為甚嘉湖為尤甚自糧解戶重役惟嘉湖有之百姓已不堪重累而又加以各項錢糧頭緒繁多故有一項之銀即有一項之解各縣俱於開徵之前編僉解戶其中鑽刺躲閃弊不勝窮及編僉既定徵完各項銀兩給批起解解戶承領銀批到省勢必投歇彼歇家與吏胥內外相構倚衙門為壘斷百計需求上納錢糧有打點使用之費投批掛號有稽延盤纏之費甚至有積猾包攬併其銀而侵用之并其批而沉匿之種種弊端莫可究詰故近日嘉興海寧士民習見解戶之苦乃於解銀項下議增津貼付之官解然見所議津貼數多加派日繁民命日蹙幾不聊生矣本司承乏錢穀有激於衷爰陳一得之愚求以革弊而甦民竊聞他省曾有類解之法今欲行之杭州等九郡有欵解之法今欲行之嘉湖蓋道路有遠近錢糧有繁簡不可執為一例也嘉湖錢糧最多弊孔亦最多且去省甚近舟楫往來

甚便委官欵解每府不過數日可完假如各縣錢糧本司酌其緩急定為先後填簿分發各縣徵收照限起解每於雙月初旬將徵完某項某項錢糧若干即填入格眼簿內逐款類報本司一面將銀傾銷足色成錠聽候本司委首領官一員即發所填簿收執順路挨次到各縣與縣正官當堂逐款照簿憑領定法馬一一究明惟京庫銀兩照京庫法馬充準俱要足色足數逐欵用縣印竹紙實糊銀上外用綿紙包累竹紙細條封口仍用縣印縣官親填職名花押各項銀數逐欵開列總類一批給付委官回司投收本司止驗封收銀該庫官攢無能高下其手委官亦止照封投納衙門各役可免措索之需至發解之日本司即以原封給發其有零數者先找間或偶拆一封秤充若有短少責在該縣印官賠補如或印封損動而有虧欠者於委官名下追補收完之後本司徑差吏赴院掛號掛完俟下次委官發縣付卷查盤如此則一批而可兼數十批一可免掛號銷號之煩一可免侵欺營運之弊一可免僉解貼解之苦不惟諸凡積蠹掃蕩無餘而目前縉紳耆老紛紛條議俱可存而



不論矣 時左轄吳公諱用先直隸桐城人 按  
萬曆三十五年光祿寺丞部人徐公必達具題白  
糧利弊內開官解一欵云差解各役惟解米非民  
不可若絹銀等差決宜官解但水脚寧過從厚即  
於條鞭內派徵蓋官代民解而民厚出水脚以供  
官官與民兩得也疏下戶部覆今後北差除白糧  
外其絹解即付之總部府佐南差除糙白外其絹  
銀等差即付之管押縣佐又須度其道里酌其費  
用寧加厚水脚派後通縣以官府代民解之苦亦  
恤下之仁以合屬答官解之勞尤供上之分矧所  
省於需索雜費不知其幾云云奉 旨依擬行吳  
公檄文中云嘉興士民議增津貼付之官解指此  
也歛解一法行至今已十有四年矣歲省鹽民金  
錢不知幾許吳公功德不可誼也而議始自徐公  
則尤所謂仁人之  
言其利溥者哉

### 四十二年行加徵減貼事宜

布政司右叅政兼按察司僉事嘉湖兵巡

道潘為議明派以甦民困事本道向因屬縣里役  
擊苦條議明派因輿情不一又博詢糧長將三十

九年以前原派每畝貼役米四合五勺議復其議  
加徵銀惟南北絹及會試卷資三事該縣每畝不  
過六毫九絲其餘如傾銷歛解修城修衙門修船  
看倉看櫃等貼役銀俱盡派在空役糧長使役者  
有實貼且不至獨勞貼者有定則且不至多費費  
出之民而官不得混加事辦自官而民一無所與  
業蒙三院詳允見經布政司發府行縣遵守今刪  
擇簡要揭示內開 復原編北白貼米二千六百  
八十八石九斗四升九合七勺 北白十蓬每蓬  
正米四百五十七石五斗四升零正副解二名向  
給貼役銀一百三十七兩二錢今議復原編貼米  
田地每畝派四合五勺共合前數每蓬貼米二百  
六十八石八斗九升四合九勺零作銀一百三十  
四兩四錢四分七厘四毫零仍少銀二兩七錢五  
分二厘五毫零均攤輪年空役糧長出貼補給  
編派通縣田地銀四百一十三兩六分三厘零

一北絹一百六十一疋五寸八分一厘三毫五絲  
每疋原編銀一兩八分今加派二兩二錢二分計  
每疋三兩三錢共加銀三百五十七兩四錢六分  
三厘零仍僉糧長三名自解 一南絹一十二疋



每疋原編銀九錢五分外今加派銀一兩二錢五分計每疋二兩二錢共加銀一十五兩仍僉糧長一名自解 一會試舉人路費卷資等項府縣各給銀一十二兩如人多只於內通融給發共加派銀四十兩六錢 以上三款加派通縣田地每畝該銀七毫 應均攤輪年空役貼銀等項 一解司轉解輕齋三四銀河工銀蘆席七分米折銀改先項下耗米易銀過江脚米折銀共銀六千三百七兩五錢四分五毫每兩除原編路費銀六厘外今加傾銷火耗銀六厘仍貼銀一十三兩以備解官水脚之費共計貼銀五十兩八錢四分五厘零 一解徐州永福倉糧折銀四百五十四兩八錢每兩除原編銀七厘外今加貼傾銷火耗銀六厘解官水脚等費銀四分三厘共計貼銀二十二兩八分五厘二毫 一解南京農桑折色銀四十一兩八分六厘五毫零每兩貼傾銷火耗銀六厘解官水脚等費銀五分共計貼銀二兩三錢八毫零 一解南京定倉草折銀三百一十六兩四錢四分每兩除原編路費銀五厘外加貼傾銷火耗銀六厘解官水脚等費銀四分五厘共計貼銀一十六兩四錢四分六厘

六兩一錢三分八厘零 一解南京部柴薪銀一百四十三兩九錢每兩貼傾銷火耗銀六厘又加貼解官水脚等費銀五分共計貼銀八兩五分八厘四毫 一解布政司金花麥米折二項正銀并滴珠京費銀共銀四千九百七十兩九錢四分三厘二毫零每兩議貼傾銷火耗銀一分每正銀一錢加滴補銀二錢五分解官水脚等費每正銀一兩議貼銀五厘三項共計貼銀九十八兩一錢一分一厘九毫零 一布政司欽解各項銀共一萬一百一兩六錢二毫零雖止欽解到司每兩貼傾銷火耗銀六厘仍量貼水脚銀五十一兩以備官解之費共計貼銀一百一十一兩六錢九厘六毫零 一零解三院司道織造府運司各衙門紙劄供應小票稅銀船鹽銀公費柴薪馬丁銀共銀六百八十六兩每兩議貼傾銷火耗銀六厘水脚等費銀一分共計貼銀一十兩九錢七分六厘 一解鹽運司竈丁蕩價并加派蕩稅共銀三千七百六十七兩五錢三分一厘四毫每兩議貼傾銷火耗銀六厘掛銷使費并水脚銀一分二厘共計貼銀六十七兩八錢一分五厘五毫零 一解布



政司勘合并錢糧號紙本章一十七道議貼銀六兩八錢 一修理城垣原編額銀二十兩今議貼銀一百五十兩 一修理察院司道府縣等衙門原編額銀六十七兩三錢三分三厘二毫今議貼銀八十兩 一看守四鎮常平倉內將白馬廟鎮倉廩歸併預備倉吏農二名共議貼役銀二十一兩六錢 一看守預備倉夫已經院革着令吏農一名看守議將原編倉夫工食一名銀七兩二錢給該吏為盤折之費但倉穀頗少每歲交盤出陳入新亦有虧耗量加貼銀七兩二錢 一守櫃吏四名每名應議紙劄銀三兩六錢書算四名每名工食銀七兩二錢共計貼銀四十三兩二錢 一補貼北白押運一十蓬役銀二十七兩五錢二分五厘一毫零 一督糧廳及府知事府學燈夫一十名共計貼銀七十二兩 一修理按院守巡糧道座船五隻及添辦家火什物等項頗稱浩繁今議派七縣輪修除原額支規銀外每年應貼派銀三十兩以備大修拆造不敷之費 一司府欽解各項錢糧紙劄鞘桶鐵箍鎖鑰等費議貼銀一十五兩 以上通共貼銀八百四十一兩四錢六分

六釐四毫零內議典舖一十三名上戶二名各銀六兩中戶五名各銀四兩下戶六名各銀二兩共銀四十四兩徵貼領銷火耗外尚該銀七百九十七兩四錢六分六厘四毫零應攤派通縣輪年空開糧長均貼計該縣糧長一百六十一名內除北白押運二十名南白押運三名南糙押運二十名集收三倉糧米押運三名又鄉紳官圖免倉糧解一十名北絹三名南絹一名實在空役糧長一百一名每名該貼銀八兩五分五釐二毫零 附免議派貼三項 一南白正米二百一十四石三斗七升五合每石原編貼役米二斗八升八合嘉秀二縣止僉正解一名故每石外議加貼銀三錢今該縣定僉正副解三名領運不必議貼 一南糙一十蓬每正耗米七百八十八石四斗六升五合五勺零正副解二名每正米一石原編貼米六升二合五勺向奉詳允比照北白事例俱儘本名糧米坐廩免其兌軍繁費不必議貼 一集收廣儲倉糧每米一石額派耗米六升內二升俱隨正米上倉完納其餘下耗米向係解戶領為搬運之費着落該倉官攢赴縣領兌蔴袋水脚俱於耗米取給



不必議貼 潘公諱洙晉江人仕至廣東左轄  
今守櫃以吏農不便復改用空役而三四徐倉等  
銀亦以各縣徵足不齊改  
官解爲民解法稍異同焉

### 北運歷年條議

按北京白糧押運一役惟東南五  
郡有之吾邑糧僅四千船止十篷

而大家巨室立破於是役者不知凡幾矣萬曆三  
十五年郡紳徐公必達爲光祿寺丞管理白糧因  
上疏極陳其弊一曰軍前民後之徂成說二曰監  
充供億煩費三曰官戶難催四曰船難僱覓多索  
詐延推五曰水脚短少不時給六曰各關搜貨納  
稅稽留七曰風濤漂沒八曰丁字沽剝船張家灣  
車運繁難九曰到京露積最苦風雪偷盜十日批  
文耽閣十一曰差解煩多殷實不足並切中利病  
得 青多所釐革今嘉湖巡道方公應明嘗身董  
是役悉利弊尤濇因采公疏及前後臺省疏附以  
已意爲北運使民總畧頒六議屬邑蘄在必行撮  
其大要於左 禮科都給事中陸樹德疏曰東南  
財賦之來有軍運以充軍儲有民運以給官府人  
皆知軍運之重不知民運之苦尤有濇可憫者夫

軍運以十軍運米四五百石民運以一民亦運米  
四五百石軍運船皆官所造而軍不知民運船則  
民自僱而官不知軍運以軍法法結爲漕法一呼百  
應人莫敢犯民運以田里小民供役遠道語言鄙  
俚衣服村賤人人得而侮之軍運經各該分司衙  
門無抑勒需求之苦民運經各該衙門動以違違  
情由問擬工價并諸雜色使用每一處輒費銀十  
五六兩少亦不下十兩軍運過洪閘一錢不煩洪  
夫閘夫共與挽拽民運每過一洪用銀十餘兩過  
一閘用銀五六錢所過三洪五十餘閘費可知矣  
其最苦者船戶皆江淮奸民慣造此船裝載白糧  
每僱船價及撐駕夫價計不下二百餘兩糧一入  
船其驅使糧長不啻奴婢每日供奉船長及撐駕  
夫不啻奉其父母蓋糧在船中卽糧長身家所係  
吞聲屈氣曲爲順從勢不得不然也其最所畏者  
軍運倉凌虐民運有等豪惡之軍故將已船撞擦  
民運之船民船板厚而軍船板薄微有損傷卽便  
蜂攢鴉擁盡入民船百般挾詐不厭其欲不已苦  
之在途者縷縷若此其他人京攬頭之需索入倉  
交納之艱難又有不可勝言者盡斯民筋力之脂



竭斯民愁歎之氣米始就倉困苦極矣嘉靖十年以前民運尚有保全之家至嘉靖十年以後凡充是役未有不破家者近來東南流離日衆逋負日多邑里蕭條盜賊滋起莫不由斯根本重地一至於此誠不可不鑒慮也臣產東南親見此苦常切痛心詢諸父老咸謂宜將白糧并入運軍順帶使民出所有以益軍軍出餘力以代民似亦無不可者但今年限期已迫尚未敢輕議上請今所當議者合無將民運并入議單兼責之漕臣令各該叅政一體督促進開總運叅政督催至京則軍運不敢肆其凌虐船戶不得恣其奸貪而洪開亦可無需索之患如有此等許不時呈告以憑警治伏乞勅下該部會議施行仍要申示各該衙門人役不得過爲抑勒以滋民怨以生物議庶乎民困少甦民心懽趨而益以彰我皇上惠養元元之初政矣工科給事中歸子顧疏曰職惟國之賦役莫重於東南而賦役之艱難莫重於民運民運之苦弊不在額外之有加益而在額內之有虧損救弊之方計不必議加以其本無而但當議還所固有試舉其受累之甚大都有一日水脚之侵

沒二日沿途之需詐三日交納之留難請不避煩縷一一具陳焉夫運糧之有水脚每船不下百金一無虧損似亦可濟吞餉之耗拆長途之勞費交納之賠償獨奈何侵漁者衆也未未下船而先行胥吏哆口而談長令拱手而聽各官原有費額另納公堂使費銀兩各項原有編銀復索驕夫修船而馬益壟原有僱運僱幫之役已而添役押幫長立人多而羊益積且扛頭把持而水手任其僱募兜攬紛紜而撐駕聽其遲速蓋糧未行而水脚已耗過半矣是水脚之侵費不可不重加裁革也至如糧船之行往返六千餘里涉險數十餘處其間觸石驚濤之險擲風犯雨之危小民已不勝匍匐而皇店皇木之暴戾抑勒關津閘壩之阻滯留難快去路而早則起車遲則守凍耗費不貲且州縣查驗矣又有淮安理刑之驗通州糧衙之驗何爲者也况淮安之驗驗其少少則罪之通州之驗驗其多多又罪之少不可多不可爲之民者安所逃罪



乎若不於沿途一帶禁革使得於受害地方官處  
告明重懲以法民困何甦是沿途之需詐不可不  
重為議處也若夫交納之累尤有不可勝言者五  
經科道七經內官掛號三十二衙門亦云瑣矣煩  
矣而糧米入城先講使用初入倉廩各役先索常  
例管門者有錢把斛者有錢夫收糧用斛耳而有  
數銖粒於掌上有選銖粒於盤中者選畢則每石  
而收之收重有罰收輕有罰總之各衙門之收米  
不一有每石費五錢者甚至有一二兩者况近時  
之新斛比國初之斛多有異同賠補甚難且遲留  
有罪違限有罪京中之罪未償而府州縣銷批之  
罪又至噫可嘆也則交納之弊又不可不重為裁  
革者也 浙江巡按方公大鎮疏曰臣嘗咨訪白  
糧解戶之苦大都二端其一在未解之前苦於水  
脚之侵分其一在既運之後苦於關津之多故水  
脚侵分之弊近在地方臣等力得而禁之而關津  
多故之弊遠在道路臣等口得而言之力不得而  
法之臣召經知解戶細詢其狀則曰自南而北有  
許聖關納料之稅有揚州鈔關驗契之稅有淮安  
工部板開納鈔之稅有清江浦戶部納鈔之稅工

部抽單之稅有徐州戶部報贍口之稅普寧店之  
稅有臨清納鈔納公堂之稅有廣安店之稅有工  
部領禱之稅有丁字沽 皇店之稅巡檢司追納  
底載之稅計每船費銀七十餘兩而臨清一關尤  
甚焉此外又有新河倒班僱募短絳撐夫之苦有  
臺兒莊濟寧南旺袁老口阻淺起剝之苦有河西  
務另僱民船倍出水脚之苦有王家務遇凍賃房  
凍米搬運狼藉之苦有起車陸運倍出脚價并車  
夫偷盜之苦有德州河西務等處 皇店照票勒  
索之苦有軍船凌擠暑雨蒸拆之苦有交納內供  
用庫光祿寺保識多索使用及勒耗米之苦有交  
納祿米倉篩頭歇家長班拏椿掣斛之苦有南北  
十五衙門批廻投銷守候留難之苦計每船又費  
銀三百餘兩而僱船僱夫與席草包索飯食神福  
一切諸費又不與焉蓋白糧一船負富戶之虛名  
到處以為奇貨而漁獵之不厭在上在下不惟不  
體念且加齟齬也此所謂遠在道路臣等口得而  
言之力不得而法之者今若不察道路關津之弊  
為之區處而但於地方議津貼議造船喋喋不休  
是地方施之於糧解者日彌厚而糧解施之於道



路關津者亦日彌厚漏卮尾閭終無益於糧解之  
毫釐而牟食繭絲徒有損於地方之什伯矣何以  
起吳越之瘠於溝中而衽席也 方公北運議曰  
或問曰役募苦於北運身既親之矣可得歷歷而  
言與對曰北運之不先也始有所羈而不能先也  
中有所阻抑而不敢先也前有所畏避而不欲先  
也何謂始有所羈而不能先夫運必資舟楫無水  
脚價則失其資矣今不請托則不得也不覓支民  
間則不得也不營求比限則不得也不鑽求放單  
則不得也不扣除公堂則不得也未涉江淮已爲  
魚肉安得冬理舟米春濟東風之便乎是水脚價  
爲北運之命脉最宜當官而見給糧時而蚤給破  
陋規而全給者也何謂中有所阻抑而不敢先白  
糧 上供漕糧軍餉輕重自殊乃先漕後白強軍  
既逞橫江湖之上而上人更助漕沮白不買幫則  
不得行也打詐欺凌百疏而不一戰其最苦者漕  
白相值遇險破舟而令白賠漕私詐未遂鑽求公  
斷私詐十餘金而不得公斷百餘金而莫誰何此  
竇一開則從來漕規一變是倒授強軍以恐喝之  
柄也後之糧解將益喘息而不敢動矣第不知白

糧遇漕破舟將借誰以償其苦也不寧惟是淮上  
游徒賄得緝盜未消之批過搜糧艘沿河刁棍怙  
恃村里烏合之衆強禦糧行部官身親而目擊之  
非不執有三尺彼借口差委將解諸院道實繫有  
徒將發問該管有司又非所屬之吏也不過稍加  
督責否則惟聽飽其欲去矣卽去已羈程數十里  
矣甚至關閘之間止司啓閉商賈攸往一見糧艘  
無禁而生禁必得重賄以導之行則覲奇貨而思  
居不啻市井無賴之人也是處處皆北運之強禦  
何如重部官之權俾得直陳軍丁強橫詐害之狀  
以爲軍官殿最備兩臺考察之一端則軍官自爲  
制以民糧分入軍幫可以一府之民糧合入軍幫  
亦可也至關閘爲擾彼自以官品償之若棍徒爲  
梗則有司之不自戢其宇下也在兩臺一傳示而  
有司禁之自止由是運官更時其起居審其風波  
無怠無急則衆役無險危之苦自無死亡之患也  
何謂前有所畏避而不欲先也苦莫苦於守凍彼  
何敢後而忘其苦意必較守凍而苦又甚焉者矣  
蓋守凍臨濟每名打點不過五十金而一至河西  
天津之間則內監以起車爲例所費不貲每名非



二百金則百五十金也照顧不及攬和水土竊取米數且有連車推入私室者矣且有捨奪近地而無人問之者矣且有日屆月運不及其半而春融水解數萬可旦暮至者矣卽部院布以寬政或車十之一或始議終免而一聞起車之議則一番催促一番打點未幾而催促隨之是以起車爲虛名而吏書受實利先至者首被害也何如守凍遠者用五十金而不驚其心也且勿論往歲卽今之役議起車者數矣民之私用不知其幾而所車不過二千石不識內府何以支其虛以待冰泮之際哉似事如永裁起車之例以塞吏書口實則各役無陸運之費爭脫守凍之苦又何樂栖栖河上踰歲而不得至也然愚又有說焉白糧之弊國家利於早各衙門吏書利於遲遲則安受守凍之金故先至者非起車別無苦之之術矣甚至交納衙門及一切保識欲借先至之人開增例之端勢不得不倍加摧抑而使之遂所求也所以然者何也彼皆視條陳爲虛文徒指弊立法而事竣之日無人據往議而按其實信其賞必其罰是以小人無忌指弊而弊在立法而法亡矣使誠能悉糧解始末之苦則人人踴躍而前未離本地所省已多然後照往歲有司扣除水脚之數改造糧船如漕船式則不數年可造輕舟數十自糧未有不早供公家之需而勿重傾廟堂之議也愚以局中之人不能越域外之觀妄爲規畫不知有當於識者之採擇否

### 南北三倉各糧聽儘緣由

往時縣總書受賄作弊將民運各糧盡派于宦

家豪戶及奸頑小民任其拖延短少相傳有以麥荳抵作米解戶只得含淚收去者萬曆三十年後稍稍行坐儘本名之法不足仍聽擇便對儘至三十二年守道李公思誠呈詳三院凡民運南北白糙三倉等糧俱聽解戶自儘立石縣門遵守萬曆三十一年三倉解戶生員楊秉偉以不得儘糧自列於府堂其呈云痛煒寒僉廣儲倉解戶五分應集收起運米五百餘石往歲奸胥作弊將米升斗零派花名詭姓對面難尋勢豪宦戶十不收一舊役某人尚監禁七年無償煒情劇自列幸救而生懇乞坐儘本名本圖庶軍儲重務不至竟有起運而無集收云云三倉坐儘自煒始觀此呈亦可



以知當日之民瘼矣

### 北絹改官解緣由

北絹雖係輕賈繁苦視白糧不啻小民僉是役未有不破家者先是郡太守吳公國仕條陳改用協部白糧官帶解兵道潘公洙復議加徵價值仍用民解至四十四年按院李公邦華下檄稱絹解之役在湖州數多而費稍輕在嘉興數少而費極重其起文掛號催批問罪等事與白糧同而投納內府之時京師攬棍通同內官侮騙倒換數番往回數年而後得收又有樣絹陋規有司尚偃然受之者至于各衙門之使費仍爾不貲合行釐正改官解為便時兵道王公在晉議北絹民解誠不若官解之便但從協部官帶解之說開徵既不同時即從杭州兼解之議隔屬又難齊一合擇本府首領佐貳曾經獎薦者一員每年蠶熟之時七縣解絹折項下銀兩到府令其領織代解如有退換本官自行織補不涉糧里由此前役免僉民稱便至今

### 辦酒革坊廂為催辦今發價官辦緣由

舊規凡遇

并本縣備辦公宴酒席每里取兩城者一名編為坊廂里長共一十六名在官承應條鞭行後此項已經編入均平徵銀係該官發庫銀自辦不知何故因循未革偏累城市里役萬曆十三年知縣蔡申詳革除另僱募願充者四人名為催辦給銀買備各項酒席後年久稍累僉空役二名黏貼至萬曆四十二年衆辦復行告脫今發銀平價僱厨役承應並不干累里甲及衙門人役

### 修城不用民七緣由

舊規城垣分軍三民七自東門繞北門西門至南門此七

分配本縣一百六十一里遇有坍塌見年里長出工料興修額徵銀止二十兩小民所費多寡不同有等偶值完固可得無賠有等傾底崩壞費至百金以上產業盡破者近蒙兵道潘於空役幫貼銀內設銀一百五十兩官自買料僱工修理不累里長見年詳前加徵減貼事宜下

### 塘長修築事宜

嘉靖中本縣額設塘長四十二名今以見年里長充之每歲一百六

十一名分任修築沿海貼幫土塘及各鄉堰壩等役修塘規則以一百六十一人分每季四十人



輪管自天字號起至李字號遐字號起至木字號  
人修八十丈菜字號起至惹字號人修六十丈因  
潮患有大小不同也如遇風潮大壞四季共修  
萬曆三十八年知縣喬以宮塘水缺難行向係塘  
長派修多應故事議用石塊兩面幫築爲一勞永  
逸計又念工費浩繁非輪年塘長所能辦將所估  
工價分爲四股一股見役獨承二股派五甲未役  
者又一股派役過四甲均出仍捐贖錢及民壯頂  
首銀買料興工計築西柵堰白泥堰涇庄堰祝家  
堰小陳家堰大陳家堰柏家堰劉家堰錢家堰范  
家堰丁家堰鄒家堰新漕涇堰灣潭堰孟家堰萬  
漕堰張水堰雙兵堰韓墩堰小廝堰黃泥堰無名  
小堰高家堰毛灰堰湯家堰錢家堰徐涇堰橫塘  
開堰低窪水缺十八處石橋六座費銀九百九十  
有奇按小修役見年塘長大  
修着十進公幫此舊規也

### 糧里雜費入均徭未盡各款

嘉靖四十四年行條  
編法改差役爲僱役

一切工食俱入均徭款中其有未盡入者錢糧無  
出仍手糧長見年派辦每歲爲常計糧長應辦馬  
戶工食銀一兩八錢倉夫工食銀一兩六錢河下  
皂隸工食銀一兩六錢每項遇閏加增銀一錢五  
分不敷銀二錢見年應辦堂甲工食銀一兩二錢  
衙甲工食銀一兩八錢遇閏加增銀一錢五分大  
約每里長一名十年中又  
費貼補均徭銀八兩云

胡震亨曰自萬曆九年前以里甲不均役不均萬  
曆九年後以里甲均役轉未易均何以故役一也  
費相懸則至無筭矣在里甲未均丁糧參差之日  
役猶易參差配搭今則田畝俱是三百二十以同  
額之田僉不同費之役如何得均昔人審役時亦  
嘗參論家道虛實以上下其間然又是論丁身不  
論田畝或失當日均甲之意矣所以救弊者只得



用分役貼役之說以曲求其均就貼役中又有明貼暗貼之不同分役者如北白在嘉隆中止僉二名于後增爲二十名衆分之而重者亦輕則法之最善者也暗貼者官定其人同役而其人貼銀于役頭以自免明貼者官免其人之役名曰空役而徵其銀以轉昇應役之人爲幫貼皆不出分役之意而明貼則萬曆三十八年始行之慮私家煩催討官代爲徵取又慮奸民有欺賴官自爲出納蓋亦法之最曲筭而淡防者矣然當時貼役所繇得行者又全賴官解一節將所有銀差俱爲百姓代去方留得多許空閒人戶辦此貼役銀兩不然一縣只此一百六十人役且不足安問出役銀乎所以官解之法之善爲不待言而議者猶思領解之官他日或以煩勞辭役有仁政不終之慮意惟有嚴核幫役之銀使帑貲不竭稍寬路費之額使人情樂趨庶幾法行可久郡紳徐公必達有疏云藩臣吳用先行官解法省僉各縣解戶甚多父老垂涕誦德但羨耗淨盡浙竟作貧藩官貧吏書并貧人情貧久生他心且合計以圖變法矣必勅撫按著爲定例而後可又云各縣空役貼銀必如海



鹽初議配與解官及承役人對支為受欲維法於  
不壞者公數言盡之矣

### 附保甲火夫事宜

保甲以察奸宄防盜賊即古什伍之法合之以講

鄉約則又有讀法遺意焉今知縣樊講求甚詳條

約具在嘉靖八年令州縣村落為會每月朔社首

社正率一會之人捧讀聖祖教民榜文

申致警戒有抗拒者重則告官輕則罰米入義倉

備賑嘉靖二十七年海道制閘行保甲法凡城

市鄉村十家編一甲為一牌不立牌頭每家直一

日十日而一周懸牌於門互相譏察甲內有不法

未行勸諭使改不從送官究治通同不舉者十家

連坐又令每家置銳利器械無事鳴金巡夜遇警

急鳴之為號鄰保響應助擒盜賊有司編保長毋

得脫漏士大夫家遇巨室占屋多亦籍其分門分爨

之人在牌不得混免前任喬禁約嚴保甲以安

鄉村設哨船以守要路置橋柵以防盜衝又於在

城十二坊置立更籌輪居民巡夜遞傳之以為左

驗前任何諭俗十二戒一戒悖逆二戒賭博

三戒姦淫四戒爭鬪五戒健訟六戒欠糧七戒販

鹽八戒奢侈九戒打降十戒謗帖十一戒使假銀

十二戒告加價今樊公刊刻約保全書以十家

為一甲三十家為一黨一百家為一保每黨舉黨

正一名黨副一名每保舉保正一名保副一名甲

長即於本甲內每月序輪週而復始其居民稀遠

不便聯絡如數者止就本村現在人數編定不必

牽合再於一保之內舉齒德俱尊為本方風信崇

者二人一為約正一為約副聽講鄉約宣聖諭

化民大率以約統保以保統黨以黨統甲以甲統

戶置立牌面如前法凡有不公不法之事互察舉

之不戒不虞之變互援拯之其禁約云保甲之法

乃古出入相友守望相助意也行者多為故事或

反至累民故不可久今宜切實開曉凡同里中有

火盜相救災喪相週不待言矣除外有孝弟才能

義讓廉節之人皆宜報縣旌揚或有力舉于鈞智

義讓廉節之人皆宜報縣旌揚或有力舉于鈞智

義讓廉節之人皆宜報縣旌揚或有力舉于鈞智

義讓廉節之人皆宜報縣旌揚或有力舉于鈞智

義讓廉節之人皆宜報縣旌揚或有力舉于鈞智



謀出衆隱淪在下者亦并報聞以便優禮待不測之用尤禁三五成羣聚頭連袂或共酣飲或共謳歌亦有假說因果唱和演義無故惹人百千叢觀夜聚曉散皆盜賊之嚆矢悖亂之流風保甲中有此卽便赴縣陳告不得縱容養亂本縣衝要地分撥捕快守之此往規也然多高坐在家至失盜乃始往捕塞責今後各到信地巡警治之未亂乃爲有功本縣設有哨船責之暮夜巡邏往往見賊船打劫哨兵不惟不救抑且不知責守何在今後置功績簿查比失事重加罪責總甲乃保甲之總如有異方流棍或踪跡可訝或面貌當疑必需一一窮究下落根由報縣遞解以絕盜源如有通同留止訪出定重責革役僧道見性者少噉飯者多卽真正通玄悟道之上真傳持大教之釋子亦不宜聚頭作相况其下者今後各處寺觀俱不許容留寓宿之人一槩驅逐不得朔望甘結了事四門鎖鑰掌自衛中樓舖整臺原各有軍兵守宿爾來積玩已久不復遵行且堆垛磚石向多近亦減少今後晝日不得縱容作踐拋撒夜則各傳籌巡守城門一更三點早閉向明方開除戒

器以戒不虞聖人明訓卽無事尚宜然况今天下多故之秋乎前查軍器庫器什俱朽火藥皆壞無一存者今徠周官束矢之意贖罪者許以弓矢器械及鉛鐵皮筋可備匠製者輸官使合邑知本縣重武之心預干城之用也今承平日久士旣耻講韜鈴民盡不知弓馬鹽邑雖有衛所軍兵尚稀假令文武分局則緩急未便救援苟諸生有志于此者肯講武以率其下未必非國家羅罍之佐况新有功令修射圃之制乎毋論効力君父亦可保繕身家至于吾民猶宜善用其力蓋十人之聚必有壯夫惟無所用之故或爲興販或爲打降甚且變爲盜賊與其爲刑罰之所加何若爲朝廷之所用今後凡有膂力剛強俱許報知列名在縣比試俱干講約後按行賞罰勿視爲虛文按是時東事未靖鄒滕巴蜀之變繼起公於保甲中默寓搜材勇靖禍亂之深意焉非第爲一方保障計也本縣看守庫藏獄囚設火夫五十二名工食出自

間架萬曆九年知縣蔡議以業主賃值科銀給票



對支小民便之至三十九年知縣喬以養濟院餘

糧抵補工食免配業房者自後每歲爲常

邑人馮  
臯謨蔡

邑侯市民去思碑曰上古之世日中爲市變化所  
居積之貨而已中世而有治市之法然未始立稅  
也後世用度日繁田畝農氓布縷絲紵之在不足  
則有舟車鹽鐵酒醋之筭又不足則有間架踐更  
之筭以濟正賦之窮法久而弊生有仁人者爲之  
去其已甚而通其變則又所以濟乎征與筭之窮  
也縣故設門攤一征及伺守庫藏火夫五十二名  
縣東薄大海北南背斥鹵莽區僅當市里許抵  
西廂宇舍聯絡以非通衢四方商賈之貨不至舊  
有稅課司裁革門攤多僦屋販夫今日占籍於此  
或明日移籍於彼又明日罷市去巡攔破費不能  
賅亦相率竄匿去則巡攔病縣與衛並峙衛世官  
錯落營伍周設皆列肆而居至貴仕有爵鬻序衿  
儒與庶人在官之屬例得優之火夫役者多擔負  
貧民晨夕不謀而又撥調不均巧增俸免懦夫弱  
子櫛比頻仍吐噀囂墮突風雨怨咨鬪火夫病侯議

照嘉秀兩縣例以業主賃值科銀而優免如例徵  
派如額以凶關西北隅屬門攤以東南東北西北  
三隅及各門坊屬僱夫行之一年輸者樂輸役者  
樂役雖其事若小關切城市數千百家嗷嗷病楚  
比侯通變之善數千百家歡忻稱慶而於侯之行  
則亦傍徨慕戀慮侯去事有更變造余請筆記其  
事勒之貞珉固自爲之慮也夫惟自爲之慮則其  
所繫思者益真余故不辭而記侯之小者以慰市  
民若通邑大政別有撰述不具

按門攤一征詳  
見後課程門

萬曆三十七年知縣喬設火夫工

食議照得本縣額役火夫五十二名常年看守庫  
藏獄囚徹夜支更達旦方散且分派更籌沿街尋  
覓衝風帶雪冒雨披霜一有失事罪責攸歸不過  
利工食爲活命計而此輩日給工食止銀一分有  
餘三兩九錢無閏三兩六錢又此項工食出自市  
民間架民之有生計者少無生計者多完者十六  
次者十四驅枵腹之民急公家之務每切缺望之  
悲查得本縣養濟院收養鰥寡孤獨之人有三百  
餘名邇年被奸書作弊或已故而不開除或臨點  
而僱倩老疾答應真正孤貧不及其半革去冒濫



者積有餘糧共三百七十六石二斗今火夫每日  
工食一分合將孤貧餘米准日給一升八合共抵  
給工食米三百三十六石九斗六升間架內又有  
糧廳聽事吏工食銀十兩亦每石准銀六錢於餘  
數內取給尚餘米二十二石五斗七升三合存倉  
閏月支銷則是禡孤貧之餘補火夫之苦革間架  
之後寬市廛之困省一分民受一分之惠矣 按  
孤貧舊支三倉糧至天啟元年奉文于預備倉糧  
支給火夫工食亦隨  
派於預備倉糧之內

### 課程

#### 晉有壞稅

晉哀帝時東海王奔求海鹽及錢塘二縣  
水牛牽壞稅取錢直帝以孔巖諫不許壞  
稅為諸王所請其入必多但未審壞

#### 唐有茶鹽酒稅

#### 錢

吳地記云海鹽稅茶鹽酒等錢四萬  
六千五百八十一貫五十八文詳前

#### 宋有海鹽漵

#### 浦稅務酒庫及茶鹽香礬竹木鐵布諸課

嘉禾志云  
宋稅務年

額一千六百二十一貫一百五十五文

宋武原志稅

坊租額九千一百五十四貫二百六十四文本縣坐

下一萬八千一百五十四貫九十八文 宋漵浦稅

務以鹽場兼攝嘉定後始分專負未詳稅額之數

嘉禾志宋酒課年額清煮界共四萬八千六百貫文

武原志酒稅租額私坊名錢五千四百六十四貫

二百四文本縣坐下二萬一千四百五十一貫五百

九十文又云酒務在縣西七十步 漵水志宋戶部

犒賞子庫酒庫昔在縣城後遷茶院紹興初有鞠姓

者抱俸廳繕錢繼屬漕司庫官兼之因立子庫于漵

城市中 宋括異志亦載有當湖酒庫 宋嘉禾志

任賣鹽述年二十九萬二千九百觔引錢三萬四百

三十二貫文 任賣茶述年四十五萬三千六百斤

引錢九萬九千七百九十三貫文 任賣香一千五

觔九兩七錢引錢一百九十七貫文 任賣礬一千

五百八十觔引錢一百五十二貫五百文 宋漵水

志抽解竹木舊係監鎮提督抱納漕司竹木錢淳祐

四年漕使袁右司差專官下鎮抽解自後為例鎮官

無預抽解抱納錢如故雇發 鐵布軍需場鐵布

舊屬鎮稅淳祐九年浙西安撫司差官下鎮置局

元



課鈔一千六百二十一錠三兩二錢二分

本州在城務課鈔四

百二十四錠一十九兩四分內酒課二百七十錠四

兩二錢四分河泊課一十八錠一十六兩八錢

浦務課鈔九百六錠三十八兩八錢內酒課五百六

十八錠四十四兩稅課三百一十六錠一十兩河漕

課二十二錠三十四兩八錢

當湖務課鈔一百四十六錠三十九兩五錢四分內酒課一百三錠二十

六兩稅課三十五錠一十一兩五錢四分河泊課八

錠二兩

廣陳務課鈔五十一錠二十七兩八分內

酒課一十三錠二十六兩稅課三十二錠九兩四分

八分河泊課五錠四十一兩六錢

乍浦務課鈔九十一錠二十八兩七錢六分內酒課六十九錠一十

六兩稅課二十二錠一十二兩七錢六分並載元嘉

禾志

元姚桐壽云稅務在安仁橋西十五步宋樞

密郭三益彰慶館基也余悲此地昔為迎賓文酒之

所今為剝斂叫囂之場前後何雅溷懸隔也近來盜

賊四起在在用兵課賦無藝即稅額一節往往增加

無筭市中不堪其擾當延祐間程文憲條言江南本

鹽酒醋等稅近來節次增添比初時十倍今又逐季

增添正緣管課程官虛添課額以諂上司其實利則

歸已虛額則張掛欠籍云云奉仁宗皇帝聖旨諸色

課程從實恢復辦既許從實豈可虛增除節累增課額

實數及有續次虛增數目特與查照並行蠲減從實恢復辦明旨凜然今但掛壁而已

國初歲額正辦課鈔除閏月及羨餘外計一萬六千七百八十一錠一貫六百五十支

本縣辦課程鈔一千三百八十錠一貫九百七十

文內酒醋課鈔七百七十一錠三貫四十支花果

價鈔三百三十五錠二貫文房地賃鈔二百七十

三錠一貫九百三文

本縣稅課局正辦課鈔四千一十六錠九百六十



文內商稅課鈔二千七百五十三錠一貫四百九十文門攤課鈔六百二十一錠一貫一十文契本七十四道工墨鈔二貫九百六十文魚課鈔六百四十一錠五百文  
澈浦稅課局正辦課鈔二千二百一十五錠四貫八百八十文內商稅課鈔一千六百四十一錠四貫八十文門攤課鈔二百五十六錠二貫二百文契本四十道工墨鈔一貫六百文魚課鈔三百一十七錠二貫文

乍浦稅課局正辦課鈔五千九十一錠四貫九百一十文內商稅課鈔二百八十四錠四貫五百二十文門攤課鈔一百七十三錠一貫文契本三十六道工墨鈔一貫四百四十文魚課鈔四千六百三十二錠九貫五十文  
當湖稅課局正辦課鈔一千四百五十錠一貫八百二十文內商稅課鈔一千一百一十七錠四貫八百四十文門攤課鈔三百二十一錠四百六十六文契本三十五道工墨鈔一貫四百文魚課鈔一十一錠一百二十文

廣陳稅課局正辦課鈔一千七百四十一錠九百



文內商稅課鈔一千五百三十一錠三貫文門攤  
課鈔一百三十四錠二貫一百文契本三十五道  
工墨鈔一貫四百文魚課鈔七十四錠四貫四百  
文  
乍浦河泊所正辦魚課鈔一萬八千八十五錠一  
貫二百一十文帶辦翎鰓折收黃麻五千五百六  
十二觔七兩翎毛五萬八千二百五根每一十四  
根折收黃麻一觔共麻四千一百五十九觔八兩  
魚鰓一百四十觔七兩九錢每觔折收黃麻二十  
兩共麻一千四百四觔一十五兩

宣德五年析縣平湖縣課鈔原額減半激浦乍浦二  
稅課局未析縣先革廣陳稅課局乍浦河泊所析縣  
後隨革本縣稅課局正德二年革各局所稅課魚課  
兩縣代辦今本縣歲辦數具載于後

本縣額徵課鈔二百六十六錠四貫折銀三兩六  
錢有四加鈔一十五錠一貫五百文折銀一錢五

分三釐

里甲內徵辦  
解府轉解

本縣稅課局額徵課鈔九千四百一十二錠二貫  
一百八十文折銀九十四兩一錢二分四釐二毫  
六絲有閏加鈔八百一十一錠一百文折銀八兩



一 婆蘭凡船舟最大者曰獨檣載一千婆蘭次者曰牛頭比獨檣得三之一又次日木船曰料河遮得三之一一番船至聚長墻山龍眼潭下貨由招寶關入運河穿城西出柵橋發引收稅抵六里堰搬度下河流通內罷其稅十分抽一後抽解增多又復博買犀角象齒十抽二又博買四分珠十抽一又博買六分

按宋史職官食貨二志並不詳澈浦開置船司所始惟載開寶中始于杭明州置市船司又紹興二十九年及乾道初臣僚言兩浙市船分建五所置官冗盡不便乃知船司雖建于杭明船官自分布海上澈浦之有市船場當即始于宋初年矣市船提舉官屢廢屢置而市船之設與宋終始並未嘗廢乾道二年廢提舉官以本縣知縣監管漕司提督之至淳祐六年始復

設提舉故澈浦志云云非是年始設市船也樂郊私語云澈浦市船司前代不設蓋據淳祐六年前未復提舉時言之

元史食貨志至元十四年立澈浦市船司令福建

安撫使楊發督之

時設慶元上海及澈浦三市船司並發領其事姚桐壽云至元

三十年以留臺安火議置澈浦市船司年分與正中異附記每歲招集船商于番

邦博易珠翠香貨等物次年迴帆十分取一麤者

十五分取一然後聽其貨賣三十年令悉依泉州

例又于抽分外取三十分之一為稅客船自泉福

販土產之物者復有雙抽單抽之制番貨雙抽土

貨單抽至大德二年始併澈浦入慶元提舉司直



鹽課

海鹽權鹽始於漢唐置監署嘉興領其事以鹽價市輕

貨輸司農鹽斗十錢後斗加百錢而出之為錢百一

十宋鬻鹽之地曰亭場民曰亭戶亦曰竈戶官設本

錢給之輸鹽官自糶後復通商宋史食貨志給亭戶官本皆以實錢或折

租賦又紹興元年詔秀州亭戶二稅得輸鹽本縣買納場鹽祖額一十三

萬二千五百五十二石六斗沙腰場合趁九萬六千

八百二十二石七斗正鹽七萬四千四百七十九石耗鹽二萬二千三百四十三石

七鮑郎場合趁三萬五千七百二十九石九斗正鹽二萬

七千四百八十四石五斗五升耗鹽八千二百四十五石三斗五升廣陳場合納鹽祖

額一十四萬四百九十七石四斗六升六合正鹽一十萬六

千八百四十二石二斗八升一合耗鹽三萬二千五十二石六斗八升五合鹽五斤為斗

入官價斤為錢六宋澈水志云鮑郎場十竈九在秀州一在越州跨海不便管轄未詳

何年改隸又云鮑郎鹽場東亭元五竈南亭四灶緣東亭人貧額重南亭人多盤少嘉定十四年十二月申明倉臺移東亭一盤過南亭添作五舍東亭減作四舍宋常棠云澈鎮長塙山葫蘆山篠山沈氏

山半湖山青山廟山澤山黃毛山秦駐山凡九山官給亭戶樵草煎鹽惹山陸墓山石屋山楊山碧里山

吳家山凡六山聽百姓放牧先是亭民百姓互相爭訟自五代至本朝屢經御判以石匣貯文藏地二百

年來尚無定屬每歲山上爭殺多死者淳熙十一年令使石檢詳起宗委幹辦公事採酌輿論各分定界

具奏由元設蘆瀝海砂鮑郎三場隸兩浙都轉運鹽

使司至元十三年立兩浙運司後又并煎鹽地四十四所為三十四場海鹽州有此三場也蘆瀝場



宋史地理志已有其場各縣志無之意即前廣陳場元但仍宋舊耳立引通商中支後

於嘉興置鹽倉設二場監運官運鹽就商尋以不便

罷鹽丁煎辦給中統鈔為工本課額前誌闕載未詳

元食貨志鹽以四百斤為一引湖西煎辦每引給中統鈔四兩為工本後鈔價日賤正鹽每引遞增至二十兩餘鹽每引遞增至二十五兩云

國朝設鮑郎海砂蘆瀝二場鹽課司復設嘉興轉運

分司於蘆瀝而以兩浙都轉運鹽使司領之如元舊

場有團團有竈丁丁給涵地草蕩及工本鈔煎辦商

中買者輸芻粟於邊赴場支鹽掣賣歲辦額鹽鮑郎

場二千六百五十三引海砂場八千一百三十六引

蘆瀝場一萬五千五百一十引其大數云洪武初亦以四百斤

為一引後行改辦小引每引二百斤三場引數乃未改時大引也竈丁每歲辦小引鹽十六引每大引給工本鈔一貫是歲給鈔八貫辦鹽三千六百斤也時鈔八貫值米八石宣德五年析蘆

瀝屬平湖本縣惟轄鮑郎海砂二場而成化中分引

目之半為折銀嘉靖中復併改本色為折色鹽銀半

解京濟邊半給商自赴場買鹽運掣盡變納支本色

之舊計鮑郎場鹽銀九百四十兩有奇海砂場鹽銀

一千六百六十兩有奇歲課日詘相沿至今為額率

又從有司責辦鹽銀不盡出鹽場出民田包補十七

八矣一日帶徵水鄉鹽折銀竈分濱海水鄉自正統



中巡撫周公忱始時鈔法不行工本無出因分附場  
為濱竈令煎辦遠場為水鄉竈令代出工本米後米  
不能辦則納折色鹽銀銀又不能辦則改水鄉竈盡  
歸民授民役銀歸民糧帶徵成化末都御史彭公韶  
議也是為民代水鄉竈輸鹽銀之始一曰帶徵水鄉  
蕩價銀水鄉蕩者水鄉竈戶所受煎鬻草蕩也先時  
工本米之給濱竈者業無出議免濱竈糧耗以優之  
糧耗屬民田即周公忱所定正糧一石例加耗米七  
斗是也於是濱竈利於免即無民田者亦受寄於民  
畝至六萬餘欲裁之而慮無以服也會水鄉竈歸民

後還官蕩歲收草價解運司者為收頭佃戶所包估  
不易徵則議以蕩併與濱竈而除其耗米之混免者  
蕩之草價則于民糧帶徵嘉靖九年知縣夏公浚所

詳行也是為民代水鄉竈輸蕩價之始

徐泰志云國初竈丁辦鹽

一引給工本鈔一貫可易米一石後鈔法不行正統中始議凡貧竈除正額辦鹽外每餘鹽二百斤官給米一石然此令雖出米實無措故復議減竈糧耗儘派存畱然利則悉歸富竈矣富竈田連阡陌得減耗貧竈無田即升斗不沾民富有力量者又百計市竈竈亦利富有力量者受其詭寄耗以課免而耗反登于課民乃病即竈不均嘉靖中知縣夏浚改議給蕩除耗議曰鹽課辦于竈丁不起于竈田故優恤灶戶本為帶南海之勞非因力田之艱先年減免竈耗加派于民其意固善而富竈糧多過蒙恩私貧竈無田不沾實惠至于詭寄影射則徒損于民無益于竈其計亦既左矣故海鹽竈田弘治以前止四百餘頃今至六百



餘頃一丁至三丁免耗三十石今無論百什石若不  
為變通後將無極今以鹽課計之蕩實有資田固無  
與莫若將原撥水鄉草蕩併給濱竈鹽煎蕩價亦于  
民米帶徵而革除其免耗之例則一轉移調停之間  
而其勢均矣何者免蕩免耗均之免也而貧富異便  
包蕩包耗均之包也而公私殊科補偏救弊宜不出  
此議上分守浙西道左叅政萬  
公潮御史陳公世輔如議行之 一曰帶徵鮑即場濱

竈鹽銀當夏公議給蕩復耗也海砂鮑即兩場濱竈  
田畝耗各相當而海砂蕩草價值千餘金鮑即草價  
僅數十金蕩所出價所給與所復耗多寡懸殊不相  
當海砂願以耗易蕩鮑即不願也夏公復議包補鮑  
即之折色鹽銀于秋糧以與海砂蕩價平是為民代  
濱海竈出鹽銀之始

海砂場水鄉蕩原額四百四十  
六頃六十九畝零蕩價一千一

十九兩六分鮑即場水鄉蕩八十二頃三十六畝零  
蕩價六十八兩三分夏後議曰包田耗則新收漸增  
包蕩價則舊額素定但鮑即蕩少于耗人情未願則  
為包蕩價又包折色鹽就中處分亦自得其平矣云  
二云 一曰重徵水鄉蕩價民蕩認納銀水鄉蕩業歸濱

竈蕩價民糧帶徵矣後夏公百年而運司以壓欠商  
價多奉院檄下縣問故時水鄉蕩屬縣否屬縣則宜  
增稅縣未稔鹽往牒也謾以民蕩畝若干對因槩加  
稅若干一蕩價也民代輸者一民蕩代輸者又一萬  
曆三十九年事也邑人侍御彭公嘗請之竟未豁

詳見

前加徵內 嘉靖九年知縣夏後以水鄉竈蕩歸濱  
竈徐泰志載有條議云水鄉竈蕩今議給與濱竈使  
煎鹽有資竈不失業國不失課但各蕩疆界未易明  
即草價亦未易同必先總計各場共該水鄉草蕩若



干逐畝估草價該若干每團該蕩若干通場該蕩若干  
于然後通算槩場額辦竈丁若干每丁該蕩若干計  
價而不計畝用千字文派編號段脩開土名畝數東  
西四至及佃業人戶刻成由票用印鈐記唱名掣籤  
給帖管業如有事故頂課承蕩度幾事體畫一經久  
可行此水鄉蕩給濱竈之實據也 兩湖釐規載萬  
曆四十二年鹽院楊公鶴檄文云萬曆三十九年前  
院某具奏清丈各蕩陞科提補商價可為苦心但一  
時承委官奉行未善未免一槩派加茲逢 恩詔推  
廣 皇仁本院上疏部覆量減一半凡重疊加派者  
自四十二年為始照數減免云云本縣民蕩初派每  
畝一分六釐七毫今減為入釐三毫八絲時揚公亦  
未悉此蕩為民蕩只照竈蕩例減 蓋合諸款為銀九  
半若知為民蕩必登正全豁矣

三千六百五十有奇而代完抵課免從銀三百九十  
八兩戶口食鹽米一千九百三石鈔銀五十七兩不  
支鹽而輸納如故者又不在其數焉 舊竈戶免雜泛  
差役均從一丁

至三丁丁免田五十畝四丁至十丁丁免田三十畝  
十一丁至二十丁丁免田二十五畝二十一丁至三  
十丁以上全戶優免正德中御史趙改擬二十丁以  
上丁免田一十畝嘉靖二十八年御史郭題優免例  
除原額大丁外以實徵小丁納銀數為主如六錢至  
七錢者照舊三丁折筭原額一大丁免田一百畝四  
錢至五錢者四丁折筭原額一大丁二錢至三錢者  
五丁折筭原額一大丁其餘一錢者朋足一兩八錢  
之數准原額一大丁免田一百畝條鞭行後從銀竈  
丁概派仍將應免銀額代竈丁解司抵補課銀其數  
詳後 郡趙志載鹽糧說云往時竈戶課易辦鹽有  
餘積民戶口得于運司支口食鹽自給有司因征其  
入日鹽糧其法官吏每口食鹽一十二斤市民六斤  
每斤納鈔一貫鄉民二斤二兩五錢每斤納米四升  
三合二抄五撮自鈔法不行鹽無可辦口食鹽亦不  
復給然鹽口之稅原額固在在有司因併其額入稅糧  
內帶徵云云本縣鹽糧鹽 今兩場所入課銀以有所  
鈔銀額數見前稅糧內 包補鮑即僅餘三百五十海砂一千二百三十鹽利



實入 縣官者益無幾而溷地與蕩價竈丁佃之海上民坐享其入歲不下三四千金有司欲問之則詭以竈困聳上聽不察其實曲護之不知民實爲竈困竈故未嘗困抑又不第無困已也始乎調停卒乎偏瘠肥不可返鹽政之失實不能無追憾於作法者已茲以 國初迄今鹽課款額備列於後庶異時釐正者有所稽焉

洪武初三場鹽課額

鮑郎場鹽課司官使擡鹽工脚一十五名總催四名頭目三十名竈丁并催目一千七丁歲辦鹽三千六百五十三引二百二十八斤一十四兩七錢

該給工本鈔七百三十錠三貫七百五十文

東團竈丁

并催目計四百一十丁辦鹽一千四百八十七引二百二十一斤七兩該給工本鈔二百九十七錠二貫五百二十九文 西團竈丁并催目二百二十九丁辦鹽八百三十引三百四十四斤八兩七錢該給工本鈔一百六十六錠八百四十四文 南團竈丁并催目一百六十六丁辦鹽三百八十四引二百三十四斤七兩八錢該給工本鈔七十六錠四貫六百三十六文 北團竈丁并催目二百六十二丁辦鹽九百五十引二百三十二斤六兩六錢該給工本鈔一百九十錠五百六十五文

海砂場鹽課司官使擡鹽工脚三十六名總催一

十四名頭目三十名竈丁并催目二千三百五十六丁歲辦鹽八千一百三十六引三十六斤四兩



二錢該給工本鈔一千六百二十七錠一貫九十

文一團竈丁并催目二百五十三丁辦鹽八百七

二團竈丁并催目一百九十七丁辦鹽六百七十

九引三百斤該給工本鈔一百三十五錠四貫七

百五十文三團竈丁并催目一百五十五丁辦

鹽五百三十四引三百斤該給工本鈔一百六錠

四貫七百五十文北三團竈丁并催目一百四

十四丁辦鹽八百四十一引三百二十斤該給工

本鈔一百六十八錠一貫南四團竈丁并催目

計一百一十丁辦鹽三百七十九引二百斤該給

工本鈔七十五錠四貫五百文西五團竈丁并

催目計一百七十一丁辦鹽五百八十九引三百

斤該給工本鈔一百一十七錠四貫七百五十文

東五團竈丁并催目計八十一丁辦鹽二百七

十九引二百斤該給工本鈔五十五錠四貫五百

文六團竈丁并催目計二百一十一丁辦鹽七

百二十七引三百八十斤該給工本鈔一百四十

五錠三貫文七團竈丁并催目計一百九十一

丁辦鹽六百五十八引三百八十斤該給工本鈔

一百三十一錠三貫七百文八團竈丁并催目

計二百四十六丁辦鹽八百四十八引三百斤該

給工本鈔一百六十九錠三貫七百五十文九

團竈丁并催目計一百三十四丁辦鹽四百六十

二引三百斤該給工本鈔九十二錠二貫七百文

十團竈丁并催目計七十一丁辦鹽一百四十

五引該給工本鈔四十九錠九里團竈丁并催

目計一百二十三丁辦鹽四百二十三引該給工

本鈔八十四錠三貫七百五十文轉塘團竈丁

并催目計一百六十九丁額辦并帶辦零鹽共五

百九十引三百五十六斤四兩二錢該給工本鈔

一百一十八錠

八百九十文

蘆瀝場鹽課司官使擡鹽工脚六十二名總催一

十一名頭目五十八名竈丁四千六百九十五丁

歲辦鹽一萬五千五百一十引一百五十七斤二



兩五錢該給工本鈔三千一百二錠三百九十二

文 西下界二團 西下團西中團共竈丁并催目

三百十六丁辦鹽一千四十三引二百七十四斤四兩該給工本鈔二百八錠三貫九百二十六

文 東正界二團 東正團西脩團共竈丁并催目三百八十四丁辦鹽一千二百六十八引二百

三十二斤該給工本鈔二百五十二錠三貫五百八十文 澶團界二團 澶團張舍團永正團共

竈丁并催目二百九十八丁辦鹽九百八十四引一百八十八斤六兩該給工本鈔一百八十六錠

四貫四百七十一文 中正團竈丁并催目二百九十八丁辦鹽九百八十四引一百八十八斤六

兩該給工本鈔一百九十六錠四貫四百七十一文 中正團竈丁并催目計四百四十丁辦鹽一

千四百五十三引二百三十四斤八兩該給工本鈔二百九十錠二貫五百八十一文 南脩團竈

丁并催目計三百二十五丁辦鹽一千七十三引二百六十七斤三兩該給工本鈔二百一十四錠

三貫六百七十文 南至界二團 南正團南上團竈丁并催目計六百八丁辦鹽一千八引三百

三十四斤該給工本鈔四百一錠三貫五百八十五文 江門界二團 江門團西上團竈丁并催

目四百三十四丁辦鹽一千四百三十三引三百三斤一十四兩該給工本鈔三百八十六錠三貫

七百五十九文 南中界二團 南中團東脩團竈丁并催目四百二十七丁辦鹽一千四百一十

引二百五十三斤十三兩該給工本鈔二百八十二錠六百三十四文 山東團二團 山東團江

脩團竈丁并催目四百四十丁辦鹽一千四百五十三引二百三十二斤八兩該給工本鈔二百九

十錠三貫五百八十一文 山西界一團 山西團新廟團竈丁并催目三百二十三丁辦鹽一千

六十七引三十二斤六兩三錢該給工本鈔二百一十三錠二貫八十文

### 成化五年二場鹽課本折額

時巡撫南直隸都察院右副都御史邢公宥臨

塲以水鄉竈丁折色鹽銀附海濱丁煎辦本色支商



鮑郎場竈丁及歲辦鹽引並如洪武元額內分

水鄉竈丁折色鹽二千八十四引八十斤銀一千

四百五十九兩六分 附海瀆丁本色一千五百

六十九引一十四兩一錢

海砂場竈丁及歲辦鹽引並如洪武元額內分

水鄉竈丁折色鹽五千三百五十七引三百四十

斤銀三千七百五十兩四錢九分五釐 附海瀆

丁本色二千七百七十八引九十六斤四兩二錢

嘉靖二十四年鹽課一例折徵額

兩制離規云 國初各場竈丁俱上

納本色邊商中引對灶支鹽續因引支不盡鹽餉貯廢走瀆消折成化年間題准一半徵銀一半支

鹽始有本折之分至是鹽院高復具題併將本色俱徵折銀焉

鮑郎場審定大丁四百一十丁七分零小丁三千

一百四十一戶歲辦鹽一千五百六十九引七十

八斤一十四兩零內 折色鹽七百八十引一百

二斤銀四百六十八兩一錢零 本色改折色鹽

七百八十八引三百七十六斤銀四百七十三兩

三錢零

海砂場審定大丁八百三戶小丁五千七百二十

戶歲辦鹽二千七百七十八引九十六斤四兩零

內 折色鹽七百九十一引三百一十斤銀四百



七十五兩六分零 本色改折色鹽一千九百八十六引一百八十六斤四兩二錢零銀一千一百九十一兩八錢零

萬曆四十二年訂正鹺規備載兩場課額并本縣包

補額

巡鹽御史楊公鶴纂輯

鮑卽場

元額四團後增爲五團萬曆四十七年鹽院吳仍并爲四團

鹽課本折五千四百五十一引今加三百十二引

本場每年共產鹽一百七十三萬四千九百斤內除銷原額引該鹽一百六十三萬五千三百斤餘鹽九萬九百六十六斤該加帶銷三百三十二引

總催五十名

竈丁一千七十五戶一千七百二十丁今四百四

十五戶三千一百四十一丁

灘場四千一百六弓一尺五寸草蕩九十二頃十

畝九分五釐二毫八忽每丁分撥灘場二弓五寸

草蕩十五畝六分八釐又舊熟蕩八百七十二畝

五分一釐新耕蕩七百五十七畝一分四釐荒蕩

七千六百四十一畝四釐各團丁蕩多寡不同分

派不等

官盤二百二十九鏈

本色改折銀三百五十兩八錢七分七釐七毫九



絲原額銀四百七十三兩三錢六分五釐三毫五絲以本縣免徭銀抵解餘此數詳後

丈出新墾熟蕩稅銀二十二兩二分一釐四毫三

絲五忽五微新闢新漲等銀三十四兩四錢三分

九釐四毫新增蕩地稅銀一十三兩七錢七分五

釐一毫又新增蕩稅給補庫價銀三十三兩四錢

五分一釐

年辦鹽運司轎甲工食銀六兩工脚出辦嘉興分司轎

甲工食銀二十四兩內催竈工脚各出辦一十二兩

海砂場今仍十三團

鹽課本折一萬二千二百八十七引今加二百引

本場每年共產鹽三百七十四萬六千一百斤內除銷原額引鹽三百六十八萬六千一百斤餘鹽六萬斤該加帶銷二百引

總催一百三十名

竈丁八百九十戶二千三百五十六丁今九百一

戶五千七百二十丁

灘場一萬二千九十六弓草蕩七百十九頃四十

五畝七分一釐二毫每丁撥灘場四弓草蕩二十

三畝一分三釐又舊熟蕩四千五百五十七畝六

釐新耕蕩一萬八千四百六十八畝二分七釐荒

蕩三萬七百一十五畝四分四釐各團丁蕩多寡



不同分派不等

官盤三百九十四錠

折色銀四百七十五兩六分五釐

本色改折銀七百六十二兩三錢六分九釐零

原額

銀一千一百九十二兩八錢七分九釐二毫九絲三忽七微五纖以本縣及嘉平二縣免徭銀抵解

止餘此數詳後

蕩稅銀三十三兩九錢七分八釐四毫四絲丈出

新墾熟蕩稅銀三百七兩一錢五分三釐七毫九

忽二微五纖倉基餘蕩稅銀三十六兩九錢六分

三毫六絲新闢新漲等銀六十二兩七分一釐七

毫新增銀二十八兩一錢九釐四毫一絲五忽又

新增蕩稅給補庫價銀二百四十二兩六錢三分

六釐六絲九忽八微

年辦鹽運司轎甲工食銀六兩

催竈出辦

嘉興分司轎

甲工食銀一十二兩

工脚出辦

海鹽縣包補二場課銀數

水鄉竈戶鹽銀二千三十八兩八錢五釐 蕩價

銀一千八十七兩九分三釐五絲八忽五微 鮑

卽場折色銀四百六十八兩一錢五分三釐 民

蕩增稅未豁銀六十四兩五錢八分

民蕩派徵數照賦規所載



如此今本縣奉原文徵額稍不同詳見前卷

海鹽等縣代解二場抵課徭銀數

海鹽縣代解鮑郎場抵課徭銀一百二十二兩四

錢八分零海砂場抵課徭銀二百七十五兩五錢

七分零嘉興縣代解海砂場抵課徭銀一十九

兩四錢七分零平湖縣代解海砂場抵課徭銀

一百三十四兩四錢七分零

海鹽縣行鹽小票數

本縣于萬曆十三年始行肩挑小票六千張每張

稅銀三分照鹽一百斤聽鹽院提充節省公用支

銷四十五年知縣何詳改行銷四千張天啓元年

知縣樊詳改行二千張

縣衛限獲私鹽數

海鹽縣并海口澈浦二巡檢司每年限獲私鹽七

萬二千斤船九十六隻海寧衛限獲私鹽九千

斤船一十五隻巡軍二十名每名月支糧六斗如獲不足扣抵解比澈浦

千戶所限獲私鹽一千二百斤巡軍二十名乍浦後

千戶所各限獲私鹽一千二百斤巡軍各一十二名

樊侯維城鹽場釐弊說國初竈戶辦鹽官給酒

地草蕩及工本鈔米以為之資草蕩薪採有限全



賴鈔米每引一石者足充牢盆費故所收鹽利爲最多後鈔法壞工本無出竈丁從業者以滴地草蕩佃之人取息抵課而家於水鄉稱水鄉竈其仍居海濱稱濱竈者僅餘三之一焉昔之名臣如周文襄者來巡海上亦姑隨順人情免水鄉之前煎辦而令其代出鈔米以給濱竈廼米寔難辦法終不行迨彭公韶巡視直憐其困弛之爲民水鄉盡得落籍而應辦鹽勛則帶民糧徵銀解運司本縣田畝始有二千三十金之加民代水鄉竈受累此時水鄉所遺草蕩若卽併歸濱竈猶可計草價以派

鹽勛少損民田帶徵之數乃官與徵銀一千八十兩解運司代之趨集至前任夏始議併給濱竈失之已晚顧又予之蕩而貰之草價反將此一千八十金者帶徵於民糧復以兩場爲惠不均更包補鮑卽四百六十金以均之合前共三千五百餘金而此外徭銀抵課本縣及嘉平二縣代解者復有五百五十金之多重疊包賠不一而足於是兩場課銀盡皆民爲竈出穀土爲鹽田出海砂所辦者猶有千金餘鮑卽直三百五十金而已更以官吏工脚之俸糧工食縣司所設之鹽課給賞計之所



費又七百餘金取以相當實入之利益復無幾竊謂國家鹽筴之失筭無如此邑兩場甚也總之一鈔法不行本絀無以生息遂行權宜苟且之術貽累于民而無益于國至此今欲修復之亦求之國初給竈之舊而可矣夫國初所用給竈者非前所云工本鈔及滷地草場三者耶工本鈔不易復滷地草蕩自在卽滷地時有坍塌蕩之無虧損有墾闢者又在今兩場竈丁所受草蕩每丁多者三十餘畝少者亦不下一二十畝每畝佃客納草價五六分與竈丁其耕熟者分爲上中下三則增派稅銀自三分至一分伍釐解運司大約竈丁所得草價多者每歲一兩餘少者亦不下八九錢而滷地之佃與人者又可得銀二三錢不止至問竈丁所納于運司者每丁歲額實不過二錢有奇而已向惟責其煎辦每年每丁須納鹽三千六百斤值銀七八兩之多故給之草蕩給之工本米優厚如此今因工本米不給鹽課俱帶徵于民糧止責其納銀二三錢矣此卽滷地之入足以辦之有何所困而必須優厚之也乃空擲此草蕩與之令歲享草價之厚入豈非常事者失于籌及相沿冒



濫未裁乎抑鹺司積胥猾吏欲留此以取分于竈戶故相隱而不發至今乎夫民爲竈困田糧爲鹽課出辦亡論矣蕩固 國家地土也草價固 國家地土所產也不辦鹽而收息有此理否卽辦鹽而以一二兩之入輸一二錢之稅十而納一又有此理否民之田可令代徵竈之蕩胡不可加徵也竈之蕩可自佃之而收價蕩之價胡不可改之爲稅如民田一例徵之以補鹽課以減本縣帶徵之課也計兩場耕熟之蕩海砂可得三四萬畝鮑卽可得數千畝今分三則起稅解運司者不過千金若以民田稅銀額論之尚可畝加銀五六分當得銀三千也其未墾者畝可徵銀二三分兩場爲畝九萬餘又可得銀二千餘也今莫若盡以其蕩歸之有司將佃客姓名籍之于冊一如編審里長之法荒熟各自爲里畝多者爲役頭畝少者爲甲戶立限徵銀解之運司除抵海砂課銀一千有奇鮑卽課銀三百有奇外尚多三千餘金則以一千金抵本縣代納之蕩價以二千金抵本縣帶徵水鄉之鹽銀綽然有餘民可甦而 國計可裕其兩場地尚有一萬六千餘弓減佃價之半而徵之尚



可得銀一千六百則或歸場官收解或歸有司照前法徵銀亦無不可總之今日海上煎丁俱非真竈編排直捷徵銀自易正不必令多人豫于其間恣其中飽而無益于國也斯議也不知者以爲創說而實非創也蘆瀝已先行之矣考之兩浙鹺規載萬曆四十二年蘆瀝場竈趙志奎等建議照蕩僉役毋沿照丁給蕩之空名鹽院楊以爲不易之論將蕩戶名下實查蕩產畝數按籍僉差其貧竈之有丁無蕩者盡免其役因以其法入之復命疏中至今蘆瀝稱便夫蘆瀝亦海邑析之平湖

海者也三場事體元同蘆瀝可行海鮑獨不可行乎但行之則于民于國便于奸竈于鹺司胥役俱不便耳夫立法而欲使小人稱便欲使小人無梗千古無有濇于計者要在獨斷獨行而不爲所撓阻斯得矣禍水禍之祥至猶懼弗免敢自徃焉之役從來久今尤烈矣班孟堅氏之志溝洫也曰國之利害故備論其事斯亦邑利害也弗備論惡盡焉



顏 大人

累才

丁紹德

切

送上圖扇一柄敬乞

法書又承

假三海鹽圖經四年奉趙並請

檢收為荷此請

禮安

不野再夫立去而為對小人蘇野為對小人無野  
野亦交與無野者盡野者我盡于對野者對野  
者此三野事野亦同野野亦野亦野亦野亦野亦

海鹽縣圖經卷之七

志邑志方域志食貨盡邑矣以盡鹽邑弗盡也鹽蓋  
有戍之事隄之事云介者力而謀諸舉鍊者力而謀  
諸塹何多備也夫非以海故邪邑於海寄大命亦惟  
海日兢兢夷禍水禍之猝至猶懼弗免敢自狃焉之  
二役從來久今尤烈矣班孟堅氏之志溝洫也曰國  
之利害故備論其事斯亦邑利害也弗備論惡盡邑  
惡詔後之有邑者乎其書舊乘闕有間別為篇著厥  
本末義例自今撰始

成海篇第三




海寧衛署圖

旗纛廟



獄



後

庫

公廳

公

史

戶

禮

儀

鼓


衛

衛洗盤



房

堂



兵

刑

工

堂

門

樓

河



前所

中所

右所


左所

獄




經歷衙











# 海寧衛海洋及海岸設備圖

石墩鳳臺素稱衝要嘉靖二十八年倭奴初犯首至此地浙西遂南有警至三十二三十四五六等年寇常奄至曾結巢石墩巡司更次改浦西圍海寧後徐海船出劫恭將廣鏗擊勝之元年議撥海寧所軍一百名防守復議裁革止存五名撥登近添設海寧軍中石墩官兵一總專哨黃港鳳凰等寨既嘉興無敵浦右營官兵會哨



鳳凰山直插海中  
乃海寧縣之水口  
省城之下関





石牆山下古置水寨原  
派激浦關兵船泊此每  
遇汛期西哨石墩東哨  
金山南哨臨山衛

西陽烽火  
石牆山  
南海總寨  
西山總寨

平陽烽火  
東中瞻望臺  
黃道廟

青山寨  
陸路廠  
直君廟

東鹽團寨

黃泥寨

大步山  
遊兵寨



激浦所平時撥嘉興右營官兵屯  
插汛期出守南海口北至秦駐山  
中左營官兵會哨今議每年仍聽  
軍門調發標兵二哨委官協守

秦駐山設指揮一員率本屬守激  
浦所軍兵共一百名湖州年撥吳武  
二百名後倭寇生發撤去民山北  
設海鹽關兵船西哨增設東哨自馬  
廟前哨山定海等處今改名曰  
塔港兵船是也

白塔山  
自塔海汛期參將中軍官部領兵  
船一十五隻泊此遇警策應近守各  
哨仍輪撥兵船與羊竹乍浦三關各  
兵船會哨又該參將為沙船尾印往來調度

大衢山係首衝乃倭賊出沒之所原  
派總兵標下中遊把總官同備總部  
領兵船四十二隻把截專門下入山  
陳錢墘下等處海洋往來哨邏隆慶  
六年倭賊突犯此山本官督兵奮勦  
收功今派本鎮標下左右遊哨把總  
汛期輪撥一員部領兵船哨邏謹  
觀遊哨兵船會哨

藍田廟  
藍田烽火

海大門  
觀遊哨兵船會哨



黃澤山

桑枝山

小澗山

上下釣山

張家嶼門

瀨頭嶼

海寧衛乃嘉湖二郡屏翰南澈北乍各相去四十里東門外龍王塘一可以捍倭船之患二可限潮水之災若潰決則一方盡為魚鱉失守則各郡咸被荼毒此衛實至要之處也

馬鞍山

海口烽墩

龍王塘

海寧衛平時撥嘉湖後營中左營官兵屯補汛期俱出守龍王塘北左營同與右營各官兵會哨今添撥守城軍餘五百名以資防禦

南敵樓

海鹽縣  
參將府  
海寧衛  
去海半里衛

北敵樓

此捍海石塘十有餘里倭船可登汛期撥後營中左二營官兵派守會期

牧場寨

九畝寨

周秀才塢

許山

黃盤山

朱家亭寨

白馬廟

羊山南洋乃漁船下網之處近題設北洋遊兵一大枝內分一把摠三哨官部領兵船巡哨羊山三姑山灘山許山大小七茅草等一帶海洋與嘉湖區官兵會哨

許山最衝派摠哨官一員部領兵船二十三隻泊守輪撥兵船于沙塘衢東等填并直隸金山官兵會哨

羊山

三姑山

羊山浙西極衝要害汛期海寧摠把摠一員統領兵船二十三隻泊守輪撥兵船于沙塘衢東等填并直隸吳淞官兵會哨

灘山

西洋塢

列庫礁

菜岐山

荻山寨

海沙場

海口鎮巡司

深水浦塢

梅子山

解針山

西海口

西海口汛期派巡哨官部領兵船十四隻協守與該間兵船會哨

麥庄潭寨

荻山









陳錢壁下極衝近奉題設北  
洋遊兵一大枝內分一把摠  
二哨官部領兵船巡哨此處  
并落華花腦一帶海洋與寧  
區中正遊哨官兵會哨





海鹽於漢屬會稽郡會稽海有樓船守尉都試令丞尉亦各統其縣以時肄習後陽嘉中又詔緣海益屯兵備盜賊海上之有戍蓋自漢始也

按海鹽吳越介壤越大夫蠡乘

黃池爭長沿海海沂淮絕吳吳大夫承亦嘗謀帥舟師自海入齊而秦皇帝時先有遺尉屠睢將樓船之事是縣海之有舟師其來久矣以不能明故斷自漢始縣中海賊患始孫吳時吳

志云永安七年海賊破海鹽殺司鹽校尉秀者是也

其後晉末有孫恩宋泰始中有田流竝從海道來犯

而恩尤劇嘗敗縣吳兵千人殺縣令鮑陋子嗣之又

殺吳國內史袁崧時宋武築城舊治禦之勝步追至

婁縣勝已引水軍復從縣海道逐之又勝恩卒破滅

其時所用者皆北府兵非土著吳兵吳兵不精不可

用宋武云

晉書孫恩本琅邪人家會稽世奉五斗米道叔父泰得秘術誑百姓被誅恩逃入

海聚山命作亂初自海攻上虞襲據會稽後復逃入海至隆安五年三月北出海鹽宋書高祖本紀前

將軍劉牢之以高祖參府軍事恩出海鹽高祖自勾章追之築城海鹽故治賊攻城高祖慮兵寡不敵選

敢死士數百脫甲胄執短兵鼓噪出因其震懼奔之斬賊帥姚盛後一夕忽偃旗匿眾若已遁者明晨開

門使羸疾數人登城賊遙問之曰夜已走矣因率眾大上乘其懈怠復奮擊大破之恩走高祖棄城追焉

海鹽令鮑陋遣子嗣之帥吳兵一千請為前驅高祖曰賊兵甚精吳兵不習戰可且在後為聲援不從高

祖多設伏兵兼置旗鼓明日恩率眾萬餘迎戰前驅既交諸伏舉旗鳴鼓皆出賊引退嗣之追奔為所沒

高祖且戰且退死傷且盡至向伏兵處乃止令左右脫取死人衣賊疑猶有伏不敢逼而去高祖徐歸恩

進向滬瀆殺內史袁山松高祖追破之于婁縣又破于丹徒恩狼狽還船浮海北走鬱洲高祖領水軍追



破之鬱洲恩沿海還南高祖亦循海要截追于滬瀆  
及海鹽又破之三戰並大獲俘馘以萬計思自是奔  
逆臨海後爲太守辛景所破沈海歿按晉書劉牢  
之傳孫恩浮海奄至京口牢之使劉裕自海鹽赴難  
破之此言丹徒之戰也據此則婁縣勝後高祖仍還  
鎮鹽鹽矣北府兵亦見牢之傳謝玄北鎮廣陵時所  
募勁勇也宋章俊卿論晉宋兵云北府兵劉牢之常  
領其精銳爲前鋒戰無不捷劉裕亦以北府兵有功  
蓋牢之爲玄參軍裕又爲牢之參軍故所用皆北府兵云  
於後置鎮將始於唐改  
爲鎮遏使始吳越吳郡志開元五年刺史張廷珪奏  
置海鹽縣澈浦鎮天寶十載太守趙居貞奏置海鹽  
縣寧海鎮嘉禾志錢氏有國諸州多設鎮遏使海鹽  
沿海有澈浦乍浦兩鎮遏使也今考寧海鎮在縣東  
一里澈浦鎮縣西南三十六里乍浦鎮縣東北三十

里竝直踞海上縣城孤懸必得寧海鎮設防二浦左

右犄角勢廼克壯爲內郡屏蔽自晉人基布意爾唐  
制上鎮防兵五百中下遞減鎮各設將副一人吳越

鎮遏使以本土豪傑世領之使秩視鎮將尤崇防兵  
爲多然其詳不可盡考矣

按唐初分天下十道置折衝府六百三十四江南之

府二制中惟越州有浦陽折衝府餘州竝不建府後江南增設軍十一時縣屬蘇州蘇有長洲一軍縣城亦未嘗別立軍也其沿海屯兵處嶺南五府經畧治廣州兵萬五千五百人長樂經畧使福州領之兵千五百人東萊守捉萊州領之東牟守捉登州領之兵各千人而浙東西海上亦惟杭州有鎮海軍越州有靜海軍在前十一軍之數他惟設鎮置防兵焉豈其時浙海寧晏故設兵不多耶此海防之大畧附記郡元志唐時嘉興華亭海鹽皆有鎮將錢氏始於嘉興之西境義和華亭之南境曰金山北境曰上海青



龍海鹽之東境曰乍浦西境曰澉浦皆置鎮過使焉如海鹽之朱行先由鎮過加至靜海節度使是也

宋初縣有土軍廂禁二軍多取供役南渡後行都密

邇防海道為亟水軍始設宋史本紀開禧元年置澉

浦水軍兵志云殿前澉浦水軍額一千五百人然縣

有戍兵實非開禧昉也先是中興初設沿海制置司

兼轄淮澉福建海道紹興二年樞密院言金人近屯

海州竊慮輕舟南來蘇洋海道通快可以徑趨澉江

宜速行相度遣官截守呂頤浩議以為虜舟從大海

北來拋洋直至定海此澉東路自通州入料角放洋

至青龍港又沿流至金山村海鹽縣直泊臨安府江

岸此澉西路宜令一人專管淮東澉西其澉東福建

路別除一員領之詔從焉縣海之設防當始於此時

至開禧迺成軍於澉爾後淳祐間復調許浦卒歲百

人更番守澉許浦水軍總寨在今常熟境其稱殿前

澉浦水軍宋諸軍竝隸殿前司也時許浦帥銜都統

制澉浦帥銜統制而郡太守銜節制澉浦金山水軍

重其事云宋澉水志水軍寨在鎮東海岸開禧丙寅統制王復古立長牆山上有閱武亭舊址

亦復古所建淳祐九年邢子政於寨中立美固堂詳見前山川內及後官師篇郡元志嘉興在宋南渡

為二浦號稱軍府節制沿海水軍今碑刻紹定嘉熙咸淳工太守文及翁史宅之陳肖孫竝銜稱節制澉

浦金山水軍可據其後元人南下漸逼海上險隘處益設戰



艦激水舊志云海外蘇州洋西南一潮至淞江名上  
潭淞江一潮回歷海昌之黃灣又一潮至激浦名下  
潭而東北十二里白塔山有白塔潭亦可泊舟登犯  
今令激浦水軍分戍於此尋以海潮自東北金山來  
泊乍浦尤易又於乍浦置水軍設統制領之拘閩舶  
籍蛋丁戍守益密而董文炳海道之師至統制劉英  
以乍之水軍降胡全以激之水軍降臨安失守宋社  
遂屋矣至元十二年伯顏分軍為三取臨安其東一  
軍沿江循海趣許浦激浦以至淞江董文炳  
率之十三年正月次乍浦進至海鹽激浦  
統制及縣令皆降事出元史詳後官師篇元承宋後  
定兵制改設上萬戶府於嘉興路稱鎮守以海鹽及

華亭為兩翼海鹽為上千戶翼而鹽之激浦鎮及華  
亭之上海青龍鎮則竝設中萬戶府稱鎮遏後又改  
鎮守焉中萬戶府管軍五千以上達魯花赤一人萬  
戶一人副萬戶一人上千戶所管軍七百以上達魯  
花赤一人千戶一人副千戶一人萬戶下有總管千  
戶下有總把百戶下有彈壓其制然也

中萬戶府達魯花赤萬戶

俱從三品虎符副萬戶正四品金牌官皆世襲有功  
則陞之又經歷知事提控案牘各一員鎮撫司鎮撫  
二員蒙古漢人參用從五品金牌上千戶所達魯花  
赤千戶俱四品金牌副千戶正五品金牌彈壓二員  
蒙古漢人參用從八品激浦置中萬戶鹽置翼竝見  
元嘉禾志所以知上千戶翼者縣有棗山祠碑上書  
海鹽千戶張士特階顯武將軍元百官志武散官三  
十四階從四品階顯武將軍上千戶從四品若中千



戶正五品下十戶從五品也於此證之自明元兵志云河洛山東以蒙古探馬赤軍屯守淮江以南用漢軍及新附等軍元籍漢軍以貧富爲甲乙戶出一人日獨戶軍合二三十戶出一人則爲正軍戶餘爲貼一卒者其後尺籍既定軍戶遂不可更易戶絕者則以民補之而是時澈浦盜起嘗一遣元侯佩虎符鎮守之

迨至元十八年復以拔都張珪李庭等東征留後兵分戍澈浦海口蓋時方有事於倭恐倭來犯故海上

設重防

盜起事見元史趙賁亨傳鎮守澈浦事見元史隋世昌傳並詳官師篇中元世祖紀至

元十八年正月命阿剌罕等征日本以拔都張珪李庭留後兵志云至元十八年十一月詔以征東留後軍分鎮慶元臨海澈浦三處上至明興倭警果大

作故時沿海戍兵以防佗寇者惟防倭亟矣倭亦名

日本其國西南至海東北大地分五畿七道三島

卽班固書所云會稽海外有東鯁人者是也其人魁

頭斷髮跣足

輕

生好殺多狡謀喜爲盜賊

漢唐來通貢中

國未聞入犯後至宋沿海開市舶徑道益通元人承

之奸闌出入者寢多勾引廣於是患始興

澈乍市舶事詳前食

貨先是元至大中有倭泊慶元焚掠釁蚤兆矣

見元兵志

而國家初平海內所殲滅羣雄方若張皆在海上

故部黨逋誅不能出者則竄而之海島糾羣倭入寇

掠以故警之發乃在開國時

高皇實錄載洪武二



年倭犯山東淮安明年犯浙東福建其五年寇我敵  
浦殺畧人民而長老亦言洪武四年有海民沈保童  
用竹筏載倭登掠海鹽事縣首被倭患如此

倭國事畧曰日

本山城居中爲國都其西南爲五島入中國必由五  
島而來隨風之所向以行東北風猛則由薩摩或由  
五島至大小琉球而視風之變遷北多則犯廣東東  
多則犯福建若正東風猛則必由五島歷天堂官渡  
水而視風之變遷東北多則至鳥沙門分隴或過非  
山海關門而犯溫州或由舟山之南而犯定海犯象  
山奉化犯昌國犯台州正東風則至李西巖壁下陳  
錢分隴或由洋山之南而犯臨觀犯錢塘或由洋山  
之北而犯青南犯太倉或過南沙而入大江若在大  
洋而風欲東南也則犯淮楊犯登萊若在五島開洋  
而南風方猛則趨遼陽趨天津按洋山卽羊山青南  
者青村南滙也本縣在青南錢塘之間故犯此二處  
者往往流突而至而羊山尤爲我之衝要云 往日  
本針經太倉港開船用單乙針一更船平吳松江用

單乙針及乙卯針一更平寶山到南滙嘴用乙辰針  
出港口打水六七丈沙泥地是正路三更見茶山自  
此用坤申及丁未針行三更船直至大小七山灘山  
在東北邊灘山下水深七八托用單丁針及丁午針  
三更船至霍山霍山用單午針至西後門西後門用  
異巳針三更船至茅山茅山用辰巳針取廟州門船  
從門下行過取升羅嶼升羅嶼用丁未針經崎頭山  
出雙嶼港雙嶼港用丙午針三更船至季順洋及亂  
礁洋亂礁洋水深八九托取九山以行九山用單卯  
針二十七更過洋至日本港口又有從鳥沙門開洋  
七日卽到日本若陳錢山至日本用辰針更者每一  
晝夜分爲十更以焚香枝數爲度以木片投海中人  
從船面行驗風迅緩定更多

上念區寓新奠海堧

寡可知船至某山洋界也

獨嬰蠱毒亟遣帥巡禦又卽家起信國公和相視竝

海要害築城置衛所統官軍各占信地戍守其法甚

備於是鹽之衛所始建一日海寧衛指揮使司在縣



城內洪武十七年置指揮使一人同知二人僉事四  
人鎮撫二人左右中前後所各正千戶一人副千戶  
二人鎮撫一人管軍百戶 十人人轄總旗二人小  
旗十人軍百人一日激浦守禦千戶所在激浦鎮縣  
德政鄉之海岸十九年置正千戶一人副二人鎮撫  
一人管軍百戶二十人人轄旗軍如衛制一日乍浦  
守禦千戶所在乍浦鎮縣齊景鄉之海岸今析屬平  
湖亦十九年置正副千戶鎮撫管軍百戶及所轄旗  
軍如激浦所制 指揮使正三品同知從三品僉事正  
四品衛鎮撫從五品正千戶正五品  
副千戶從五品所鎮撫從六品百戶正六品 縣志  
洪武十七年三月十五日開設海寧衛十八年

開設五所所宜與衛同建却後一年未詳何以  
皇帝實錄洪武十九年十月初十日置激浦乍浦二  
守禦千戶所 縣志永樂志乍浦所調錦衣衛官軍湯  
成等守禦激浦所於二十三年調千戶孫信等二十  
八年又調台州衛 二所隸衛衛隸浙江都指揮使司  
百戶余瀾等協守 以內隸於左軍都督府合凡官一百二十七人旗軍  
一萬三百二人 以七所九千五百戶計之該轄旗軍一  
萬八千名此額舉零數在內也 按  
官與旗軍數皆舊額  
今增減不同見後 衛有印有銅牌十二鎮撫司有  
司印七所印七九千一百戶印九十幕官有經歷有知  
事經歷司亦有印凡衛司所並有吏

銅牌十二面文夜巡令牌背愛字十三號衛鎮撫印  
日海寧衛鎮撫印所印文日海寧衛某千戶所管軍  
印百戶印以所為別日某所百戶管軍之印經歷印  
日海寧衛指揮使司經歷司印知事嘉靖三年裁吏



令史二人典吏四人吏戶禮三房兵刑工三房各令  
史一人典史二人分攝其事庫吏一人經歷司司吏  
一人衛鎮撫司吏一人所吏以  
衛城卽元海鹽州城  
農民克百戶吏以識字軍人克

因其舊加葺之詳前方域篇不贅  
激浦所城周八里

十七步高二丈四尺五寸池周九里濠一丈一尺闊

五丈陸門四水門西一鎮舊無城十九年置所時

朝命安慶侯成榮陽侯遇春築  
董穀志城基一頃六十五畝城堞一千八百七十五

南曰靖滇北曰拱辰水門口通儲四門兵馬司共地

二畝八分六釐五毫月城并吊橋及水門河共一十四畝四分四釐四毫沿城畏馬地二頃七十五畝三分八釐

乍浦所城周八里三百三十二步高二丈池周

一千六百三丈濠八尺闊一十丈陸門四水門北一

則十九年信國親行相度所築也  
初張氏據江洲築城崇德甚雄壯信

國議欲墮之因移築乍浦城按郡柳志載洪武十九年海寧衛依奉左軍都督府勘合將崇德縣城拆運

公用趙志云以築乍浦城也城堞一千七百有一

日四門衛署在縣東門縣西一十步卽縣舊治

衛署地南西北距水東並縣治其廣六十畝正堂三楹後堂五楹堂左經歷廳東西廊爲六房前爲儀門

爲譙樓儀門外左鎮撫廳右經歷私宅庫後堂東獄

鎮撫司後五千戶所初並設於衛署之西夾道正統七年調後所貼守乍浦今惟左右中前四所

在馬初寧波衛指揮許能建弘治中本衛指揮李振嘉靖中

在鼎彭端隆慶中姚馨二所署並在二城東門衢制

萬曆中彭紹賢並重葺畧彷彿署  
激浦所基地十九畝八分七釐五毫鼓樓二間東庫房一間西軍器庫一間正廳東西爲廊房土地堂一間監房在西鎮撫廳在儀門內乍浦所



正廳六間穿堂三間耳房三間後堂二間儀門三間  
門房三間兩廊東西房各十間架閣庫三間譙樓三  
間所鎮撫廳三  
有屯田衛屯五田一百七頃有奇百  
戶八人小旗一人領之激浦所屯一田一十三頃有

奇百戶一人領之乍浦所倍激浦所屯二田二十六

頃有奇百戶二人領之弘治縣志云海寧衛屯所九處以八百戶零一小旗領之

共百戶九員旗軍九百六名派種海鹽縣田地一百

七頃二十五畝五分內二都三屯十六都三屯十七

都一屯二十都一屯二十二都一屯宣德後二十都

析平湖縣而屯田無改焉激浦所屯田在城外五

里係海鹽縣十二等都以一百戶領之計旗軍一百

一十二名派種海鹽縣田地一十三頃七十六畝

乍浦所屯田二處並在城外十六里係平湖縣二十

二都以二百戶領之計旗軍二百二十四名派種田

地二十六頃五十二畝有烽埃有寨凡五十有七聯

以上歲收子粒各不等

### 布海岸南屬之海寧所北屬之金山衛境汛月各以

#### 軍五人守之瞭海洋船火報聲息

衛志海寧衛烽埃六座麥莊涇中寨

九里亭教場夾塘藍田廟山寨十三座東轉塘寨朱

公亭寨第二寨頭寨南寨北寨龍王堂寨開口寨落

塘大寨南小寨三間寨藍田小寨藍田大寨激浦所

烽埃五座秦駐山青山塙山西山廟山山寨十四座

南石山寨秦住山寨東鹽團寨西鹽團寨青山東海

寨青山寨牆山東中寨牆山平洋寨牆山東嘴寨牆

山西嘴寨南門水關寨混水山開中寨葫蘆灣寨南

湖塘寨乍浦所烽埃五座獨山高公山陳山觀山惹  
山山寨十四座獨樹東寨獨樹西寨蒲山外寨蒲山  
東寨蒲山山西寨蒲山大寨東山寨東山嘴寨益山寨  
唐家灣寨聖妃宮寨周涇寨金家灣寨西海口寨衛  
又有與城關在縣西一十八里洪武十七年指揮許  
能置有戰船為大青為風尖為八槳凡七十有二其  
今廢

五百料者以軍百人駕之汛月出海洋巡倭大汛二







米四千八百九十石八斗七升一合二勺嘉善縣徵解麥米一千四百石六斗九升三勺海鹽縣徵解米四百三石八斗三合平湖縣徵解米六十三石八斗九升六合九勺崇德縣徵解米二百二十五石二斗桐鄉縣徵解米六十六石二斗六升四合俱本折中半杭州府餘杭縣協濟米四百六十石湖州府長興縣協濟米三千六百三十三石二斗五合八勺德清縣協濟米三百八十六石四斗八升七合俱全折坐給激浦千戶所官軍常積二倉在乍浦北水關內洪武二十九年千戶許貞增置倉四十四間凡十六廩本倉麥米共一萬一千五百九十五石八斗四升七合五勺內嘉善縣徵解米一千九百三石一斗二升四合九勺桐鄉縣徵解麥米二千三百五十五石六斗四合二勺俱本折中半杭州府餘杭縣協濟米一千四百三十二石七斗九升三合一勺湖州府武康縣協濟米二百五十五石一斗孝豐縣協濟米三百石七斗紹興府蕭山縣協濟米五千三百五十三石五斗二升五合三勺俱全折坐給乍後二千戶所官軍三倉初隸衛所帶管後於正統中始隸縣設大使詳前職署篇舊志載俸糧三七兼支數指

揮使月支本色俸糧七石二斗折鈔二十石指揮僉事俸糧四石知俸糧五石四斗折鈔二十石指揮僉事俸糧四石八斗折鈔一十九石二斗衛鎮撫俸糧二石八斗折鈔一十一石二斗正千戶月支本色俸糧三石二斗折鈔一十二石八斗副千戶俸糧二石八斗折鈔一十一石二斗實授百戶俸糧五石折鈔一石試百戶俸糧三石折鈔七石所鎮撫俸糧二石四斗折鈔五石六斗衛經歷俸糧二石折鈔五石知事俸糧二石折鈔二石五斗洪武中軍有演武場海寧衛演武場編發者一石克發者八斗有演武場海寧衛演武場東北一里週圍三百二十五丈將臺一座高一丈方圍十丈前廳三間後堂三間東側廳三間馬軍廠十間正德十一年知縣朱實昌嘉靖中府同知林鳴鸞知縣魏廷璽竝重修嘉靖三十二年倭寇焚毀四十年知縣王宗載重建激浦所演武場在城外東南計六十三畝九分九釐六毫周二百五十七尺內正廳三間前軒一間將臺一座又操備南海口廠房基地二畝九分亦在南門外乍浦演武場在城南門外周圍一百五十有軍器局海寧衛軍器局在丈正廳四間將臺一座縣西安仁橋北嘉



靖間遷棲真觀傍今遷聖妃宮之有躡基有營房

東北巷二所軍器局在所署內

祿衛志國初指揮給地五畝建正廳五間二舍後房

七間十戶四畝正廳五間二舍後房五間百戶二畝

正廳三間後房三間每軍營房一間每十百戶有一

宮附本所以便祀禱皆祖制也今遷改佃廢不常

多難其秩祀有旗纛廟二所城有城隍廟海神有聖

考矣

妃祠此其建置大畧也

旗纛廟祀軍牙六纛之神守

禦長官武服行禮國初春祭

用驚蟄日秋祭用霜降日尋省春祭止於霜降日祭

先期集軍士演武場盛陳軍容奉纛迎入廟中安置

次日致祭若出師則取其纛以祭班師仍置於廟

衛旗纛廟在廳事之東啟浦旗纛廟在所廳北乍浦

旗纛廟在所廳東啟浦城隍廟在南門大街

浦城隍廟在東門大街齊景公廟之西相傳嘉靖中

倭寇陷乍城神率鬼兵從廟門出倭遇而追之入廟

看竟無有羣倭因羅拜神前止殺有民匿池葦中親

得其狀云一統志聖妃莆人宋都巡檢林愿之女

生而神靈能言人禍福沒為海神宣和中路允迪浮

海使高麗中流風大作諸船皆溺獨允迪所乘舟神

降於檣遂獲安濟歷代累封至天妃本朝洪武永樂

中凡兩加封號海濱人多虔祀以禱利涉之福焉

海寧衛聖妃廟在縣西北二百五十步十字街北洪

武二十九年建成化嘉靖萬曆等年竝重修先年香

火元夕為尤盛見前風土記啟浦聖妃宮舊設南

門外操備廠前天順初移門內大街扁額摹張印之

書甚工乍浦聖妃宮在南海口苦竹山香火甚盛

詳見前簡苦竹山下又本衛香火近尤崇奉關羽

衛城紫虛道院之西舊有廟側向萬曆四十五年本  
衛彭昭毅公紹賢以祠居廡下為褻拓地以廣舊基  
立軒殿門廡各三楹專祠向南朔望行香虔禮附記  
此之三城鼎足稱重元設府翼獨乍無之似偏輕茲  
衛所竝建溪得控制之宜而哨守之規糧儲之設區  
畫尤為精詳蓋聖祖謨烈在焉非第一方保障之  
故實矣其後澈有小警旋就晏寧先臣鄭曉曰洪武



末年海中方張諸逋賊壯者老老者歿以故沿海郡

縣得休息謂此也王文祿衛志洪武二十六年倭寇犯澉浦二十七年正月倭寇又犯

澉浦蓋頻年有警言云末樂中益嚴汛守其七年有沈家門遠哨

之議沈家門在定海洋外舟山普陀間往倭人入貢

每泊船於此信國經理時因立水寨防禦至是調衛

所戰艦協哨蓋欲聚重兵一處壯兩浙聲援然此山

去東澗為近去西澗實千里而遙非本衛衝要必守

之地洪熈元年巡撫浙江右布政使周幹請撤歸近

海各守信地宣德初行在兵部又以為言皆未果撤

仁宗實錄洪熈元年七月十八日巡撫浙江右布政使司周幹言海鹽縣地臨大海數被倭寇洪武中設

海寧衛及澉浦乍浦二千戶所陸置煙墩水置海船

巡警得保無虞末樂七年革去煙墩移置海船於沈

家門水寨相去一千餘里猝有寇至消息難通及官

軍至賊船已退官軍既回賊船復入軍無休期民無

安枕若仍舊各守地方庶幾倭賊知懼軍民兩便

上曰前更改時自以為是矣今復欲改亦未可輕率

其令都督府遣官與浙江福建三司官及捕倭總兵

熟議便利以聞宣宗實錄宣德三年七月十一日

行在兵部奏昨巡撫官布政司周幹言海鹽縣設海

寧衛所戰船盡赴沈家門立水寨防守倭寇乘虛連

年縱掠相去千里不能救援民甚苦之請如洪武中  
防守今累覆勘皆以為便上曰古人云利不什不  
變法凡謀事須為未久計其再令巡撫  
大理卿胡榮與三司計議然後處置  
至正統間倭  
警作頻年寇大嵩寇桃渚且寇我乍浦者再  
命侍郎焦公宏巡視海防因漸有釐改焉縣舊志正統七年七月

月倭寇乍浦明年八月又來寇百戶徐榮戰歿隸公  
宏之巡視志載正統七年至十二年海上事並有其



名在任 最久也 先是衛五所並在衛署至是以乍浦新中患

所軍單弱奏調後所移署乍浦城貼守 海寧衛志云五所並在衛

右夾道正統八年奏調後所貼守乍浦城遂即東門大街而設署於乍浦所之西焉 又云後所署千戶

李亨通建弘治十一年指揮嚴明嘉靖三十三年指揮李元律並重修內正廳八間兩廊八間儀門三間

其北十里梁庄堡地尤衝增拓為城以指揮一人統

官軍戍焉 乍浦諸寨並有小堡梁庄地尤衝要正統十二年巡按御史李奎奏建大寨儼然百

雉與諸小堡規制殊矣城周八百丈高一丈五尺城樓二座角樓四座廳事儀門庖富共十六楹演武場

在堡外之西南周二百三十丈演武亭及將臺制如乍城云 徐泰曰浙西並海之地海鹽為要海鹽乍

浦為要乍浦當西海口可泊往往致寇 國朝既設守禦所正統間倭夷登岸吏兵不能支故復以後所

協守至今海口梁庄等砦 而澈浦所亦調湖嚴海寧歲必專官設備監往事也

三所軍遇汛協防 三所各調軍餘五百名今澈城外尚有湖州貼守廠房基址在見前

穀 添築二所城及縣城南北二瞭望臺併省烽堠與

寨為三十七所 二所城初築時並土城永樂十六年都指揮谷祥始包以磚石正統八年

十月焦公宏奏令杭嘉湖三府備料重加包砌事見英宗實錄時董其成者則海道叅政俞士悅也詳

後官師篇 景泰續志焦公裁革海寧衛烽堠山寨四座添改南北瞭望臺二座澈浦裁革二座乍浦六

座 其沈家門戍亦以其時撤回增設騎操馬一百五

十四疋傳遞塘報在海岸設防而戰艦則減為小尖

哨船二十備乍之西海口不復遠汛申飭雖詳事稍

異 開國時矣 王文祿衛志云正統中倭寇屢犯乍浦官軍路德等死之因軍少奏革出

海五百料金字號戰船七十二隻改立寨堡止留小尖哨船二十隻見存西海口聞諸故老云正統以前



衛指揮千百戶率軍乘戰船哨往沈家門防倭半年始更番或遇颶風全溺或病歿每更番哭聲震地海口居民劉鳳奏云海東遼遠防彼失此枉喪生靈請罷之增沿海海堡戍復下議責居民可保無虞否鳳遂自保之乃罷沈家門之後停革戰船增置馬軍焉舊志正統十四年都指揮高舉建二所公館各一座並在二城中東門大街又景泰二年都指揮王謙成添設海鹽墩乍三城四門城樓各四座并記此

弘而後海上久無事罷三所之戍澈者弘治二年侍郎彭韶巡視

抽選本所餘丁補諸弁寢尚文雅絀言兵軍亦服四

民業者多尺籍虛大司馬譚公綸有云自昔衛所空虛徒存尺籍非真無軍也家道殷實者讀書求舉而外往往納充史承其次賂官出外為商其次業藝其次役占其次搬演雜劇又或通同賣放回附近原籍歲收常例皆不操守至於補伍食糧則反為疲癯殘疾老弱不堪之輩軍伍不振戰守無資弊皆坐此至于逃至嘉靖中海船廢盡馬額亦亡故絕此特其一節耳

減

初本衛馬減為四十四匹十九年議存二十匹墩乍二所各十四

武備衰耗極而倭

變適大作初

國家仿宋元遺制開市舶寧波嘉靖

之二年因是有宋素卿宗設之闕既而革舶司禁番

船往來顧不能盡如禁率泊近畧私與內豪市內豪

更狡積漸賒負弗償諸奸商益讐憤起為賊勾倭人

沿海寇犯不休 朝廷為設巡撫及總制大臣兼轄

浙直福督勦若朱公純王公忬張公經李公天寵及

胡公宗憲先後來蒞師而衛所軍不堪用則募民為

兵用之兵制因大變

都督萬表云向來海上漁船出近洋打魚樵柴無敢過海通番

近因海禁漸弛勾引番船紛然往來海上各認所主承攬貨物裝載或五十艘或百餘艘成群合黨分泊



各港又各用三板草撇脚船不可勝計在於沿海兼行劫掠亂斯生矣自後日本暹羅諸國無處不到又誘帶日本島倭奴借其強悍以為護翼徽州許二住雙嶼港最稱強後被朱都御史遣將官領福兵破其巢穴焚其舟艦擒殺殆半就雙嶼港築截許二逸去王直亦徽州人原在許二部下管櫃素有沉機勇畧人多服之乃領其餘黨改住烈港漸次併殺同賊陳思盼柴德美等船伍遂致富強以所部船多乃令毛海峯徐碧溪徐元亮分領之因而海上番船出入開無盤阻而興販之徒紛錯於蘓杭近地之民自有餽時鮮餽酒米獻子女者自陷黃巖屠郭衢而其志益驕其後四散劫掠各通番之家則不相犯人皆競趨之杭城嵌客之家貪其厚利任其堆貨且為之打點護送如銅錢用以鑄鏡鉛以為彈硝以為火藥鐵以製刀鎗皮以製甲及布帛絲綿油麻酒米等物無不賫送接濟而內地之人無非倭黨矣按鄭曉吾學編日本考言海寇之起由於內豪除欠其貨因而讐憤劫掠據萬都督所云又起於自相防衛自相吞併遂盡變為盜賊合觀兩說當時寇起之原始盡王直事詳後 鄭若曾曰是時倭夷勾引至者薩摩肥後長

門三州之人居多其次則大隅筑前筑後博多日向攝摩津州紀伊種島而豐前豐後和泉之人亦間有之乃因商於薩摩而附行者大抵日本之民有貧有富有淑有慝亦如我中國然其富而淑者或登貢舶或登商舶而來凡在寇先時浙有把總四臨諸衛卽

選衛指揮克之至是分六總改 欽依以都指揮體

統行事重其權浙西者曰海寧總駐乍浦 海防類考云兩浙原

有考選把總四員分爲定臨觀一總松海昌一總金盤一總海寧一總嘉靖二十八分定海臨觀爲二總松海昌國爲二總共六總三十六年以六把總事權不重題奉 欽依以都指揮體統行事始由朝授

焉 把總司在乍浦南門行署在衛城新橋北並嘉靖九年把總杭州右衛指揮楊和建二十一年把總

杭州前衛指揮陳鳳四十四年 欽依把總章延廩重修 乍浦新建欽總司記武原三閩乍浦最要故

有帥司隘且敵癸亥北川章公奉 命以都指揮視師四衛所欲新之謀於憲副肖溪王公遂白少司馬



劔門趙公報可乃檄平湖尹直齋顧侯主之庀工須  
材卜基於南門之內為廳事五楹穿堂三楹後堂五  
室十有六門二前左有祠以奉土神前右有庫以貯  
旗幟東北隙地別為書舍者三以便休憩馬廐庖福  
井濶各得其所雖其費出有司而經營量度綜理周  
密則皆公心思之所任在也公為會稽簪纓望族海上  
自夷變以來挺身赴難水陸鏖戰如柯橋馬嶼龍山  
龍山高田南灣石塘烏牛等處所向克捷於是劔門  
趙公疏聞乃授今職莅任選驍騎葺城堡修戰艦簡  
士卒飭烽疾凡旗幟戈矛劔戟弢弩煥然一新精銳  
堅緻興義學使人知方以故東南賴有重鎮焉而公  
願以餘力營作官解為悠久之計如家事者可多得  
哉予述其事而系之詩以紀不朽之績詩曰武原之  
北當湖東中有干櫓蟠如龍山環水遶巨海衝是為  
乍水屯兵戎鳥夷窺伺來朦朧鎮以大將摧厥鋒偉  
哉元戎武且忠謀新幕府當玄冬落成於春規制雄  
將非人力其神功君子居之安以榮一洗簡陋加尊  
崇蛟鱷遠避朝貢通未奠溟渤消邊烽我作歌詩貽  
無竊嘉靖甲子夏  
孟敵水董穀撰

先時設總督備倭都指揮臨各總

列衙都司至是以都司權輕設總兵定海節制兩浙

別設叅將四奉 敕統領六總浙西者曰分守嘉湖

叅將駐縣城 海防類考云洪武三十年設總督備倭

靖三十一年倭變以督閩權輕策應不前添設叅將

駐定海三十五年復設總兵官於定海改叅將於臨

山總督備倭都司裁革尋設杭嘉湖及溫處台金嚴

各叅總馬 會典云嘉靖三十二年添設杭嘉叅將

三十四年改為嘉湖叅將三十五年改設專駐海鹽

建置年歲較類考九詳 叅將府在衛城黃橋之左

寅倭寇海鹽始從撫按之請頒授旗牌符驗以古邳  
湯公克寬克叅將分守之於衛寓尋建帥府於城外  
東北海上其制甚宏費千金云乙卯彭城王元伯代  
之連歲倭寇又數來有司以帥府孤懸難守恐為寇  
巢廢之仍於衛寓丙辰處州丁公僅來任始給關防  
請舊布政分司改為叅將府而府門方向偏曲形家



以為不利余討諸輿論謀改作焉兵船舊有例銀克  
公費不敢踵陋出之買地六畝創建中門三楹正門  
三楹樹之屏壁延賓館於東南旗幟廟於西南中軍  
廳於門之右竝三楹又建私宅於東北正室三楹南  
房三楹及諸庖廂室凡兩月工成緡以株守被論得  
歸侍親或以為修建何益夫取而克之囊是贖貨  
也官無府豈可露居將來不免於修建其取費於府  
庫則累及於軍民茲建也一以省公費一以寢私求  
豈以身將去敢泄泄從事先時有海道副使兼巡兩  
嘉靖庚申冬古譙楊縉撰

湖已分設叅政理湖西至是復增設副使備兵杭嘉

湖名其兵之區曰嘉興區用上承督府下監本區之

總叅駐郡城海防類考云巡視海道舊制以侍郎都  
御史領之洪武三十年後始領於按察

副使嘉靖初年駐省城遇汛巡歷全湖沿海地方二  
十三年駐台州二十七年改駐寧波仍巡歷沿海至  
三十二年間以倭變始添設杭嘉紹台各府兵備而  
海道所轄止寧紹區矣添設叅政事類考不載惟

景泰舊志云正統七年倭奴登乍浦初設布政司叅

政一員奉勅專一提督海道因設分司公署又錢薇

集云正統間奏設藩叅一員駐札鹽城理而陸兵則

海防自劉瑾革去而經理遂泯必有所據

郡城設五營縣城二營乍浦二營澉浦一營合十營

營各五百餘人郡志載海鹽陸兵五營分為左右中  
前後五總左守海鹽前守澉浦中後

守乍浦每營把總一員隊長一十五名什長四十五  
名正兵四百五十名火兵四十五名雜流五十五名

正兵日支銀三分三釐遇汛分派水兵郡城亦五營

沿海循塘拒守汛畢仍守城池平時截守郡境水  
港遇警聽調邀擊而海上募福蒼

營之人數同陸營

船七十七艘兵二千餘人立海鹽乍浦澉浦三關分  
三總戍守兼出哨羊許二山羊山至許山一潮許山  
至乍浦亦一潮倭來至陳錢山合艚自陳錢至羊山



復占風分艚犯澗直故羊許尤澗西門戶末樂時哨  
沈家門則已遠正統時撤而泊乍之海岸則已近惟  
哨羊許於澗西海徑有合爾胡公宗憲議曰防海之制謂之海防則必宜防  
之於海猶江防者必防之於江此定論也國初沿海每衛各造大青及風尖八槳等船一百餘隻出海  
指揮統率官軍更番出洋哨守海門諸島皆有烽墩  
可為停泊其後弛出洋之令列船港次澗東於定海  
澗西於乍浦蘇州於吳淞江口及劉家河失初意矣  
議者欲分番乍浦之船以守海上羊山蘇松之船以  
守馬蹟定海之船以守大衢則三山品峙哨守相聯  
可扼來寇而又其外陳錢諸島尤為賊衝三路之要  
宜令總兵官統領戰船屯泊而提督軍門及海道等  
官每於風汛時月相參巡察有警則我大船火器衝  
截賊入使不得越過各島則彼毒無所施孽孽不作  
而內地安堵矣又云直隸與澗江各雖異地而實則一家若不設官總理則彼此自分門戶賊一入內地隨風南北可以互犯故必兩地兵船共守陳錢分

守馬蹟等三道而後賊無遁情兵可夾擊海防類

考各區戰船先年俱於衛所食糧旗軍內選駕海寧

摠計二十隻後損者不修缺者不補嘉靖三十一年

倭變船無可用海寧摠改募福蒼等船七十七隻官

為給稅海鹽縣志云嘉靖三十六年議設海鹽澗

浦乍浦三關水寨兵船七十八隻立把摠三員哨官

十員正副捕舵繚旋梢手散兵共二千餘名船有福

蒼小哨叭喇唬八槳等項名色福船捕兵五十名蒼

船捕兵三十名小哨捕兵二十名叭喇烏八槳船捕

兵各一十名在乍浦者船泊西海口謂之下關在海

鹽者泊白塔港謂之中關在澗浦者泊黃道廟謂之

上關遇汛月備倭把摠率之輪番出哨羊許山等處

與浙東臨定直隸吳淞兵船會哨如遇有警合艚截

殺兵備參將則並駐乍浦督發汛畢各船回守本關

正捕舵日支餉六分副捕舵日支餉五分散兵日支

餉三分王兵憲樵樵李記云此時三關水兵船一  
百五十艘與類考至其他徵調客兵如坑兵邳兵漳  
縣志不同并記

兵廣東山東兵狼土兵及橫江烏尾船兵往來遊擊



者又不在前所設營哨數

坑兵處州守銀坑之兵劉大冲嘗統五百人守鹽屢

有戰功後敗歿邪兵叅將湯克寬家丁也守城却敵甚得其力時凡三百人漳兵漳州兵叅將盧鐘張鈇部下皆有之倭中多漳人戰時兵有與賊通敗事者廣兵三十五年調至守鹽一千二百人山東兵故老言三十四年嘗調至宿城外掠姦索食不減於賊廣西田州狼兵亦三十四年調至土婦瓦氏率之過鹽進搗金山賊失利而歸廣東烏尾橫江船較福船尤大三十五年調一百八十艘分撥浙直海洋在前給稅海艦之外但未詳吾鹽派有若干艘耳此外又有湖州水兵指揮徐行健所統有四百人然用之陸戰不可曉采九德曰倭警初發時海上僅有本衛驍兵六百木縣勇壯四百敢乍各驍兵三百餘而已後本衛又選驍兵四百第用之守城則又其次者矣其他客兵常有數千人在鹽大抵客兵每日餉銀五分邳兵多至八分云 又三十五年進兵乍浦沈庄調到兵數錄後 京營神鎗手三千名涿州鐵棍手六千名保定箭手三千名遼東義勇衛虎頭鎗手三千名河間府義尖兒手三千名德州兵備道民兵三千名

臨清曹濮二道團操快手兵三千名河南毛葫蘆兵三千名河南睢陳兵備道團操馬軍三千名漢州府礦徒三千名永保二司土兵 嘗考胡公用兵時故籍三萬容美等司土兵一萬

歲費餉六十八萬有奇而嘉興七邑所增田畝額餉

幾五萬掇括奇羨克餉銀又不下二三萬並以給本

區增設兵則兵數之多可知已

承九德倭變事畧云時每田一畝出兵餉

銀一分三釐沿海之民膏血幾盡 又是時城垣築有甕城敵樓土城小東關烽墩築有敵臺水港各布

椿柵宜并志 本衛甕城及敵樓十八座澈浦敵樓十六座並縣令鄭公茂築乍浦敵樓十座平湖令劉

公存德築敵樓凸出城外三面可施砲箭擊打攻城賊人最為守城之利土城濬河深一丈五尺取土即

築于沿河之上高又一丈三尺內布貓竹簽鐵菱角等物乃署叅將張公鈇所築工派里長民夫及十一

屯所軍餘增城外一重藩籬衛所三城並有敵臺築於賊所經由要害之地包以磚石上設堞堞勢甚雄



杜僉鄉兵守之遇賊過攻打衛城外凡二座一在南門外東南一里興福橋一在北門外東北一里教塲口王兵憲樵云各處水陸要害之處設敵臺所費不貲誠以事關防守而事寧之後上下全不經心多就廢壞蓋亦謂此臺設之有利也衛志云嘉靖三十二年縣令鄭公茂承胡撫制命建按胡公拜撫制命在三十四年鄭公陞任後矣此當是王公忬所命建也小東關不久廢港口椿木避難者阻礙不便尋復聽民撤去則惟時縣境大小戰不知凡幾砂腰新塘兩屬浪費云

**戰殺指揮三人**滿朝馬呈**千百戶七人**王繼隆姜楫楊臣康綬王

相器鳳**孟家堰殺指揮一人全軍並覆**指揮李元律與處州千戶

姚岑**薛爛寧波百戶宋應蘭並死于陣**

時兵士死者一千四百七十五人**北王橋之戰亦殺指揮一人**徐行健又指揮姚弘戰於松江陶宅死

秋有**衛城澈浦再被攻賴叅將湯克寬令鄭茂指揮**

**徐行健尉李茂力守得完而攻乍竟破城中人大**

**半殲受禍慘酷若是**叅將湯公守海鹽事在嘉靖三十二年時倭至者三十七船凡

數千人圍鹽五晝夜不破城守法見官師篇公本傳下倭解圍去攻乍浦一夕破守乍者指揮王應麟也縣令鄭公守城事在三十二年時倭至者五百餘人圍鹽僅一日而巢於石墩時出掠近境縣城堅閉戒嚴者則四十三日馬徐與李守澈浦亦在此時李飛石擊殺攻城賊自放佛郎機誤傷幾墮城下澈人誦其全城功至今不衰鄭公守城法亦見官師篇本傳**於後諸賊以掠飽不得去**

**誘之偽降離解其黨使自相縛以効功於是陳東葉**

**麻紮徐海亦燔王直受餌就阱諸主名賊帥及群倭**

**相繼盡海上始就寧胡公功實多然東南郡縣大抵**

**皆殘我三城四郊外民廬稀煙火欲斷矣**徐海徽人初為僧後



亡命入海中投王直為賊葉麻海書記陳東薩摩洲  
王弟書記也嘉靖三十四年海與東各糾諸島倭入  
寇海屯柘林東屯川沙明年正月明亦率群倭來屯  
老鶴嘴四出攻掠嘗由海鹽沿塘揚兵進逼省城其  
眾萬餘鹽四郊村落為所焚掠甚慘又嘗攻乍城困  
兵備劉燾城中幾破後掠鮑思歸胡公遣謀招撫欲  
降予官爵欲歸具舟送之海正坐窘佯諾投降實私  
營歸計胡公諱知海與葉以爭一婦女成嫌因說海  
縛葉自効復令葉為書勸東殺海而偽遺書海海遂  
并縛東導我兵掩殺二人之部黨于乍浦海屯平湖  
沈庄聽款胡公因進兵勦之縱火焚沈庄海沉河死  
餘眾盡戮焉王直事見前初直於嘉靖十九年走  
廣東通番致富後投許棟於雙嶼領哨船隨貢使至  
日本交易棟破改屯列表叩關求開市不得三十一  
年始挾群倭分踪寇浙東明年都御史王忬遣叅將  
俞大猷破列表走泊馬蹟潭因分掠浙東南直其攻  
海鹽陷乍浦皆直黨所為也尋還日本造巨艦聯舫  
大可容二千人上為城樓櫓四門馳馬往來屯薩摩  
州之松浦津自稱徽王自此坐遣徒黨入寇不自來  
矣總督胡公用生員蔣洲陳可頤使倭說而招之先

是直母妻及子繫獄金華胡公釋而厚待之而直故  
貪商以市舶不通激為盜至是復以開市請洲等佯  
許焉三十六年遂聽撫來投詔斬  
于省城市曹而倭寇之患始絕  
嘉靖末以警息有

銷兵之議始汰兵備令巡道兼攝

初稱杭嘉湖兵備今以嘉湖分巡道

兼攝因稱嘉湖兵

隆慶三年汰諸營郡城及衛所三

城合留兵五營又汰海鹽澈浦二關水兵留乍浦一

關居平泊守臨汛出哨且有抽選軍丁補兵之議四

年巡撫谷公中虛始定嘉興區兵制曰陸兵凡一營

五總中總守嘉興左後總守海鹽右總守澈浦前總

守乍浦曰水兵一關凡四哨一哨羊山一哨許山一

哨乍浦西海口一哨白塔港其哨守之規則每遇汛



月各總遞移屯就遠以資防禦中總屯海鹽左總屯  
鹽之龍王塘前總屯梁庄後總屯乍浦城右總屯澈  
之南海口水哨兵遠出海洋各哨所占山巒南與臨  
觀海哨會北與直隸金山吳淞海哨會哨陸有籌哨  
水有符稽驗各有法而陸兵募兵一總軍兵與民壯  
兵各二總水兵者舵募兵貼駕用軍兵時當事者以  
軍與民壯並元在食糧之額用以充抵民兵則兵數  
不虧餉數自減蓋於總叅新法中仍叅用軍伍存衛  
所初建意兵制有變而得其善者此制也

海防類考  
云倭亂時

兩浙召募陸兵不下十萬餘續因減免餉銀議將水  
陸募兵漸次汰減選取民壯及兵軍兵抵用至隆慶

四年督撫軍門谷題准各區水陸官兵內嘉興一營  
五摠募兵一摠民壯軍兵各二摠海寧摠水兵留用  
民捕耆舵兵九百一十五名加添軍兵五百二十三  
名謂之貼駕軍是以餉數減除而兵數反加足敷防  
守又王兵憲樵樵李記曰自倭亂平三關改為四哨  
白塔港為一哨兵船九艘哨官一人領之乍哨為一  
哨兵船八艘叅將中軍把摠領之許山為第二層門  
戶立為一哨用蒼船二艘沙船小哨船叭喇唬船共  
十六艘水兵把摠一員領之以羊山為第一層門戶  
立為一哨用船如許山之數以備倭把摠親督領之  
據此則當時船亦減為五十三艘數有可稽者民  
壯始於正統時後正德中每縣額十人尋又定為每  
里一人初為力差嘉靖五年工食派秋糧中帶徵始  
有額餼會典隆慶四年題准浙江通省額設民壯  
除留看守各府州縣城池庫獄外其餘徵收工食挑  
選精壯之人設立隊伍聽各該摠叅都把摠官與軍  
兵合營操練縣舊志隆慶三年以兵餉缺乏奉文  
議革民兵在于海寧衛并澈乍七所軍兵挑選足數  
各摠以海寧衛指揮統領哨官以各所百戶統領軍  
兵糧在於軍儲倉本折關支類考載軍門哨符哨



籌檄文各區舊規水兵逼汛彼此會哨取單查考近來率多虛應就於近洋交單致賊在外洋隱匿不報今刊刻哨符編號印發把摠各官照依派定處所給符填註發日時刻往來會哨交符即填到時汛畢繳查其沿海烽堠臺寨置立循環哨籌分撥乍浦所三十根蒲門所三十根每年三月十五日起至六月十五日止每日南北各遞發一籌彼此循環毋分兩夜逐墩遞送傳報有無聲息各衛陸路官置簿登記遞到籌號姓名日時每五日類送入驛 萬曆初水兵貼飛報軍門并就近海兵該道查考

駕者復改用民兵僅存軍兵之半 軍院方議革水哨軍兵一百八十名

募民兵補之 在萬曆二年 時以倭警久息始裁五總中哨又裁白塔港哨船之半不數年釜山見告海上復修備舊所裁者多補又以乍浦地尤衝兵止一營為弱增設軍兵一總名左營而稱舊左總為中左營舊中總為標

營汛時左營屯乍後營改屯龍王塘南標營自守郡

城聽調發移屯之規稍變 乍浦左營萬曆二十五年撫院劉公元霖奏設疏云

海鹽三關惟乍浦突臨大海密邇平湖內地一帶最稱衝要止設前營陸兵一總深屬卑薄查得乍後二所操備正軍一千一百四十名或占役投閑或經營商販積弊相沿操備徒為虛名耳今議於二所正軍內挑選精壯軍兵四百名內選隊長一十二名什長三十六名立為一營仍於該衛所軍職官內選委把總一員哨官四員就於乍浦所城朝夕訓練逼汛調發前營民兵移住梁庄而以該營之兵與省城大營標兵一總協方防守本所至於月餉自有本等名糧無煩加派第於汛期少加口糧與摠哨廩糧紙劄之費為數無幾即於本區支剩額餉抵給 其黃道關舊此營一立邊海孤城隱然增一藩屏矣

置澈浦關處亦增設哨船以白塔港為中遊左哨此為中遊右哨而每遇汛期督撫軍門檄嘉湖兵巡道







六名兵二百二十四名戰馬一匹雜流吹鼓旗手二  
十四名共四百二員名匹後營民兵一總計五哨名  
色把總一員哨官五員隊長一十五名什長四十五  
名兵四百五十名戰馬一匹雜流吹鼓旗手二十五  
名共五百四十二員名匹以上二營常川防守本縣  
城池汛期中左營出守龍王塘南哨至秦駐山與右  
營官兵會哨後營出守龍王塘北至白馬廟與左營  
官兵會哨一 激浦所城右營軍兵一總於右所軍餘  
內挑選計五哨名色把總一員哨官五員隊長一十  
五名什長四十五名兵四百六名戰馬一匹雜流吹  
鼓旗手二十四名共四百九十七員名匹常川防守  
本所城池汛期出守激浦所南海口北至秦駐山與  
中左營官兵會哨 乍浦所城左營軍兵一總於該  
所軍餘內挑選計四哨名色把總一員哨官四員隊  
長一十二名什長三十六名兵三百二十四名戰馬  
一匹雜流吹鼓旗手二十四名共四百二員名匹前  
營民兵一總計五哨名色把總一員哨官五員隊長  
一十五名什長四十五名兵四百五十名戰馬一匹  
雜流吹鼓旗手二十五名共五百四十一員名匹以  
上二營常川防守該所城池汛期前營出守梁庄東

至大營盤與直隸金山營西至乍浦教場與本區左  
前營官兵各會哨左營出守西海口東至梁庄大寨與  
中右營 本營額設軍兵四百三員名匹亦屬本營  
統領汛期屯劄教場西至赭山巡檢司哨邏東至黃  
灣寨與激浦右營會哨初本所委亂時設選鋒兵一  
千名後漸汰盡至百名本營係萬曆二十六年軍門  
劉設 軍門調發標營 舊規汛期軍門調發標兵  
一總協守激浦後以乍浦九衝改發乍浦萬曆三十  
一年以激浦均為邊海要區激浦仍發標營二哨協  
守聽該參節制汛畢撤回 海平二縣巡檢司 海  
鹽激浦海口二巡檢司平湖乍浦白沙灣二巡檢司  
舊規各設弓兵百人與正軍同操有事聽調隨伍倭  
變後因抽取工食弓兵多所裁汰隨操之制遂廢然  
亦總參所得節制也 後營兵營房在海鹽縣東門  
外海塘公館西前營兵營房在乍浦城南把總司之  
東萬曆二十五年撫院劉奏建 按陸兵練習每總  
以中哨三隊習鳥銃每什以二人習刀牌二人習狼  
筍四人習長鎗二人習鈞鑱短鎗暇時俱習弓弩臨  
敵鳥銃衝陣則刀牌手護之刀牌手衝陣則長鎗手



護之弓弩鎗鏃手衝陣則狼筈手護之長短必相間而進而火器尤利於用其各營百子銃鳥銃火藥火繩鉛彈噴筒及水哨發貢將軍鏡佛郎機之類皆官銀造發各有成額

大小八十八艘中軍官役總哨捕舵兵士薪水戰馬

合一千七百五十一員名匹 萬曆四年海防考載海

三隻民捕者舵兵夫一千八百名軍兵三百三十一名

中軍官役戰馬一百一十一員名匹 萬曆三十年海

防考載本總五哨船九十九隻捕舵兵薪一千六百

九十三名中軍官役戰馬九十五員名匹 合五哨

細數開後 本參標下中軍名色把總一員旗牌官

三員聽用官一員書記二名醫生一名健步十名火

藥匠一名鐵匠一名家丁二十六名馬丁二名戰馬

二匹軍旗手一十六名吹鼓手八名又中軍官下書

記一名家丁一名健步一名吹手四名戰馬一匹旗

牌官下各家丁一名備倭把總一員書記二名健步

二名家丁二名總哨官三員各家丁一名每哨吹手

四名戰馬三匹共官役雜流戰馬一百十三員名匹

福船捕盜一名正舵一名副舵一名兵士三十二

名薪水一名蒼船捕盜一名正舵一名副舵一名兵

士二十四名薪水一名一等沙船捕盜一名舵工一

名兵士一十九名薪水一名二等沙船捕盜一名舵



蒼沙哨唬等船共一十九隻捕舵兵薪三百六十六  
名平時駐泊乍浦西海口汛期泊守許山輪撥兵船  
前往浙東沙塘衢東等處并直隸金山營官兵會哨  
守關哨總哨官一員統領蒼沙哨唬等船共一十  
八隻捕盜兵薪三百六十名平時駐泊乍浦西海口  
汛期出守唐家灣每上下半月輪撥兵船前往浙東  
沙塘衢東等處并直隸金山營官兵會哨近因守關  
與出洋勞逸不均三哨逾年更番輪易 參將於各  
哨撥福蒼等船一隻并網船六隻居中往來調度汛  
畢收泊乍浦關訓練仍撥喇唬船輪出外洋哨探  
附嘉興水兵協守哨本道標下中軍官兼攝巡哨  
哨官一員統領喇唬船一十四隻每隻捕舵兵一  
十六名哨官家丁一名共捕舵兵家丁二百二十六  
員名平時派守嘉興西北二塘巡緝鹽盜汛期出海  
協守西海白塔二處海洋與該關兵船會哨 船稅  
本區嘉靖中所募福蒼等船皆官為給稅隆慶後  
改為官造官修以致侵剋弊多不堪經久萬曆二十  
五年議令各捕預領稅銀自造克為私船庶免他弊  
定限三年燂洗四年輕修五六年重修七年拆造遇  
修造年分船兵照限放班舵工改食兵糧扣省餘餉

抵湊船稅今計各船每年每隻稅銀福船七十四兩  
三錢四分蒼船二十四兩沙船內一等二十五兩二  
等二十二兩小哨船一十二兩六錢八分其銀於嘉興  
共該銀一千一百二十二兩六錢八分其銀於嘉興  
府額派料銀并扣省月糧銀內支給網船係各隊兵  
自造自修例不給稅 按福船中為四層高大如樓  
敵舟小者相遇即擊沈之沙船能調截使鬪風蒼山  
船有二層隘於福船而濶於沙船用之衝敵頗便而  
捷以喇唬底尖首尾如一旁用十 餉銀自前三倉糧  
槩破浪如飛尤便追逐哨探之用

### 外歲費三萬三千有奇其大數云

倉糧款 按今三  
倉糧官軍本折兼

支不等本色於額坐軍儲各倉折色於該府庫軍儲  
銀內而折鈔又於布政司課鈔銀內各支給萬曆三  
十年海防類考開載海寧衛并左右中前四所指揮  
千百戶鎮撫等官吏七十二員名旗軍一千四十九  
名每歲約支俸糧一萬八百六十四石八斗折鈔銀  
三百七十一兩四錢二分零激浦千戶所官二十二  
員旗軍五百二十名每歲約支俸糧 千九百五十  
七石折鈔銀一百四十四兩五錢六分乍後二千戶所



官三十一員，旗軍八百六十名，每歲約支俸糧八千二百六十四石，折鈔銀二百六兩五錢八分零。今二十餘年來，增益又多矣。舊規各軍以額設與充發者，為正軍各照差支糧奉例頂補絕軍者，為例軍。不論差役輕重，月止支糧五斗，其隨差操舍餘餘丁，並不支糧。後因海防多事，始議將舍餘餘丁，轉與正例軍一體照差造支。隆慶元年，定正例軍人舍餘餘丁，點撥出海，并抵充水陸兵者，常川月支一石，貼駕軍汛期取用，月支一石。汛畢寄操，月支六斗。望斗者，照出海名色造支，其餘正差降埃散臺陸路廠監軍俱春汛二三四五月各支八斗，小汛與餘月通支六斗。操備正軍隨操，吹鼓手火藥匠等月支六斗。例軍月支五斗。隆慶四年，軍門谷挑選協駕軍丁，月支米一石。外汛月加行糧四斗五升。隊長月加銀一錢及編充陸兵者，常月給米一石。汛月隊長外加工食銀一錢。什長五分。此其支給大畧也。議者多謂倉儲之設，元有定額，今軍旗日有消耗，倉儲不見贏餘，不解受乏之故，不知自嘉靖十六年開頂軍之例，漸有舍餘餘丁一繫收糧之議。自後衛官率以異姓義男捏作舍餘，各軍亦以異姓民人捏作餘丁，各項撥差不將

額軍抽選，却將所捏舍餘餘丁，克數冒補糧缺，以致關支逾額，歲有空乏。其間更有老病而歲與全額隻身，而月領雙糧，或逃亾而造單不除，或占役而官旗代領本管縱容不發，有司查點頂名種種弊端，無非蠹蝕倉糧不足，職此之由。至於摘支借支重疊透領，弊尤非一。有萬曆四年海道劉條議三十七年本縣知縣喬申文，竝直窮弊源，有裨倉政備錄於後。海道劉條議云：海倉之弊，槩有百端，其大要不過收支二者而已。私兌之奸，起則實收不足，憑而收納之法，壞侵冒之弊，滋則領狀不足，信而支放之法，壞其源起於糧長憚遠運而樂輕齎積棍，遂乘之以包攬衛所出虛領以冒本折官攢遂因之而通同。知縣喬申文一定放給銀糧月分查得放給旗軍月糧有府銀有屯米有本色倉米頭緒不一，故有既領府銀而復領倉糧者，有既領屯糧而復領倉糧者，有銀屯兼支而復領倉糧者，弊所由多。以此本府近議正二六七八九月支放本色倉米三四五月本府放銀十一十一月坐放屯米若照所議，未為定式先期十日帖發本縣，則應支本色倉糧之時，不得非時而領府銀，應放屯糧之時，又不得非時而領本色倉糧。謀



牒之弊絕而重支冒領不待查而自見矣 一禁革  
官軍私領私票查得支放錢糧最為重務府縣印支  
尚有盜漏之弊今衛官領糧止有印記總領一紙而  
無花名細數斗級即以印領為據放給甚至旗軍私  
票私記亦准支放錢糧何物而玩忽若此更有積年  
軍蠹動歛使用鑽謀上房帖發該縣坐支解戶某人  
米若干石作某年某月分糧米此帖又不下於縣不  
下於倉衙解戶竟赴該倉斗級如前作數作放失入  
失出之弊皆根於此今本縣刻有雙連號票一給官  
軍支領一畱本縣對查俟府帖應支倉糧之期照應  
支花名文冊每名給發號票一紙隨填應支糧米數  
日斗級照票給放仍收票繳查如是則官軍之私票  
私領難以混支而斗級侵耗之弊絕矣 一放糧扣  
冊宜同查得軍儲年收年放俱奉府帖發給官軍某  
人等某年某月等糧槩衛通支其有支府銀支屯米  
并扣抵還補者縣司無從知也且狡猾軍人通同書  
識巧立名色有云烽埃裹糧者有云門禁請贍者有  
云窰局裹糧者有云鹽捕請糧完憲者有云叅總軍  
健請贍者又有不檢武弁請糧完賊請糧完課助襲  
助喪種種名色不一方其具呈之時俱云待放扣算

及到放時賄囑承行朦朧隱蔽即責不扣之故又云  
放冊在先扣冊在後聞有查出扣算然扣者一二而  
不扣者七八也此皆承行支料與斗級表裏為奸應  
扣者已暗行扣除矣惟折乾私侵入已故為是欺掩  
之計已後牒發放給乞同扣冊一併付查惟奉正放  
若有朦朧上呈批發下縣許令查明申繳則重支借  
支之弊絕矣 今按喬公革倉弊三議可謂曲盡然  
公去而弊終如故者何也三倉放給權不在縣在府  
受牒奉行之人雖切婆心終局媳分耳欲清弊源郡  
太守一加意足矣 兵餉款 叅將領給心紅每歲  
支銀一百四十四兩 備倭把總日支銀一錢七分  
紙劄歲支銀十兩 兵道中軍官日支銀一錢二分  
紙劄歲支銀十兩 二錢旗手健步及聽用官親兵日  
支銀三分 叅將中軍官日支銀一錢二分旗牌官  
日支銀六分聽用官日支銀四分書記醫生日支銀  
三分旗牌官家丁日支銀二分五釐 水陸營哨各  
領兵名色把總總哨官日支銀一錢二分名色把總  
紙劄歲支銀十兩 二錢總哨官紙劄歲支銀六兩六  
錢總哨官家丁日支銀二分五釐各哨官日支銀六  
分 各營書記日支銀三分 各旗手健步家丁馬



丁戰馬醫生吹鏡手弓鐵火藥匠日支銀二分五釐  
民兵日支銀三分 軍兵營隊長日支銀四分什長日支銀三分五釐  
營什長月支銀四錢四分 軍兵營隊長月支銀五錢軍兵  
役每月支銀四錢 捕盜者民日支銀六分正舵工  
日支銀五分五釐副舵工日支銀四分五釐號船舵  
工日支銀四分隊長日支銀四分五釐汛月日支銀  
五分水兵兵薪日支銀三分每年加銀一兩八錢  
軍前犒賞銀 嘉湖兵巡道七十兩杭嘉湖參將二  
百五十兩海寧衛備倭把總二十兩 按兵餉之設  
始於總制胡公時內一項曰額餉銀於田地山派徵  
卽前所云田每畝加徵銀一分三釐者是也一項曰  
克餉銀則於民壯弓兵皂隸軍儲預備米銀等項內  
括取時方用兵故兩浙餉銀之數多至六十萬三千  
有奇其後漸議銷兵嘉靖四十五年減為四十一萬  
七千隆慶中又減為一十九萬萬曆初稍益為二十  
六萬四千其時每田一畝猶只徵銀五釐二十七年  
後始增至四十二萬有奇每田一畝加徵銀又至七  
釐焉計嘉興府七縣額餉銀二萬八千五百九十有  
奇克餉銀一萬七千五百三十六兩有奇內除七千

五百四十有奇解布政司協濟寧波遊洋官兵糧餉  
外餘盡貯府聽給本區水陸官兵支用大抵萬曆中  
每歲所給三萬三千今水陸兵哨日有加增稍稍溢  
出於此額不能守矣 附歲解軍器 海寧衛額辦  
解京軍器八十副激年二所各二十副列於

銀內支解都司成造類解 歲運漕船 海寧衛

漕船二十二隻 舊志載本衛原係邊海與臨觀等  
沿海九衛專為備倭而設其腹裏杭州等七衛所官  
軍例有駕運之後清江浦船廠碑文可據正統間有  
北京調任本衛指揮莊端圖便回籍代領杭州衛船  
駕運嘉靖二十五年間倭寇海鹽荼毒甚慘三十二  
年老軍吳汝常何景春奏行都御史王忬巡按御史  
趙炳然議勘查發運船退回原衛官軍仍留守禦時  
軍人孫倫曹倫李軋始其議而鄭公曉官漕運都憲  
為地方主持尤多其力云後於隆慶五年被湖州賄  
派淺船一十二隻書役趙采通賄外所利於有船歲  
可侵竟致漕期促迫不遑申辨衢州所復比例又派  
十隻相沿至今雖陳告屢屢未蒙奏豁實本衛一大  
累害焉 萬曆四十二年本衛議將前船均派激年  
二所二所軍願幫貼月糧免運至今以為兩便詳見



澈人吳中偉碑記內 額辦軍需銀 海寧衛每年  
軍需銀二百三十七兩四錢五分六釐零 澈浦千戶  
所每年軍需銀七十四兩三錢二分零 乍後二千戶  
所每年軍需銀六十九兩三錢二分零  
按衛所每年應用表箋 祿匣路費軍三軍器料價 櫃  
索祭旗火藥修城紙劄糧單清勾歲支歲用旗役折  
鈔等冊行移勘合地理圖本武舉刷卷摠參都司并  
經歷司家伙等項謂之軍需錢糧往皆取給於軍及  
有軍吏則其費盡出於軍吏深受賂累之苦後議革  
軍吏以懸之尋復立直廳柱頭飯頭耆老名色坐派  
害終歸之予軍嘉靖二十五年前所軍餘徐鵬捐銀  
五百兩買田五百畝附屯所收租作軍需料銀衛官  
取田價准作二年軍需其事不終隆慶二年海道副  
使蔡以旗軍鈔銀爲奸徒侵領未沾實惠議將應領  
之鈔抵應辦之需不足之數將月糧 扣足支用而衛所免軍需之累云

胡震亨曰聞之

言禦倭者禦諸海則功禦諸陸幸殲焉功罪半矣

國初置戰船近胡公議哨羊許斯禦海說乎而間者

或稱許山難泊蒙上之不察改哨內港偷取近地自  
佚微兵憲范公涑亟爲改正幾復蹈正統間屯泊海  
岸故轍矣衛所之變爲總參官旗之變爲營哨勢也  
其父揭楯趨其子或不克擔束薪有世而軍者無軍  
而世勇者第精而簡之勇者亦從出焉故抽選之法  
宜弗簡雖民兵也且終弱今應募兵非市井販夫卽  
豪家廝養爾不數年亦將化爲軍罷不可用等矣則  
何如復往制選金衢台處人與土著參用爲得也均  
餉也倉儲餉視兵餉弊益多又何故兵餉銀餉給以  
時軍餉銀米中半餉郡帑縣倉雜給給又非時故弊



也則曷若盡改折色壹輸郡帑按季發縣截給庶清  
蠹窟乎議者謂歲有豐歉穀資協濟或難盡廢本色  
不知平原產稻之鄉水次易達之境與浙東海倉設  
在山縣崎瘠處者不同解頭往往輕賚到縣就糴輸  
倉而軍士亦不以得穀爲重多先期賣票至期折乾  
又何必多爲轉展重煩民力始得飽海上戍也乃其  
本計又在慎發旗由杜遠汎之漸嚴搜接濟塞勾引  
之原漁樵船納稅下海者給有旗由內地  
人與海賊通賈送水米者曰接濟但使累  
朝片板不下海之禁毋弛則內宥息外姦自絕曩爲  
孽於海者豈盡海以外人歟海之人自爲賊則爲恩

海之人用海外之人還自賊卽爲直爲海始乎販卒  
乎掠爲賈不終爲倭廼樂小人之情哉酉之歲有巨  
扁杙梁庄其中人挾刀仗挈貨物轟然投岸起一夜  
絕跡是不知從何來亦又不知從何所匿去虞余海  
重產害勤干掇者憂非遠矣



縣圖經卷之七

終

海鹽縣圖經卷之八

隄海篇第四

海鹽隄海之役其事始見於唐縣舊志唐築塘起鹽官抵吳淞江袤百五十里捍海亦名太平塘王伯厚書引地理志云開元元年鹽官縣重築是年鹽尚與鹽官并縣故稱鹽官云重築知唐因乎前隄海從徠更遠也自後宋紹定中縣令丘耒築凡二十里見徐恭志咸淳中邑人常林官兩浙轉運使築新塘三千六百二十五丈名海晏塘見林本傳而元之至元二十一年尹顧泳修築者樹表復名捍海塘則元嘉禾



志具焉今考唐塘實竝海通築宋塘丈里減是或於  
近郭衝嚙地耑力築之今俯東門閱武場迤南屬之  
山澗寨意卽其處惟甃築程製莫詳然據林傳當時  
特請命於朝大發金粟益已帑興工斯役重大靡愆  
財力濟事槩可觀已宋史常林傳曰海鹽歲爲鹹潮  
害稼林請於朝捐金發粟復輟  
已帑築新塘是秋風濤大作塘不浸者尺許民得奠  
居歲復告稔邑人德之許相卿元尹顧泳贊曰汴  
流泱泱厥產惟良來司民社惠澤無疆海若憑怒氣  
吞百里限防弗樹民其魚矣令建長堤丈石三千聿  
空西山移峙海孺早懸殃民蘊隆如焚四野龜拆民  
沸鼎鱗合瀝丹悃控籲於帝神龍降庭沛洽甘對惟  
昔旱民誰續爾命維今有衆孰與爾境禱應昊天目  
捷紓灰堤屹海涯功存不世胥橋一杯累然蓬顆皆  
等秦華百萬憑安遺愛不忘白  
渠召棠鋪此誦詩千秋播芳 原鹽邑中海患獨劇

隄不可但已有說海自邑境南潮汐盛長迤流灌入  
浙江之口入之不盡入者激爲洄波緣海岸盪漱鹽  
旣適當其衝而鹽北南苦竹秦駐山趾角張不受漱  
則漱其坳中土疏易崩者於是東南五十里外之貯  
水陂南三里之藍田浦東北三十里之橫浦與所謂  
九塗十八崗三十六沙舊爲海潮限者盡淪爲巨洋  
鑄蝕一綫之岸以及城根僅半里許每東北風稍張  
怒濤乘之輒溢殺禾稼湛漂亭舍人民甚而都鹹流  
三吳窪縣中患如鹽同壑矣夫欲存鹽亟隄鹽欲存  
鹽以無壑吳尤亟隄鹽其事易策也役未可但已以



此 明興水土政益修役數勤顧隄亦數壞築葺無已時若適厄天數始洪武之三年從邑民潘允濟請

詔署令宋某治隄

舊志失其名

易土以石凡二千三百

七十丈堅厚中程矣後十七年潮大作隄竟潰云於時浙叅議閻察發民丁修之永樂初再潰右通政趙居任調浙西蘇松九郡民復築之宣德中又潰巡撫侍郎周忱募郡民七百人部分更築時以石堤內虛始築土五丈實其裏且著令非時巡護加葺無待大壞謀甚豫顧未十歲海溢塘卒大壞時知府黃懋博達多遠識以塘屢葺屢圯執咎匪人財縮故爾議大

採木石別築複塘度用銀二十六萬有奇正統九年奏聞 報可矣會遷去而僉事陳某與叅政謝某繼至改議因舊址役里甲雜用瓦礫填中包巨石爲之省費十九塘亦成後成化八年大風駕潮至塘不足以禦平地水丈餘民溺歿亾算廼思黃公議悔不用之後叅政邢簡僉事趙銘以府同知楊冠補葺麓完海復連歲四溢塘又盡圯不存而十三年副使楊公瑄來公故名御史嘗抗疏犯曹石二凶起謫所陞今官司水利講興作功甚銳遂以意改舊塘爲坡陀形築成凡二千三百丈當是時公日夕蒞海上程督甚



瘁民感之爲立祠血食

鄭曉名臣記曰公任浙江按察副使定海城北捍海塘縣

西走馬堤霏霽所裏外海塘健跳所及海鹽海塘皆公修築有功海鹽塘踰二千三百丈工尤巨禦患尤大陞按察使力振憲度察吏奸斷訟明敏無留獄甫半載病病亟寮案問候尚論築海塘法及濬西湖之利無片言及私  
張寧贈公詩曰吾聞浙江潮湧撼勢莫比迺流趨鹽官一射數百里海鹽當其衝適際南北趾何年作長防去郭數丈許疊石類懸崖壁立敵其淡剗中實外障高岸墜入水表裏河海間相隔纔一指譬如漬豕形皮好肉已毀潮來石奮角潮縮石拔齒時平漸離缺風迅遽披靡工役歲無涯漂蕩日常耳皇皇魚鼈民藐藐軒裳子剝牀不及膚解牛未得理豈無達務才遺我徒好語使君人中英萬物備一已咨詢度豁如顧眄心隱只發彼巉巖孤砌作盤屈峙軒然巨鰲側坦若長坡迤躄漏互蔽虧力勢相併倚盈不與石鬪縮不隨浪委肉厚骨不疎腹飽背復偻秦鞭竟空談漢絙無用此何期既倒瀾忽見急流砥但恐述者能不類創智美速成功易隳舉重力易弛安得百使君歷歲如大禹  
仇俊卿曰海上

舊有楊公塘碑記歲久損裂爲風潮飄沒初有司慮其不存輿而置諸墻堵迨今欲纂入縣誌苟搜不可踪跡昔呂梁碑文字磨泐可認者止三十六字人皆惜之今楊公勒石一字無存感更爲深  
**塘云**

坡陀者豎石斜砌磊碎石於內支之先是塘石皆疊

砌勢陡予公以爲潮激之生怒易潰也故稍斜之殺

潮勢因名坡陀其法昉宋王安石之鄞縣塘鄞人利

之廼築後餘十年亦竟就圯弘治初元知縣譚秀言

楊公塘用石斜甃歲久仄壓內向勢也請改築便於

是巡浙侍郎彭韶以知府徐霖通判蹇霆偕秀築仍

疊石如舊法而畧彷彿坡陀意內橫外縱以漸減縮合

斜用殺潮勢

時重築者九百餘丈佗未壞者仍舊按同知黃清海塘式謂坡陀塘用單皮



石墜砌譚秀改爲單皮眠砌止用一縱考宋祥縣志  
備載秀所修塘下施木椿上加以石縱疊於外橫疊  
於內外漸收縮以殺潮勢內則上下齊直厚築以土  
以防側倒石塘下闊一丈五尺上闊一丈高一丈八  
尺土塘厚一丈八尺高二丈二尺每二丈用椿木六  
十三株石一百九十五塊則知一縱之說有誤矣  
至十二年知縣王璽繼之備講縱橫之法而塘制始  
善矣王公塘築於故龍王廟前砥方石縱橫交錯爲  
之其法有一縱一橫有二縱二橫者下闊上縮內齊  
而外陂形勢隆固屹立潮衝不壞有歌其功者見邑  
人布政使吳昂集舊令廬陵王子陽也曾疊石砌官  
塘到今已歷三朝久穩臥龍崗百  
尺長王令曾無碑紀績老塘屹立比荆公相看父老  
從頭數四十年來保障功昂二絕雖俚謠不可不記  
其後正德中通判韓士贇水利郎中朱袞凡再修悉

依王公法而嘉靖初海連溢郎中林文沛奉命來

修塘以王公塘獨亾恙因呼爲樣塘益遵用之功成

詳林所自記記畧曰嘉靖壬午秋海潮大作癸未繼  
之塘圯視昔倍泛濫災及百里時文沛

督工治之舊制石多縱少橫今使縱橫交錯連屬不  
可解又必擇其廉隅之石布置必穩椿計四千八百  
石計一萬六千或拾於海壩之遺或運於數程之外  
北自丁又南抵宋庄因其舊而增之計七百五十七  
丈通舊堤爲一千三百七十丈是  
役也費銀蓋一千五百兩有奇其後十年增築教

場塘一百七十丈爲僉事蔡時十四年海溢築塘二

百餘丈土塘二千七百丈爲僉事焦煜分督者通判

陳文昌知縣董珪及平湖知縣黎循典時華亭徐階  
爲記云古之

君子以天下爲一身惻怛慈愛根於中而不能已  
是故憂未至則預爲之備患已迫則亟爲之防其又甚



也排羣議冒怨謫毅然必爲之而後世卒蒙其利今之君子以官爲傳舍憂民體國之志不能勝其自爲之私是故苟可無事則自托於不擾以幸且夕之安而訐謨至計動以爲迂拙其言可采附志之然是役也成未幾而卽崩布政吳昂疏稿謂  
十七年海又溢  
碑文尚未入刻塘岸先已傾頽云

築塘三百二十餘丈土塘二千四百三十四丈及四  
陡門爲僉事張文藻二十一年築塘若干丈爲僉事  
黃光昇三十年風潮復作塘壞築凡若干丈爲僉事  
胡堯臣邑人給事中錢薇記日是役也胡公以憲司提其綱雖風雨率卯出申入又節驕從供應以身儉先故一時從官咸奮若林丞士儀楊簿繼蘭及劉經衛國學章知事林以至揮使在役者罔不勤  
格而黃公光昇築法尤備著議具在曰予築海塘悉  
塘利病也最塘根浮淺病矣夫磊石高之爲塘恃下

數椿撐承耳椿浮卽宜露宜露敗易矣次病外踈申  
空舊塘石大者郛不必其合也小者腹不必其實也  
海水射之聲汨汨四通侵所附之土湫以入滌以出  
石如齒之疎豁終拔爾余修塘必內與外無異石先  
去沙塗之浮者四尺許見實土乃入椿入之必與土  
平仍傍築焉令實乃置石爲層者二是二層者必縱  
橫各五令廣擁以土使沙塗出於上令深皆以奠塘  
址也層之三若四則縱五之橫四之層之五若六縱  
四之橫五之層之七若八縱橫竝四之層九十縱三  
之橫五之層十一層十二縱橫又竝三之層十三層



十四縱三之橫二之層十五縱二橫三層十六縱橫  
竝二層十七縱二橫一層十八是爲塘面以一縱二  
橫終焉石之長以六尺廣厚以二尺琢之方砥之平  
俾緊貼也層表裏必互縱橫作丁字形彌直罅之水  
也層中橫必稍低昂作幞頭形彌橫罅之水也層相  
架必跨縫而置作品字形以自相制使無解散也層  
必漸縮而上作階級形使順潮勢無壁立之危也如  
是又堅築內土培之若肉之附骨然可免崩潰矣蓋  
黃公築法因縣令璽法益詳究之故獨善然爲費亦  
不貲率塘一丈如議築若石木材若人徒用銀三百

云黃公亦曰余築塘所不盡築尚八九則財訕故矣

公官至刑部尚書閩之晉江人初海塘無字號今自  
天字起至木字二十里共一百四十號每號二十丈  
共二千八百丈皆公所編也公督工有法所用者悉  
副任使嘗有言曰海塘如欲盡築非四五十萬金不  
可工役大興諸夫匠奸詭百出須得通判官五六員  
縣丞主簿等官二十餘員專駐於此朝夕臨之方可  
隄防卽臨之仍須耳目瞬息不離苟頃刻恍惚卽奸  
弊乘之蓋巨石一疊內藏疎畧更難移驗矣况事權  
不一此委彼奪旣奉命以去另代者經手不一遂難  
稽考又况所委各官賢否不同上下扶同塗抹了事  
者常十而六七可輕議哉邑人錢琦有詩贈公所委  
別駕陳白石云五更鐘動戴星出短褐肩輿一隸隨  
日給行廚二升米郡侯心事有誰知讀此亦卽可知  
黃公矣時知縣魏廷璽亦有議曰海塘之役近年  
以來憲司提督於上府縣分理於下非不欲成此大  
工但患有可懼弊有未革耳支給工銀易生侵尅之  
誦患一講議修築之法各恃已見紛紛爭勝莫知適  
從患二拘於估計制於成命不得相機隨宜有所增



損患三近海軍民多賴修塘以爲活計一身做工影射數名通同管工人役冒破工銀獎一又砌手志在常得修塘工食不肯砌築堅固獎二管工委官羈身海上颶風毒霧之中度日如年但欲速成了事孰肯盡心如幹家事獎三去此隆慶四年海溢水利僉事三患三獎塘不難成矣

李文績督湖州府同知藍偉來築用黃公法縱橫稍殺之費銀萬五千僅成塘九十餘丈而萬曆中兩大

役遂興僉事李公修築事宜曰國朝以來初築頗簡有以石斜豎貼土者有橫砌一縱者後來築

法漸詳有二縱二橫者三縱三橫者亦有五縱五橫者五縱五橫者計築一丈用銀三百餘兩歷年風潮衝塌猶屹然如故今欲砌如五縱五橫之式勢必不能酌量見在錢糧將龍王塘天闕要害去處定爲三縱三橫其餘往秋等字號時三年乙亥之五月晦夜潮勢稍緩定爲二縱二橫大風駕潮來水出地二丈餘溺歿者三千餘人侘內

縣河皆成鹹流田不可灌塘則盡崩先是嘉靖中邑

人布政昂嘗一再上疏請大發金錢築故塘豫備海

蓄之一旦隆慶之役助教仇俊卿彷彿昂意亦以爲言

前後皆中格至是變果大作昂之議曰成大功者必計久遠惜小費者反傷

財力海塘之役每歲均徭闔郡計銀七千兩自正統七年至嘉靖十五年僅百年已費銀七十萬兩矣其他承迎之費借倩之力又所不計今若能費銀十萬兩併舊有石料大爲修築一番可保百年無事是謂一勞永遠暫費永寧功之垂於後也久而民陰受其利益於無窮矣不然擊鼓日繁財力日窘海患日浚因循既久縱棄海鹽一縣田土於波浪之中一縣人民於魚鱉之腹旁縣恐亦未得安枕而臥也昔年名臣大典九郡之役始亦有見於此爾時撫臣謝公鵬舉按臣吳公從憲

探知府李椽知縣饒廷錫言具奏大指謂鹽隄浙鉅



役縣官宜無惜小費爲東南計永奠意甚愷切既得  
報而徐公棧代撫集僉事陳公詔張公子仁同知  
黃清議之清起家椽史故材敏搜考故時築法得黃  
公光昇前牘上之遂仿其法改用大石以清督丞募  
諸官三十餘人分築清勤於帥先且相度潮緩急衝  
稍增殺其縱橫石凡用銀十二萬有奇成塘七百五  
十丈土塘三倍之又開白洋河三千丈而餘塘欹且  
裂未盡圯者姑理砌理砌者砌層之上不及趾以節  
費役竣建海神祠及前憲使楊公瑄祠昭祈報鑄鐵  
象牛厭勝又植木菑盪浪冀淤沙塗護塘意甚美

天子嘉之賜棧等金帛陞秩俸有差清得超格擢同

知鹽運司

董份撰碑文曰鹽邑在海中若浮瓠然獨石塘號稱捍海而邑當秦駐白塔乍浦諸

山南北夾峙激海鼓颺潮與塘直其衝撼特甚故數被患視瀕海諸郡縣尤劇而塘輒易敗明興數苦之矣乙亥歲颶作濤溢入而塘敗十六七民漂不可勝計數十里室家爲墟而浙西數百里間水微鹵有海魚游焉識者皆寒心而大中丞謝公侍御吳公奏狀請治塘議費十六萬金有奇既戒期興役部署有緒矣而謝公入貳戶曹上簡少司馬徐公兼中丞來下車晉問塘事或言議政嚴往牒舉事占近世塘自正統間議築矣度費幾三十萬載在誌籍今事變過之而議費減半恐不可且創大者難卒復工鉅者難趣成勢非數年恐不可曷再請而徐圖之公乃嘆曰夫人臣下當憂民上當體國今縣官屢乏而浙帑素虛何再請也且古稱拯溺救焚言其速赴不旋踵也民旣漂溺吾有速拯之耳憮然不能須臾何徐圖也昔漢稱王遵以身填金堤吾其身許是塘矣乃亟親按行數僦泥涉塗蒙霧露冒寒暑勿懈因晉藩臬三



道召郡縣諸屬引父老集士庶而訊患害審便宜究長策與侍御鮑公條上得報可而公銳意督之蓋每飯未嘗不在塘每夢寐未嘗不慮塘事心兢兢嘗不違而藩叅朱侯舒侯前後相繼爲守道憲僉張侯爲巡道陳侯爲水道三道皆以才賢著名極一時之選與公同心日夜殫思畢知以効匡贊而公虛中盡下與相周旋然公擇善以人而任難自己其志奮勵足以感動而身親勤勞尤足表率以是諸屬皆奔走爭前諸役亦輻輳並進周後上下合爲一體以有成功本皆公竭精致之非若世之授指而責成端居而論績者也工始於丙子春二月成於丁丑秋九月僅閱歲云初公於石塘內加築土塘間行塘曰夫築土塘所以爲石塘唇齒護也然潮過石塘而無河以洩之則勢悍而益漂今從二塘間爲河使潮過有所容宜足以殺其悍亦古廝渠之遺意也乃亟鑿河而石塘之難難於聚石公既令博采洞庭杭湖諸山會河濬舟行轉石益便而舊石墜塘下者匿土中悉募人出之得石益多矣蓋塘之速成者以此先是議費十六萬者徒以石塘耳今加築土塘又鑿河又樹盪浪椿無數以抵潮又鑄鐵獸十二以厭水又舩橋五以通

道而屢費十萬有奇其存者五萬六千有奇焉余嘗適海上觀塘見石磨如珉其縫如繡外極精矣蒸秫如脂傅土如膠內極固矣工速費省而既固且精慮無不周事無不備邑人言自有塘以來未有若此者因登秦駐望海無際潮怒如震雷瀉如建瓴獨石塘力抗之亘如金城屹如砥柱上塘如重關如疊障而河經其中如長虹余乃作曰嗟乎壯哉其東南之奇觀而末久無疆之茂業哉於是邑人出於波濤安於衽席息於弔問興於謠歌思欲得余言紀功貽後世而三道遂以民情來懇余惟天下同患北有河南有海間者河嘗梗漕縣官不愛鉅費歲單無已者固以四百萬粟關軍國至重也然漕者四百萬粟所過之地而浙西東吳諸郡者四百萬粟所產之地其本末甚易辨也頃濤一搖而浙西水微鹵矣嚮使塘不修而益漂能無爲壑乎浙西壑而東吳能免乎故公匪獨一邑之功而實社稷之閔謨軍國之本計也余浙西人也故備著之公在浙靖夷氛擒大寇撫安黎元其功甚多而此特著其塘事如此是役也侍御鮑公復行而王公至益核實考成云於是天子嘉公功晉俸資金帛三道郡縣或遷或賚有差公名棧常熟人



謝公名鵬舉蒲圻人吳公名從憲晉江人鮑公名希  
憲長子人王公名曉淄川人朱英名炳如衡陽人舒  
侯名應龍全州人張侯名子仁無錫人陳侯名詔晉  
江人嘉興守黃君希憲前守李君椽同知黃清梁棟  
通判張繼芳伍希德胡嗣敬推官陳文吳海鹽知縣  
饒廷錫海寧知縣蘇湖皆竭力是塘者也宜并得書  
余乃系之辭曰昔在帝堯傲於洛水洪濤爲苗自古  
伊邇我 皇御極海奠南紀區域共貢山川式序云  
胡天吳弗率厥職鼓颶掀壽播蕩茲邑遠近震驚黎  
庶墊溺皇日念哉孰予俾又乃咨司馬汝往予治粵  
惟徐公名重當世經國之才憂民之志夙夜不遑日  
月靡暨舍其路車涉彼沮洳去其幕府數行漳癘豈  
曰安之心不容貫勞身率人竭精任事勤勞維甚策  
盡咸宜閔綱既綜小物不遺動中要領合其微機二  
三同心左右匡維羣僚庶尹各執其司奔走匪暇曷  
云怠弛萬夫攸集翁如雲隨舉石相杵聲如殷雷上  
下一體孰無競思人盡其力一以當百物適其用一  
以當什費是以省成是以疾一年之工百世之績爲  
邑作鎮脫其艱厄異時邑田浩渺無所濯者爲河高  
者被鹵今得耕耨是成樂土甌窶懷穰汚邪膺膺異

時邑居頽垣敗壁葭菼之宮魚龍之窟今作百堵妥  
其家室桑梓維陰燕雀來集異時邑人或漂或堙生  
莫厝足必莫招魂今有寧宇長子育孫丞丞昇其祖洽  
比其隣邑有茲塘欣欣相語異時哀號今式歌舞茲  
塘屹屹關國實大浙之咽喉吳之門戶是稱與壤充  
溢天府百萬軍儲副以筐篚四隩雖廣取足千里惟  
公之功社稷是輔朝之鼎臣時之砥柱公之精忠格  
於昊穹夏無霪霖冬無烈風歲以晴霽以庇羣工公  
之精誠通於神明楊憲正直屢顯儀刑異人蓬跣來  
告厥敬厥惟默相功是以成公拜稽首惟 皇寵靈  
天佑 皇家百神拱極四海底寧徼福一邑豈臣之  
功寔 皇聖德 皇祚萬年永永無斁史氏紀功昭  
垂珉石 陸光祖碑畧曰萬曆三年五月晦縣海溢  
之變盡破捍海塘石十九淪海無迹漂沒屋廬禾稼  
歿者不可勝數前督撫中丞謝公鵬舉以狀聞於  
朝既下議修築謝公察郡同知黃君清才廉有心計  
肯任事命之董工會公遷去於是 朝廷念海事至  
重特簡今兵部侍郎徐公兼御史中丞來撫治之公  
蒞事之明日率其屬親行海上齋戒潔牲虔祭海神  
以告肇工擇遣丞簿尉談繼先黃用中謝希周典史



陳柯王金把總王三錫指揮馬繼武李嘉元等三十餘人畫地分功并力合作謂同知清汝總余塘工盡其能無避短長之言工大小咸責成於汝謂海鹽令饒廷錫此汝邑事汝其悉乃心稟餉諸吏士百工無或闕乏汝五日至塘省視謂按察水利陳君詔爾惟專職其出舍於塘晝夜巡董謂按察備兵張君子仁月一往察之稽其勤惰賞罰用命不用命已而太守黃君希憲至郡勉僚屬以同心一志調匠於浙東諸郡採石於武康梅溪甌窰而力皆募海上災饑之民使取顧直以贍拏寓救荒意凡槎木鐵炭麻竹灰應用之物悉平布之民間郡吏既受事俾作治如式用石長廣厚八寸有度塘基下密椿皆二丈之木深入平之然後石層砌其上縱橫有數始運石募客舟舟不能過三巨石乃官造舟舟堅且安一舟所勝再倍石運易集大省輦昇之費同知黃又言石塘之內宜更爲上塘疏爲內河備決潰湧溢之患按察張君力主其策公納之乃復行視自金家路至章堰歷大小天洋河舊跡皆已湮塞而內塘亦夷自章堰歷大小天關至山澗寨舊無塘開新河卽以其土築新塘河可行舟運石益便已復更濬濶闊計長久石塘旣成得

上塘表裏相輔愈益堅完卽有巨潮越塘內河足以受之可分殺泄勢不至壅激爲害河之上舊替黃茅白壤名曰草蕩今可引漑以爲田工始於萬曆四年七月訖工於五年九月是役也按察備兵張君在事最久勤勩獨多水利陳君繼至勸勤率先人吏益奮太守黃敦道範物克相厥成邑令饒拊字供輸顏貌爲瘦別駕張君繼芳胡君嗣敬有購材造船採石之勞分守前參知朱君炳如參知舒君應龍先後輸猷寅恭協力郡司理陳君文炘和衷默贊成人之美前守李君椽謀始度費收樵溺者海濱人德之而前撫院司徒謝公違衆拔用同知清卒賴其力人服其有大臣知人之鑒是皆有功塘事者也按二碑陸尤實錄并而十五年丁亥秋七月海溢先所理砌塘復盡存之

圯時巡撫滕公伯輪行閱日理砌以省費也費卒不得省絀其議撤新築之條上方畧十得報允行於是以前副使夏良心同知曾維倫視工而公數馳泣之



程督甚勞歿於位傳公孟春代之終其功凡成塘全築者五百七十一丈半築者六百餘丈又土塘二千四百餘丈用銀六萬八千有奇奏聞如三年例賜金帛陞秩俸有差而滕公特予一子蔭旌勤事實異數也

公條上十議疏一議委官塘工大役總大綱者水利道臣之責移駐該縣督理其董率官役工匠收放錢根本府同知一員專理之次則蘇湖二府採石合委府佐二員分管塘工應用官十六員入官採石應用官四員俱合委衛經縣丞簿等職於通省選取庶足克任使二議錢糧嘉興府屬原歲派塘夫銀七千積今十五年豈不綽然有餘而有司視爲緩圖任意那借今除搜括本項外動支該府驛傳積餘銀七縣預備倉穀銀并衢州府驛傳支餘銀金衢嚴溫處五府見貯糴穀銀共足原估之數免令加派地方二議塘式舊塘惟典史吳允隆所築及三監生罰修者自嘉靖至今不壞堪以爲式蓋砌以魚鱗又二面收

縮石堅工細故也今議以四縱六橫起脚二層闊二丈七尺五寸自第三層漸收而上每層內外各收七寸至第十八層結面闊九尺三寸石必六面方平砌必縱橫相制蓋面之石又必內外皆縱以順水勢仍於安砌之時每層必先鋪地驗過面面相同縱橫相合方許擡砌以祛偏斜貼襯虛飾草率之弊四議採石舊議塘石長六尺闊厚二尺二寸不如數者亦爲折算以故虛冒生弊茲議蓋面用大石外其餘以長五尺闊厚一尺六寸者爲準每塊給價伍錢出山麓料仍多二寸以備整削不許別開大小折補之端致生弊竇其驗石必取六面方平稍不合式卽行揀退運石船隻上次杭嘉湖三府編派打造共三千五百八十九號費至三萬餘金及工完變賣所補無幾今莫若令採石宕戶包運諒亦樂從又或廣示招募宕戶有力者自載合式之石赴塘驗收照前給價採買招買並行事可兼濟五議木椿海塘之築全賴椿木入土之深則爲基孔固議用中三丈木徑四寸者截作二椿各長八尺或委官在本處廣招木商載至平買或於杭州南關聚木地方招商收買每塘一丈釘椿二百五十九箇又必先於塘基內去浮沙數尺見



實土方如法密釘庶椿堅基固石塘賴以無虞六議  
工程海塘大役必有分任後可責成功今議全築石  
塘三百六十五丈每官分理三十丈以十二員管之  
修築補砌石塘七百九十九丈每官分理二百丈以  
四員管之每新塘一丈限十日修補者二日斯事無  
推諉功可期就七議收支海塘錢糧支放頭緒甚多  
稽察密則弊無所容放給時則人速需惠舊議委嘉  
秀二縣司牧海鹽縣司放管工官造冊送總理官總  
理官造冊送水利道道府行縣給發申間吏書  
展轉查覈才踰耽延爲弊反滋夫匠銀難到手未免  
結債豪門苦不可訴今議銀俱解發海鹽縣貯庫聽  
縣官收掌總理同知備將各該採石買木管理塘工  
委官每官置簿二十扇送院印鈐發各收領採石官  
日開採運到石塊若干買木官日開買運到木椿若  
干應給銀若干註簿總理官驗收訖卽行該縣照數  
支銀封送總理官驗散應找給者找給應全給者全  
給毋令宕戶木商守候其管理塘工各官每日將領  
過木椿若干木匠削過釘過若干領過石塊若干石  
匠琢洗過檯砌過若干應給銀各若干開填簿內每  
五日送總理官查閱無弊卽行該縣照簿依數將銀

兌准封送總理官同各委官當面鑿鑿包封喚集夫  
匠逐名唱給隨造冊送水利道稽考仍同原發填過  
簿送院查閱庶稽考有法支放及時夫匠旣得速需  
實惠而衙門人役之敝亦清及查夫匠向有計口償  
工之說大爲冒破今惟計工定價如削椿釘椿琢石  
砌石拆拽扒沙等項俱照工給銀則老弱夫役不堪  
匠作雖欲浮食其間自不可得此又考工節財一法  
八議土塘石塘外當風濤內必依於土岸此貼備土  
塘所不容緩往年土塘隨石塘並築故石塘工作麓  
踈無從詳驗今宜俟石塘築完之日閱視內外如式  
委管工官督率人夫挑取實土緊貼石塘填築斜坡  
近塘者高與塘等築令極實土始不散庶水過直瀉  
石塘益固九議體恤塘工興作之際委官必須朝夕  
不離塘所乃可照管櫛風沐雨勞苦萬狀議每日給  
銀二錢每官除撥驛船住止外又各設蓬廠一座仍  
撥夫二名聽其差用俾日給稍克而風雨有蔽役使  
不乏乃得盡心所事匠作人夫多係各縣應募或係  
外府投克今議令於每官廠側各起搭草蓬四五區  
使安歇炊爨糜庶物料得看守之便赴工無往返之勞  
而居停亦免苛索之苦十議稽查築塘工役非小惟



侍賞罰以爲勸懲除在工各官有偷安誤事及侵尅不檢者卽時分別發落外其塘工通完之後容令嚴行查閱如果經畫得宜修砌如法有裨保障者將各司道府佐以下大小委官據實薦揚上請優錄勞苦功高者破格擢用庶賞罰嚴明人心自相戒勉大功之就可期矣 黃洪憲撰碑文曰鹽官故襟海而治距東門不數百武石塘橫亘壁立盤旋蜿蟺若飛虹遶天而下睇海泰自九王門諸山巖巖束隘衝激飛沫每疾風怒濤欲野歎山震撼颺蕩塘不克砥而善崩蓋自唐開元迄明興遷築遷圯費縣官金錢如塞漏卮而沃焦釜萬曆四年大司馬徐公新築見謂石畫乃丁亥之秋颶風駕海潮而上塘之衝圯者什四五漂沒田廬人畜無算前撫臣滕公亟上狀請修築惟時郡國倉廩或困於三服官而又大青大疫旱澇頻仍百姓凜然莫能必其命卽欲加賦簡役其道何繇故有謂姑理砌以須後舉者滕公獵纓語曰海塘係三吳屏蔽蟻穴不完千里盡爲瀉鹵吾何計目前而重後費不使一勞永佚哉於是偕水使者暨藩臬諸大夫蚤夜講畫利便復條爲十事以請簡材官計錢穀定式度採石料益捷木築上準分訾程謹欽散

厚餼稍覈功績議咸報可中丞公乃以身總其凡而水利夏公出舍海壩經營盡瘁少府曾君專司督理部署諸役若丞若尉若幕若掾矢力錯事無不人人自奮者僉議旣同百堵皆作令中丞傳公嗣來蒞之躬閱申飭以藏成事工勦於戊子之二月越庚寅二月告成原估七萬餘緡其後續議增築費僅六萬八千七百奇而贏千有餘金總之全築而爲丈者五百有七十半築而爲丈者百稍築而爲丈者五百有三十爲陲門者座有二爲天闕備塘者丈十有七爲土塘者丈一千三百有七十延袤幾二十里其築塘基必去浮沙令見實土乃下捷木而內外甃石必取其堅厚光平者縱橫上下如魚鱗綺錯勢相聯繫俾潮無直射石無旁泐有金埔砥柱之固 天子嘉諸大夫勞勩賜晉秩有差余嘗考按顛末茲一役也其多乃前功而可爲後法者便有五徃歲海溢守土者憚於上聞至令士庶叩關乃得報可而又部覆移咨動淹時月甚或有司齟齬言者不爲亟治此何異假越人以救溺哉今使者蒿目憂民朝聞夕奏而又以便宜從事役不逾時財不侈費便一徃歲鳩工多履畝益稅事罷輒著爲率民甚患之今時詘舉贏而賦不



加額惟括諸郡儲傳塘夫之羨者約四萬有奇而又  
出備賑倉穀令當稟鬻者赴工取庸抵原估二萬贏  
拯溺賑饑一舉兩得使二往歲塘石率取之洞庭武  
康比年饑疫宿戶丘墟採辦甚艱茲復於海鹽南境  
顧嶺葛山開鑿岑麓得石磊礧而又爬剔其沉且棄  
者石料四集工役易興便三往歲董役者咸宿官邸  
譏察罔恒故工多盜竄詭程而靡廩餼茲分官董  
視人給一舟令芟舍海上朝夕行舂楫間程能計日  
勞其勤而扶其惰者又道旁蓋廠俾量時休息免風  
霜蝨厲之侵故民日踴躍以趨而不歌東門之誓便  
四往歲海塘夫銀率輸府庫以待堤繇其後島夷內  
訖有司徵調那移不復爲備請專勅水利別駕駐海  
上其原額夫銀令貯邑庫以備歲修而又禁民之墮  
田者竊石者陰利災而覲乾沒者自是隨罅隨築歲  
以爲常毋臨渴而後井便五之數者經營大備於前  
良法可垂於後役鉅而賦不增時艱而民不憊令國  
家根本之地百年安於覆盆非諸大夫明智體國極  
心不二何能建必然之畫而成累世之功也哉先後  
董斯役者巡撫滕公名伯輪旣寧人傳公名孟春高  
安人水利副使夏公良心廣德人總理同知曾維倫

樂安人海鹽令黃之俊清江人謝吉卿晉  
江人其餘諸執事爵里名姓具載碑陰云

後三十九

年知縣喬拱璧以銀四千八百有奇再葺有錄記所  
費又十一年爲天啓二年知縣樊維城以塘圯裂者  
二十八丈爲請郡以縣丞李筦銀二千九百再築之  
塘卒賴以不壞自兩大役來又數十年云大抵海潮  
歲惟夏秋兩時大月惟初三十八日大天闕宋庄以  
及龍王廟皆直潮衝最亟閱武塲以北爲差緩先時  
築塘發郡民丁築之不足得發之徧郡民丁出錢代  
徭始弘治中知府徐霖議條鞭之法行遂派爲畝稅  
郡七邑歲合徵銀七千嘉靖中半之今復故額然兩



亥之役取諸歲徵所積猶不給搜藩司兵餉驛傳羸金及他郡贖穀價以克而前亥之役用銀爲多則本郡及杭湖兩郡畝復益稅有差皆取 旨行其無恠

征繕救一方民如此

萬曆三年加派數本府田地每畝派加銀一分共銀四萬二千

七百有奇杭州府田地每畝派銀六釐共銀一萬六千七百有奇湖州府屬田地每畝派銀五釐共銀一萬六千六百有奇 萬曆五年布按二司善後議曰海塘當大海要衝爲浙西藩蔽一遇潮患首及海鹽而嘉興諸縣勢必漫溢是以舊額歲派修塘銀七千兩於七縣派徵蓋以利害相關故也頃緣波濤稍靜當事者過爲節省遂減其半加之侵那拖負遇變倉皇近既議復原額相應每年預行徵貯府庫鑿字不許那移遇有修築應用方許動支庶儲蓄不致空虛而臨時隄築有賴 萬曆十八年工部覆巡按浙江監察御史蔡海塘善後事宜疏內稱原派嘉興府等七縣塘夫銀以後年分照數派徵通發海鹽縣庫收

貯聽候歲修塘工各項支費用剩存庫以備不虞不許別項及別衙門那借水利道於每年二八月潮水盛發之時躬親巡歷嘉興府水利通判不妨原管事務移住該縣本部仍咨吏部今後該府水利通判文憑添註兼督海塘字樣以便行事毋得 因循怠事以致日後大壞徒滋勞費 塘之云土塘者有二一附石之土塘塘成附土於裏以培之黃公

光昇云若肉附骨者卽斯塘也然第以土附水終得湫之法先用碎石細帖於內後附以土水隔於亂石卽及土勢弱不能侵矣此亦黃公法後有調灰漿彌灌者故善曾公維倫曰是太糜且沒土中鈎考未易滋侵冒不可一則內之備塘又在附石土塘內相去稍遠有此塘始可撤外塘以築卽石塘圯潮不至闌



入黃公懋所議複塘者是也自丁父塘而南至秦駐石塘內盡鹽場從隄門引水漉鹽田尤賴複塘隔之夏公良心塘成後嘗獻議欲每歲增築此塘令高厚備外塘非常見海塘錄嘉靖二十年通判陳嘉猷知縣魏廷璽有修內土塘議與夏公議同畧曰內土塘一帶正統中知府黃公請築以防不測其勢若緩其實則捍海之大可恃者在此歷年既久勢漸傾頽修理之法固當用石以砌其外之根脚其下亦當用木椿令其實縫用石灰令其密舊窄者濶之舊低者高之舊缺者補而平之務求堅固迤比單塘亦須於石塘之內補而築之大凡海塘與工之序必須自內塘始則人工可施得以久用其力無速成不堅之弊其培護塘址一議尤善議曰海塘埋椿莫址綦固矣顧海潮日再至根址洗剝終且露昔人嘗於隄外植椿帖石護之其

法具在今宜取小筏運沿海亂石盡納塘根有浮露者積高廣丈許掩之第令碎石常在填淤漸聚塘可永固是尤善後一策惜未有舉行之者而白洋河之鑿互有利害議前後獨不同河起自南敵臺沿複塘鑿之至秦駐山以通於石鼓橋袁如外石塘竝里二十初鑿時以為潮溢賴此洩之實不然溢非丈尺渠可洩也利運石并取土附塘爾先嘉靖九年有議鑿此河者知縣夏公浚力持之其言曰海塘形厚者僅七八丈薄者至四五丈以此捍海勢亦甚危昔周文襄嘗增土五丈於裏塘以防衝決其慮甚遠蓋築塘



之法石必大始堅土亦必廣始固也今藉數丈之土  
爲基賴河身素淺堤勢不傾若濬此河則但可增高  
不可培廣萬一基薄而決雖盡鞭秦山石爲之亦何  
所附如謂取土運石良便成大事者豈惜津搬小費  
乎與海爭利未見其可至萬曆乙亥此河竟開云又  
不鼓橋至敢浦向不通舟時因自洋河工畢復開此  
河則地方至今便之海塘錄載有全文云水利道奉  
撫院徐批敢浦千戶所中稱敢浦至泰駐山計地一  
十餘里河港未通舟楫不便乞照白洋河一例疏通  
云云依行同知黃清會同海鹽縣知縣饒廷錫督同  
典史陳柯把總王三錫原委百戶余騰蛟丈量得自  
石鼓橋新濬河東起至常川舖官路止原有舊河形  
跡止應加濶濬溪又自常川舖起至黃泥寨迤南至  
敢浦東關外近城濠河止或自高阜新開或囚民地  
濬通共長二千二百二十五丈七尺再照此河一開

不惟利於地方灌溉亦且便於衛所糧運議自石鼓  
橋至常川舖計長一千三百二十三丈五尺每方丈  
該銀四錢計銀二千八十六兩零聽委官典史陳柯  
管理同知黃清知縣饒廷錫往來提調其常川舖起  
至敢浦城河每方丈亦宜給價四錢但此河大有裨  
益軍兵而軍兵月有糧餉先給月糧三箇月每方丈  
比民無糧無役者減銀一錢止給銀三錢共計銀一  
千五百三十二兩零分委指揮馬繼武督同千戶呂  
繼忠百戶余騰蛟等管理聽把總王三錫提調通計  
用銀三千六百一十九兩零其自縣致場北至乍浦  
亦議開河取土築塘以錢糧不給中止北路潮勢小  
而荒蕩多利於開濬與南路一帶不同當時工勤於  
南而顧靳於北


胡震亨曰鹽中海患數矣乙亥之變

余方幼父母攜登樓避之足未躡梯而水至聞四外  
乞救聲不絕風撼樓欲傾相顧無策明起視城河屢  
蔽流下矣後十五年之變偕長老觀於圮塘見海中



盪出昔人井竈故基拾甃井磚而歸蓋數百年外物  
尤惻然傷之非此數公者商方畧請救援後先隄治  
不皇鹽尚有生種遺乎哉跡其所興築或積久始壞  
或未幾卽崩財有覈濫術有工踈致然要未可同年  
語然余所謂適厄天數亦時有之其以勤吾民効績  
縣官一也敢爲之差次乎楊公煌煌列食俎豆滕公  
歸室延賞厥後民不能報 天子代報之矣佗湮沒  
未章者尚有善乎僉事陳公詔之言曰先王制祀典  
以勸將來惟茲咸勤百工均宜侑食楊公庶下昭美  
報况其大者斯言甚廣吾紀諸公隄海績用終以此

楊公豎砌坡陀塘式






布揚公塘蓋倣王荆公居鄞修築定海塘式每丈  
 不過用浙中薄麻石六十餘塊砌法如斜坡用殺  
 水勢石底之外俱用木椿以固其基砌下石塊亦  
 用一橫石爲枕循次豎砌裏用小石填心外用厚  
 土堅築工料之費甚少舊亦尚有存者  
 者至乙亥歲風潮異常始盡圯壞云

黃公五縱五橫魚鱗塘式

內

土塘






右五縱五橫塘每丈疊砌一十七層該用新石四百八塊每塊價銀五錢該銀二百四兩底石四十四塊每塊用椿八箇共椿三百二十箇每椿二箇用三丈木一株共椿木一百六十株每株價銀七分該銀一十一兩二錢砌手砌第一層新底石四十四塊每塊下椿工銀八分該銀三兩二錢砌第二層至十七層止共石三百六十八塊每塊工銀二分該銀七兩三錢六分石匠琢洗新石四百八塊每塊工銀五分該銀二十二兩四錢扛擡新石四百八塊每塊截長補短大約該工銀一錢二分二釐該銀四十九兩七分六釐搜石麻索五十筋每筋銀一分該銀五錢拆拽舊塘扒沙洗脚工銀三兩擡石扛索一副該銀六錢二分鐵犴一根用熟鐵八筋每筋銀二分該銀一錢六分鐵鉞山鏈各一把每把用鐵三筋共六筋每筋銀二分該銀一錢二分木匠做椿三百二十箇每箇工銀五毫該銀一錢六分漁戶絞索五十筋每筋工銀三毫該銀一分五釐竹扛二根每根銀二分該銀四分木犴二根每根銀五釐該銀一分以上通共工料銀三百兩五錢六分一釐其四縱四橫者疊砌一十五層

外

此至滿潮

沙塗



橫

縱

橫

縱

橫

縱

自此



用新石二百九十塊每塊價銀五錢該銀一百四十五兩脚椿二百五十六箇該銀三丈木一百二十八株每株銀七分該銀八兩九錢六分砌手砌底石三十二塊每塊下椿工銀八分該銀二兩五錢六分砌第二層至十五層止共石二百五十八塊每塊工銀二分該銀五兩一錢六分石匠琢洗新石二百九十塊每塊工銀五分該銀一十四兩五錢拆拽扒沙洗脚工銀二兩七錢拽石藤索四十筋每筋銀一分該銀四錢擡石拉索一副價銀六錢二分拉擡新石二百九十塊每塊截長補短每塊約該工銀一錢二分二釐該銀三十五兩三錢八分木匠做椿二百五十六箇每箇工銀五毫該銀一錢二分八釐鐵孔一根用熟鐵八筋每筋銀二分該銀一錢六分山鉗鐵鉞各一把每把用鐵三筋共六筋該銀一錢二分漁戶絞索四十筋每筋工銀三毫該銀一分二釐竹扛二根每根銀二分該銀四分木孔二根該銀一分以上通共工料二百一十五兩七錢五分



海鹽縣圖經卷之九

官師篇第五之上

邑掌故前簡畧具矣孰轄而理諸實惟人則受之以  
 官師首令長所總也次學博諸屬所析也又次則聯  
 事之武衛所互毗者也符而涖鐸而迪介而扞古迄  
 今洵多賢矣姓名里貫與厝施事蹟舊志有載必續  
 而謹書之蓋一展卷得位著之經焉識交承之叙焉  
 惕借鑒之思焉疇曰卑棲雲霄屢致疇曰傳舍碑版  
 永賁一時祝詛千代褒刺匪調惟公告爾籤記

令長

知縣題名壁記曰縣令之職雖卑實與民尤親  
 得其人百里蒙福非其人一邑受敝孔門四科



海鹽縣圖經卷九



政事首稱冉子然夫子則曰求也千室之邑可使爲宰求言志亦曰方六七十如五六十比及三年可使足民夫以冉求之藝所志乃不滿一國之地而夫子所許不過一陪臣之邑則其以撫字爲重可知也後世類以州縣爲徒勞之職一切苟且罕復以民爲意邇來令益以輕循習益未以簿書案牘之具爲能以期會之峻應辦之速爲捷苟可以自利則必力焉凡所以爲民者不問也矧且希清望者不屑爲之憚訶督者避不肯爲凡爲之者率視爲猥冗且羞薄焉若是則求所謂循吏者又烏可得焉海鹽爲秀望邑惟唐長慶中李諤鑿涇以利民號稱賢宰它槩無所見至本朝爲令者時有其人而舊無壁記余始至謁肅簡之祠究魯浦之遺利乃知魯公嘗爲令于此實咸平六年也又今左相司空何公元祐初亦嘗宰斯邑是以邑人每誇二公爲榮擢焉余竊謂武原雖僻陋令之職固卑矣間有名臈鉅公出焉是不可以無記遂推考簿籍得爲令者名氏斷自魯公而下凡四十四人刊之于壁因併書近世縣令之弊使來者得覽焉政和三年冬十月丙子西安徐嘉言記 續題名壁記曰秦始皇郡縣天下粵二十年甲戌海鹽乃得

縣名歷漢至唐累更廢置攷之載籍自漢而上爲令者姓名缺焉所攷者東漢一人陸讓六朝十二人吳步騭孫誼爲海鹽長陸禕爲海鹽侯東晉鮑陋齊王思規王靈慶孔滔蕭特梁劉霽陳徐份顧野王監海鹽縣唐四人劉長卿攝海鹽令姚南仲李諤徐芳知海鹽務自秦置縣迄我宋紹興辛亥凡閱歲一千四百一十有九政和二年今徐嘉言哀集前人名氏自魯肅簡公而下刻之廳壁其後相續書之至余衍而止直養承乏暮年暇日因再續之以告來者紹熙元年六月中泝邗城李直養識 歷代縣令題名記曰惟王建國設官各有分職以爲民極縣令之職掌縣治以守縣地親縣民以二典視郡經縣治一曰政二曰教以六事視郡理縣治一曰吏二曰戶三曰禮四曰兵五曰刑六曰工以三德舉縣治一曰清二曰慎三曰勤正月之吉始和乃鄉飲于學讀法講禮彰善癉惡使士民觀治法乃施典以先有司乃施法以分六曹乃施德以勤有政祀先師祀風雲雷雨祀山川社稷城隍則成民以致力其神以時造戶版以登民數賦數以時貢士大朝覲則視視羗省以會于京師有德澤禁令則承宣於境內有水旱則有災傷之訴



以免民租有孝第行義貞烈聞于鄉則有表揚之奏以樹民風有鰥寡孤獨則有養歲終以二稅歛財賂以九式均節財用以九貢供邦國之用以九等定民役以月計上郡以歲計上省三歲則考績以聽于冢宰縣令之職難矣難矣海鹽自漢唐以來為州為縣其稱名也為海鹽為武原為故邑其寃為海鹽其制地也有方千里或四五百里或百六十里制以時異治以職同故變而通之存乎時推而行之存乎職神而明之存乎其人神明其政以為民極存乎其德行自漢以上吾不能徵之矣歷唐而五代而宋而元以入我明其傳記所載觀者吾得覽觀焉有若魯宗道有若何執中有若趙汝愚其殆庶幾乎縣令之職難矣難矣浚來也晚憇甘棠則慕之不足則尚友之尚友之故論其世求其職作歷代縣令題名記嘉靖九年某月海鹽縣知縣事玉山夏浚識按李記陸偉海鹽侯是封爵非令也今刪去補入者更多

秦先漢無攷以東漢為始

白沃史君順帝永建二年令也初縣治在武原鄉陷為當湖君乘馬走指得湖東北一角遂不沒民建廟

祀之

廟一在乍浦一在海鹽砂腰村今訛為白馬廟者是

夫長水之陷也令若

幹相顧歎為魚何如君精誠感通畱沮壤于舊郭顛感昨于新堵也種族有存三遷益大君功為衆父冠矣

陸穰字子仁樂安人

見唐書宰相世系表云尚書右僕射樂安侯逢之仲子父曰表

子曰恢仕晉為諫議大夫按晉與漢中隔魏代之十八年於子之為晉官知父之為漢令亦在末季桓靈朝也

褚盛河南陽翟人令海鹽子孫遂家鹽為邑人唐贈

禮部尚書無量其十一代孫也

見文苑英華唐蘇頌誌文又萬曆志載漢



令蘇章益據漢書蘇章傳嘗爲武原長也。不知武原是鄉未嘗爲縣。惟彭城有武原縣。豈得謂是吾土收乎之。

### 三國吳

步騭字子山淮陰人。博研道藝。靡不貫覽。避亂會稽。主人以貧賤過之。孫權召爲主記。與諸葛瑾等並著佳名。除海鹽長官。至丞相騭嘗諫權罷守百里。各得其人。庶政自康。今諸縣並左備吏。小人銜命不務奉公。而作威福無益。視聽更爲公害。不如一切罷省。又周昭嘗言士大夫患有四急。議論爭名。勢重朋黨。務欲速凶。身害國多。因於此騭獨不犯此四者云。

孫誼吳人。父將軍河本。姓俞。孫堅姑子。策愛之。賜姓列屬籍。誼爲海鹽長。早卒。

葛公失其名。丹陽人。學無不涉。究測精微。文藝之高。一時莫倫。有經國使才。仕吳。歷宰海鹽及臨安山陰。縣入爲吏部侍郎。御史中丞。廬陵太守。吏部尚書。太子少保。中書大鴻臚。侍中。光祿勳。輔吳將軍。封吳壽縣侯。稚川大父也。見抱朴子

### 晉

鮑陋隆安中爲縣令。海賊孫恩作亂。劉裕築城海鹽。故治禦之恩。去向滬濱。裕追恩陋。遣子嗣之。率吳兵。



一千前驅為賊所沒陋後終益州刺史

按宋高祖本紀云高祖追

孫恩嗣之為前驅高祖多設伏兵然一處不過數人賊萬餘迎戰前驅既交諸伏皆出賊謂四面有軍乃退嗣之追奔為賊所沒高祖守海鹽城時兵力甚弱今賊去弃城而追設伏雖多人數自少情形一露難免反攻嗣之陷沒政繇眾寡不敵力竭而盡命耳失策在裕非關嗣之父也乃本紀又稱高祖先語嗣之賊兵甚精吳人不習戰可在後為聲援倘前驅失利必敗我軍不從云云史若該各嗣之為高祖出脫者守土吏不難遣其子從王事衛疆圍至以身殉矣猶不免失律譏後將何勸故特為洗之

宋

王孚瑯邪臨沂人大明末為縣令泰始初天下反叛唯孚獨不同逆後官至司徒記室參軍

齊

王思規長沙人

詳見叢記

王靈慶

孔僉會稽山陰人少事師何胤通五經尤明三禮孝

經論語生徒數百人三為五經博士為海鹽及山陰

令

史云僉儒者不長政術在縣無績

周顥字彥倫汝南安成人隱居鍾山應詔出為海鹽

令孔德璋作北山移文焉終國子博士

德璋移文曰鍾山之英草

堂之靈馳煙驛路勒移山庭夫以耿介拔俗之標蕭灑出塵之想度白雪以方潔干青雲而直上吾方知之矣若其亭亭物表皎皎霞外芥千金而不眴徒萬乘其如脫聞鳳吹于洛浦值薪歌于延瀨固亦有焉豈期終始參差蒼黃翻覆淚翟子之悲慟朱公之哭乍迴踪以心染或先貞而後黷何其謬哉嗚呼尚生



不存仲氏既往山阿寂寥千載誰賞世有周子高俗之士既文既博亦玄亦史然而學遁東魯習隱南郭竊吹草堂濫巾北岳誘我松桂欺我雲壑雖假容于江臯乃纓情于好爵其始至也將欲排巢父拉許由傲百氏蔑王侯風情張日霜氣橫秋或歎幽人長往或怨王孫不游談空空于釋部覈玄玄于道流務光何足比消乎不能儔及其鳴騶入谷鶴書赴隴形馳魄散志變神動爾乃眉軒席次袂聳筵上焚艾製而裂荷衣抗塵容而走俗狀風雲悽其帶憤石泉咽而下愴望林岫而有失顧草木而如喪至其鈕金章綰墨綬跨屬城之雄冠百里之首張英風于海甸馳妙譽于浙右道帙長殯法筵久埋敲朴誼囂犯其慮牒訴倥偬表其懷琴歌既斷酒賦無續常綢繆于結課每紛綸于折獄籠張趙于往圖架卓魯于前錄希蹤三輔豪馳聲九州牧使我高霞孤映明月獨舉青松落蔭白雲誰侶澗戶摧絕無與歸石逕荒涼徒延佇至于還颺入幕寫霧出楹蕙帳空兮夜鶴怨山人去兮曉後驚昔聞投簪逸海岸今見解蘭縛塵纓於是南岳獻嘲北隴騰笑列壑爭譏攢峯竦諒游子之我欺悲無人以赴弔故其林慚無盡澗愧不歇秋桂

造風春蘿罷月騁西山之逸議馳東臯之素謁今又促裝下邑浪拽上京雖情投于魏闕或假步于山嵒豈可使芳杜厚顏薜荔無耻碧嶺再辱丹崖重滓塵游躅于蕙路汗淥池以洗耳宜高岫幌掩雲關歛輕霧藏鳴湍截來轅于谷口杜妄轡于郊端於是叢條噴膽疊穎怒魄或飛柯以折輪乍低枝而掃跡請迴俗士駕為君謝逋客按李善注馳妙譽于浙右引字書江水東至會稽山陰為浙右顯本傳建元初為山陰令此可據也惟呂向注謂應詔出為海鹽令未詳所出何書陳晦伯天中記駁之甚明似當刪此友人姚士粦却謂彥倫甘為吾土一出傳得稚珪調笑千秋亦自不惡唐人注齊撰相去不遠必有別聞不妨信着轉借為泰山墮淚爾姑並識之以俟博通者

梁

### 孔滔會稽山陰人

滔孫即陳都官尚書範也於範傳存滔名秩難定其幸與不幸

蕭特字世達齊高帝曾孫子雲之子早知名善草隸



梁高祖嘗使之書及奏謂子雲日子敬之書不及逸少適見特迹遂逼于卿官太子舍人出為海鹽令坐

事免

簡文帝撰特墓誌曰威鳳五色朝陽千仞孫枝發響將雛流韻瑾既誕子恒迺璫亂銀鈎之巧

重世通雋况此臨池蟬輕露澗大率多贊其書法云

劉霽字士湮平原人性至孝博涉多通天監中歷位

西昌相尚書主客侍郎海鹽令前後宰二邑並以和

理稱後除建康令不拜著釋俗語八卷文集十卷

祖撫仕海鹽令有集三十卷

見隋書經籍志

顧野王本海鹽人梁末太尉王僧辯使監海鹽

詳人物篇

陳

徐份陵之子少有父風九歲為夢賦陵奇之解褐為

秘書郎累遷太子洗馬出為海鹽令甚有政績秩滿

復入為原官年二十二卒性孝弟陵常疾篤份燒香

泣涕跪誦孝經日夜不息如是者三日陵病豁然而

愈親戚皆謂孝感所致

唐

劉長卿字文房河間人開元二十一年進士至德二

年攝海鹽令終隨州刺史詩集十卷元好問曰學詩

顯門有白首不能道長卿一字者唐高仲武云長卿

為吏剛而犯上兩遭遷貶皆自取之

按唐詩紀事載長卿官監察御史



史以檢校祠部員外郎為轉運使判官知淮西鄂岳轉運留後鄂岳觀察使吳仲孺誣奏敗潘州南巴尉會有為之辨者除睦州司馬終睦州刺史今仲武云兩遭遷貶則初貶當在官御史前矣長卿有攝今上節度李公詩云昔忝登龍首能傷困驥鳴遂令辭短褐仍欲請長纓罷權後還舊居詩云累辱群公薦頻雷一尉微去綠焚玉石來為采葑菲州縣名何在漁樵事亦違讀此知長卿登第為尉後以事貶廢復應李公浙西幕府辟為監察御史始承攝縣之遣也韓愈集載鄭群以進士為鄆縣尉在鄂岳幕府拜監察御史亦此類御史雖雄職其時例得借為幕衙攝縣自宜耳舊志却謂攝縣後擢御史泥于今制失考矣長卿海鹽官舍早春及過橫山訪顧山人詩別見

姚南仲華州下邳人乾元初擢制科授太子校書右補闕大曆中納讜言帝嘉之進五品階坐善宰相常袞出為海鹽令浙江東西道觀察使韓滉辟為推官

歷鄭滑節度使入朝授尚書右僕射卒贈太子太保

謚曰貞

南仲節度鄭滑監軍薛盈珍恃勢奪軍政數毀于德宗頗疑之貞元十六年盈珍遣小使

程務盈馳驛奉表誣奏南仲陰事南仲裨將曹文洽亦入奏事京師伺知盈珍表中誣文洽私懷憤怒遂晨夜兼道追務盈至長樂驛及之與同舍宿中夜殺務盈沉盈珍表于廁中乃自殺日旰驛吏闢門見血流塗地旁得文洽二緘一告于南仲一表理南仲之寃且陳首殺務盈上聞其事頗駭異之南仲慮豐深遂乞入朝久之授尚書右僕射以其事頗異附載此亦見南仲夙昔得士心可想為今時風概也

李諤長慶中為縣令察俗利病開古涇三百一通引

河流資灌溉民到于今利之

事見唐書地理志詳前水利中諤嘗于西郊立

望城館故人張祐過之題詩見古蹟

徐芳

兄李季養直記



五代吳越

任煥梁龍德中為縣令卒塋海鹽

宋

黃郎中失其名或云名道宋初賢令也

縣衙有廟後合于魯蕭簡

祠名二賢祠碑文詳祠廟內

魯宗道字貫之亳州譙人舉進士為濠州定遠尉再調海鹽令縣東南境有藍田浦通白塔港自海口至邑下凡十八里歲久湮塞宗道發鄉丁濬治之民蒙其利號為魯公浦改歙州判官擢右正言嘗上疏言守宰去民甚近今銓除太輕故黷貨害政者多宜令

大臣延詢守佐初除者觀其施為吏部擇縣令亦如之庶得良守宰宣助教化仁宗朝以右諫議大夫禮部侍郎叅知政事卒贈兵部尚書謚肅簡宗道為人剛正遇事敢言在政府未嘗以名器假人時目為魚頭叅政因其姓且言骨鯁如魚頭也初涖縣時嘗夢胡僧來迎呼為叅政過金明寺瞻羅漢像適符焉果入叅大政為先兆云

題名記云咸平六年守令景德二年代

翁緯

景德二年知祥符元年代有修學碑載銜試校書郎

吳舜

祥符二年守令

田濟川

祥符二年守令五年代



張顏 祥符六年知

彌楚 祥符七年守令 天禧八年代

解冲 舊志云祥符七年守令 天禧三年代疑誤

王文正 天禧四年守令

薛坦 天禧四年守令

楊儀 天禧四年守令 乾興元年代

張元迪 天聖元年守令 三年代

伍佑 天聖四年知 五年代魯浦亭 記云佑由佐著局為縣大夫

趙時 天聖五年知 八年代

趙襄 天聖九年知

張程 天聖九年知

陳淑景 景佑元年知 二年代

蔡希顏 景德四年知 寶元元年代

李緘 康定元年知

王愈 康定二年知 慶曆三年代

程廊 慶曆二年知 四年代

趙慎微 慶曆五年知 七年代

翁頂 慶曆七年知 皇佑元年代

劉勳 皇佑三年知 四年代

任浩 皇佑五年知 嘉佑元年代



李惟幾字幾道河內人時薦饑會漕使元絳行郡惟

幾上書請官錢貸民糴種子濬溝洫又置牐於橫塘

節蓄一縣之水名其牐曰常豐築捺鄉底堰三十餘

所旱潦有備歲賴以稔見陳舜俞遺愛記詳前

楊諷嘉佑四年知七年代

褚理嘉佑七年知治平二年代儒學碑記載理銜朝奉郎尚書員外郎知縣事兼管勾鹽場騎都尉

賜緋魚袋云云

陳伯倫治平三年知四年代

范世京吳人文正公從孫以著作郎知縣事教民孝

友睦嫻力田治聲冠浙右召為管勾湖北廣惠倉時

朝廷新法行銳意改作論不合辭歸舊治海民間京

復來懽呼鼓柝相迎未幾以疾歸田詔進秘書丞致

仕熙寧元年知

董倚熙寧四年知當年代

王震熙寧七年知九年代

富翹熙寧九年知元豐二年代

錢伯熊元豐二年代知六年代

張元忠元豐六年代知元祐二年代

何執中字伯通處州龍泉人進士高第判台亳二州

尋知海鹽為政識先後邑人紀其十異入為太學博



士初徽宗在端邸執中選為侍講及即位以舊僚峻  
用不數年代蔡京為相輔政一紀被恩禮甚隆卒贈  
太師追封清河郡王謚正獻震亨曰初何公任滿去  
鹽鹽父老攀舟泣留幾不能行有夾山村民衛惲者  
獻祝辭藉以綵繒中十四字若朱書者刺曾前血為  
之邑佐王仲升問之日期以感動玄穹令吾父母貴  
且壽耳公當時惠澤入人可知矣顧以晚節迎順汰  
主偷取富貴釀國禍與京輩同譏君子於功名之際  
惡得弗慎元祐二年  
知五年代

吳充

元祐五年  
知七年代

方師顏

元祐七年知  
紹聖二年代

謝黻

紹聖二年  
年知

閻建

紹聖四年知  
元符二年代

胡忠寧

元符二年知建  
中靖國元年代

沈彥升

建中靖國元年  
知崇寧三年代

王本

崇寧三年知  
大觀元年代

劉知至

大觀元  
年知

王懋

大觀四年  
知當年代

徐嘉言

大觀四年知政和六年  
代壁記云西安人也

喬大臨政和中知縣事時平江朱氏以花石幸浙西



一花一石不問主名朱氏蒼頭排闥入以黃紙封之

戒主人善護御前物橫於五方小兒蒼頭至海鹽入

僧舍將盡封其花石僧徒少拂意即呼其黨筆之僧

訴縣大臨命追逮悉杖之且檄朱氏朱氏憤誣劾大

臨坐是罷免高郵秦觀書其事延平廖剛跋之  
載高峯集 致和二年知五年罷

徐浩致和七年知  
宣和二年代

方鐸宣和三年  
知當年代

徐盤宣和四年  
知七年代

陳能干宣和七年知  
建炎二年代

吳孝立建炎二年  
知三年代

歐陽延世建炎四年知  
紹興四年代

李憲紹興二年  
知三年代

施玘紹興三年  
知五年代

祝師龍紹興五年  
知六年代

向子昌紹興六年  
知七年代

陳深紹興七年  
知十年滿

充堯叟紹興十年知  
十三年滿

徐光實字德充晉江人進士紹興間知海鹽清白慈

愛歲旦輒縱囚歸省吏恐亡去囚輒如期至無敢脫

者光實銜左承議郎見學  
碑十三年知十六年滿



余衍 紹興十六年知十九年滿

祝閔 紹興十九年知二十三年滿

黃昱 紹興二十三年知二十五年滿

林仰 紹興二十五年知二十八年滿

陳璘 紹興二十八年知三十一年滿

徐玉老 紹興三十一年知

劉銓字全之樂清人進士隆興中知縣事災傷請旨

停閣秋苗勸富人助賑貸耕資學久廢輟圭租二百

斛以倡士感悅爭輸財以應學乃一新 隆興二年知乾道元年滿

按縣宋志及永樂志劉詮止有題名並不記事實作賢令事實具有之時相去未遠詳見問乘筆者有

漢意也至嘉靖徐志始增入詮事實甚多蓋取王龜齡所撰墓誌廣異聞耳今即據墓誌亦云詮為政務循良所至咸有可觀語固平平又云至官未暮年憂歸則施澤自是不久龜齡與詮甚厚諛墓語豈盡實錄似不宜輕信盡入之也今稍稍削惟存其修學一事蓋今建學地是銓所卜可信耳

魏汝功 乾道元年知三年通理

黃綸 乾道三年知

李大卞 乾道中為令修牒置堰勤于民事四年知七年代

邢銖 乾道七年知淳熙元年滿

蔣行簡字仲可永嘉人進士歷潮州市舶監紹興中

知海鹽有聲還朝獻所著樞言五十篇通判興國軍

知處州聞趙汝愚謫死遂感疾不起 淳熙元年知三年滿



石若樸 淳熙三年知四年滿

趙汝愚 淳熙四年知五年滿 徐泰志云以汝愚之相業而為縣之績無聞焉史畧之與抑弗久

于其位與蓋以為郎太師趙沂公也沂公登朝所歷官闕自判寧國軍正字校書著作郎知台州江西轉運判官歷吏部郎秘書少監權給事中吏部侍郎出帥福建而已並未嘗令海鹽也又公傳載其論內侍王抃與不謁內侍張說事抃被公劾論在淳熙之八年公為侍郎時而說寵之盛亦始軋道之七年終淳熙之元年此時公不為侍郎即權給諫矣安得有淳熙四年作令之理乎當是同姓名人耳

林槐 淳熙六年知九年滿

周宗文 淳熙九年知十二年滿

魏冲 淳熙十二年知十三年滿

鄭緯 淳熙十三年知十四年滿

陳祖求 淳熙十四年知紹熙元年通理滿

李直養字無害維揚人初為丞用當路薦改為令縣

有魯浦通東南境水又常豐牐節畜西北境水養直

濬浦至鮑郎鹽場十八里以便鹽運灌稻田為屋覆

牐使有守不壞興學校修大成殿置書籍祭服兼設

小學擇師教之至解舍亭館無不葺繕為叢冢湯山

設僱直費撈溺海屍漂至者塋之歲數百計禱雨感

神龍率子見事甚奇邑志纂修亦自直養始直養具

綜理才又大父正民寓斯土稔知邑利病廢墜修舉

蔚然改觀多其興作功矣 陸崧鄉校頌 鄉校縣大夫能教育人材而成之也



維鄉有校示民有知教始豫遜迪于訓彝維風化是禪維校在鄉示民有防入孝出悌為忠為良斯邦家之光鄉校有基如德弗虧劉侯遷之魏侯新之李侯能成之其遷者初其新者中肄業傳道有師有宗緊李侯之功樂只君子孰後孰先顯有嘉聞於千斯年維大夫之賢鄉校五章章五句

趙希姚江人

丘耒字少潛常熟人紹興末知海鹽興學宮築海隄二十里民有宿逋檢縣藏得羨餘悉為代輸隄有疑獄一時平反民大頌德薦者九十有八人終朝奉大夫見通志按題名記紹興中舊無丘耒惟徐志增入之浙江通志亦同今考福業院常棊碑云紹定元年大夫丘公耒蒞事法喜寺楊幼度碑亦同是丘乃紹定中令非紹興也當以金石刻為據

李仁端

李謐趙與二李不能定其年次第據楊幼度法喜寺碑云寺工始紹定改元迄淳佑庚戌趙侯希丘侯耒李侯仁端李侯謐相繼竟役因次之如右自淳祐庚戌後又二十餘年為德祐丙子有縣令王與賢之事不敢為前宋大書亦不敢不附綴于耒昭萬世守土者戒也元史世祖十三年伯顏伐宋董文炳軍次乍浦宋統制官劉英以本軍降軍至海鹽知縣事王與賢及澈浦鎮統制胡全福建路馬步軍總管沈世隆皆降時元三路進兵臨安其東路從海道者繇吾鹽進云

元元貞元年縣陞州自朱維禎以下皆知州也

梅黻宣城人

按樂郊私語趙子固到縣縣令梅黻到船謁趙趙飛棹去梅佇立岸上歎曰昔人所謂名可聞而身不可見者歟黻篤緇衣之好乃爾當是賢令也

顧泳汴人至元中尹海鹽值大旱禱龍神陳山雨立

澍築塘禦潮患名之曰捍海塘歸存者八十餘年卒



官貧不能還子孫塋泳尚胥橋南水際因家焉陳山

碑自云奉皇太子令旨授此邦未詳科目所自墓田五畝嘉靖中邑人董穀請之郡得復除至今

朱維禎皇慶三年任楊耐翁碑載其銜為朝散大夫海鹽州知州兼勸農事云

李仲彬至治中任 三賢堂碑記云海鹽州醴場麗其治亭民揀處厥土輕揚厥水渾鹹凡蒞政

者循酌貪泉罕逢廉官風土所召也至治三年李公仲彬來尹是邦五月下車時雨若禾變成仁風扇和

暴傲革面實崇三教掖民作則海若為之賸縮波瀾歌謠載途公猶未寧朝乾夕惕謙和同寅思來諒直

以鏞吾仁天錫鞏國公胤子字蘭奚處其右公察通洞遐奸宄僉得其情二公憇棠異形合心言或後先

同符已出門絕四知之金交無二天之庇清明朗徹類水月之止于困也疇昔墮下虐民鹽官薰過未聞

其伏誅者矣時有海砂令抹速忽廉幹寡欲能潔其躬程先課最亭民不頌或為暴虐就有司誅元惡餘

頑自化繫公之德其由明水之厠于水月焉三君子者亦可云關於風土乎方今龍飛甲子進賢踰尊將

登廟堂之上化四海以仁距庸一邑私專耶遺愛去思宜宣金石垂憲于後云不著撰人姓名按此碑記

自為鹽場官立因首及本州耳錄以備一時故實云

王協中泰定中任

趙孟貫

賈禧

王澤至元十五年任

葉彥中姚桐壽樂郊私語州學在淨業寺南神宇齋舍頗弘厥有至元六年知州趙孟貫賈禧重

修碑至正六年知州葉彥中再修亦有碑三州守皆賢有治聲當時趙字子唯台州黃巖人治海上有惠

政民到于今猶念之其先世子英宋宗正少卿南遷時以宗室從為黃巖丞遂家焉有子六人皆以文學

登膺仕至其孫師淵為太常丞師夏為判宗皆受業于紫陽之門且締姻焉故能以禮世其家施于布政



云賈字吉甫宛丘人能行之以正限之以信群佐若  
卑弟生之聽嚴傳老胥肅然若家老之奉其尊也葉  
字太中松陽人嘗以才敏有風操為江南行御史臺  
架閣管勾所至皆有休績可記至于留神庠校崇道  
重學則三君  
之雅意均也

又有陸德中失其名行省叅知政事陳秀民有送陸  
德中赴海鹽知州詩曰陸侯有仙骨晚歲學長生服  
氣歸元海游神入太清渴惟餐玉露饑不飯青精酒  
後頻看劍愁來即洗纓宦情聊復爾江海一麾輕云  
其人信服氣辟穀見寄

亭集中德中蓋字也

至正二年有知州陳並其名字亦佚之嘗典舉學校  
聘儀真貝君作大成樂範金為鍾及造琴瑟笙磬之  
屬集諸生三十二人肄習之

詳見前職署篇黃潛記文

萬曆志州守載楊維楨今攷維楨嘗調海鹽未任見  
世亂不赴客于錢塘終隱于松江志以為使車雖  
板授已定鹽民孔適之思不可以越世遐遺  
彥回授司空未任而卒掾屬之服喪者為九  
其言甚

辨姑附  
之于此

達魯花赤監使也時海鹽為中州達魯花赤與知州

並正五品得二人焉李蘭奚

至治中與知州李仲彬同官泰定中與王協日

同官詳見職署篇帥正堂記及前三賢堂碑文中

也先不花

至正初任後官至叅知政事不

花初至州聞潮聲大懼升屋而呼事見叢記

皇明

劉潮英洪武初任

王文洪武三年任有旌表孝子沈嗣昌事

張箎洪武十四年任

趙公著洪武十六年任



祝用宏洪武十八年任今縣署公所遷也

郎時祥洪武二十一年任

淡成洪武二十三年任

龐高博興人進士建文二年任革吏弊深得民心永樂元年應求賢舉陞工部郎中

畢瑗永樂五年任築田園一千六百四十民利之

上官廉南豐人舉人永樂十三年任公平正直和易近民卒于官歸視之日民有執紼而號泣者

厲肅永樂二年由大理評事左遷

陳諤字克忠番禺人舉人永樂初官給事中彈劾不

避奏事聲甚洪 文皇每呼大聲秀才歷吏科都給

事中順天府尹著有聲績坐忤 親王謫知海鹽

仁皇一日問大聲秀才何在敕除荆府長史改鎮江

同知告老

葉壽鄱陽人監生洪熙元年任

曾良閩縣人監生宣德初任

左璇安福人舉人正統初任

史昱唐縣人監生正統五年任

曾昌新化人監生正統十一年任

王端字宗正河間人監生正統十五年任爲政勤懇



廉平苞苴不行刑罰不濫景泰五年入覲卒于途民  
哀之

莫震字廷威吳江人進士景泰七年補任七月有威  
嚴吏民敬畏不敢干以私終延平府同知

盧潤安陸人監生天順元年任

江傑字廷俊江寧人舉人天順七年任

周顥字秉純邵武人舉人成化三年任

楊克敬字宗禮真定人監生成化六年任端重耿介  
吏人甚憚之以執法太嚴竟爲奸者所誣邑民聲其  
枉者千數卒亦莫白

李雲字載章分宜人進士成化十年任爲政廢墜悉  
舉有能聲然性踈豁不能防奸竟以毀去

謝萬貫字一之華容人舉人成化十七年任

徐朴字尚質羅田人舉人成化十九年任二十三年  
改安溪

譚秀字聳秀龍泉人舉人成化二十三年任先是捍  
海塘役七邑民夫築包攬多誤築法又爲坡陀形易  
圯秀始建白徵夫銀催役改築法植椿疊石稍殺其  
外以禦潮水鄉竈課重多逃亡改議歸民授民役以  
民糧之羨補課額修學校治橋梁續邑志多所興作



而持身尤清謹巡視侍郎彭韶獎之滿九年去

海昌祝萃

撰德政碑銘曰維此海邑斗絕南服俚俚我民久懷良牧懿哉譚侯豈弟君子令德豈弟民心樂只事上敬共無言不孚攸理我民匪亟匪舒早歷有禱必信必誠發粟停租拯我生靈捍海之濤奠安未賴武原之志筆削斯在新我儒學祀我鄉先退食公宮我侯創焉催科撫字不弛不烈庸調以均運儲罔缺彼役之餘防海之虞彼廩之餘貸運之輸豈不我勞孰勞而瘁豈不我費孰費而匱逋者以完逃者以復上安下順侯錫之福匹夫匹婦豆羹飯黍先祝而嘗勸侯久處侯之處兮惠及我思侯之去兮實勞我思吾君吾相命吏臨方願皆我侯坐享明堂

王璽字仲信廬陵人進士弘治十二年任外剛內和

善論古今識本末以文章飾吏事新縣治興廟學築

塘捍海砥方石縱橫相制尤得法數十年不圯人呼

為龍王廟前樣塘是也擢知德慶州民立去思碑

吳昂

有詩頌築塘見隄海篇

李順字文嘉考城人舉人弘治末年任篤厚廉謹

也

嵇鋼字汝堅安東人舉人於潛調至蒞政二年案無

留事獄無宿囚吏畏而民懷之擢知河州

吳尚志祥符人舉人

徐泰志云以墨土云

辛九齡字希章蔚州人舉人剛方自負不私一錢

董毅

嘗曰吾邑令長于唐得一人焉曰李公諱于宋得四人焉曰魯公宗道李公惟幾何公執中李公直養于明得一人焉曰辛公九齡辛公自始暨終不以一錢目玷上下數百載僅六賢耳厥惟艱哉



朱實昌字士光高安人進士器度踈暢擢監察御史

試諸生作詩有神駿存奇骨  
干將有異光之句至今傳誦

李學字伯勤涉縣人舉人

張濂字景周蘄州人進士蒞政三年民歌之曰前堂

無吏人後堂無優人堂下無犯人擢監察御史以

上並正德中任

失其年月

劉桂字子芳黃岡人進士嘉靖初任性聰悟工古文

辭晚年好道術不樂仕進終合州知州

曾用攸縣人舉人蒞任三月以疾去

張聽字鵠舉泰興人進士心術光明為政得大體民

久困征役聽至減十之五甫半載陞貳湖州去後官

至戶部侍郎

彭紹賢詩  
武廟南巡廷校後起海鹽

張鵠舉先生奎四曾三諫  
今有惠政累

遷楚中督學至總督三邊一再破虜晉少司農近百  
年始祠名宦久而見思漫成一律云憶昔先朝侍從  
臣憂危諫獵屢屢批鱗總因疏草關時政翻遣恩波潤  
海濱持節坐銷千嶂壘行車曾轉萬家春莫誇褒德

平云亭主侶爭似  
官墻組豆新

夏浚字惟明玉山人進士嘉靖九年任英敏有學識

邑賦役多所調劑水鄉竄歸民後所授蕩官設收頭

歲徵草價納鹺司乾沒賠贖累不一浚乃改議蕩給

濱竄價并歸民糧其濱竄舊所免民田耗悉征之用

以相抵選雋茂講授經義考正邑名宦鄉賢祀典汰



其濫入者修縣志自爲凡例授秉筆者人服其簡嚴

浚與徐泰論志書凡例曰昨妄擬縣志凡例將以就正有道若附衛所于有司之末之類皆有深意但鄙意猶有一二未盡者猶俟請質以求成一家之言蓋志也者史也禹貢職方萬世作志之法後之爲志者取則于方輿諸書條析雖詳而史法遠矣昨者所擬其義實取諸禹貢職方也但恨無古人筆力無緣似之如食貨總于地輿者有土此有產有產此有賦物產以詔其地之所出貢賦以詔其地之所入任土作貢固夏后氏之法也祀祠載于職官似若未安然傳有之先王先成民而後致力於神故曰有民人焉有社稷焉又曰建學立師乃釋菜于先聖先師是其序也此所以置祀祠于職官也人物選舉二者後先若無大區別然人物實統言之凡仕進隱逸孝子順孫義夫烈女皆是也選舉特仕進之一途所以增地靈而開世教者豈專在此哉此人物選舉之序也至若雜志者將以言天下之至雜也易有雜卦詩有亂辭皆此義也故名物不可以預設也凡此數端皆愚意所未盡而欲求終教焉者也有疑不厭往復惟裁之

董玲字

涇縣人進士嘉靖十二年任築海塘事

見前簡

魏廷璽字朝信成都人舉人嘉靖十七年任滿九年

陞河間府通判

李華魯字

祥符人進士嘉靖二十五年任

張載陽字子春浮梁人舉人嘉靖二十九年任

鄭茂字士元莆田人進士嘉靖三十二年任性慷慨

應變有膽畧時倭擾海上茂以才選來令豫儲守具

增築子城四拓睥睨爲敵臺者十八移倉廩清野倭

至茂籍軍民急乘城部分僚吏及衛職督之禁緹城



避者而納其絙以入者晝夜巡行給糗餌衣絮或親  
扶其不力者示激勸且設法燬賊攻具倭凡再薄城  
守益力竟得全當是時倭南穴石墩北穴柘林鹽介  
其中村落焚劫幾空茂弔死扶傷日不暇給而一切  
調發受檄制府輒咄嗟辦人咸服其才敏後以秦駐  
塢之捷拜白金文綺賜尋擢給事兵科歷觀察使卒  
士民議欲特祠茂及湯叅戎克寬報全城功不果天

啓二年始祀茂名宦云

公自撰靖海紀畧曰嘉靖甲寅夏四月五日乙亥夜漏下

三刻倭船二自乍浦來亟登城召居民分塚守六日  
丙子黎明二船抵龍王塘吹螺登賊五百餘直趨東  
門箭如雨發佛即機却之賊退焚其船復進時戍守  
海鹽者有秦將盧鏗兵調赴廣陳無可出戰余乃塞

四門以死守諭衆衆皆惟命賊攻西門燬民舍三百  
餘煙蔽空矢鏃交集攻城幸擊斃其當先者一人遂  
退屯天寧寺左右晚復出擾城下群情洶懼乃與衛  
諸君分守各門方君泰東門門彭君端劉君潮北門南  
西二門則余與陳簿鍊余仍左右督焉邑博士鄭歐  
陽許三君暨諸縉紳先生賓造秀士咸徒步從爲士  
卒先每塚軍一民一塚十有五一胥史攝之敵臺以  
驍兵勇壯老人攝之人各米二升燭五枝夜及子賊  
以長竿探于北城守塚者以亂石擊退是夜馬不停  
策火不滅燼柳鈴矢石聲相屬繞城六匝天始辨曙  
賊乃解圍去犯郡城八日戊寅賊還至孟家堰盧兵  
遇之敗績是午復進薄城下知不可犯又去十一日  
至海昌石墩立柵巢焉嗣後揮使劉君岱松丞林子  
士儀朱子光裕尉李子茂並歸自調所協力守巡督  
益嚴四門惟開其西出入諸水關皆瓦甃軍民守塚  
如初置竹牌以避矢石建蓬廠以禦風雨修鞭銃火  
藥弓矢以壯軍實皆先後就緒可裨實用且則諸縣  
治兵事夜則宿西城樓視公解若浮萍矣賊在石墩  
四出劫掠鹽西北境隣海昌者多殘至五月十八日  
下已賊掠飽奪海舟四宵遁水兵出舟百餘追擊之



覆其三舟斬首二百有奇時統領水兵者揮使劉君隆潘君鼎千戶晏君繼芳也奮翼桑榆過綠功準亦不負初心焉 朱士遷鄭公全城志曰賊初至勢張甚男女幾數千人襁負爭避趨城諸衛官惟怯憚賊素請公疾閉城拒弗內便公慷慨應曰皆吾赤子也何忍棄之飽乃吾自任之毋恐乃戒令掩東南北三門獨啓西門危坐悉縱諸避賊者入入且盡門者請公曰可也甫肩鑰畢而賊至又曰公乘城夜微服行獎勞扶惰一衛弁小懈以軍法參治不少假借 秦駐鳩之捷詳見徐揮使行健傳

楊進道字自勉曲周人進士嘉靖三十五年任擢戶部主事

何思謹字仲勉莒州人進士嘉靖三十九年任

王宗載字時厚京山人進士嘉靖四十一年任擢御史歷左都御史以罪戍震亨曰公貴非公幸也公爲

令精明疆毅剔宿弊決淹獄平徭賦卽隣邑編審以煩公公一以潔廉爲本丰裁凜然豪強自戢矣公無貴或無某甲獄尸祝賢令民何敢後公也公貴公不幸也

李薦佳字伯受潁川人進士嘉靖四十五年任洪于量而政尚簡易擢戶部主事

鄭昊字祖欽順德人進士隆慶三年以江陰令補任築塘自解印采石爲文諭俗有惻怛思擢南戶部主事

范梅字元春豐城人進士隆慶六年任英年明察如



老吏覈詭沒田修築用里隄蓄水以憂去

饒廷錫字文命進賢人進士萬曆三年任治尚嚴犯

者多周貸時大典役築塘公佐憲府先百執程事至

風日侵面目盡黧黑後卒官以勞祠海上

縣署有清心堂公所

建能署書至今在有遺墨為當家所重

蔡逢時字應期寧國人進士知縣事六年擢禮部祠

祭司主事官至河南左布政使公潔廉有執持邑賦

長以戶不以田里甲中田多寡不均而均受役貧富

失其平民最病公乘丈田後行均甲法先定士紳免

額次歸併貧里陞富里槩以畝三百二十受一役專

以田為主而戶勿論於是富者無詭匿貧者無偏累

役法稱平至今便之又革坊廛丁田役立門攤催夫

法甦市鄺民困勑羅星臺興文風今天啟二年祀名

宦均甲事詳見前役法中邑人朱學顏撰公生祠記云公賦性謙冲冬日春陽藹然處子人或語及非

義則頹然怒髮上指伯起故人益掃迹矣市民舊苦供億疾素甘澹泊官衙蒔園蔬以自供諸郎衣敝苧

袍夫人躬撿辟纒杆軸之聲時聞于外

黃之俊字君顓清江人進士萬曆十五年任温恂澹

雅有蕭然塵外之致雖汗以蓋簋去清貧自若公論

多寬之

謝吉卿字修之晉江人進士萬曆十七年任時大饑



民多攘奪公以鎮靜持之海溢再築塘有勞績後以前任事罷免

于天經字克孝冠縣人進士萬曆十九年南蒞而卒

公初謁廟病畏寒廟祝進乳湯一杯曰湯可矣何用乳爲命吏取錢償之故謝都幕子貞曰公先任陽曲極清以憂歸父老泣送郊外獨一老人追泣百里外不肯去問何意曰民不悲公去民慮公太清他日恐不能徹底耳民愛公難爲公言故送獨遠也公聞言不覺感而失聲下車拜受教則知償乳一杯錢公已先見其意惜病遽不起

王臨亨字止之崑山人進士萬曆二十年以西安最

調至公言貌恂恂遇事精明強立屹然不撓善察獄

赴訟者不越宿輕重各得去邑豪結死黨稱十龍橫

嚙人至烹殺孤旅滅跡公廉得殲數人迄今凜凜無

以俠犯法者縣城久圯撤築加高廣于初徒步程督

挾駮羗羈堅否爲求賴計海上警息非時至侍以無

恐公功矣後入爲刑曹官至杭州太守未任卒

王太史衡

撰公傳曰公作牧時時斷擊類法官已去牧作法官又多所平反開釋類牧寬嚴無常悉中肯綮又曰公治盜第躡尋根株而止凡指稱同黨者槩不問有一類早媼隨母兄往來海鹽崇德間有三惡少一冒媼之叔一僞爲夫一僞爲亡夫之兄詭詞訟縣已而佯以和請月餘僞夫訟媼之母兄掠婦去公覆前案良是而訝其貌狠鞠之則前案悉僞也三人伏辜又一女未嫁少年求之其父不許誣以娶而更嫁婚書媒聘悉具公呼女前與語已而遽問少年曰汝妻手中有疤記左乎右乎少年愕然遂敗沈氏兄弟皆無子兄富先亡弟貧有一女嫁褚升兄之妻常虞升瞰其資儀被盜盜賄隣人誣升言從屋上來去所遺鞋是也



公曰婿而盜何必登屋茲方六月何必衣鞋升得自  
公治獄多此類 公折節下士時邑人劉世教上舍  
生姚士彝布衣並式廬與抗宿主禮震亨科試荷獎  
拔斥歸特為詩唁云長鉞歸來客淚殘黃花濁酒若  
為歡山中叢桂元亡恙愁人不耐看公沒後又  
二十餘年震亨罷官歸且老矣而公始晉祀名宦震  
亨謁祠下賦詩云衆裏陪祠秋黯然一生知遇受誰  
偏隨行攝拜無空地獨自捫心有寸天恩往細從免  
輩說禮成忍拭泣痕旋不知已作神明奉猶續招魂  
弟子篇同時諸生受公知者亦存歿各半不及今紀  
公行實恐後  
便零落也

李當泰

後復姓俞

字元祉泗州人進士萬曆二十三年任

歷官司空即卒公明敏通達人一見即識面不忘而  
慈衷曠度上自薦紳下至走卒無不曲慰藉得其驩  
心公去官後邑人猶起居不絕親愛之朱學忠曰公

審役限士紳免額謝隣邑詭免者甚嚴僉解戶請托  
不行和中有執錢糧原封發解耗羨無染皆其不可  
及處識者以為知言

公家本素封輕財慕俠交結半天下貧士請求或急難相過者

居家未嘗不欣納在京師有縣民姚治者以比運通  
欠流落不能償公聞之曰此役吾所僉不謂其不能  
任也立捐數十金代償之仍攜歸泗上畱歲餘厚贈  
還他護持舊民施恩不報多類此 姚士彝送李明  
府召入計曹序曰守令不下士所從來矣令鹽而下  
士自公始士之窮而得以身遇上鹽亦自公始公  
幼孤窶伏菰蘆中家酷貧親戚掉臂不肯顧至身為  
刈芻擔醴拾海月蟹蛤以自給稍長去學為繪工喜  
吹篪彈絃自娛數年復棄去讀書作韻語古文詞於  
是西出絕塞北到京輦歷嵩阿涉江漢足跡幾半天  
下數年來歸復為里中所侮遂悉棄故所習更橫經  
為制舉業然未嘗挾行卷一詣公之庭以操觚見能  
而公獨微聞憐之薦于督學洪公歲庚子竟得補縣  
傅士弟子由是一縣駭歎曰彼青青者衿非刈芻擔



嗷拾海月自給者乎非繪工無賴吹篳彈絃者乎何  
青青者矜一旦也葬聞之益感奮思有以報公歲以  
穀十斛付妻息具炊糜負一笈出門走他縣從鴻生  
譽儒爲弟子都養夜分讀至眼勞見燈燭作兩光不  
復辨向字爲跳起自批面大誦曰老大脫負販欲第  
着一領青衫爲不負李公耶聞者笑之曰君揚揚敖  
大人間得半言隻韻若出金石詫人以爲作者復起  
顧以中歲授帖括與造物爭糞以不負李公曾不知  
李公之負君乎葬顧讀自如不爲動曰我誠不能圓  
屈造物使李公不負我又烏知在我者爲竟負李公  
也歲壬寅四月公以秩滿除小司徒縉紳父老爲誦  
功德卧車轍下至遮擁不得發葬獨紀公之下士與  
葬之所以遭于公者

杜士全字道執上海人進士萬曆三十年自大治補  
任三載擢給事刑科今官太常卿公坦衷亮懷寡營  
栖澹亭亭直上獨稟孤高嘗自謂吾作令於前官無

一事更張於上官無一款條陳獨服膺平易近民四

字以爲箴警民亦遂不恐忘我然公不獨以清靜造

福遇大利害嶷然斷山不少動要歸於保護單赤無

使傷焉而止公不求赫赫名名自歸最民牧之以品

勝者往時直指按部舉豪惡者備訪公不欲爲擾而

例不可廢姑舉鹽徒一二以應後發縣訊擬公  
含淚低頭他顧杖之受杖者亦感而泣公滿任去清  
帑金有胥史侵沒若干公曰吾典守不能夙戒若曹  
貧卽盡登其肉能償耶勅家人歸雲間質房得金代  
補之又公待干請者輒和顏以應而中實不爲移有  
迫之急者公曰毋苦我我嘗引鏡自照豈望有三公  
八座耶今日去卽去耳斷不能相從也言者失色罷  
此皆記公仁慈清節及毅然執持之大畧耳目所見  
可例其凡邑人鍾兆斗生祠記云明府完三杜族  
坦衷天殖亮懷日皦身萃八陵之秀家存萬石之風  
落落寡營營是栖恬愴亭亭直上獨稟孤高披之者在



春風噓妯之中測之者感谿谷涵容之度謙謙君子  
溫溫恭人洵其如圭如璋抑亦不茹不吐歲壬寅秋  
侯蒞鹽抵今乙巳夏凡三稔野不聞追呼市不聞宣  
索賦稅無奇羨之入讎集無留連之期賓旅回旁午  
之車胥史收耽眎之目訶謔不及于徒隸  
請謁不行于堂皇幾弛蒲鞭頓空園戶

濮陽春字生府宣城人進士萬曆三十三年自上高  
調任公率真不脩方幅人暱就之無忤也滿考擢南  
刑部主事去

喬拱璧字穀侯上海人進士萬曆三十六年任公志  
在有為而宏材偉度允足副其用故在事興除特多  
往時衛卒餉府縣本折得雜支重冒百出公建議歸  
於一絕其弊里甲虛丁賦長苦代賠望書得挾賄移

改公悉覈虛者額分坐于各甲累以均派始輕田土  
先有丈量冊屢推收而紊弊漸多公取舊冊按字號

一一歸之給以單田額復清行貼役法徵應役者銀  
貼承役人仿古義役遺意而築捍海塘增設漕糧倉  
廩吏解及甃街葺堰諸工作尤不一公坐堂皇對隸  
人或訟者時出一言破其隱雖私居猥嫚語能道之  
不覺驚伏歎謂公疑於神明也今官兵部郎

海鹽廣儲倉與

澈浦常積一倉並七縣解納給海寧衛官軍糧米往  
年各縣解戶掛欠不前衛所官旗復私通斗級買票  
折乾以致倉廩空虛軍苦枵腹公受事之初條陳六  
事洗剔諸弊每年多有剩積自三十六年至三十九  
年共積餘米五千四百三十六石五升三合九勺詳  
見前衛所誌中公築捍海塘多所節省初海溢塘



圯估銀四千一百有奇續有添用木板之議估銀五千七百有奇公節省二千而塘成迤南塘五十餘丈原估全築用銀八千公并築百餘丈殺其築法三之二用銀七千而塘亦成備載工料冊可考

何早字白夫懷寧人進士萬曆四十一年任公老成練達臨事先有成畫而應之裕如初政尚嚴後稍濟以寬故民畏而見德縣市肆有門攤商稅報派多失均公核而差等之困大蘇行鹽票多至六千滯正引且累肩挑民賠賤公請減票二千鹽課以足漕糧押兌舊用快甲督催逼同漕卒需求民甚費燭其弊革之貧生張某不能婚為娶妻幼童張煥剗股救父療治之且勸之學屬吏喪歸皆厚賻邑先賢張靖之無

後葺其棹楔皆仁人事也擢監察御史

公有政紀具載事四十則

而以培養人材為首友人姚士彝咏云借將風送翻葦葦出埃塵拾破還為甌窶貧我一人蓋士彝洗雪皆公力志感也初士彝為布衣時王公折節下之後李公拔為諸生濮公復請之學憲合江李公廩餼之而浮梁陳公至以為非例坐斥杜喬兩公仍以格外待至公乃白之當陸還故物今樊公復禮聘佐余成諸公傳士彝念寒土屢荷邑侯顧盼也有詩誦諸公德總附此 單窮羞出幾龍門三十年來一曉昏肝膽祇餘些少地歿生難報許多恩身曾着眼光猶在名為爭扶力尚存手自夜窻書姓氏半纜追頌半聲吞

樊維城字亢宗黃岡人萬曆四十七年進士本年十

一月任

觀還東鄉薦紳詩 二載徒荒飽千程入帝都人如春柳弱跡似塞鴻孤注考誠宜下

無才亦不虞見 君仍賜璽又得仰前模 父兄夙所事承教尚如新梅柳皆生趣桑麻可得春年深吏



事習宦久物情真勿以疎庸棄箴當朝夕類海邦

春已暮民事始相侵紅女修篁管漁人視罽罽插青

祈密雨熬白若多陰不識今時候容能愜衆心東

事時還急輸租百倍難化金方愧許最課德非寬舊

甕無儲粟新絲不作統催科敢署拙默默愧盤餐

五年成一信稅政敢言字治邑占科雉離山問螻蛄

朱明鮮動植青海長鱖鱸若此非期會民生庶得偷

曾聞長老訓成事足吾師邑有烹鮮式人留馴雉

規鳥聲鳴自和棠芾蔭相垂幸見良農畔勤勤再用

思此國多君子重來似有緣方期銘我右豈敢護

吾前高柳台清霧嬌鶯轉曙天新涼好氣候晤語可

繩愆但人能訓我勝我自為謀頻復期終吉其臨

利既憂紅方還易謝白日不常修四海逢三益終身

獲所求散材難適用有似器無當拙以誠多諒愚

因懶益彰薰風能解慍麗日喜偏長俗吏無經事專

為抱贖忙論才非百里令譜未全窺豈敢邀民譽

因緣得我師密林篩日碎疎徑納風遲晚節崩新策

芳蘭十步披十箴人亦何失多欲為愆欲之所

起以身為緣衣皮血食世固不沿列珍曳綺在身可

指推此以類抑其次焉聖學之要無欲而全王道之

佐寡欲為先素朴以化百姓自然帛冠衣布駮牝三

十魚殮脫粟齊晉以安儉其治本聞諸昔賢寶吾共

德不殄于天右儉箴心聲無出出則爾窺人苟

未諒爾何人斯洪鐘難叩鉞響錢虧既鮮知德豈易

託辭微言不悟強聒奚為况以口頰發人陰私隰子

伐樹胡不鑿之兵頸莫枚刺舌焉追道可目擊交在

心期待言而合其合必離聖臣無口百世可師吾守

吾默以養吾知右默箴人責于我以爲過求我

之已甚人乎何尤五官百體時不自由豈屢軀殼而

即相投天空海濶能任物游器果大受誰不當收前

路若狹祇以自愁欲容吾足寧爲人謀汚茵何害聾

逐可留此特世法亦獲其休士志于道可願其修變

化蕃若惟恕之猷

右恕箴

需能賊事輕實喪功

二害雖異失恐則同

吾所謂忍剛柔必中

舍近圖遠

割繼濟洪勿快一擊

勿惜一恫彼逆來者

如力截風

行常守黑心則知雄

堅惟無忍垂晉興戎

寇賈排難

豈賴谷崇虞侯乳毋

斯見令公此大人作

如日當空

丈夫用世惟忍有終

右忍箴

屬垣之耳其聽必

真矚室之目其視必

親謂于不信不密失

身妻子慮

泄胡不畏人詭辭而

出豈獨愛君上貴可

望猶惜笑

海鹽縣圖經卷九

三十一



頓代終之責矧不自遵李杜憂國更以禍民龔生竟  
天坐不隱鱗黃龍其露抑又非倫誰知幾者而不諱  
諄害成可戒生寧不辰 右審箴 好生之德其象  
威如若雷春震甲拆蟄舒發為事業群陰盡鋤威克  
厥愛不激不徐以正天下正家之餘如而夫者可使  
親疎是謂易與是謂尤虛豈振其末曷循其初何以  
嚴治反身在予敬以直內驕氣盡祛瞻其顏色孰不  
承諸淇澳之什請以神書 右嚴箴 大人不作寧  
取鏗鏗管言害霸不果為京先賢惡室正愛其名房  
謀杜斷相濟乃亨嗟而不發舜禹亦盲怯夫速决坐  
享休聲矧智而勇萬夫之英達仁必武守義須貞以  
戰則克從政斯成自茲以降何事不行蓄疑弗果謀  
用是傾鑿于古訓斷以全明 右果箴 本無隔礙  
只此分形思通其際如魘得醒君民親友動以吾誠  
肝膽胡越形氣列星思不思異豈有徑庭山崩鐘響  
落月謝奠無情尚爾況人之靈感竹躍鯉隕霜致震  
虎渡蛇避賊去身寧昭然史冊孰謂不經動于天地  
去辱而榮君子有九使一情冥 右思箴 彼教有  
成儒者不敦寧知可患惟此六根聞諸夫子及吾聖  
孫畧陳三概精入睹原蒙莊稱引義命是尊即此已

攝龕細二門人守戒律如室有籓設致寇至不毀我  
垣久而習慣有律覺煩頭冠腰帶自適忘言何為逐  
物後輕前軒戒亦有要君形者存 右戒箴 百年  
寓宇樂少憂多以吾觀之憂樂者何神交而夢或泣  
或歌形開俱失孰別唯阿而吾真樂實不關他若人  
羈旅洵美非家得返其室樂且無譁孔樂蔬水浮雲  
經過人難堪者顏樂不磨後儒尋得名安樂窩天  
下為任先後一科彼或未寤尚寐無訛 右樂箴  
德政碑記

楚黃國樊侯亢宗令海鹽五載治行稱寓內第一邑  
父老子弟念侯旦夕 內召行安得未侯厝施靡朽  
令後今畫一守沐恩膏宥亭造無已也遂相率走御  
史臺款列諸善政如于目請得刊示垂來范御史臺  
亟檄郡行邑如其請侯瞿然不自功奏贖郡伯令荒  
飽無似靡可紀即父老子弟謬為紀身未離局非義  
所敢出惟轉聞收成命甚幸郡伯語侯勒良法賦後  
吏父老子弟自為計爾令何與郡重違直指旨其敢  
聞侯固辭不獲於是邑太學文學諸君相率趨不佞  
所代父老子弟請曰不腆鹽邑在樵李七諸侯國為  
邊壤枕海而闡隄成竝棘其間繇賦繁重獄訟滋多



與冗蠹之年候單赤之凋劫謠俗之誣囂跡苟邑劇  
且倍蕞操割者躊躇難之而皆不足難矣矣以名進  
士來洩初下車值歲告稜粟買翔踊侯設法賑貸勸  
富民出滯積嚴剽掠禁銷亂萌且爲豫備計修倉庾  
之廢墜者廣米穀儲人心賴以定治距海實半里許  
氓隸與颯夷海若爭一旦命止戈于汛消沴于溢在  
海言海侯于此尤兢兢而大者在編審一役邑均甲  
法翔自宣城蔡侯至天啓初元歷冊四屆免額多而  
均額漸縮侯力持其議寧殺免田毋減役田哀纓綏  
以埤益編庶遂令均甲良法可保葉萬無變置議役  
官單俾十甲自相公議以盡民情詭弊亦絕而徵賦  
則聽民自衡自納禁絕耗贏懸金儀門稍有所需許  
登擊以聲其罪其漕餉惟豫徵乾潔本色在版立限  
交兌賦長不爰刁勒而蜚輓者亦已取盈快然鼓礮  
往所省無名贈粟不下數千百石爲前此所未有鹽  
織署有添設三倉丞與海口敢浦兩巡檢侯謂是枝  
官也而又多胥兵之窟穴卽稍食亦無益之糜况佗  
者亟建白裁去又歲弛征中金千物力大蘇至聽訟  
具兩造得情哀矜手傳爰書各厭其意去事麗大辟  
者必親檢親鞫一不以委丞尉狂無冤繫田土之爭

雖在遠鄉必親履勘質成之衆爲望風讓畔焉乃侯  
所最惡傑惡民冒鄰籍妄訴致比境追呼嗚吠騰沸  
侯得主名必重懲之株逮者禁不發四遠謂攝樊侯  
民辟奪乳哺子於慈母強必不可得因之取衆隣窳  
弗恤也喜獎拔士類加禮賢士大夫體貌欵接藹慈  
周詳以私于卽正色拒不顧人亦無敢干者邑有孝  
子沈公壽康二百年以上人物侯高其行誼立俎豆  
賢人之間先正張公黃門葉公侍郎或絕後或子姓  
夫守墓俱荒蕪不可問侯捐俸修葺且具特性親爲  
文祭之爾乃制作備教化成纂修邑圖經志林藝文  
諸書置大成樂器及舞綴於黌宮太和洋洋翕鬼我  
東海哉旦夕內召至則吾濟且不能長有侯矣夫  
不能長有侯而長有侯之政者恃金石之章在也是  
用代爲父老子弟請余應曰樊侯治行高嘉績至多  
誠如父老言乃余知侯深嘉績自元本余聞侯在  
署中日用粒米片蔬與民同享價謝絕覬遺齋廚蕭  
然恒茹素讀書浹旬月不市鮮炙潔廉如此廉生明  
明生公衆美繇斯該舉茲侯善政本歎而本之本又  
有在侯性至爲尊人友軒公余同籍嘗爲名御史疏  
建國本承嚴謹有嶺南行侯發憤揚名顯親洎筮



仕抗疏白復父官昔奉常居恒一出言一舉足不敢  
忘友軒公訓自揭得力處在斯夕持詞孝經嘗著  
傳靈感一記啓迪士民共敦經義夫孝德之本廉所  
從出而衆美所繇該舉者也子言之孝慈則忠父老  
子弟不忍忘吾疾欲以金石求侯政豈非忠之屬慈  
之報歟而實為之權輿則余所稱本之本者說矣  
即從此宰天下上佐天子德教加百姓刑四海亦  
裕如焉矧百里之治乎哉南史徐孝穆子太子洗馬  
份天性仁孝值孝穆有恙跽誦孝經三日夜誠感冥  
通立致霍然之應份嘗為鹽令舊志稱其多異績為  
六代江左循良冠孝子之能為仁君此其左驗也夫  
侯善政更僕未易終自非份所可埒而誦持孝經靈  
覲千載合符人誰出自空桑邑誰不侈甘棠求夫敦  
本行成雅化能為子以子其民者於今有幾我檇李  
七諸侯國當從此東偏者問途庶幾得司南矣爾海  
可枯石不可爛不習為吏視穿窬功倍事半敢不贊  
諸郡伯洎直指用告嗣侯合茲土者少傳謙太子  
太傅戶部尚書武英殿大學士郡人朱國祚撰

**承** 縣丞廳壁記曰海鹽貳令兄於史傳惟唐陸愬一  
人五代前不置丞簿太平興國元年歸版圖於國  
朝後置丞焉淳熙丁未直養負丞茲邑問前人了無  
知者僅因紹興改元緝諸名氏得二十有二人饒名  
龕置於壁間俾來者有攷焉  
巳酉歲除邦城李直養識

**唐**

**陸愬** 玄宗相象先四世孫  
**李顏** 長慶中與令李諤同官通志稱能舉其職

**宋**

**王裳** 左奉議郎紹興元年任  
**董旻** 朝散郎二年任  
**王良約** 宣議郎三年任  
**張麟**

四年任  
**章靖** 通直郎五年任  
**李益** 從政郎六年任  
**周棨** 十一任  
**錢南** 十四任

**麗溫孺** 二十任  
**錢載** 二十五任  
**馬希言** 二十八任  
**陳敏行** 二十

九年任  
**竇顏曾** 三十一任  
**李壽松** 乾道元年任  
**巫明允** 宣議郎四年任



詹宗堯承事郎趙汝謙從政郎俞直方從政郎淳熙陳

襄從政郎王邁從政郎張澤從政郎陳祖求文林郎

四月任九月李直養修職郎十四年任紹聞近修職

改知縣事熙元年改知縣事熙元年改知縣事熙元年

右壁記宋丞姓名始紹興迄紹熙凡二十五人今考

紹興前尚有王仲升紹熙後有陳仲微而紹興中復

有姚憲孝宗朝大拜丁安義著抗直聲用並識之後

方

王仲升見前何執中傳

姚憲字令則鄉人以父舜明任補海鹽丞惠利及人

後監奏進院知秀州土豪錢安國舍匿亾命為奸盜

州縣莫敢詰憲禽之并其支黨悉置於法焚其巢穴

州里遂安浙西大水民饑憲請輸粟萬斛以賑朝廷

賜書獎諭累官御史中丞淳熙元年參知政事

丁安義人紹興十八年旱詔復民租十之八而

和糴尚未罷安義語今日歲饑常賦且減不應復有

和糴卽上官怒安義請以身當之檄屢下抗論反覆

卒賴以免

陳仲微字志廣高安人嘉泰中進士調莆田尉遷海

鹽丞隣邑有疑獄十年郡命仲微按之一問立決擢



知崇陽縣通判黃州後歷殿中侍御史終厓山海外  
仲微天稟篤實於書靡不研覽發跡郡縣屢樹嘉績  
進列侍從抗吐危辭獨嬰權相之鋒遠徇幼主之難  
竄跡夷邦藁葬不返亦可哀也夫時賈似道當國襄陽之役國勢危甚  
仲微上封事畧曰前日之日近冕旒朱輪華轂俛首  
吐心奴顏婢膝即今日奉賊稱臣之人也疆力敏事  
捷疾快意即今日叛君賣國之人也迷國者進悞優  
之欺以逢其君託國者護耻敗之局而莫敢議當國  
者昧安危之機而莫之悔有謀莫展有敗無誅上下  
包羞噤無敢吐是以下至器仗甲馬衰颯靡京不足  
以肅軍容壁壘柵折樊駕漏不足以當突騎號為  
帥閫名存實亾光景蹙近日睫矣惟君相幡然改悟  
天下事或尚可為

州同知

張邁 趙泰並承

州判官

陳徵 承事郎

趙士元 從事郎並

皇明 國初設縣丞一人永樂三年增設治農縣丞一人嘉靖二十三年增設三倉縣丞一人凡三人

隆慶元年始汰治農丞 按大明會典戶部設官款內云宣德二年添設浙江錢塘仁和海寧新城昌化

嘉興海鹽崇德八縣縣丞各一員治農今查本縣永樂舊志添設治農縣丞在永樂三年之二月鑿然可

據如此則海鹽之有治農縣丞不始宣德明矣此 國史採修於邑乘亦宜參考也

郭占濟南人吏員初任本縣典史奉職公勤有幹才



洪武二十三年知縣淡成奏保陞本縣縣丞  
袁惟善穎州人吏員勤撫字平徭役民悅服之永樂  
十二年坐事謫徒役民具績訴於郡郡轉聞之朝  
下所司覈實得復職震亨曰丞之爲職微矣有罪民  
得而代訴之旣聽其訴又必詳審而後雪之國初  
人多自愛上亦不以人之微輕視焉吏治所繇獨盛  
也弘治間邑人鍾海丞懷遠亦有辨復事後此絕不  
聞矣

李芳穎上人進士宣德中爲刑科給事中上每朝  
退御便殿與大臣議事百官候左順門芳直前言洪  
武中大臣奏事必給事中二人與之俱以防弊上  
顧謂侍臣曰芳言是芳退輒自矜每見百司所爲不  
如意卽請上前言之衆爲側目上亦惡其訐謫  
海鹽丞

安然邯鄲人

翁裕

曾顯龍陽人

林雍福建人

魯誠新建人

張懋

馬驥

韓瓚正統中

封圭莒州人

周普掖縣人景泰中

郭爵萬安人由薦舉

黃忠厚新喻人天順中

袁綬信豐人

王璘崇仁人

吳壘武陵人

湯安

衡陽人

李瓊鷄澤人

王昇冠縣人

張宗載東



平人 鄭觀政任丘人 何暹遂寧人 胡鏡高安人 陳紳長汀人 成化中

徐謹江陰人由書算今橋梁多題謹修葺謹蓋勤於職者 段文彤安仁人 濮讓當塗人 崔鐸同州人

王相萬全都司人 姜朴南昌人弘治中

洪顯金溪人 王裕旌德人 鄭寅金溪人 馮勤

滁州人 蕭源泰和人 汪玉涇縣人 路平汶上人

張時中真定人正德中

呂湯民南河人善奉母父老皆稱其孝任三年卒官

歸無行資 鄭允珪閩縣人 徐泰志云其官守蕩然 詹岳貴

溪人質而頗慎擢淇縣知縣去 許勳蕪湖人 劉

敵德安人 劉岳成山衛官籍懷遠人居官循謹擢

蘭陽知縣 沈繼美四川人進士為人溫謹清介先

為給事中以疏劾吏部尚書汪鏐忤旨謫陞鄞令至

按察使 陳九德五河人 黃謙休寧人 戚袞宣

城人選貢後擢知項城 鄒庶無錫人 任寶江寧

人 楊獻青城人 施漸無錫人 張衿江陵人

林士儀瓊山人 楊鑑廉山人 朱光裕蕭縣人

黃鶴清流人 劉鑰膚施人選貢擢知靖江 李玖

遂寧人 尹鶴太和人 卓立茂名人 梅說良宿

梅說良宿



州衛人 黃叙莆田人 丁應時廬州人 鄧佑宜

山人 陳表上海人 何希周新寧人 監生持身謹

愿甘清苦海塘圯壞泣懇當道修築陞許州判官轉

知縣嘉靖中 吳維金宜興人 陳闔高安人 隆慶中

江鴻漸縣人 李一夔泗州衛人 謝希周歙縣

人 陳化碭山人 黃文明懷寧人 選貢陞慶元知

縣 黃用中歙縣人 陳化與用中嘗以塘工旌 張

汝翼景州人 歲貢性太魯直然一文不染日惟補糜

耳陞廣寧衛經歷 曾一鳴進賢人 程應忠歙縣

人 魏漢宣城人 周之光湘潭人 歲貢管糧能却

例金人 頌之陞漢陰知縣 余時崇仁人 于化鵬

昌樂人 吳堡登州衛人 楊德愛都昌人 查櫬

涇縣人 朱大桐靜江人 成斐然南直海門人 選

貢 龍希夔永新人 監生好古能詩攝篆甚著能聲

陞州判官 錢可賢桐城人 選貢深於經術而修潔

自愛卓然倫輩中 後擢知縣 龔三台進賢人 郭

倫黃岡人 林萬瀾尤溪人 蔡煥程鄉人 蔡伸

瓊山人 陶化龍綏寧人 張邦吉阜平人 李世

德隆安人 趙允中南城人 李徵問南海人 沈



嘉謀涇縣人萬曆中今

李宗惠字天祿洪洞人

楊四知字自畏安邑人

主簿

宋

石知一太平興國中以明經任攝縣始建儒學於縣

東翁緯碑記曰李唐時先有夫子廟藩臣稱霸以儒

為戲厥制遂亾至主簿石知一權縣事始立之

詳見藏署

篇

趙昌宗

大觀中見東岳祠碑文銜云登仕郎行海鹽縣主簿管勾學事

陳震之

淳熙中

吳天民

紹熙中

李仁表

吳興人太府卿淡之子迪功郎主簿嘉定三年任見葉水心集

皇明

吳復閩縣人永樂初以知印除後陞吳縣知縣歷通

政司叅議工部侍郎 蔡智 姚本

樊公佐進賢人由人材 謝鑑 陳重安仁人天順

中

李永宣道州人 張理信陽州人

永宣成化二年任理成化十二年代

又十二年為弘治元年理始滿去時簿載久任如此

苟濬營山人 郭文解



州人 董讓真定人弘治中徐泰曰濬與讓皆以清  
謹聞乃讓任不滿三年即致仕去可知已顧郭文獨  
稱好賄是貪無如文矣

周璇真定人黃顯鰲山衛人 王華鉛山人 劉

爵德化人正德中 蔡晉 張本

陸德無錫人雅澹有大家風氣 李應昌章丘人

金珮 杜汝松 張 羅廷傳崇義人 張瀛深

水人暴刑若狂 楊繼蘭瀘溪人 陳鍊五河人

裴陳猷豐縣人 陳鳳永豐人 李棟合肥人嘉靖

中

王奠新都人 胡慎言太和人隆慶中

彭藩江西廬陵人 何士淳太和人 湯希賢四川

人 姜伯禮休寧人 劉朝恩山東人 蒯喬安陸

人 汪沛六安州人 徐可度興化人 曹應元蕪

湖人 方麟桐城人 李朴莒州人 陳汝升華亭

人 白應麒威縣人 王應張玉山人 羅宗耀沙

縣人 羅周彥歙縣人 呂容宣城人 林實卿德

化人 謝瑞卿古田人 陳汝泰龍泉人萬曆中

謝堯通州人天啓元年任

尉



唐

孫公胄武邑人

後魏巴州刺史伯禮之後吳大帝族裔也

宋

張用丕

景德中

吳遷

大觀四年將仕郎海鹽縣尉管勾學事

黃唐傑

靖康中

朱良字良伯吳郡人世儒科仕為縣尉建炎四年金兵入境良曰今日忠臣義士歿國時也披甲執戈集所部百餘奮擊之一戰殺數人眾為披靡力不敵竟歿事聞官其子思至漢陽守贈良銀青

柳志云按建炎三年十二月

月虜騎自臨安循黃灣至海鹽四年二月遂陷秀州良歿當在此時

趙善沛

淳熙中

方瑜

朱寢炎良五世孫也侗儻有祖風善持論見義必為實祐中蔭授迪功郎為縣尉歷真州司法叅軍制置使印應雷知州王昶宗朱煥成以其廉敏州事多委之

皇明 典史

秦貞以教諭左遷

郭貞

見前

洪武中

張佑金壇人建文四年任贊政公勤吏民畏服永樂



二年應求賢舉陞長樂縣丞

郭禮蒲州人清儉介直蒞下有威民信服之在任九年卒官正統中

徐能 李貴霍丘人治亦有聲景泰中

田寬徐州人天順中

孟紀河南人 柳訓肥鄉人 孫通鳳陽人 劉肇

封丘人成化中

劉綸泰州人 周灌贛州人 羅元泰和人 趙靖

歷城人 趙宏江都人弘治中

陳文高南海人 胡時亮舒城人 胡山進賢人

吳允隆江西人承檄築捍海塘縱橫互制有法至今屹立屢經風潮不圯名曰典史樣塘亦有功於禦患者 田世威清豐人 曹作旬容人 李茂南昌人

吏員勤慎明敏尤精於射歲癸丑倭犯鹽茂卽有牛橋之斬獲甲寅四月倭又猝至茂佐鄭令備守城器什賊知有備去復守澈城悉力捍禦澈得保全人多其功鄭靖海紀畧稱其屢隨征勦氣壯而弗憚亦簿書中有甲兵者 傳烈進賢人 漆偉彭山人嘉靖

中

朱昱圻胎人隆慶中



陳柯當塗人乙亥開白泮新河築土塘督砌捍海石塘勞績為多陞高安主簿 胡世用德興人有築塘

功 蔡會莆田人 蔡道勉福清人 解安祿大足

人 劉鵬霖廣安人 陳日新英德人 黃時聘龍

溪人 鄭應星莆田人 陳其學 人 賴良士

歐寧人 陳爾祖新昌人 陳夢垣上元人萬曆中

周晉階字翼宸常熟人由吏員天啟元年任

學職

宋 紹熙中儒學碑記載掌學官 四員又有主學及教諭之稱

施棐 紹熙四年棐撰小學記其銜稱兼海鹽縣催煎場而記文則自云濫次主學蓋以鹽官而領教

也事

朱沈 教諭紹熙中李直養聘主小學

元

丘世良 大德中教授嘗復學田詳職署篇 揚載集有贈丘子正之海鹽詩珠生滄海底玉韞碧

山中夜氣交明月陽精現白虹有賢兼重價當代振

英風好學由天性能書至 工知名傳冀北作賦擬

河東始欲徵揚子旋聞薦褚公陰符難獨美遺教實

爭雄絕藝雖宜進奇才事不同交遊傾上國掄選屬

南宮鄧禹官初試匡衡對漫通海邦終寂寞學館尚

穹崇已注千人錄當成五典功星辰皆在水渤解信

浮空把酒歡何限乘榼興不窮文章趨浩瀚物態入

牢籠子必登雲閣吾方守桂叢索居彌寡陋荒業孰

磨礪弗獲披雲霧唯思對華嵩知音期郭泰流俗易

王克江海從茲逝飄飄在轉蓬徐泰志以子正與世

良為兩人今考揚載延祐初登進士第前七年即大

德為世良教授海鹽之歲時載尚未第故詩有吾方

海鹽縣圖經卷九

四十五



守桂叢之句子正疑  
卽是世良非兩人也

徐思敬

皇慶中

鄧文翁

延祐中嘗修學

呂德裕字文饒單父人初學田萬畝餘德裕搜剔其  
侵蠹者以所入興修廟學置主學官廨舍語具前職  
署篇德裕處已以嚴行事有節人心素服而其時知  
州事趙孟貫賈禧先後有志作興故能卓然有成翰  
林陳旅書其績以為才可大用云

陳陽翁

至正初

劉恂字彥和陳留人至正間以明經任學正時天下

兵起河南北為奸雄所據恂因留家為陶涇里人子

孫迄今行盛

皇明

教諭廖輕撰海鹽儒學教職題名記輕昔來視海鹽校事暇日索邑志稽我國朝前教茲邑

者自洪武初迄弘治得教諭訓導若干人下此則茫  
不可攷輕以是知邑志之不可不修而又慨誌未遽  
修也則他日有能修之者欲采其人以備官職之數  
將何所據與輕不佞逡巡八載得命廣之文昌治行  
有日益為懼乃即同寅諸生而謀之僉日記諸石  
則可豫諸誌矣於是近取諸志旁稽諸人立石而題  
之教諭列上方訓導列下方嗣是而在者如其式地  
貫歲月不詳者以俟後之君子事竣同寅日吾輩幸  
矣先生母耆一言引其端輕辭弗獲已因次其  
語為之記而明日遂行嘉靖戊子孟夏日記

教諭

孫復初 胡龍臣 山陰人 洪武中



李惠甌寧人 楊謙長洲人舉人永樂中

袁議長洲人舉人宣德中

黃楚章豐城人歲貢設學規甚嚴與訓導鄭理劇孫

芳協心誘迪士習一變 王恭吳縣人舉人正統中

蔡嵩漳浦人監生景泰中

陳銓鳳陽人監生 彭 安福人儒士天順中

林榮字希仁閩縣人舉人待諸生一以恩義有脫其

妻釵珥為贄者慰謝不受卒於官幾無以歛張寧以

榮貌與心同言與行似君子也 陳良字秉善莆田

人舉人以蔡氏書教諸生多所成就 歐澄彬州人

舉人 陳暹字序進莆田人舉人嘗修縣志成化中

葉葵字蓋臣浮梁人舉人 蕭韶字鳳儀晉江人誠

篤君子也尋常無疾言遽色罕言利 龔澤閩縣人

舉人弘治中 鄭元吉懷安人舉人 李時蕃

俞徽南京人舉人 蒼梧人正德中 廖輕字鍾範崇仁人舉人敦行誼好詩文與同官莆

人陳瑒相得瑒千里命駕歿於其家厚殯焉

輕與陳

瑒二人

愛慕皆出肝膈輕擢文昌縣令及歷任楚中時修侯於瑒後謝事家居瑒年已七十餘忽携僕來訪相見對泣旋復忻慰居歲餘瑒遽疾弗起輕揮淚曰見母慮天遣故人終於吾手喪具當勉力圖之瑒顧僕點



領而逝輕爲之厚殮仍立主於家服朋友服爲喪主  
率子在朝夕哭臨七日告訃瑋子厚遣歸其柩事見  
朱國楨湧  
童崇字德崇旣寧人抗直善振作士氣  
幢小品

徐咸贈之詩有靜廉不作肥家計諄切期收造士功  
之句 龔以文富順人舉人 劉賓進賢人歲貢

孫瑤南京水軍衛人歲貢儒雅有詩酒高懷 吳應

徵莆田人舉人 黃儲廬陵人歲貢 鄭天瑞浮梁

人舉人 陳智樂連城人歲貢介立耻趨阿猶有先

輩風範 姚廷鳳句容人歲貢 劉守謙安福人舉

人嘉靖中 盛德丹徒人歲貢端嚴而寬

周廷詔安義人歲貢 漆元中新昌人舉人初令湘

恕士有冤抑求達有司者必面拒而潛爲之地終不  
使之知也隆慶中

吳純德新城人歲貢 漆元中新昌人舉人初令湘

鄉以論獄忤監司旨改任嚴取予敦氣節士有何有

司謁廟請事者元中間之必先揭其人於廟門至則

皇愧不敢吐而罷署篆崇德以長揖漕使者遷教授

長沙勒致仕去 或問漆學博揭廟門事與盛學博潛

切已與否耳切已事聽其自爲自可而 周思文餘姚

佐之而阻之吾總不能定其孰得也 吳自修南海人舉

人舉人 許宗仁黟縣人歲貢 吳自修南海人舉

人性坦遂無擊曲態於功名際澹如也 張應元餘



姚人歲貢 葉榎慈谿人舉人官至知府 陳九級  
新昌人舉人 潘復化新昌人舉人 胡光祖長洲  
人舉人 裴紹中海寧人舉人萬曆中今  
吳尚文字長孺武康人舉人

訓導

潘原嘉興人由薦舉 劉貞真定人

子儼附籍本邑  
祀鄉賢有傳

洪武中

邢貴瓊山人永樂中

鄭理劇閩縣人舉人以經義德行教諸生爲體用之  
學士知嚮方焉 孫芳沐陽人以興起斯文爲已任

增置學舍與諸生日夜相講授時刻闕有程度絃誦  
之聲每至曉不輟與鄭理劇黃楚章相守一道學校  
之政爲之一新故至今稱善教必曰孫黃先生 王  
憲武進人舉人正統中 范琮沐陽人監生景泰中  
鄒靖汝州人舉人天順中 詹鏞邵武人監生  
蘇疇安溪人監生 劉顥長汀  
人監生 丘隅莆田人監生 伍復將樂人監生成  
化中

傅克寬廬陵人舉人

劉瑤安福人

余崇鳳柳州



人舉人弘治中

陳垣固安人 李倬進賢人 洪紹儒宿松人 李

祥南丹人舉人 王文郁豐城人 李清武平人正

德中

陳瑒莆田人篤行攻詩文 事見廖 林宏器永福人

黃嘉績莆田人 陳棠泗州人 楊信安義人

陸麟武進人 張鑑江都人 姜琳巢縣人 周魁

豐城人 歐陽延泰和人 許道金壇人 龐增增

城人 林鳳賓州人廉靜有模範 潘溥廣德州人

爲人瀟灑出塵 劉淪靖江人 葉世雍華亭人

柏鳴鳳句容人嘉靖中

吳慶餘長汀人 高梓貴池人始置學田 王如鼎

泰和人隆慶中

詹梅芳桂林衛人 黃仁俊福清人 蘇必達雲南

太和人舉人 吳從周甌寧人 吳式餘姚人 姚

喬齡桐廬人 林集鳳莆田人骯髒負意氣士心附

之 樊經德縉雲人 姚惠永豐人 屠俊初鄞縣

人 翁恒吉壽昌人端方嚴毅有不屈之節不染之

操師模賴以未墜焉 吳志仁安吉州人 仲言序

寶應人 劉汝勤無爲州人 俞世推蕭山人 趙



國藩仁和人 駱從寰武康人 性孝聞父病卽掛冠

歸 苗新宜山人 徐清源黟縣人 楊承憲仁和

人 羅材新城人 齊士英博平人 章時新昌人

性安恬深於經術所著劄記多見道之言萬曆中今

周日新字又銘西安人由歲貢

游仕進字漸之懷寧人由歲貢

鎮官

宋澈浦監鎮 宋史百官志凡管下人煙繁盛處設監

云大觀中舊碑額騎都尉監澈浦鎮稅兼鮑郎鹽場

紹興後以鮑郎鹽場兼澈浦鎮稅煙火公事繫銜嘉

定十四年始分專員 澈浦鎮題名記曰東南財用

大抵資羨海之饒而閔市有征又未能去也自郡邑

外每因大聚落置官司或至於兼二則責彌重任者

難之澈浦為鎮隸秀之海鹽鮑郎在焉自鹽場兼鎮

稅課額日廣居官者救過不給今疆事正殷屯戍隨

增兵民雜居其難又視昔數倍矣宣城胡君應雲之

來受代有日詢訪昔之官守者得一十九人列其姓

氏而刻之石俾余書其端君以淳熙丁未進士一第

二十年憂患屏居及是始筮仕未嘗作滯淹之嘆而

以平時講畫者次第出之廉以律已勤以泄官事不

付之吏乎薄征以惠行旅與亭戶期約不失信義宜

其上下之相孚如此也惟諸與君共登慈恩且居是

邦因紀所見以告來者嘉定九年四月望日朝散郎

宗正丞兼江淮制置大使司參謀官常緒記 應

雲名從龍見後寶祐二年從龍子字用虎者調尚書

署澈浦司船摩洋舊石屬監鎮張焯續鐫十有二人

而褚之姪孫棠復 為之記文多不載

陳南美 左文林郎紹興 李格 左從政郎 林極 右文林

七 袁藻 右迪功郎 姚廷襄 左迪功郎 沈大卿 左迪功

年 三十一年 三十二年 三十二年 郎乾道



二 蔡興世 左修職郎五年 魏衡 右迪功郎八年 林猶 迪功郎淳熙三年 趙師

石知秀州趙善悉嘗薦之於朝時黃洽為中丞以所

親囑善悉善悉聞師石材而未識面薦而後報日宜

以中丞所親為後洽大恚 迪功郎六年任九年滿 吳仁表 修職郎九年

年 高文慶 修職郎十一年 王子洪 從事郎十五年 葉樾 文林郎紹熙二年 周

焯 迪功郎慶元元年二月 吳華國 承直郎慶元元年七月 王顯世 迪功郎六年

曾晏 修職郎嘉泰二年 胡從龍 從事郎開禧元年事見題名記中 詹輔 修職郎嘉

定三 劉三畏 迪功郎四年 葛挺之 迪功郎六年 徐之紀嘗繪夫

子像就禪悅院行釋菜禮自後歲節冬至於其地序

拜鄉飲以為常 儒林郎九年 賈岳 迪功郎十一年 朱俊之 迪功郎十四年

史攢 文林郎十六年 趙潛夫字景壽黃岩人嘉定十六年進

士詩有清思監稅之暇輒夜泛扁舟永安湖扣舷把

酒而歌高標遠韻迥在物表嘗謂人善畫者亦莫我

圖也侍郎黃宜以著述薦提舉司馬述以練達薦未

幾卒 從事郎寶慶二年九月任三年正月卒 潛夫 有弦風亭詩見前職署篇潛夫自號鶴所其卒

也鎮人趙與珣為立思賢碑建安葛紹體撰招詞曰

君之來兮鶴自九臯駕以去兮渺天地而逍遙縞衣

玄裳兮橫大海之驚濤雲旂先驅兮霓旌旖旎月皓

皓兮風灑灑青山之上今黃灣之下挹北斗兮椒漿

羽扇綸巾兮佩璆鏘盼而笑今玉潔水光鳴鸞鳳兮

舞龍鼉馮夷鼓兮定妃歌魚味龍吟兮蛟螭護訶倦

言歸兮南園飄飛兮過 張廣年 承直郎三年 羅叔韶字儀

甫四明人以胄子登太常第再調至在鎮廉平多善

海鹽縣圖經卷九



績始剏官廨鑿廨傍河數里屬鎮人常棠為澈水志

樞尹袁韶憲使吳淵倉使袁肅太守黃壯猷交薦之

於朝去後民立德政碑修職郎後轉文林郎紹定三年張思齊儒林郎六

年思齊撰澈浦鎮廨舍記曰鎮治舊攝鹽場在安

定橋西嘉定十二年職始分於是鎮廨改為鹽署監

鎮廨有定寓或假民廬或泊僧舍因循已數政矣紹

定壬辰羅儀甫始置民產於事家橋東建正廳穿堂

癸巳孟夏思齊實為之代鳩工度財亟廣前規由是

宣詔有亭戒石有銘榜示有房俱列於外廊廡吏舍

翼乎左右廳之夾屋分為二塾扁以肅賓倒屣關廳

側以為帑外嚴公廚恪奉錫宴添買鄰地以為東廳

雜植花卉於前中闢一戶以通東廡循披廊而趨有

看街之所由角門而入有翫月之亭堂宇峻發房室

得宜東西小閣寒暖隨處以至庖湍之類纖悉備具

郡守喜而給牘蠲牙皂之資除元輸之賦自落成來

雨暘時若戶口日繁民與軍相安商與賈共悅俱口

澈川當由此益盛矣何幸拭目見之端平三年上巳

日記思齊

錢塘人趙汰夫文林郎端平三年曾羣文林郎嘉熙三年傅朋壽

儒林郎淳祐三年朱嗣立從事郎六年趙汝洄從事郎九年張焯承直郎十

二年嘗續周之綱從事郎寶祐四年趙孟若迪功郎開慶元年胡沫

修職郎景定五年徐衍祖承直郎咸淳三年李興宗迪功郎六年

監稅官

宋海鹽稅務解榮紹興中以彰慶館建稅務者

宋澈浦監酒朱南杰淳祐十年李得基淳祐十一年陶寶祐

年汪元圭婺源人宋末嘗獻軍國十策特補承信郎

監澈浦酒按朱與陶舊志俱稱茶院監酒考澈水志云戶部犒賞子庫酒庫昔在嶼城後遷茶

院去鎮西一十二里後屬漕司庫官兼之因當湖監立子庫於市是知茶院酒官即澈浦監酒也



酒

姚應瑞

姑蘇人事見叢記

宋抽解竹木官

戴安節

淳祐中解竹木舊係監鎮提督抱

納漕司竹木錢淳祐四年漕使袁右司差專官下鎮抽解自後為例

市舶官

宋澈水志云淳祐六年創市舶官

宋朱南杰

淳祐十一年

胡用虎

寶祐二年

元

楊發

福建安撫使元食貨志云世祖定江南凡隣海諸郡與番國往還互易舶貨者以

市舶官主之至元十四年立市舶司三於慶元上海澈浦令發督焉大德二年始併澈浦與上海入慶元市舶提舉司按宋時市舶浙江分五提舉司朱南杰諸人或即提舉未可知也元則直以安撫使領之且兼轄三市舶焉其尊又與提舉不侔矣以同屬市舶并志之

巡檢

宋

毛

建炎間勅岳祠者

張思湛

淳祐中並澈浦鎮巡檢

元

范廉卿灤城人至正十八年以蔭補海鹽州蘆瀝巡

檢善射私販者畏而遠之

樂郊私語曰廉卿為人恂恂儒者顧長騎射無論鳥

獸不及飛竄雖海塗上跳魚子蟹之細捷射之百不失一夜每懸火竿上去竿三百步從暗中射火無不滅者州瀕海凶命販鹽擅利操兵飛棹往來莫之敢撻至是皆心懼廉卿毋敢於州北私販境內為之肅然時本路推官陳春以平反鹽獄百人見稱大僚以為使巡官人人如范何必陳司理平反也

皇明

海口巡檢

熨人奴

洪武十九年遷司於白馬廟者

今巡檢周秉忠



長洲人

澈浦鎮巡檢

王德遷

洪武七年

愛顏

洪武十九年遷司於秦駐山者

今巡檢柯芬大田人

國初未析平湖縣屬巡檢四年浦鎮巡檢祁僧伽奴

張觀音奴白沙灣巡檢幸克名竝洪武初年任附志

鹽司官

三國吳

駱秀烏傷人統之子秀初被門庭之誚衆論狐疑莫

能辨明建武將軍謝淵垂意人物聞之歎息曰公緒

早夭同盟所哀聞其子志行明辨而被闇昧之誚望

諸夫子烈然高斷而各懷遲疑非所望也秀卒見明

終爲顯士仕爲海鹽司鹽校尉吳主休永安七年海

賊破海鹽被害

會稽典錄

宋

史載砂腰蘆瀝二場又舊志載有鮑郎及海鹽場鮑郎場有題名記曰鮑郎爲場列竈九歲課三萬

五千六百石有奇而年督

指買不與焉迺浸

就弛弊言路上疏謂窘於兼二之冗庚辰詔典銓注

顯官母與鎮稅事癸未又詔今後鎮官免以鹽場繫

銜催煎之職雖舊而茲方更勗噫嘻難矣雪川朱君

俯中興勛相曾孫公謹廉勤得於家傳始服茲事願

砥規模蕩如也民勞而瘁吏墮而黠迺肅申約法宣

上旨以布政由是劑量斥地之廣狹陞降戶額之輕

重易置牢盆之間憐室塞鼠穴之滲泄迺飭藏宇迺

穿運渠迺置程藉凡一介蠹公害民之事悉就罷行

至復靡舍請賦稍定輿皂郁然如方輿之家甫莽而

課增新羨比及三年砥諸場爲冠可謂能其所難矣

君既請代屬余日舊有題名二十四人更十七載倣

海鹽縣志卷九

辛五



落紹興壬申訖於嘉定辛巳中間胡君所立也今釐  
事方新請為擬其畧而改圖吁嚙首龜跌歸然聽事  
豈姓字遷次云哉於以識歲月紀治理也夫經營疏  
浚爬羅剔扶則源深而流長扶持全護訓飭道齊則  
本固而未懋君其有志於此歟嘉定十七年甲申仲  
春月朔朝奉郎新克福建路轉運司主管文字李昌

宗記

**朱俯** 從政郎嘉定十四年任鮑郎司鹽十七年滿鎮  
人黃寅贈俯還朝序云俯字伯昂吳興人中興

宰相之聞孫也。不卑小官毅然發軔以廉勤為本以  
公恕為守亭民境壤與齊民接擬私怙強舊染成俗

君其爬極事功以興君其導齊人心以格人皆曰所  
以幸吾邦者不淺今還朝其能以條畫事悉力而開

陳之儒術且 **史彌炳** 修職郎 應彌明 修職郎 寶  
行於天下矣 慶三年 薛師

**仁** 儒林郎紹 **顧用卿** 從政郎 周應旂 嘉熙元年任後  
定三年 六年 降錢糧官初朱

福建秀野堂應旂復新之常棠有記云西峯秀野不  
遇魏侯家法名世則傳舍其官府葺爾亭民榛蕪莽

沒於靈芝乎何有今吾周君傳山房之芳拾世科之  
芥故能不日之間而萬木向榮胸中丘壑當不在魏

侯下肯使秀野專美 **趙希規** 從事郎三年任淳祐  
西峯應旂姑蘇人 五年奉旨典岳祠 厲

**夢龍東陽人歲大歉清苦檢飭竭力奉公三年鹽課**

**以足** 建功郎淳祐二年任五年滿鎮人常棠有政績  
記日鮑郎催煎場舊共澈浦政事裕如也自分

創以來局冷如水廩稍不足以供事育庚子歲大歉  
亭民相鬻肉自抹九竈不煙倖活無幾宿奸陸梁倒

持蓮勺撞糖傲睨來者當署涉筆噤不敢問催煎之  
職至是難為矣東陽厲君夢龍到官庭空阜走案卷

塵蕪墊廢盤合鱸火燭熄上官朱黜紛來自立不容  
頰於是喟然日早懸肆虐饑饉荐臻則鹽不可催銜

勒寬縱期會玩愒則鹽不可催賂門乘機洗手未淨  
則鹽不可催倚海築場刮壤聚土暴曦鈎鹹漏竅瀝

瀉三日而成功驟雨至則前功又廢催鹽之職重難  
如此迺清苦檢飭奉公竭廉戴月披星鋤獮投蠹盡

心力而為之復鹽竈一所復鹽丁四十餘戶復鹽額  
一萬六千八百七十七石有奇一年而鹽場之課額羨所



謂才全而能鉅者也田疇多俾耕且糶戶百有餘家  
饑者得君之食創亭中路掘土墾砌草蕩一十二井  
渴者得君之漿官浦不道六十餘年參度高低疏浚  
約七百餘丈曝灰者得君之水傲居者得君之地省  
臺剝薦獎諭疊至將以上幕奏辟不日有功於鹽場  
乎哉淳祐五年七月故人歌舞相告謂厲君歸矣政  
不記何以詒諸久竹  
施樸從事郎淳祐五年  
詹元善儒林郎七年任  
總領浙西江東  
財賦淮東准備  
俞墳十一  
王九齡以上並鮑郎鹽場  
晏述大觀四年東岳廟碑載其街通仕郎監海鹽監兼管管砂腰海鹽場煎買鹽貨云云  
施棐紹熙四年修職郎監秀州海鹽縣砂腰催煎場  
陸桂山陰人尚書左丞一佃之曾孫慶元中以修職郎兼蘆瀝煎催場  
元

江正皇慶三年楊宣慰齋糧碑載其街嘉興路海鹽州海砂場鹽司丞  
抹速忽至

治中海砂丞廉幹寡欲亭民爲之立祠事載二賢堂記具前簡

金汝礪至大中鮑郎場鹽司令

皇明

海砂場鹽課司大使張眉高洪武二十五年開設  
今大使梅賓

國廬江人川鎮邊使吳越功臣越州都指揮使

鮑郎場鹽課司大使蕭士贇洪武二十五年開設  
今大使馬出

萃新河人

國初未析平湖鹽場三蘆瀝場始設大使康達遠附

志

倉大使三倉設官自正統二年始  
今



廣儲倉大使程世彩慈谿人常積一倉大使李文桂  
瑞安人常積二倉大使鍾隗武平人

鹽運使鹽監同大使蕭士賢

共九十二人

國監五人

監丞監監監同大使張晉高

正平開道共九十二人

今大使蘇寶

皇賜

金必齋

鹽監同令至大中鹽監

軍中監丞丞兼韓襄煇亭男為之立麻

麻其前蕭事蕭二贊堂

海鹽縣圖經卷之十

官師篇第五之下

武秩

五代

屠龍驤澈川鎮遏使吳越功臣越州都指揮使環智

之子也

宋

王復古開禧中澈浦水軍統制長墻山閱武亭復古

所立

尚景南京指揮淳祐五年鎮守澈浦鎮統領水軍





邢子政淳祐七年鎮守澈浦鎮統領水軍嘗鑿泉黃道山架屋以資汲者又建美固堂於營中自爲記

余領軍事越三載舟楫器械視昔具備一日暇登高望遠兩山橫倚巨海浸盪營壁中立若龜之伏焉門關三面如尾如足而垣其東偏形勢無迺未全乎詢諸宿老答曰陰陽所忌者卯風焉嘗闢復室余應之曰此未識變通者也使益壻仞而臺加之以屋則有形勢之備無卯風之嫌其不可乎哉衆皆曰然於是度材僱工築室構堂欄楯憑眺晨光濕翠夜影涵壁師休役簡與衆同樂其在茲矣是堂也予以全此營之形勢而山海環帶又以益此堂之勝美哉山河之固魏武侯語也余是取焉用以名吾堂淳祐庚戌六月二十六日浮光邢子政書 宋末有乍浦統制劉英澈浦統制胡全並降元附記

元 哈刺解哈魯人至元十二年統水軍從海道攻宋戍

澈浦海口後克沿海經畧使進兵福建廣南多其功終浙東宣慰使贈鞏國公謚武惠

隋世昌棲霞人涉獵書史善騎射身長八尺鍛渾鐵爲鎗重四十餘斤能左右擊刺累戰功至宣武將軍至元十四年進安撫使佩金虎符鎮澈浦十七年以獲海賊功進安遠大將軍卒封定海郡侯謚忠勇

趙賁亨字文甫冠氏人襲父職爲行軍千戶以平宋功晉宣武將軍至元十四年盜發澈浦賁亨時授處州路總管府達魯花赤未行間行省檄爲招討使率兵討平之後終處州路管軍萬戶



張士特至元中鎮守海鹽管軍千戶階顯武將軍

見陳

山行祠  
碑文

王熔鎮守澈浦招討使

見永安湖碑記熔卽决湖為田肆虐于澈者時有百戶駱

亦與之濟惡失其名震亨按元史兵志云國制既平江南以兵戍列城其長軍之官皆世守不易故多與富民樹黨因奪民田宅居室蠹有司政事浙宣慰同知張鐸嘗以為言是武弁中侵攘如王與駱者元時固比比有矣

皇明

海寧衛

王文祿衛職黃志曰武職自公侯伯下指揮千百戶視子男世襲指揮上有把總參將總

兵都督流官不世襲指揮有使有同知有僉事千戶有正有副百戶有試有冠帶總旗衛鎮撫視千戶所鎮撫視百戶指揮使曰昭勇同知曰懷遠僉事曰明威正千戶曰武德副千戶曰武畧並將軍百戶曰昭

信校尉有開國功靖難功征蠻功平寇功下西洋功海運功開屯功開國曰舊官襲試騎射靖難曰新官不試今亦試功載內府冊曰黃其副在兵部衛歲造上都司曰貼黃今按而纂之人各為傳曰職黃志把總者備倭以控海洋衛之帥也參將者又帥之大焉尤宜特書經歷知事視參軍乃文衛皆附之前無所考缺以俟後之續云

指揮使

王信定遠人元至正丙午歸隸淮安衛永樂元年以

靖難功授金吾衛指揮同知尋陞指揮使宣德元年

至傅斌珙鑒勇勇字國用剛直而有謀遇事敢為慷

慨散金罔吝人樂為効力正德中署衛篆奏定班首

造局修城垣廢圯具舉子大邦襲季子大猷成進士



官僉憲晉勇階昭毅將軍大邦傳彥忠繼茂國寧  
劉永受武功人洪武初歸隸燕山中護衛靖難兵起  
累功授指揮僉事小河戰歿于海定九門永樂改元  
陞指揮使尋僉浙閩事傳江清宣德六年至傳翰寧  
寧字時泰性孝友涉畧經史署衛篆二十五年撫恤  
殫勤餉罔滯缺歲阻饑移檄請賑且捐俸佐之戎伍  
全活甚衆每大比設宴餞衛籍之預試者於西郊或  
曠學廢黜貽戎胄以愧之表張氏雙節廬增同寮俸  
減城垣窰柴料價恩威甚著傳銳字蓄之識政體能  
詩與薦紳鍾徐諸公爲社會有海村稿傳湘岱松承  
光堯臣

徐進合肥人洪武中歸隸燕山左護衛靖難累功授  
指揮同知從定京師陞徐州衛指揮使傳道翥鑑宣  
德十年至傳恭黼玠並署篆有聲玠爲人言論侃侃  
好與賢士大夫交晚守禦乍浦鋤強植善弊規汰革  
一新乍好訟畏之帖服傳行健初玠訓行健甚嚴幼  
時卽以忠義自許嘉靖癸丑倭犯海上行健統兵守  
澈浦感信素孚訓練有法倭攻之輒敗不敢近每臨  
陣必密書姓名于衣以死自誓橫涇河鳳凰山諸處  
累戰勝獲倭級百餘

采九德東夷事畧曰嘉靖三十三年十月八日石墩泊一大船



賊百餘詭言兵船打水使居人不疑暮則四掠矣至十一日開洋遇兵船復登岸十四日丁總戎僅與徐揮使行健率兵往勦丁斬八賊徐殺五賊明日兵船生擒二賊餘黨復開洋追抵萊子山火器破其船斬獲約八十餘生擒十三賊赴官訊問言如鳥語莫能辨三十四年十一月二十日倭賊六十人自大步門登岸指揮徐行健率兵出賊登山以待徐從間道登山襲之賊下山而北避破塘關復抵金水堰匿民家卽火其廬徐駐師南山巔伺其出而進擊之會縣遣捕官率兵至賊亂行龍麥間直奔西南去官兵追抵橫涇而暮賊匿張姓民家時敵兵隔水圍其南縣兵繞屋圍其後須臾一賊瞋目咬牙作叱咤聲舉刀對斫火噴星流撲地舞而前眾兵攢刺中十數鎗尚能跳起五六尺餘賊闖門以避兵踰垣入賊罔敢對敵有潛榻下者有避樓中者有羅拜乞生者官兵遇卽殺之凡四十九顆逸十四賊夜匿秦山之阿二十

二日徐兵搜山悉擒斬之

丙辰四月八日大艘倭寇登乍浦進犯

海鹽行健率兵五百當之倭分其眾一由海塘一由

北王橋腹背夾攻行健力戰斬數寇身被重傷死贈官立廟子志達襲陞都指揮僉事次子志伊指揮僉事志達傳承勛

贊曰萬戶英烈總角已占戎行既陟致果以嚴志懷效死自書衣襜其師可沒厥名不燬

黃國樊維城撰

王忠本姓脫康里國人洪武中自金山歸附穎國傳

友德編永平衛靖難累功授遵化衛指揮使永樂八

年征迤北陞都指揮僉事子得洪熙中征迤北沒傳

貴宣德十年至傳俊景泰初以善騎射檄征沙處賊

從都指揮王鉞累戰金華沿滄嶺麻洋麗水龍潭武



義王皮坑諸處多所擒斬論功賞金牌綺鈔以鉞事  
坐累不得晉秩傳軒性孝母沈在堂遠饋必令人視  
食否爲欣戚尤精祿命占卜之術

王文祿衛志云軒出汛沈家門屬有

千戶滿正者自家來責曰爾來何遲曰今早生一男  
子乃遲也遂按其生時推之曰千戶却生指揮矣正  
後征姚源陣亡子潮陞二級襲指揮巡海副使由海  
寧來卜口不來或曰見前導出東門曰必不來已而  
果逐人皆神之每正旦卜卦審休咎庚午得  
同人爻值游菟嘆曰已矣訣別寮友果卒

傳臣勲

勲有膽力善射督捕饒航亂槩將及發二矢斃二寇  
汴有悍卒七號七虎請之上夜詣境擒之傳國賢嘉  
靖二十四年中武舉會試官至都閫傳一初洪綬兆

騏

李成滋陽人洪武初歸韓平章隸濟州衛靖難累功  
陞燕山左護衛指揮同知小河戰歿子興陞金吾衛  
指揮使傳安成化十七年至傳振有膽氣力能拔樹  
善騎射性孝親疾衣冠不解歿則盡哀遇忌辰必茹  
素署篆十五年重葺衛廨不私一錢傳煥熟於春秋  
能左右射汛卒缺餉鼓譟入城單騎諭散之督漕閔  
輓卒勞與同甘苦卒感之效勤傳元律嘉靖甲寅從  
叅將盧鏜追倭寇於孟家堰遇伏力戰死元律初爲  
諸生有文名應武舉中第一人竟死于難不負所學  
贈都指揮僉事世襲傳鳳鳴繼晟



采興定遠人元至正甲午歸詹總管洪武初隸燕山

中護衛靖難累功陞指揮僉事克金川門陞瀋陽右

衛指揮同知子旺永樂十五年至傳玉真清鉞煉煉

負氣有膽畧管陸路團操嘉靖三十二年倭犯新塘

嘴諸將禦之率激兵三百策應斬二賊力竭死祀英

烈祠子鳳翽襲陞指揮使

王文祿衛志曰煉嘗守大

為倭也喝問之船中人聚語曰張髯赤面者真將軍

也殆不可近遂遁去采九德事畧曰賊四十二人

犯自馬廟滿將軍遇害賊留廟中四日不出南北探

報俱絕時協總指揮馬檄指揮采率敵浦兵三百合

衛所軍千餘屯教場又指揮王彥忠帥陸軍三百徐

行健率湖兵四百俱屯馬凡三晝夜矣五月六日黎

明我軍散至柴家埭炊餉賊分為五六夥而至服色

裝束如鹽人眾以為此避賊鄉民也不疑之或從海

岸或從裏塘吹螺四合亂擊我軍眾皆驚潰馬被鎗

洞胸背而死采橫刀擊賊賊叢必斃之彥忠行健俱

被傷千戶姜楫百戶王相姚岑呂鳳鳳之子爵並戰

死時城上人視教場中黑霧濛濛天若為色慘者倭

後奔赭山奪錢鳳翽傳成文夢賜

姚順梁縣人陳也先百戶元至正丙申來歸征偽漢

鄱陽湖戰捷陞武昌衛百戶洪武二十六年子清陞

指揮僉事至傳廉英調潮州衛傳雄景泰中征三山

陞指揮同知天順元年復還本衛傳麟鸞昌弘嘉靖

乙卯弘領兵征倭寇於金山進攻陶宅賊巢戰歿子

磐襲陞指揮使

采九德事畧曰柘林屯賊萬數軍門

調主客兵號二十萬屯金山討之邵



尺突出衝擊我師敗績姚死之將官遇害二十餘人  
兵千餘人張僞倭變志曰乙卯九月浙直官兵會  
擊陶宅之寇指揮邵鼎姚弘生負于岳陷陣殺賊賊  
大敗乘勝進攻賊死守其巢乘高刺下三人皆死按  
二書所載異傳師期振虞

崔福鳳陽人詹院判百戶元至正丁酉來歸從克吳  
越闖蜀上都授金華所副千戶子英調定海衛二十  
八年陞指揮僉事至傳忠端端字惟正善騎射及詞  
翰器識不群正統間從都督徐恭征鄧葉二寇搗穴  
擒渠賊陶得禮晉同知景泰中貢倭所過索攘浙藩  
檄端防護倭帖伏傳章巽鼎鼎字元器方峻寡言笑  
嘗署本衛及台衛篆務擢浙西備倭把總所至以清  
介稱性尤好學善吟咏有詩稿行世傳致遠襲指揮  
僉事傳成俊字朝彥初爲諸生受餼稟中乙榜者再  
後襲蔭中武科者三成俊深經術善屬文負才骯髒  
不屑下人意本欲從儒塗進介冑非所好也迨試大  
司馬復不遇益怏怏抱憤俗流以弁士待之觸事多  
迂遂謝職園居著詩文名祭書祭劍等集以自見遺  
命葬我無以誅韋拊注必用儒者服志可知已生平  
事父母孝先世產悉讓二幼弟撫恤有恩傳天賜字  
青支中萬曆三十二年會試陞指揮使歷浙江海寧  
備倭把總廣東都司僉書中都留守南贛叅將廣東



副總兵南京前軍都督府僉書今官左軍都督鎮守

廣東總兵

崔氏德音錄自叙曰天賜束髮從戎砥節勵行惟恐墮棄自筮仕來辱知上官卽蒙

獎予任衛事惟行其無事公餘不廢頌讀鄉榜三登皆握篆時也吾衛事繁刺人情難調一不當未有不媒藥其短巧加排擠者賜惟以無事視之故事無廢弛而身名亦得以全藉令竊餘脂自潤事擾心昏祗取辱爾幸天誘其衷忝列甲辰會榜志願少酬嗣後漸涉亨衢歷任遭逢無非知己自揣庸鷲何以得此誠能感人勤可補拙夙夜可幸寡過以斯耳夫士屈于不知已伸於知己則國士之遇知己之恩何忍忘之敬錄歷任勅諭簡書及諸名公贈言彙成一冊名曰德音錄用誌不諛兼以垂示後昆云

指揮同知

方勝真州人元至正丙申歸隸金吾衛洪武三年征

西没子原調羽林左衛靖難累功指揮僉事定京師

晉同知瀋陽左衛子正永樂十七年至傳綱秦秦字

吉甫儒雅善書法及詩署篆十年以廉介恭勤著稱

屬有百戶某肆刁挾致之法不少貸嘉靖甲寅倭寇

來犯率兵追勦屢有功詩稿三卷藏家傳巽承恩戡

之戡之字者定擢守備南京坐營歷劉河遊擊金山

叅將今官雲南臨沅副總兵

金山去思碑記曰今上德化翔洽華夏獨狡

夷匪茹黔蜀間潢池未靖宵衣四顧徵兵出大府金錢事未有歎議者謂國家重肘腋急遠左重藩服

急黔蜀而東南數千里安于覆盂可偃旂卧鼓治余謂是未哲天下大計也天下事勢利害夷情倘嚮愬

不出先後虛實之機事固有樹勞于此宜績于彼者大將所以建威銷萌防患耳目表也吾金山叅戎方

公世為文武名聞聲績著留京泊劉河移鎮金山金山介海壘海外中山日本之屬錯峙波濤中異時橫



肆薦食數十年始剪撲今我方悉力東西睡得無有  
妄意窺我左足者乎奴脫以餌虜者餌倭梗餉道撓  
授兵即皮島奇師旬麗義旅不得議奴後憂將大耳  
今之海宴烽悒明靖倭之妖氛陰震奴之膽魄者非  
方公力乎公始受事建麾巡行餘皇組練身試驚濤  
慨然有泝扶桑問若木之意為壇而盟洗手飲水自  
飭飭下旌鼓間有觸然不辱色乃簡尺伍謹斥埃明  
賞罰均勞逸時餽糗又却召募舊例革長短踐更罷  
燈夫禁科歛宿弊盡掃士馬飽騰投石超距者無不  
一當百即盲風若霧中士無敢解甲臥而探丸煮海  
通市之奸相戒遠避公乃以其暇蒐卒講射又人人  
感奮不待公教督蓋公有輕裘緩帶之整暇而濟以  
密有雅歌投壺之風度而濟以勤有士卒同甘苦之  
豈弟而振以法有九天九淵之膽智而主以慎故士  
樂為公用而蠢茲島夷且望風逆折于萬里外而何  
虞于東師哉會黔事急天子即金山授公臨沉鉞  
麾下士請諸臺借恂不得謀伐石紀去思惟昔馬伏  
波破斬徵側啓土嶠南其意恒欲一奮烏桓以靖北  
塞忠臣烈士為國家捍患紓憂志固如此今公文武  
為憲功高望崇中外倚為干城屏翰他日不賓荒服

次第從公解藩悔罪告廟飲至天子式公壯猷  
以公用鉞遼左令東南益安吾吳世世拜公之德正  
未有極余敢辭櫟館役福建布政使司右叅議吳郡范允臨撰

彭勝全椒人元至正甲午歸張總管成洪武四年隸

金吾左衛十七年以征雲南功授平越衛指揮僉事

傳壽玉三十二年至傳程程素負膽畧知天文正統

十三年檄征沙寇鄧茂七哨延平攻後洋前洋寨鵝

峰山大竹口巖家島黃金井斬級四十擒渠寇三招

撫千二百餘人景泰元年又檄征葉宗留進守永康

戰沙灘渡哨白姆沿滄破麻洋龍潭大戰天井背周

奈寨斬級六十一擒渠寇五積功晉同知

王文祿衛志曰初程



受都督劉聚檄征沙寇師出碼祭縣學生仲端捧毛  
血所盛碗適墮地碎程校劍欲斬端端跪而言曰宛  
然破賊乃釋之旗幟號令赫然竦觀果傳紳雲雲撫  
破賊奏凱歸惜功隆賞薄未盡請報云

士卒仁性孝父疾嘗割股療之每忌辰哭必盡哀風  
雨走墓下省視傳端大年嘉靖丙午倭犯唐家灣端  
戍守兵弱大年散財募死士助父戰斬倭七級倭遁  
不上首功歸傳紹賢紹賢少折節爲儒工古文辭及  
書法視篆多所興除葺衛署一新擢守禦浦口城圯  
於江創關隘四選五衛卒譏防境以安歷副中都留  
守都闕陝西以外衛更番卒增濬陝省外壕培子城  
遷叅將分守蘇松議移寶山哨與浙海會符防汛請  
郡粟貯衛倉士得宿飽具有成績紹賢兼文武材而  
性寬大所至多厚德事浦口救荒平糶預給月糧定  
渡江條約脫民於溺收塋佛寺暴棺及在金山大中  
丞欲去民冢廣城濠力持之得全竟以此相左去官  
弗恤他居鄉懿美及生卒封秩具後人物志不贅子  
宗孟萬曆辛丑進士河南道監察御史宗孟子四長  
宜乙卯舉人原廣邑庠生期生丙辰進士工部主事  
弘保郡庠生並繇文塗典而宗孟弟宗礪宗因亦庠  
士宗礪尤讀書敏恬素操於是以第三弟宗周借襲  
今擢溫處道中軍守備



滿客來黑山人永樂七年降隸涼州衛八年陞正千

戶

滿氏世系表云恭順侯吳光誠生子五客來其第五子也

傳朶羅禿傳打歹正

統十四年征口北戰沒傳打蘭台調南丹衛傳滿失的天順八年至傳正字公直初劉六劉七之亂正解

軍噐次滄州與守臣張竒協守却賊有功正德七年

開常賊起檄正往征守嚴村戰均坑口斬級三奪馬

二匹得勝歸後追寇至青陽嶺殺二十餘人深入遇

伏死

王文祿衛志曰正時兵寡矢盡被捨墜馬而死有卒倪垣控馬亦死之正之得士心於此可見

贈指揮僉事世襲傳朝丰儀甚偉有節氣嘉靖癸丑

守梁庄寨倭酋八大王以賊四十二人由金山潛踰

梁庄而南朝所統兵甚少奮勇率千戶王繼隆百戶

楊臣康綬追及砂腰村賊據民家登屋揮旗朝射之

殪復有賊從白馬廟突出朝力鬪不支死繼隆等亦

死今祀英烈祠子子謙襲陞指揮同知子謙幼育于

繼母嘗擠之井不死而事之益恭待所出弟妹恩禮

兼至爲人情所難居官清謹治家尚儉與人交尤敦

厚和柔無機心械事壽至一百一歲而終子謙手足

甲特厚小腹堅如石臍帶至老不落皆壽者相又常

言生平房帷外未嘗近一女婦男色尤所未經所畜

養亦有以致之矣

翁生於正德十五年卒於萬曆之四十八年壯時筮管務至麥莊涇



李瑤家方坐間有白龜盈尺者入其室向翁翹首注視翁取而放之深淵龜回顧者數數又領水師汎海至陳錢馬蹟大洋有絳幘神來迎光映水一海盡傳赤此二事嘗舉似人以爲奇翁福壽已先徵云

上林生有膂力輪大刀如飛弓挽二石矢及二百武善調馬一經控策無不受馭逐鹽寇沒於硤石子宗仁襲今署衛篆

馬得良懷來人洪武六年募隸濟州衛子旺補靖難累功陞遵化衛正千戶永樂二十年征迤北宣德六年至子信戰歿傳文景泰元年征溫處賊守永康攻敗賊首朱必森斬首一級次麗水謝山擒寇吳廷方攻沿滄斬首一級破麻洋研珠二寨進至天井背擒

寇王仁又破方前平寨三年叙功陞指揮僉事傳瑞銀銀爲人馴謹領漕平恕得士心時劇寇劉六擾山東焚運艘銀設計保護獨全傳呈圖好古能詩恂恂有儒將風嘉靖三十一年倭犯海上呈圖協同把總王應麟擒倭二十四人於新塘嘴明年倭自青村登犯至白馬廟呈圖營於演武場以禦軍潰被重創與指揮采煉俱死祀英烈祠子繼武襲陞指揮同知魁岸有大節居恒痛父戰沒悲憤自奮擢松海把總值倭奴突犯曰此吾報仇雪耻日也統海艘戰於西磯洋親斬酋首徭戍卽生擒十餘人又戰於大陳洋窮



追外島復生擒二倭斬首十七級犁沈賊舟溺死不  
及首鹵者亡算連戰六日皆大捷設父像生剖倭心  
取血酌酒以告痛哭再拜見者感動歷遷湖廣都閫

鎮守江南副總兵平劉汝國亂尋陞南京右軍都督

僉事卒官繼武室多侍媵沒後諸姬食貧矢操圃政

蕭然尤其刑家之驗也王世貞集云馬將軍呈圖力戰殉節子總戎君繼武持重

廉惠有大將風可謂世美為詩併及之詩曰一代馬新息英風颯至今能將裴革事了却據鞍心樂府歌

都護孤兒備羽林清源務持重不愛財間金傳孟驥累薦遷吳淞把總山

東都司僉書歷登萊金台嚴叅將今官臨清叅將萬曆

辛丑海邑訛言倭至時已暮夜又大雨傾注民奔入城避強負幼穉及衣囊纍纍塞門諸帥守城門者半

啓其罪不及盡開惡少乘之掠取頃刻相蹂踐死者數十西門尤甚孟驥時分守南門獨秉燭戒嚴聽民

徐徐入無所損失人以此服其應變畧焉事見彭宗礪紀事

指揮僉事

竹昌固始人洪武元年歸授鍾山衛指揮僉事攻馬

方密臘寨戰歿子泰襲傳喚三十二年至傳勝琳琪

龍鳴鳳凌雲長菁

嚴嗣全椒人至正丙申歸隸牛塘營克常州征江西

克蘓州破北平征定西遼東迤北洪武八年陞安豐

所百戶十一年陞濟陽衛副千戶征灰山金州至百

眼井子政二十六年陞指揮僉事至傳端齡明明性



廉介嘗總浙西戎務廩餼皆却不受撫軍馭夷海上  
肅清傳震善騎射手搏及劍術性尤好文喜談論能  
詩藏古書籍彝鼎名畫法書甚多延納名流設醴無  
虛日疊竒石爲山鑿池畜鶴日盤桓其間因自號鶴  
汀生傳守約有翼廷傑

商允通州人洪武十八年歸榮陽侯授總旗後自彭  
城調大寧前衛靖難累功陞平陽衛指揮僉事永樂  
十六年至傳祥宣德二年征交趾任昌汀戰沒傳懋  
經論鉉霖大成希元執中應文

郭聚滕縣人至正丙午歸徐丞相吳元年隸徐州衛  
子守忠代靖難累功陞金鄉衛指揮僉事永樂十五  
年至傳瓚郭東麟鸞相卿雲鵬愈高景儀

童保保桐城人洪武四年募隸羽林左衛子奴兒補  
靖難累功陞燕山中護衛副千戶齊眉山戰沒子正  
永樂五年陞指揮僉事傳昇受傑成化二十一年至  
傳勲堂尚斌嘉靖三十四年中武舉會試陞指揮使  
子養初襲指揮僉事署衛篆累薦擢松海把總傳軋

鍾

王聚興州人洪武八年編永清左衛子全代靖難累  
功陞指揮僉事永樂七年征迤北陞指揮同知子方



宣德十年至傳瑁翰憲陞都指揮湖廣江南總漕傳  
應麟坐事逮繫子思忠降襲僉事傳元良廷臣

王海黃岡人偽漢都鎮撫元至正甲辰來歸授橫海  
衛百戶子敬洪武中累陞宣州衛指揮僉事敬子智

三十五年至宣德初檄征交趾傳清瑤絕今後裔食  
總旗糧

李顯密雲人洪武二十年募集征大寧授百戶永樂

初陞平陽衛正千戶傳敏宣宣德十年至景泰元年  
年征沙處有功陞指揮僉事傳輔絕

陳文治秀水人坐事成新河所嘉靖三十九年參將  
戚繼光選入幕府以斬倭級功授本衛前所百戶歷

世本衛都指揮同知世襲後總兵昌平以上首功不  
實繫獄死除

附

嚴德初從高皇起義累功授海寧衛指揮僉事後  
從朱亮祖下台州力戰死洪武二年六月贈驃騎上  
將軍都督府副使上護軍天水郡公

孫虎始從王師屯池陽下於潛昌化安輯嚴州諸暨  
授千戶克新昌取桐廬陞海寧衛指揮副使嘉定盜  
起虎率兵捕斬之征福建還從大將軍徐達征沙漠  
至落馬河與元大尉賈驢兒戰死之洪武三年五月



贈鎮國將軍僉大都督府事康安郡伯  
許貞乍浦所千戶洪武三十四年陞本衛指揮僉事  
永樂四年從都指揮使張勝征交趾屢戰有功五年  
二月又從都指揮使羅文攻廣原州天峰寨歿于陣  
貞在衛薦恕人感之不忘  
周鑑指揮同知洪武十九年建廣儲倉  
趙鎧衛指揮洪武二十七年置本縣潮閘  
二人並見永樂志後  
或調去  
未可知  
尚鷹衛指揮永樂四年征交征後除功次無攷  
莊端天順中衛指揮後絕功次無攷

### 衛鎮撫

張德含山人至正乙未和州歸華總管取采石太平  
從下安慶陞總旗洪武元年陞夷山衛百戶征洞夷  
及迤北七年陞大興右衛所鎮撫子英征迤北都山  
陞弘農衛鎮撫子義三十二年戰歿傳雄三十五年  
至傳翽武謨鏜應雷國道廷寵

夏清江陰人至正丁酉歸岳摠管下蘓州取澤潞征  
雲南洪武二十年陞濟川衛百戶子春靖難功陞西  
安衛副千戶洪熙元年陞衛鎮撫至傳甫升達文鼎  
應元時霖正寅



夏郁任丘人田使莊團練百夫長靖難累功陞河間衛副千戶永樂二年陞神武衛鎮撫傳尚忠宗宣德四年至景泰元年征金華受賞傳至光祖絕後裔食劉忠新安人洪武二十四年授保定衛總旗以靖難守城却敵功永樂三年陞忠義左衛鎮撫傳剛宣德四年至傳愷勲欽絕

左所

千戶

王義泰州人僞吳頭目降隸定遠衛洪武元年克益梁陝蜀陞長春所百戶二十六年至傳旺海運守龍灣高資港迎靖難師陞正千戶傳英震正統十四年征金華受賞傳隆瑞祚絕

李壽黃岡人元至正甲辰歸隸武德衛授小旗征江西戰敗僞漢洪武十五年陞寧波衛百戶傳忠陞副千戶二十六年至傳能永樂二十一年征長興受賞傳璞志經隆嘉元舉武科納級指揮僉事督造捍海石塘征倭戰船轉漕治兵具有聲績子延德納級指揮僉事傳萬象

陶方定遠人至正丁酉歸曹國公李善長從征浙東陞杭州右衛百戶傳璿調廣西河泥所傳鏞三十四



年至傳洪正統十三年征延平受賞傳桓炳炳字德明高談自負善騎射正德七年檄征開常賊率坑兵進東臯斬級二與首賊蔡六二戰太平寺斬級三與王浩八戰斬級二攻瑤田戰勝會八省兵進至江西貴溪裴源斬級三攻爐坊與首寇陳邦四戰斬級一十年叙功陞正千戶初炳家居隣人夜望見其廳事屋脊常有光進看光發處是其架上一刀後功成名其廳事爲瑞劍堂志先徵炳能詩善行草有集藏家傳堂情遇春希堯允明

胡添望江人至正甲辰選授小旗調河南衛洪武二十九年子通陞振武衛百戶傳敏寬三十五年至傳剛景泰元年從指揮彭程征沙寇守永康敗寇楊廣麗水搜山擒寇吳煬保沿滄擒寇陶貌次龍潭斬級一三三年陞副千戶傳璉宏懷堂繼武獻賢

所鎮撫

夏勝江都人至正丁酉選授小旗戰捷鄱陽湖破潼關攻定西洪武四年陞所鎮撫調萊州衛傳典二十六年至傳輔茂錦明宗禹之恭

謝敬遂平人元安陽元帥至正甲辰降除英武衛百戶攻蘄州妾門監築敵臺箭傷歿子毅襲太倉衛所



鎮撫傳麟三十三年至正統十四年征福建受賞傳  
芳震絕

百戶

馬成單縣人至正丙午歸隸大典衛靖難戰歿弟斌  
永樂八年陞試百戶征迤北十六年陞百戶至傳麟  
俊良禎起龍思周志選

潘名安和州人至正乙未來歸取采石太平戰鄱陽  
湖征齊魯遼陝雲南洪武十九年陞天策衛百戶子  
正調淮安衛又調海寧守禦所傳勝祥昌正德十六  
年至傳子賢文英士顯

吳興海州人洪武十五年編杭州右衛十九年至子  
忠永樂七年征西洋十三年陞試百戶傳進璿正統  
十四年征處州擒首寇陳鑑湖大戰烏龍嶺招撫降  
者景泰元年追寇五錦橋斬級三擒首寇陶十四進  
次麗水擒寇林叔埜破龍潭寨次年擒寇陶成四追  
至方平寨斬級二又擒寇邵月斬級一五年叙功陞  
實授百戶

王文祿云上功七次例陞副千戶  
因忌者沮之故止得實授衛云

傳清正

勲明俊國彥師玠

沈仁志黃巖人洪武七年編水軍衛十三年子亞顯  
補永樂十七年征西洋陞百戶子貴正統八年至傳



珍玉堂尚武士熊

方三建德人至正丁酉歸附庚子征廣信子貴補金吾衛洪武十四年征雲南廣西鳳儀陞百戶二十九年至傳圓俊玉隆昌奎如斗象坤

王虎兒巢縣人至正乙未歸取采石子真補征赤迷河百眼哈喇洪武二十七年陞鎮海衛百戶傳福永樂八年至傳禮輔鎡鰲世臣尚賢

張黻巢縣人至正乙未歸附征江西洪武元年陞潮陽所百戶傳勝羽二十六年至傳英輅輦琥玠天麟郭範和州人至正丙午隨本州郭千戶收集陞搃旗

洪武中累功陞西安衛實授百戶二十八年至傳青斌恩震宗泰大忠中武會試任浙西禦倭把搃傳歸存

陸均仲鄞縣人洪武二年募隸明州衛子今孫補海運高資港渡靖難師陞百戶至傳成道源銳瑰楷絕劉成西安人民兵萬戶至正己亥署千戶征江西陞搃旗征雲南歿子承保洪武三十年陞紹興衛百戶傳源永樂十六年至傳真璽祚光堯絕

右所

千戶



蘓魯高郵人歸隸鎮江衛至正己亥攻大興隨征山東  
洪武三年陞潞州衛百戶克哈喇幹耳朶二十六年  
陞府軍衛正千戶子文永樂六年至傳鶴義瑾霍  
霆絕

蔡保兒徐州人至正丙午歸隸徐州衛子暉代靖難  
累功陞徐州衛正千戶傳瑛正統二年至傳昂文臣  
國良斌材

呂全海州人僞漢部下吳元年降授濟寧右衛小旗  
征北平抵沙漠又征卜魚海子陞太原右護衛百戶  
子榮洪武三十四年征迷河永樂八年征瓦剌陞副  
千戶十六年至傳謙論鳳綬銳調陽如望

朱銘興化人僞吳將軍至正丙午降授鷹揚衛百戶  
洪武元年征梁陝三年會寧戰歿子斌調南昌衛十  
八年征潁州陞副千戶二十七年至傳姪源景泰元  
年征金華白姥攻破寇寨次武義港斬級一次王皮  
坑擒寇何燈三年陞正千戶傳姪政政子永仍襲副  
千戶傳爵朝重民悅

劉傑臨淮人至正乙未渡江來歸克徽州兩浙福建  
洪武二十二年陞留守左衛百戶子敞二十八年至  
傳斌正統十三年從指揮彭程征延平景泰元年征



永康斬首一十二級攻沿滄寇寨破麻洋龍潭斬級  
一三年陞副千戶傳剛珙黻表朝憲名相舉武科督  
漕治兵著材譽傳榮祖承寵

百戶

康彥名懷來人洪武三年募隸濟陽衛靖難藁城戰  
歿子勝陞錦衣衛試百戶正統八年至傳寧泰勇絕  
范興夏津人編鷹陽衛永樂四年征交趾下西洋十  
二年陞試百戶傳勝正統八年至傳能端勲絕

唐珪江浦人至正丙午歸授摠旗征蘓州調金吾衛  
克永平調永平衛征虎林黑龍江陞廣陽衛百戶洪

武二十七年至傳忠能爵福臣堯咨時英元振

李道名章丘人洪武二年選授濟南衛摠旗攻孟洞

山寨征沙漠攻虹螺山征灰山征金山二十年陞府

軍衛百戶子思忠二十六年至傳斌贊端珊驥一陽

絕

王雲昌國人洪武四年編楊州衛又調登州衛二十

年擒叛黨陞羽林衛百戶子智三十一年至傳通倫

寔寧繼勲國平上卿

朱尾達漳浦人洪武五年編長淮衛調水軍永樂四

年下西洋征夷十八年陞百戶子立正統八年至傳



輝瑾子潮繼勲之翰

陳亨蘄水人僞漢叅政至正壬寅以袁州降乙巳禦  
侵寇丙午陞興武衛千戶克姑蘓洪武四年陞陳州  
衛指揮僉事傳英惠諒降百戶二十六年至傳銘麟  
祥鵬臺邦策明道

袁鵬歌合肥人至正乙未歸取采石太平克陳也先  
寨克長興姑蘓延平陝西洪武十八年陞長安衛百  
戶十九年雲南戰歿贈宣武將軍子顯調武昌衛傳  
成永樂元年至傳敬忠信輔武卿洪範洪憲

雍德高郵人僞吳千戶至正丙午降授游靖所小旗  
攻台州戰傷洪武三年征蒼山寨陞百戶二十四年  
至傳信榮寬福昌簡國忠淳熙

張寬博興人吳元年歸洪武四年授青州衛小旗征  
沙漠灰山陞府軍衛百戶子文二十六年至傳弘彪  
瓚琪一元萬朔萬翼

王福仁和人洪武二十八年補舅沈興役海運陞瀋  
陽中屯衛百戶子真永樂十一年至傳輔龍韶相嘉  
靖三十二年禦倭寇於新塘嘴戰歿傳家翰慎德

張原真本縣人洪武十年隸杭州右衛又調紹興衛  
子官音保代三十四年海運守高資港渡靖難師陞



摠旗傳成正統十三年從寧陽侯征福建有功陞百  
戶景泰四年至傳昇元正承祿應斗鰲  
中所  
千戶  
章哈刺海遼陽人洪武二十年率部兵來降陞指揮  
僉事征雲南二十二年調金山衛二十八年陞浙江  
都指揮僉事子瑜降正千戶傳雄鑑成化二年至傳  
甫卿國賢耀忠弘憲  
劉益遷安人洪武十年選授儀衛司校尉靖難北平  
報捷陞錦衣衛副千戶傳原得廣真宣德十年至傳  
英漢龍絕

談再成宿遷人吳元年歸隸濟寧左衛洪武二十年  
子旺補靖難小河戰歿傳廣永樂元年陞副千戶宣  
德六年至傳忠勇文儒絕

所鎮撫

陳興楊信人洪武元年補舅李達達編蘓州衛齊眉  
山戰沒子貴永樂六年陞錦衣衛百戶正統五年陞  
所鎮撫至傳忠剛雲士賢奇策

百戶

唐文蒲圻人僞漢萬戶至正壬寅征贛州取福建取



南康陞蘓州衛百戶傳文興洪武十四年調金山衛  
傳勝三十五年至傳英僅武洪楷家瑞虞化

羅受衡陽人至正戊戌歸附征閩浙廣東破三山寨  
洪武十六年陞紹興衛總旗傳寧陞鎮南衛百戶傳  
賢正統元年陞聚文鸞繼恩奇英萬象

夏四兒滁州人至正乙未歸隸中山衛子回兒補靖  
難鄭村壩戰歿姪忠補充金川門永樂四年陞試百  
戶子信正統八年陞傳玘寅卿永繼隆襄明

王福一會稽人至正丙午歸附洪武四年海運沒子  
亞員補十七年至永樂十二年下西洋陞試百戶傳

忠鑑弼泰國正啓子萬曆二十三年會試武舉以軍  
門中軍領水兵防旅順調征釜山倭守朝鮮南原進  
防全羅康津縣巡哨瓮幕鹿島進兵大洋逐倭復領  
兵船回南加守備職銜賞銀鈔傳明翼萬曆三十二  
年會試武舉陞金磐備倭把總

王仁甫文水人洪武五年歸隸羽林右衛征雲南十  
七年陞錦衣衛百戶二十一年關嶺戰歿子整二十  
六年陞傳佐黻冕璽陵介臣國元宗顯

潘伴叔無爲人至正乙未歸附取采石攻蘇州戰鄱  
陽破襄蜀洪武十二年陞橫海衛總旗十九年陞鎮



南衛百戶子忠二十六年至傳俊全源震思美漢龍  
黃圓保寧遠人洪武十七年歸隸虎賁衛子良補征  
雲南沒子龍補二十六年發叛姦陞金吾前衛百戶  
傳均保永樂七年調海寧所傳鍊河金正德十六年  
至傳榜邦賢顯爵

張三順義人洪武三十二年選隸義勇前衛靖難東  
河戰歿子忠陞試百戶永樂十六年至傳義敏瑞怡  
拱辰鳳齡

唐祥崑山人僞吳元帥至正丙申降選克總旗隸長  
淮衛子善補洪武二十六年僱運遼東陞百戶至傳

誠銘寬輔弼雲世祿時中

申長六安人至正丙午歸隸廣洋衛克蘓州延平四  
川洪武十九年子敬補陞百戶至傳磬顒純奉祥憲  
大卿自崧自嶽

前所

千戶

孫勝六安人至正乙未歸隸衢州衛洪武十八年至  
海運守龍灣高資港迎靖難師永樂元年陞副千戶  
傳英瑞景泰元年征金華破大閣鮑村二寨大戰蔣  
檨峯擒首寇陶思孝陶春容搜東山獲寇張牛一陶



質破岑嶺孔岩寨擒首寇命名典三年叙功陞正千戶傳懋權文相燦一龍光祖

高謙宛平人洪武二十六年歸隸燕山右護衛靖難師起守北平禦南兵復小月城平村大戰克水寨陞試百戶禦南兵大戰凡五永樂元年陞正千戶二年至傳禮嵩忠尚選儒宗

馬歪頭懷柔人洪武三十二年編義勇右衛靖難戰靈璧縣歿子興永樂四年陞副千戶宣德七年至傳裕聰文僊如龍上錦天麒

徐文和州人乙未渡江取采石克陳也先水寨征吳楚洪武元年護駕至北京陞大梁衛百戶八年陞永平衛副千戶子立調彰德衛傳奇永樂五年至景泰元年江西戰歿傳震玉恩憲承爵

劉友德平人洪武三十三年歸隸燕山左衛靖難累功陞杭州前衛副千戶永樂七年征迤北飲馬河戰歿傳通賢俊輔正統八年至傳渭霆承勲漢雲朝錫國祚

百戶

王思敬樂陵人洪武四年募隸英武衛征天龍寨雲南子榮補征赤迷河有功陞府軍衛百戶二十八年



至調征廣西傳麟遞聚雲臣國賓耀祖

胡源徐州人淮安趙丞相部元帥至正甲辰歸胡參軍大海隸處州衛克建陽章中丞三益舉陞百戶吳元年攻通州洪武四年調建寧右衛子澄二十二年至永樂七年使日本八年受賞傳銅鑑福玉翰節嘉龍武卿國泰

孫亮巢人至正乙未隨張萬戶渡江取采石克鎮常宣池四州甲辰陞天策衛百戶傳旻嵩洪武二十五年至傳廣源政英登高紹武

孫才甫定興人洪武四年募隸濟陽衛十一年子仲良補靖難夾河戰歿子忠三十五年陞宣武衛百戶子友正統八年至傳福綱震國承光裕

劉聚巢人至正乙未從渡江授帳前鐵甲小旗征僞吳僞漢陞總旗征中原洪武七年陞杭州衛百戶傳安英二十四年至傳清勇璽朝卿大奎紹錡

孫均壁慈谿人洪武十六年歸隸府軍右衛子順補海運征東流山大營陞百戶永樂二年至傳蒙顯武誥霖宗奭相

吳貴六溧陽人至正戊戌選克民兵弟寧代征江西洪武四年征雲南二十二年陞廣陽衛試百戶尋實



授二十七年至傳政清勲震鸞介邦賢守道中熙  
尹司鄆城人至正辛丑歸吳平章征湖廣甲辰隸龍  
虎衛征泰州克蘇州慶陽克重慶尋征迤北洪武十  
五年陞鳳陽留守衛百戶傳文二十七年至傳福昇  
洪嵩  
張魁宛平人洪武三年歸隸金華衛征紅羅山克蒲  
城溫州征處州通州征赤迷河征喇哈征黑松林二  
十七年陞應天衛百戶子貴永樂九年至傳璿威憲  
承勲武安師貞祖孝  
後所

千戶

李忠蕭縣人至正丙午歸隸徐州衛克梁陝攻上都  
征迤北子淮代洪武二十年征金山陞總旗靖難白  
溝河戰歿子榮陞百戶夾河大戰陞副千戶靈壁大  
戰陞正千戶永樂十五年至傳亨通珪奎欽德椿國  
勲正芳

王文清流縣人至正乙未歸張萬戶得才克和州渡  
江克太平丁酉湯大夫和舉授武信將軍克湖廣陞  
撫州所百戶吳元年克福建沒子禮襲征雲貴克鹿  
角羅臺莽臻等寨十八年陞濟寧左衛副千戶子威



三十四年至傳翼良欽正綱國臣三聘德化

趙真毫縣人至正乙亥歸隸滁州衛攻杭州克福州  
南昌陞宜興衛百戶洪武元年征太原克陝西子敏  
襲征遼東抵金山赤迷河二十七年陞副千戶至傳  
信義廣琮振子龍邦濟元輔

所鎮撫千戶永樂十五年陞副千戶  
沈貴麻城人至正癸卯歸隸水軍衛沒子瘦兒補永  
樂七年征西洋陞小旗又征西洋陞試百戶子忠宣  
德二年陞所鎮撫至傳安榮鸞禎光裕上元  
百戶

仲文泰州人吳元年歸隸豹韜衛子關僧補靖難累  
功陞莊浪衛百戶傳義正統八年至傳昇春鎮鰲世

勲

吳信南城人至正辛丑歸隸建昌衛吳元年征福建  
子成代陞豹韜衛百戶征金山赤迷河子毅調海寧  
所宣德二年征交趾戰歿傳浩濬銓乾正德十一年  
至傳鳳岐國勲正仁中俊

杜斌毫縣人至正甲辰渡江歸授興武衛小旗克蘇  
州陞總旗征中原策應大同征沙漠二十二年陞應  
天衛百戶子貴襲二十六年至傳勇忠禎英綬焄邦



憲懋功繼美

岳玉高郵人吳元年歸授龍驤衛小旗攻魯汴陝薊陞總旗征赤迷河陞豹韜衛試百戶洪武二十七年至傳安嵩岫洪恩忠世宰

李三金華人至正戊戌歸征紹興攻蘇州克咸平捕鵝秀山寇授典武衛小旗征灰山陞總旗洪武二十八年海運歿子復補三十年陞百戶至傳林本宗樵釗春先

汪隆民望江人洪武四年收隸龍驤衛調燕山前二十三年子民歌補二十八年弟轉兒補靖難夾河戰歿弟淵永樂七年陞試百戶十六年至傳貴濟恩仁元明鏜

郭著固始人洪武八年募隸武德衛征伯顏平章追虜至連雲棧選充錦衣衛長隨二十六年授府軍左衛百戶子斌襲是年至永樂四年征廣西受賞傳安榮方正元臣

劉仲寶應人洪武十年募隸虎賁左衛子成補征雲南子忠補靖難累功陞莊浪衛百戶永樂六年征迤北歿姪斌襲正統八年至傳英廣宣震

袁金蒙城人至正戊戌隨劉元帥降守宣州征江西



陞千戶攻邵武南門箭傷歿傳友調碣石衛傳通降  
調紹興衛所鎮撫征交趾歿傳福征延平陞正千戶  
傳恩金降百戶嘉靖十六年至其子仍襲紹興衛千  
戶去

激浦所

千戶

楊蠻蒙城人至正乙未和州歸附渡江克采石太平  
破陳也先營克建康選充萬戶攻池州擒偽漢萬戶  
陞百戶鄱陽湖戰捷陞陝西正千戶傳先貴調邳州  
衛傳濂宣德十年至傳潤楷貌魁梧有膂力署所篆

四十餘年倡其下力於屯作軍民安堵傳璽有孝行  
在職廉勤建所署不費軍伍一錢傳玘承勲承恩州  
金名顯廷獻

李臯登豐人至正丁酉歸附渡江克池州選授海寧  
衛總旗克建寧洪武元年征海島二年克上都陞百  
戶子祥陞金吾衛副千戶二十七年至傳玗璇寧鸚  
恩憲國卿時芳經國祚

石玉清豐人洪武三年從征歿子巖補選授小旗靖  
難累功陞隆慶衛副千戶永樂七年迤北戰歿姪泉  
正統八年至四十年征金處受賞傳璽鎮鑾渠萬鍾



如銅

姚祿潛山人至正甲辰來歸征福建授小旗征四川  
烏撒龍江陞總旗征金山益吐河陞神策衛百戶洪  
武二十七年至永樂七年海運歿傳真全暹景泰元  
年征金華受賞傳勇勲玠岑嘉靖三十五年禦倭寇  
於新塘嘴歿子思舜襲陞千戶傳國龍大元

呂得零陵人洪武九年歸哨武州戰歿子興補靖難  
兆兒河戰捷陞百戶傳真正統八年至景泰元年金  
公巖戰歿傳剛信鳳嘉靖三十二年鳳率其子爵禦  
倭於新塘嘴並戰歿爵子繼忠襲陞千戶傳師望

于誼含山人至正壬寅克江西吳元年攻蘇州選授  
天策衛總旗洪武元年克汴梁陞懷遠衛百戶征黑  
水河赤迷河子淵陞副千戶二十八年至傳懋獻瑄  
祚炳守臣煥守爵嘉靖三十三年勦倭寇累功陞本  
衛署指揮同知子時保襲千戶傳國柱

李興旺合肥人至正歸附克鎮江征湖廣江西洪武  
元年隸金吾衛子興兒補追達寇至連雲棧二十六  
年陞百戶三十年陞府軍衛副千戶子福宣德八年  
至傳盛昇節欽璟璉正華逢春

附



費進 國初千戶嘗奉安慶侯命度地築潑浦城  
孫信 國初千戶建潑浦倉廩

朱貞千戶置潑浦新倉

所鎮撫

陳興昌化人元至正戊戌徽州歸鄧參院攻顯嶺關  
攻饒州鎗傷賞銀幣策應安豐退偽吳兵取廬州鄱  
陽湖與偽漢戰捷陞飛熊衛所鎮撫克襄陽征通州  
洪武二十八年至永樂二年征安南傳遷職輔鑾綬  
經綸洪道大任

林景清海豐人洪武十六年編隸鎮南衛子公保代  
征南歿弟公養補調江陰衛永樂中下西洋陞總旗  
征忽魯謨廝國陞試百戶傳勝正統八年陞鎮撫至  
十四年征金華傳保方秀忠嘉靖三十五年擒賊受  
賞傳鳴鳳萬春

百戶

左貳馬邑人洪武三年歸隸蔚州衛子忠補靖難白  
溝河戰捷陞中都留守衛百戶傳真正統八年至傳  
敬景泰元年征金華受賞傳全勝天祥承明士奇

胡會南豐人洪武十六年編隸鷹陽衛陞甘州衛百  
戶傳忠海調府軍右衛景泰二年征金華傳浩成化



十一年至傳寬偉靖寵嘉靖三十三年殺賊受賞傳  
允升宗憲

朱成定遠人至正甲午大洪山歸渡江克太平取長  
興鎗傷龍灣退偽漢兵鄱陽湖戰捷洪武二十年陞  
驍騎右衛百戶傳榮二十六年至傳昭英正統十四  
年征處州傳祥松震臣時寵家麟家鳳

黃子成東莞人洪武十六年募隸鎮南衛海運歿子  
本奴補下西洋陞總旗又征西洋永樂七年陞百戶  
傳貴正統八年至景泰元年征處州受賞傳福雲漢  
鍾有光元亨元勲

王玉合肥人至正丙申歸攻偽漢水寨鄱陽湖戰捷  
洪武十四年陞龍驤衛百戶調台州衛十七年至傳  
廣永樂七年征交趾傳剛雄謙縉家賓學詩之柱

徐彬壽州人至正辛丑歸隸天策衛克高郵征山東  
破潼關抵沙漠歿子郁補靖難戰白沙岸陞百戶傳  
敬正統八年至十四年征金華受賞傳智震恩漢應  
穀天麟

馬福博平人吳元年歸授小旗征延平洪武元年取  
蘭秀山授宜黃上勝巡檢征雲南十七年陞天策衛  
百戶謫金齒衛子良二十七年至傳榮昂預聰勲化



龍景援之麟

劉成高平人洪武三年歸隸安吉衛子順補靖難陞  
彰德衛百戶傳斌正統八年至十四年征處州受賞  
傳能正德八年征開化受賞傳賢寬壁璠璵志伊志  
達

陳壹溧陽人至正乙未歸湯元帥和克陳也先營征  
浙東福建陝西征雲南會州興城戰歿子貴洪武十  
八年陞泗州衛百戶傳福瓚三十四年至景泰元年  
征金華受賞傳武德湧九州嘉言獻廷

郭信松滋人洪武三十二年編隸開平中屯衛靖難  
陞武城中衛百戶征交趾迤北子興正統三年至四  
年征福建金華傳敦禎繼勳舜卿允隆輔明

郎蠢兒單縣人洪武八年歸隸彭城衛子暹代靖難  
齊眉山戰歿子銘陞海寧所百戶傳汶正統五年征  
金華傳旻武勇勛正德十六年至傳舜臣一鵬舜儒  
一鳳

余壽通州人至正甲午歸常國公遇春征中原取陝  
西選充驍騎右衛小旗征大寧洪武二十二年陞虎  
賁左衛百戶征上都寧夏調臨山衛傳生調泰州衛  
傳弟綱永樂八年至傳旺壽昌宗韜勳騰蛟建議開



澈浦上河軍民咸享其利傳全金鵬舉

楊遇春蕭縣人至正丙午來歸守廣德克中原克蜀  
陞應天衛總旗子佛關代征南戰歿子銘補征廣西  
陞雄武衛百戶建文中征北平擒燕山護衛千戶賈  
俊陞留守衛副千戶傳姪守澄正統五年以革朝陞  
職降百戶八年至傳輔忠信功國昌接祖

趙祥盱眙人至正丙申歸潘平章隸濠州衛圍杭州  
克上都征茂州征龍南對陣弩傷洪武十七年陞府  
軍衛百戶子信二十四年至永樂四年從指揮尚鷹  
征安南攻多邦敗之六年守鎮夷衛八年哨爭江戰  
歿傳本昂瓠和淮加住承印廷用

余潤河津人至正甲午歸趙平章守建康取宜興戰  
鄱陽湖截餉道攻取桂陽洪武二十年陞台州衛百  
戶傳真二十八年至永樂四年征安南水戰勝受賞  
傳忠銳瀾椿灑

史興九丹陽人洪武中授百戶失其功次傳文永樂  
六年至傳斌景經昭章絕

乍浦所

千戶

王林密雲人洪武二年募隸大寧前衛靖難累功陞



平陽衛正千戶永樂三年至傳端政景泰元年征金華受賞傳雄綬璽鏜嘉靖三十二年倭犯乍浦城陷死之傳邦振建忠

滿帖木兒小河人洪武二十年歸隸永平衛靖難戰歿弟永平永樂二年陞副千戶子王禮襲十七年至傳節鉞淮繼隆嘉靖三十二年追倭寇於白馬廟戰歿子國昌陞正千戶傳世勲

李華崇明人安豐趙丞相千戶至正己亥渡江降取南昌克岳州克蘇州陞鷹揚衛百戶克潼關征鞏昌定西甘肅洪武九年子貴調羽林左衛充叅將侍舍人征金山赤迷河陞海寧衛副千戶三十三年至永樂六年征交趾傳俊宣德二年征交趾戰傷傳智正統十四年征金華受賞傳叡錦繡師中師正應芳復春

褚隆五宜興人丁酉歸子貴洪武十一年補調燕山右護衛靖難累功陞邳州衛副千戶傳倫永樂十六年至傳禎員能廉俊文通應麒天祿

楊榮先歷城人洪武九年歸隸濟南衛征雲南三營寨箭傷陞總旗十七年至海運守龍灣高資鎮渡靖難師陞副千戶傳興剛華瑄珩奎鰲絕



黎勝天順間正千戶後絕功次無考

所鎮撫

朱祥三永嘉人至正丁未歸隸水軍衛子亞文補承樂中征西洋瓜哇國十八年授試百戶子敬正統八年至傳文保璽臣榮天芳繼光

張盟太湖人僞漢鎮撫至正辛丑江州降陞英武衛所鎮撫征福建傳子林從東川侯戰歿傳姪性洪武二十七年至傳瑛仁忱恩憲應乾國治鵬舉

百戶

楊僧見東河人洪武元年募隸永清右衛十四年征灰山歿子正補靖難累功陞鳳陽衛百戶永樂七年征交趾歿傳名正統八年至傳暉恩臣嘉靖三十二年禦倭寇于白馬廟力戰死後絕

葉福華亭人吳元年歸隸和陽衛授小旗征汴梁克潼關征定西迤北征雲南陞鷹陽衛總旗弟壽代海運累功陞百戶洪武三十年至傳俊英景泰元年征金華受賞傳茂松助繼塌萬叢有光

張玉住江都人至正乙未歸隸潭州衛攻何萬戶寨克保慶授小旗征梁陝太原陞總旗征蜀建昌戰歿子通洪武三十年陞百戶至傳文正能旺忠洪深勲



潮大成雲鵬問達

王闕巢縣人至正丙申歸魏國公徐達取鎮江征蘇州攻胥門箭傷取延平接應大同攻札興脫里別營鎗傷征雲南攻蠻子寨陞百戶洪武二十四年至傳恭諒資鉞明應勲國卿家棟

徐福巢縣人至正丁酉歸桑院判征江西及蘇湖選授總旗四川戰歿子勝補征迤北雲南陞百戶洪武三十年至子榮正統八年倭寇登岸戰歿傳政銳洪乾學孔一麒

錢興盱眙人至正乙未歸克和州隸水軍衛征雲南歿子聚補征迤北累功陞百戶洪武二十九年至征安南受賞傳貴鋪正統十四年征處州金公巖戰傷歿傳鎮洪浩淮良臣良宰

芮成來安人至正甲午歸曹總管克和州陳也先營授小旗克蘇州福州陞平陽衛總旗征甘肅陞虎賁右衛百戶洪武二十七年至傳貞謙英雄官綬琛經繼芳

戴禮大冶人丙申歸廖總管收苗軍水寨攻蘇州齊門中炮歿子廣補併鎗勝授總旗以出海年深陞百戶洪武二十九年至傳英正統三年征處州受賞傳



玉恩魯大賓承勲舜華

季成蕭縣人吳元年歸隸驍騎右衛取鳳翔臨洮陞  
總旗征哈喇卜魚兒海子陞紹興衛百戶洪武二十  
八年至傳禮忠海椿霆鏜武昌紹斌

朱大太和人至正乙未歸張萬戶中丞水寨戰歿子  
潑養補攻陳也先營戰歿子二補克南臺鎮江丹陽  
取宣州廣德子玉補傳潑陞百戶洪武三十一年至  
傳真銘縉永雲山世勲萬里夢熊

王傑武進人至正丙午歸隸蘇州衛征蘭秀山擒倭  
寇受賞子福陞龍江右衛百戶傳真永樂元年至正  
統十三年征福建受賞傳惠玘經贊瀚弘道

陶小乙滁州人至正丙申歸攻豐城五子門洪武元  
年征江西戰歿子九補十九年至永樂十二年下西  
洋白沙岸戰捷陞總旗十四年陞試百戶傳義暹景  
泰元年征金華受賞傳裕英鸞子良堯仁

苗買兒和州人至正巳未歸隸留守衛征浙江戰歿  
子仲誠補征中原戰歿子應春補征雲南授小旗征  
北平陞總旗征金山赤迷河陞錦衣衛百戶調永寧  
所傳文貴二十七年至傳正坪得霖濟民

劉莊昌邑人洪武四年募編燕山衛子添兒補靖難



累功陞揚州衛百戶子勝正統八年至傳鏞溥權應隆納級海寧衛指揮僉事傳學斌學顏之傑

康泳嵩縣人洪武四年募授虎賁左衛小旗征北平雲南鄧州陞府軍衛總旗三十一年陞百戶至傳弼崇正統十四年征金華受賞傳寧輔綬嘉靖三十二年禦倭寇於白馬廟戰歿傳汝暘汝昇

劉大儀真人至正丙申歸隸江陰衛子斌補永樂三年下西洋陞小旗九年西洋錫蘭山谷擒王陞百戶子政正統八年至傳福俊洪彥才嘉靖三十三年禦倭累功陞本衛指揮僉事子國英襲百戶傳繩武紹

邦

李遇真定遠人至正乙未歸隸和州克太平陳也先營攻鄱陽湖戰歿子遇春補攻蘇州戰傷子保代洪武二十年征金山赤迷河征火焰山受賞陞錦衣衛百戶傳得三十三年至傳政景泰九年征處州受賞傳勛明鰲加相大經助國

陳聚蒙城人至正丙申歸宋總管克鎮江洪武三年征定西克四川克諸洞蠻夷十年陞總旗征西番追胡寇至連雲棧二十四年陞虎賁左衛百戶子景諒三十五年至傳子英朴綏倫嘉言彥文



胡阿三江陰人至正丁酉歸廖守忠甲辰隸橫海衛  
洪武七年調澈浦所總旗子拜住補二十五年海運  
高資港渡靖難師陞本衛千戶至傳斌英寧浹樑武  
宣以罪戍寧弟美之孫坤降襲本所百戶傳勝宗  
周翼明本所人由會試武舉任昌國把總萬曆四十  
六年討建夷領浙兵爲都督劉綎先鋒從寬甸路深  
入五百里破牛毛馬家深河古火狐狸等十五寨至  
橫壤兵潰戰歿 賜祠子元起實授百戶世襲  
劉思辰洪洞人洪武十四年歸隸江陰衛選授小旗  
隨陞總旗調杭州右衛永樂二年子從信補正統十  
一年子買奴補十四年征延平景泰三年陞試百戶  
天順元年遇例實授傳福山璠巖鎗嘉靖五年至後  
無考

經歷

張某江都縣人監生 江浩湖廣人監生 韋恭遼

東人舉人以知縣謫 李鑾新安縣人監生 俞泰

莆田縣人吏員 徐源真定衛人歲貢 柳誕莆田

縣人吏員 章碌石碓縣人歲貢 李杜江都縣人

歲貢 林仁莆田縣人吏員 趙允恭武邑縣人監

生 許用良句容縣人歲貢 劉國學江西南昌府



人 黃君泰福建人 鄭廷元南皮人 選貢清修有

品之士擢瑞安令不赴 張文炫新建人 吏員 羅

承欽麻城人 吏員 潘然歙縣人 吏員 黃萬春休

寧人 監生 程運泰州人 吏員 吳時成太倉州人

監生 周如邦莆田人 吏員 吳道元廣昌人 監生

陳道明霍山人 選貢由德清縣丞陞任

知事

李慶咸寧人 吏員 趙永爵華陽人 吏員 田成固

安人 吏員 黃鸞灤州人 吏員 焦永隆慶州人 監

生 陸來章武進人 書筭 楊增昌黎人 吏員 葉

立春麻城人 吏員 陸鳳仙游人 吏員 章林江西

饒州人 霍意鄒縣人 趙沁河間人 監生 嘉靖三

備倭把總 總司前題名記曰兩浙邊海與海東諸夷

道議以 國家重海防雖專責一都帥總督諸衛所

幸然有警 一人詎能遍歷宜旁委以分其任乃奏析

沿海諸衛所為四總簡諸道衛帥之材者四人更守

其地此總戎所為設也責亦甚重矣海寧衛所封域

廣遠不及東浙三總險要則同加以吳俗驕侈振厲

約束視東浙尤當致嚴非得人曷克有濟總戎陳侯

鳳來蒞思及前政懼歲久無聞乃廣稽旁詢自陳文  
而下得二十有四人爰列名于石以垂不朽云嘉靖  
辛丑邑人徐泰撰 總司後題名記曰平原滙夷帆  
出沒之吭設戍監者三 國初卒編土著總帥以一  
都尉轄之道 世宗癸丑歲戎首徐海粹寇掠乍城  
以是賈害大中丞念事權輕人鮮固志於是題奉欽  
依始授以都指揮誠重其事也賢豪迭起或虎變於  
韋布或蛟騰於武科或龍驤於世胃藉藉冠軍吐奇



樹績後先彪映誠足以光來禩垂範不朽余幸際熙  
明濫竽險扼惟恐諸名公芳躅積久益溼敢訪拾舊  
聞臚列貞珉俾後之徵文獻者攻鏡焉萬曆  
庚戌春孟海寧備倭把總指揮使崔天錫撰

崔源寧波衛指揮同知正統七年任潔已奉公私交  
盡絕雖退食端坐無惰容後征處州賊葉宗留累功  
陞都指揮守武義賊復來攻戰死聞者多為之墮淚  
云

陳文字彥章溫州衛指揮同知天資仁厚慕古好讀  
書時延儒者講論經史禮貌終始無間後以平處州

寇功陞都指揮移鎮金華按景泰續衛志云正統七  
年設把總備倭海寧總崔

源其初蒞也陳文繼源之後今王世廉衛  
志以文居先源次之似誤從景泰志改正

劉清本衛人

崔端本衛人

劉瑄字廷器杭州右衛

葛奎松門衛

黎端杭州右衛

劉澤定海衛

嚴齡本衛

邢永嚴州守禦所

李瑄定海衛

王英字時彥觀海衛

張寧去思碑記畧曰公為人深  
沉縝密處官屬節而和馭士卒



肅而惠前是寧波崔公源杭州劉公瑄各以其道得人風聲氣節炳然猶在至於相時操縱獨任所難非公莫善其後今年尚強壯決於去就平生胸次度越至是可以盡見云云

邢相字志尹永子

嚴明齡子

陳傑杭州右衛

張鯤溫州衛

白泰字宗岳紹興衛

楊和杭州右衛

顧邦重字良弼寧波衛

黎秀杭州右衛

崔鼎端孫

陳鳳字時儀杭州前衛

劉臣字朝弼台州衛

李忱字忠甫台州衛

金濂定海衛

張鈇字寵之台州衛指揮治軍訓齊鼓舞並有法嘉

靖丙辰嘗攝叅將事築海鹽縣澈乍海寧三所外墉

防禦有賴又製箭牌火器諸攻守具至今用之

王應麟本衛

丁僅處州衛陞叅將見後



樂墳處州衛指揮嘉靖三十四年任陞福建行都司  
僉書

楊憲海門衛指揮嘉靖三十六年任

祁雲龍溫州衛指揮嘉靖三十九年任

章延廩會稽縣人嘉靖四十二年任

潘吉徽州人嘉靖四十五年任調廣東惠潮守備

季金松門人武進士隆慶二年任陞湖廣興都副留

守

韓沛三江所人武進士隆慶六年任陞浙江僉書都

司

王三錫臨山衛指揮萬曆四年任陞浙江僉書都司

陳良玳義烏人萬曆八年任陞李家峪守備

文棟濟寧衛指揮萬曆九年任陞南京江防守備

陳洪範龍江衛人武進士萬曆十年任陞湖廣僉書

都司

梁文元旗手衛人武進士萬曆十四年任陞鳳陽中

都副留守

戴敏忠台州衛指揮萬曆十七年任

張景房常熟人武進士萬曆十九年任陞浙江僉書

都司後任叅將見後



陳祿義烏人萬曆二十一年任

郭大忠海寧衛百戶武進士萬曆二十一年任

陳夢斗昌國衛指揮萬曆二十二年任陞旅順遊擊

趙文憲涇縣人武進士萬曆二十六年任陞浙江左

遊擊

王逢源杭州前衛指揮萬曆二十九年任陞應天軍

門標下遊擊

崔天賜海寧衛指揮武進士萬曆三十四年任陞廣

東都司

范涵湖州守禦所千戶萬曆三十九年任

胡廷相處州衛指揮萬曆四十三年任陞援遼遊擊

湯鉞福建興化衛人武進士天啟元年任

趙應科臨山衛指揮天啟三年任

王文祿曰浙東西四總自正統間倭夷數犯始設以故衙曰備倭把總嘉靖三十六年因倭夷內擾加欽依自樂墳始加以都指揮體統行事自祈雲龍始聞諸獻老云崔端之英邁忠勇劉瑄之威重有謀王英之沉雅剛介卓乎不可及矣黎端之嚴重邢相之儒雅嚴明之廉威豈易得哉予所及見者顧邦重之才能有守可匹前休也若楊和之



材識崔鼎之清介亦表表云承平久矣備疎蓋自  
白泰始李忱金濂極矣振作而海甸肅如其張寵  
之乎又聞獻者云張鯤正德間征開化守察西寨  
路逢漆客巴元宗縛之為俘控馬壯士侯左扣而  
諫曰曹斌不妄殺子孫永昌請釋之不聽送都指  
揮李隆竟斬焉嗚呼用兵當以此為戒可也

### 浙西叅將

題名記曰淵以西杭嘉湖三郡東傳大海日本諸島夷時乘汎入寇抄為害高皇

帝經畧邊陲置衛若所海上捍禦之嗣又推擇衛指揮一人克把總官治其師顧勢不甚相下未有所統一也嘉靖壬子倭內訌益亟新安胡公受命征討疏於朝設叅將四總全淵諸衛戎事體統與按察使者顏頤而屬軍令於開府如各邊制於是淵西始有叅將其屬把總一衛三所六而海寧衛居其重設

兵水三千陸三千而水兵三關扼其要戍守險畧上而羊許二山當其衝南抵紹之三江北抵淞之金山聲勢聯絡實相為犄角云我國家東南陲諸郡邑人物之盛財穀之產甲於寰區自中倭以來物力稍稍稱詘中原亦以衰耗叅將以身干城統率而安攘之奠東南以奠區宇非赴赴雄畧材望不世出之姿烏能戡其任而愉快乎先茲湯公克寬手提一旅師脫孤城倭吻名最著迨海氛漸息議論叢興胡公功坐紉湯公亦中吏議去海上事一切改張額兵屢縮非舊時矣嗣是若盧公鏜之謀猷楊公縉之機警張公四維之老練胡公守仁之揮霍皆世所稱名將然亦未有能展拓四體建殊茂之烈者他更可知也是以論世者不能無歎息焉王公尚文由武科高第來守茲土值烽燧久寢轅門無事爰蒐開署以來諸將軍姓名勒石以昭示來茲不忘朝廷所以急淵西而增置帥臣之意余嘉其為不朽盛舉也遂因衛指揮姚磐崔成俊之請而為之記邑人馮臯謨撰

湯克寬邳州衛指揮嘉靖三十一年任克寬噐宇雄



壯臨敵果毅先爲福建叅將嘉靖癸丑倭擾海上都  
憲王公忬奏調克寬守鹽至則簡卒伍嚴號令休兵  
養士以待方經營間倭數百突入乍浦卽帥衆往勦  
盡殲之凱還慰勞士卒未幾倭大至以三十七艘泊  
東關龍王塘直抵城下四面亟攻城中震駭公獎率  
官軍百計捍禦所部邳兵劉黑虎黑煞神等三百餘  
人並驍勇絕倫分門督守公親自遶城巡察衣不解  
甲者五晝夜賊有緣城蟻附者公手劒擊之賊知有  
備去時承平久城守弛廢微公鹽且立破事寧調守

金山邑人議欲建祠祀公未果

永九德事畧曰癸丑四月二十五日湯公

殺倭賊四十餘於乍浦之高公山五月四日師旋以  
長矛冒倭級入鹽東門觀者如堵守巡潘姜二公設  
宴爲賀酒未三行倭衆三十七艘至龍王塘矣舟如  
蔽天之山帆亦如浮天之雲軍民大駭懼公慰曰爾  
衆毋恐吾爲爾守第遵吾約毋梗毋惰而守巡二公  
俱微服步行城上惟湯公是依公相視城垣外石有  
凸凹可登處携二公指示鑿平之民家附外城可虞  
者拆卸之計城梁二千有奇每梁軍一民二暨鄉紳  
舉監生員之家丁一五梁督一邳兵十梁監一甲長  
每窩舖城樓屯以兵民二三十人及千百戶一二員  
每城門一指揮一千戶一縣僚屬守之某門有警坐  
某官某舖有警坐某官某梁有警坐某甲長某軍民  
甚得邳兵監督之力守城兵民姓名諸衙門各一冊  
或差官或親自點閱鄉士夫俱城上侍湯公及守巡  
側而聽命焉賊衆數千自晝攻城矢入城中如雨弓  
長七八尺矢長四五尺鏃之鐵者如燕尾鏃之竹者  
如長鎗城外隔河而射中城內屋釘瓦入椽而沒鏃  
矢自梁隙中入者傷死數十人湯公關弓射殺數賊  
邳兵亦射數賊俱無虛矢或擊以鏡皆立倒是日自  
午攻城至申益急值夜昏黑命城上舉燈火如晝拂



鐸鈴鐸聲四震有頃則銃砲又絡繹而發凡一門舉號則合城吶喊可聞數十里許又時時以縹懸水運行梁外慮賊登堞而上者是夕有賊襲附北城二三處將及堞推而墮之賊攻城連三夕東北二門外賊造雲梯高三四丈者數十居民乘賊出掠竊獲獻諸官守巡命縣每梯賞銀三兩賊旋造旋失以城有備竭力攻之無益遂開船揚帆竟往乍浦湯登城樓躡其巔望之知其往乍也顧謂眾曰乍難支矣會大雨守乍者下令曰毋擊柝柝試靜聽之有頃賊遂瀾漫四入而城陷湯兵有黃猛者膂力過人嘗勦倭於普陀山被圍數重身中十數鎗竟突圍而出賊畏之相戒避猛時海鹽城門方閉呼不得入猛植竿于城下曰我湯兵也一躍而上觀者駭異後抱病從征猶斬六賊而死

盧鏜處州衛指揮嘉靖三十二年任鏜官福建都閩勦海寇有功坐事繫獄數年以薦起立功贖罪攝叅將分守海鹽追勦倭寇多所斬獲乍浦沈家莊等大

捷皆鏜統率兵船圍海口截寇歸路也鏜爽朗魁梧談兵事曲盡形勢禮下賢士有古良將風後至大都督總兵浙直孟家堰之役我師覆者千五百人鏜越河而免議者謂縣令鄭公促戰甚亟鏜時從隣境勦寇還兵士不及休息故敗非其罪也

王文祿衛志曰甲寅四月八日

倭寇一船來犯海鹽直趨嘉禾時叅將盧鏜松江史洪凱還聞報晝夜趨二百里晨至海鹽鄭縣尹憤其貪功撤守兵赴直隸界閉關不納隔濠呼曰寇去二十里至半邏將出境矣遂不及朝炊麾之西行把總丁僅李元律從至與城午炊木商設醴渾兵竊銀盃盧繩以軍法眾求元律救元律贊盧立斬之以徇遂啣而解體及列陣近孟家堰左麥田右河孺軍中裝鏡忽火星爆入藥桶煙焰蔽空麥田伏寇起逼我兵駭潰入河盡相踐而死李沒于陣盧躍馬越河渡丁泗水免初列陣忽有羊繞陣中俄不見殆咎徵歟



王元伯徐州衛指揮嘉靖三十三年任

丁僅處州衛指揮嘉靖三十四年任僅有勇畧其子堯時亦知兵同僅在行間嘉靖甲寅僅父子追倭廣陳獲輜重三艘倭據小營盤巡司堅壘自守攻破之部下有漳兵得倭賄縱之逸擒獻軍門斬狗又與指揮徐行健追倭石墩海岸獲級尤多王江涇之戰僅父子先登衆倭因披靡我師大捷云

趙龍燕山左衛人嘉靖三十八年任

楊縉亳州衛人嘉靖三十九年任初叅將寓於衛署丁公僅始請以布政分司爲府會被劾去工未竟縉

買地拓基建造一新焉

王棟武昌衛指揮嘉靖四十年任

張四維觀海衛指揮嘉靖四十二年任

盧錡處州衛指揮嘉靖四十五年任

胡守仁觀海衛人隆慶二年任

王尚文觀海衛人隆慶二年任

狄從夏臨清衛指揮隆慶五年任爲人魁梧儻軍旅之暇賦詩染翰綽有儒將風

季金松門衛指揮萬曆五年任

董汝梅懷慶衛指揮萬曆七年任



李應麒鳳陽衛指揮萬曆七年任

張應選觀海衛指揮萬曆十年任

王接武廬陵人武進士萬曆十四年任

金秉鉞會稽縣人武進士萬曆十五年任

王柱新安衛指揮萬曆十六年任

王元周太倉衛人萬曆十九年任

黃嘉謀蘇州衛人萬曆十九年任

李遇文宣州衛指揮萬曆二十三年任

萬邦孚寧波衛指揮萬曆二十七年任都督表之孫  
清謹廉恕得士心居恒好編纂手未嘗釋卷焉

魯璋磐石衛指揮萬曆二十九年任

馬如錦臨山衛指揮萬曆三十年任慷慨負氣諸弁  
貧者分俸餉之時邑有三虎搏人率壯士射得之歸  
邑中失火夜半急傳令撲滅詰朝計功賞士數十金  
民醵錢以償曰吾自行吾令毋煩爾也卻之去遷漳  
潮副總兵

董永遠鷹揚衛人武進士萬曆三十八年任

季裕徵太倉州人萬曆四十一年任

杜璧衡州衛指揮萬曆四十二年任治兵有紀政無  
瑣屑齋素蕭然惟以讀書爲事遷漳潮副總兵請告



張景房常熟縣人武進士萬曆四十六年任修整奇  
偉能坐射命中時東南穀暴貴邑中掠劫群起公部  
署將士畫城爲四令各守其界有作暴者縛之民遂  
定遷狼山副總兵  
江之清成都右衛人武進士天啟元年任深沉強毅  
遇事徹見標本左右顧人人自廢性骯髒耻事交結  
然操履自嚴將卒畏服當道亦以是重之遷狼山副  
總兵

焦續後南京旗手衛人武舉天啟三年任太史竑諸  
孫也貌若儒素而應變材畧裕如嘗平江南巨寇殲

山東妖賊降其衆二萬餘治兵海上人素懼其威望  
咸爲肅然茗溪盜起卽率所部戍守其急公有足多  
者  
附記有事茲土著勲績者  
春秋伍胥築馬嘑城爲吳禦越詳前名勝篇  
晉虞潭吳國內史軍荒之後修滬瀆壘以備海沙百  
姓賴之

袁山松吳國內史孫恩作亂山松築滬瀆壘緣海備  
之後爲恩所攻陷被害

徐泰曰海鹽舊城最廣今淞江東北六十里滬瀆舊海鹽  
東堰晉虞潭袁崧皆嘗築壘以禦寇焉



宋武帝初爲劉牢之叅軍禦海賊孫恩築城舊海鹽治大破恩衆詳前戍海篇

虞丘進字豫之剡人從宋武征孫恩破其將張驃追至海鹽故治又追恩至石鹿頭還海鹽大柱頻戰有功後封望蔡縣男

唐張廷珪字溫玉濟元人慷慨有志尚初海鹽縣省入嘉興百姓以應奉塗遠難於往來數請重置廷珪爲蘇州刺史開元五年五月奏于舊海鹽縣吳禦越城西北復立縣治又奏置澈浦鎮焉卒謚貞穆

趙居貞鼓城人國子祭酒冬曦弟吳郡太守天寶十載奏割崑山嘉興海鹽地置華亭縣又以海鹽多盜置寧海鎮節束之

宋李餘慶字昌宗連江人判秀州以境多鹽盜作海鹽華亭二監俾業鹽者歲入常緡以杜私販

趙善悉淳熙九年知秀州奉孝宗親札開濬海鹽官塘增置鄉底堰詳前水利篇

包恢字宏父建昌人任浙西提點刑獄值海寇爲亂單車就道調許浦澈浦分屯建砦一旦集諸軍討平之官至刑部尚書僉書樞密院事封南城侯謚文肅黃灝字商伯南康都昌人提舉浙西路常平值歲荒



秀州海鹽葶藶盈野民伐桑柘毀室廬至有食其子  
持一臂行乞者而州縣方督促逋欠灑見之感然時  
有旨倚閣夏稅遂奏乞併閣秋苗不俟報行之言者  
罪其專削兩秩而從其請後起官不赴卒

皇明信國公湯和洪武十九年親歷乍浦鎮度地築  
城

趙居任溧水人永樂三年官右通政調浙西蘇松九  
郡民築海鹽石塘

胡槩字元節豐城人宣德初以大理寺卿巡視兩浙  
海寧諸衛所軍餉不足以嘉興等府犯人贓罰米支

給先發後聞 上謂尚書夏原吉曰槩識權宜勿以

專擅議之又械海鹽豪民史慶真黨三百人至京抵  
罪奸宄帖息復以海鹽地廣宜析爲二縣 上遣行

在吏部員外郎柰亨相度卒從其奏析置平湖縣時  
五年三月二十八日也

周忱字恂如吉水人宣德中以工部侍郎巡撫浙直  
築海塘增廣土塘爲五丈令嘉興屬縣出夫七百人

護守

俞士悅字仕朝長洲人浙江左叅政正統七年倭寇  
乍浦城圯不可守奏令兵民合作百日而成官至刑



部尚書

楊瑄字廷獻豐城人浙江按察副使築海鹽石塘倣  
鄞縣王荆公坡陀塘式豎砌殺潮勢曲畫指意措置  
有條塘踰二千三百丈禦患功大今廟食海上詳職  
署隄海二篇

黃光昇晉江人官浙江水利僉事嘉靖二十一年築  
海塘始編字號備講疊石縱橫之法綜理精詳後皆  
遵用其議官至刑部尚書

潘恩上海人

姜廷願巴陵人嘉靖三十二年倭擾海上潘公以藩  
叅分守浙西姜公以觀察分巡浙西咸在海鹽守禦  
倭衆三十七艘犯鹽攻圍五晝夜兩公同叅將湯克  
寬乘城拒守購死士奪賊所造雲梯攻具挫賊銳氣  
城以得完時攝邑篆者郡判鄧公遷軍興無乏勞亦  
不可泯焉

羅拱辰柳州人有膽力善弓馬標鎗發解爲吳川諭  
嘗率兵殲海寇擢松陽令倭犯餘姚當道檄之往援  
嘉靖三十二年夏叅將湯克寬移守金山因以拱辰  
來代權攝把總兼統主客兵立營教塲分軍設伏於  
外又於衝要掘坑塹自固親與倭戰多斬馘功擢本



郡同知未幾擢浙僉憲

羅所用有晉秀才者以鐵尺裹衣裡賊刀所不能傷後追

倭于東洋橋爲所襲殺石墩之戰有哨領項東岡者先率數十人覘賊賊匿太山祠項入祠中搏賊亦以無援被害二人皆羅帳下驍勇也

劉燾天津人浙西兵備性闊達善射知兵旁通奇門風角之術嘉靖三十五年徐海攻乍浦爲臺高出城上順風焚煙薰守卒公躬督男婦運石擊賊不敢近而退進兵沈莊率諸將攻徐海賊以發煩擊公鉛子去公尺餘入土三五尺公顏色不變卽向賊連射三矢賊棄煩走後終獲海所著有浙西海防議稿

劉懋萬安縣人知嘉興府嘉靖癸丑乙卯間倭亂孔棘海鹽當其衝公悉心料理一切火藥兵器軍餉之需輸發獨倍他處公遣人至鹽或得鹽海上報憂憤激烈迨寇旣寧對客語及鹽事未嘗不涕泗交墮鹽屢經寇生靈猶得保聚皆公力也

劉大仲者處州人驍勇以忠義自負嘉靖癸甲間以千總統坑兵五百援鹽追賊曹蕭顯由柘林廣陳乍浦屢戰輒勝諸將成功多其力後從盧鏜追倭于孟家堰遇伏率其黨胡大力連仲吳蠻牛力戰而歿時有薛爛宋應瀾者亦死於陣薛處州千戶宋寧波百戶也



董漢陽吊大仲詩曰百千矛戟一身當半邏橋邊是戰場學語小兒知姓字花卿精爽未應亡

徐棻常熟人巡撫

張子仁無錫人兵備副使

陳詔晉江人水利僉事

黃清上饒人嘉興府同知並以萬曆三年築海塘著

蹟詳前隄海篇

朱國楨湧幢小品曰黃清起吏員由台州粹擢嘉興同知築海塘有功加

四品服俸陞運同黃侂直與人言必自稱名後在寶應築土石二隄支河工銀四萬餘兩錙銖磨筭上下皆不得欺上官頗嫉之時已積勞得歎血病水次參謁令人密促其板墮下救起已死尋復甦掖入城寧國寺凡二日氣絕蓋萬曆七年六月初二日也年僅五十八至不能殮奏聞贈卹有加清管理海塘採石於湖先大父親受役見清徒步出入慰勞夫匠備極勤苦運石甲首自厄酒勞之無絲毫它費人人感激

大父部下一人逸為盜事發逮捕獨移文昭雪得免即家立位祀之後聞變致祭哭之三日云

滕伯輪甌寧人巡撫

夏良心廣德人水利副使

曾維倫樂安人嘉興府同知並以萬曆十五年築海

塘著蹟詳前隄海篇

功臣封

吳征北將軍陸禕封海鹽縣侯

武原志海鹽侯陸禕墓碑政和間知秀州

毛滂取之置月波樓建炎三年冬胡虜南侵將逼郡城太守鄧根碎為砲石仇志載漢封功臣衛胙為

武原侯代共王子蘭侯更封武原侯唐封右武衛將軍長孫裕為平原公宋封李正民平原縣伯今考海鹽之為平原雖見吳越春秋然非郡縣鄉亭之名可為封土稱者唐宋兩封當是今山東之平原况宋代



五等爵稱尤屬虛銜乎武原兩封亦不應混收漢縣自有武原在彭城郡若蘭侯之武原漢書明標其地屬河西郡入之尤誤今並刪去

### 帝女封

晉恭帝女諱茂英封海鹽公主爲宋武帝子榮陽王義符妃後太子立冊爲皇后

宋文帝第四女封海鹽公主趙倩尚焉後以事離婚梁簡文帝第九女封海鹽公主適張纘次子希

### 海鹽縣圖經卷之十終

### 海鹽縣圖經卷之十一

### 人物篇第六之一

夫大壑所都靈氣斯倍毓爲英產靡限今古已前志托始李唐之通翁無乃藩於徵遠徐光澤爰遡漢晉采鬱林父子啟篇亦以舊壤遠該陸氏寔於我宅擷此匪嫌借豔爾而友人姚叔祥氏復謂吳賢陸顧於鹽具有瓜葛焉容新茲宗幹漏彼縣賦別纂新編引類較徐書尤繁富焉夫志士女於一方例必從乎土斷若當湖之彥有收於洪永之始則長谷之產寧拒諸天寶之前第主客自有微辨詳畧存乎載筆爾今



取徐姚兩家本稍加折衷凡前賢屬在今轄者則備其行實割歸隣封聊記宗支名秩而已其今代人士徐志稍復病略則盡從姚氏新本以類點次不敢有所過刪適彼九京未定誰歸之歎言瞻高山奚斬仰止之辭夸英多於土風塞慈孝於衆喙善善則長可不勉乎若夫微嚮有托定論斯存紬繹邑侯贊頌蓋亦思過其半如曰謏言請俟後哲

陸顧叙宗系餘並以時代爲次

徐泰志曰按陸機詩芳鬢谷水陽婉孌崑山陰陸道瞻吳地記海鹽東北二百里長谷陸遜陸凱居之谷

東二里崑山父祖葬焉則陸氏固海鹽人也海鹽舊屬吳郡人物產是鄉者前史但曰吳人故後人志吳郡悉收入而海鹽乃遺之弗攷故爾陸氏居長谷自陸康始故余志陸氏亦自康始

又曰余志陸氏自康績遜抗凱珥胤襦機雲擘玩納而止按松志陸氏世居華亭納後名士尚多然安知無散處他方者故斷自納止又唐時陸元感子南金趙璧並知名今考元感墓志書塋於華亭之崑山時華亭尚轄海鹽未析故志之

姚士彝陸氏世譜曰漢初陸烈字伯元太中大夫賈



從兄弟也烈爲吳令卒于豫章都尉吳人思之迎其  
喪葬胥屏亭子孫遂爲吳人去烈十一世爲尚書令  
閔閔生桓桓生揚州別駕續陸譜所稱揚州枝是也  
續生褒褒生康據陸道瞻記云康守廬江與袁術有  
隙使從孫遜與其少子績將家還吳居於長谷知家  
於海鹽自康始矣今所採擷以康遜瑁凱列爲四支  
雖諸史未免人歸于吳自以郡槩縣耳即云他徙均  
之鹽產且根株連類血脉傳貫得謂非鹽胤也乎至  
嘉郡志收唐相啟信此出荊州枝非鹽派也及南史  
澄杲以源本未別斷置之矣

陸康字季寧漢末舉茂才歷三郡太守疏諫靈帝歛  
錢鑄銅人被免後徵拜廬江太守世亂蒙險劬節加  
忠義將軍子儁孫尚並拜中郎少子績  
績字公紀博學多識孫權辟奏曹掾出爲鬱林太守  
歸裝以巨石壓載人號鬱林石是也作渾天圖註易  
釋玄傳于世子宏會稽南部都尉獻長水校尉此康  
已後一脉也

遜字伯言褒之孫九江都尉駿之子康之從孫也仕  
孫權幕府尚桓王女拜偏將軍代呂蒙屯陸口克公  
安南郡繼以大都督假節有猗亭之捷拜輔國將軍



封江陵侯爲丞相謚昭子抗

抗字幼節初拜建武校尉後加鎮軍大將軍領益州牧拜都督信陵西陵夷道樂鄉公安諸軍事以討步闡功加拜都護終大司馬荊州牧謚武子六晏景玄機雲耽晏嗣侯爲裨將軍夷道監景尚景帝女封毘陵侯吳亡並死難

機字士衡天才秀逸辭藻宏麗爲一代之絕吳亡與弟雲入洛大傅楊駿辟爲祭酒累遷太子洗馬趙王倫引爲相國叅軍預誅賈謚功賜爵關中侯成都王穎起兵討長沙王又假機後將軍河北大都督被讚爲穎所殺二子蔚夏皆死焉

雲字士龍六歲能文與兄機齊名號二陸入洛補浚儀令入爲尚書郎侍御史太子中舍人中書侍郎成都王穎表爲清河內史轉大將軍右司馬與兄機同遇害耽平東祭酒亦同死此遜已後一脉也

凱字敬風遜族子黃武初爲永興諸暨長累遷建武校尉以討山賊功封都鄉侯拜征北將軍假節領豫州牧遷鎮西大將軍都督巴丘荊州牧進封嘉興侯爲左丞相疏論時事著忠直節子禕

禕字元容赤烏中徵宿衛郎中遷黃門侍郎封海鹽



侯加備將軍行左丞相鎮西大將軍事歷征北將軍  
後入為太子中庶子禕剛方強固在戎果毅臨財有

節子申都衛尉階散騎侍郎前將軍郡內史征北將軍海鹽

侯陸禕墓碑曰昔龜鳳啟符媽缺襲缺之亂世為諸  
侯或缺陸鄉因氏姓焉顯考吳故左丞相凱聲聞于  
海內君繫遠祖之懿緒承洪族之清缺嵩嶽降其神  
淵瀆協其氣是以景靈咸贊奇姿挺策合九缺性聰  
苞五缺敵故能缺大業經缺德指瓊雪缺行瞰雲霄  
而厲峻節若夫散經好古玄缺圖缺則思缺之缺神  
入幽芒之缺而識其機苞萬品而缺其指也爾乃彼  
蜀林缺遲養其值缺求士匪缺數沈網繞缺石之缺  
幽澤無散髮之缺君缺歛節降志屈缺從時赤烏六  
年徵宿衛即中缺遷左郎中治書執法缺中校尉立  
義都尉五官郎中騎都尉遷黃門侍郎君克明缺憲  
允亮納言缺封海鹽侯加禕將軍行左丞相鎮西大  
將軍事于時基辰缺御江河異宗皇晉蕃平南境有  
缺君征止缺則儒色温缺武弁則缺氣在爾乃撫成

廟筭量敵缺北攻前缺彼場缺憚威之缺也及其戈  
執缺入賓皇儲若珍衽席講道論缺而缺則缺世俗  
方昏日月不照鷓臬缺豺狼競趨君耻甯武之伴愚  
厲祖考之烈缺以缺興違貝錦疾缺合米缺受海以  
遐遷永蕭缺於遺祀到大康之缺栖缺水缺鱗君將  
缺之蟠奮朝陽之羽缺箕之入周陳洪謨於晉宇享  
年不永春秋知命缺而缺夫缺君德缺銘大勳缺之  
通義人道之缺事也君元子西曹章安二縣令缺申  
都尉衛仲子缺大夫缺掾缺子散騎缺即缺前將軍  
歷陽宣城二郡內史階仰堂構之遺蔭蒙析薪之缺  
尚詠缺永思感蓼莪缺山以代君命執翰以褒德庶  
同理于日月垂永照于罔極也乃作頌焉其辭曰缺  
皇綱不缺天裂地缺埋南基廣北辰桓桓缺命作缺  
龍肅江缺威響北運古承泰六合缺帝鑿海嶽求其  
隱逸將彈南冠入缺金室我翼未輝缺折何用不德  
命此執翰鏤金作頌億載不刊泰寧七年歲次乙酉  
十二月壬戌朔  
一日壬戌立

胤字敬宗凱之弟選曹郎歷衡陽督軍都尉交州刺



史以破賊功徵爲西陵督封都亭侯子式柴桑督揚  
武將軍嗣侯

退凱從孫光祿大夫

慶凱之後梁婁縣令陳通直散騎侍郎子士季唐弘  
文館學士士季子謀道詳正殿學士謀道子元感字  
逢禮善班固漢書建德歷陽二縣令歷黃州司馬元  
感子南金趙壁坐藏匿盧宗道兄弟爭死玄宗並宥  
之南金官至太子洗馬此凱兄弟後一脉也

瑁字子璋遜之弟也好學篤義大帝徵爲議郎選曹  
尚書子六滂喜頴英偉顏喜晉散騎常侍子育弋陽  
太守英散騎常侍子六術舉麟玩粹瓘

曄字士光有雅望元帝辟爲祭酒歷尚書左僕射領  
軍將軍以平錢鳳功進爵江陵伯與王導並受顧命  
輔皇太子後進爵爲公子諡散騎常侍嘏新康子  
玩字士瑤元帝引爲丞相叅軍以平蘇峻功封興平  
伯歷侍中司空翼亮累世以弘重著彌謚康贈太尉  
子六謚儒側納入始

納字祖言清操絕俗初爲吳興太守累遷尚書僕射  
加散騎常侍拜尚書令左光祿大夫開府儀同三司  
始五兵尚書侍中子萬載臨海太守萬載子子真宋



海陵太守中散大夫子真子慧徹慧曉

慧曉齊南兗州刺史子三僚任倕僚蜀郡太守任梁御史中丞倕梁太常卿任子繕尚書右僕射謚安

慧徹宋車騎府法曹行參軍子閑齊揚州別駕閑子四厥絳完襄厥善屬文蚤卒絳代父死併命完彭城郡丞襄梁度支尚書陸黠舉義拒侯景推行郡事卽襄也詳後卷絳子四雲公令公晏子丘公

雲公梁中書黃門郎子瓊陳吏部尚書瓊子從典隋著作佐郎

令公梁宣城王記室參軍子琰陳東宮管記瑜陳太子洗馬中書舍人

晏子梁大匠卿子玠陳中書舍人

丘公梁臨川王長史子琰陳中書舍人琛之子玄之豫章尉玄之子元方字希仲相武后子象先本名景初相玄宗而象先弟景融四世孫希賢相昭宗

瓘字士貴晉中書侍郎五世孫文盛齊散騎常侍文

盛子宜猛梁宣威將軍宣猛子潯陳吏部侍郎潯九

世孫齊望唐秘書少監子八泌漚潤淮灞漉渭漉漚

主客郎中子師德侍御史孫墀監察御史曾孫宸相

昭宗灞兵部郎中子侃漂陽尉孫贄相德宗此皆瑁



出玩與瓘之一脉也

趙公瀛郡志曰按文士傳顧榮之先勾踐支庶封于顧邑子孫遂以爲氏春秋有東顧城在海鹽縣境郡人物收顧雍自趙志始

姚士粦顧氏世譜曰魏趙志引文士傳謂顧榮之先居海鹽此羅泌所云漢文封東甌搖之子期視爲顧宗族也鄭夾漈亦謂顧氏漢初居吳郡今考舊志有佗山顧邑山顧會浦東顧城皆漢時吳郡所轄海鹽地歐陽公稱吳丞相雍弟徽居鹽官鹽官之于海鹽共一方幅徽又鹽齋也則顧氏之繇族吾邑著先長谷

矣

顧雍字元歎從蔡伯喈學伯喈貴異之因命與同名也初爲合肥長吳大帝朝以太常進封醴陵侯丞相平尚書事匡贊凡十九年謚肅子邵裕濟邵博覽書傳善知人與舅陸績齊名豫章太守裕宜都太守濟騎都尉

譚邵子吳太子四友代祖父雍平尚書事弟承侍中榮字彥先裕子初與二陸入洛號爲三俊歷尚書郎廷尉正以討葛旃功封嘉興伯元帝鎮江東以爲散騎常侍謀畫皆諮焉贈侍中驃騎將軍開府儀同三



司謚元子毗嗣爵位至散騎侍郎此雍後一脉也  
徽字子歎雍同母弟好學有脣吻吳大帝署爲主簿  
嘗拜輔義都尉使曹公終巴陵太守子裕鎮東將軍  
道望徽八世孫齊散騎常侍子仲成梁護軍司馬豫  
章王府諮議參軍仲成子越陳諮議參軍歷散騎常  
侍中書舍人越孫胤唐著作郎餘杭公胤子琮天官  
侍郎同鳳閣鸞臺平章事子二潤秘書郎浚齊安太  
守此徽後一脉也

向徽族人也歷四縣令子悌吳中郎偏將軍悌孫崇  
晉大司農崇子黃老晉司徒左西曹掾黃老子凱之  
宋湘州刺史謚簡胤之孫憲之梁太中大夫惠胤凱  
之弟之子驃騎參軍

秘悌第四子交州刺史子衆鄱陽太守廣武將軍以  
平蘇峻功封鄱陽縣伯遷尚書僕射謚靖子昌嗣爵  
會中軍諮議參軍此向後一脉也

和字君孝衆之族子王導辟從事歷御史中丞尚書  
令謚穆子淳左衛將軍履之司徒西曹掾履之子淡  
亦官西曹掾淡子琛宋常侍中散大夫瑛子寶先尚  
書水部郎協和六世孫梁散騎常侍清介絕俗謚曰  
溫此皆和後一脉也



右二姓宗系並采叔祥所錄列人物首卷見余邑古昔材產之盛叔祥叙云陸顧兩族皆自漢至唐各有源派相承不忍斷裂以代附人欲令後知前獻苗穎如登其堂皇鏡見千載一門眉面耳蓋叔祥精于譜學故淹貫若此如謂一同之地生材未遽若爾則水本本之海上支裔散居吳中自有徐光澤之論在不妨兩存之以問博識者震喜

海鹽縣圖經卷之十一

終

海鹽縣圖經卷之十二

人物篇第六之二

晉

干寶字令升少勤學博覽以才器召爲著作郎平杜弢有功賜爵關內侯中興草創未置史官中書監王導以寶請於是領國史著晉紀自宣帝迄愍帝五十二年凡二十卷直而能婉稱良史焉歷始安太守散騎常侍所著有春秋左氏義外傳注周易周官凡數十篇文集四卷性好陰陽術數留思京房夏侯勝等傳以有所感起撰集古今神祇靈異人物變化之事





為搜神記二十卷並行于世

搜神記事  
詳雜識篇

震亨按徐泰志云晉史寶新蔡人一統志寶自新蔡徙嘉興父瑩塋海鹽五行記載寶為海鹽人則南渡徙居實自瑩始寶固海鹽人無疑也泰所援引如此今再考釋道宣續高僧慧因傳內附載寶後裔名秩甚詳並繫籍海鹽此書唐人所撰去古不遠尤寶為鹽人之確證可補徐志所未備云

千慶寶之兄長寧縣令

事詳雜  
識篇

李祥海鹽歟城里人也少雄于力知書史每抱憤世疾邪之志鄉中有爭鬪悖犯者必折之以義無少依

違人咸敬憚之隆安初孫恩寇海上祥糾集鄉豪為防禦計內史袁崧率兵討恩祥從崧築壘滬瀆協力相持久之恩驟至崧與敵而死滬瀆遂陷時祥不在左右聞而奔死所突白刃收崧尸歸塋焉時人義之名祥所居之里曰教義里在歟城南

見吳地記今上海縣長人鄉有

袁內史墓相傳  
是祥所塋處也

梁

千朴散騎常侍

千元顯中書舍人二人並寶之後

陸黥海鹽民太清之亂侯景遣其將宋子仙攻沒吳



郡以僞太守蘇單于守之黠舉義有衆數千人乘子  
仙進兵錢唐夜襲破郡殺單于推鄉人前度支尚書  
陸襄行郡事黠與襄兄子映公帥衆拒子仙子仙聞  
之還兵來攻戰于淞江黠不支敗績吳下軍聞之因  
奔散功竟不成時同義者有陸緝戴文舉等景以鹽  
人起義破吳因分海鹽胥浦二縣爲武原郡不復令  
屬吳云

震亨按史稱侯景平後元帝以建義功追封陸襄  
爲餘干縣侯而賞不及黠豈史有關文耶

又考萬曆志人物漢有徐栩梁有到洽栩由拳人  
故縣在嘉興縣南洽彭城郡之武原人非此武原  
也今並去之

陳

顧野王字希馮祖子喬梁東中郎武陵王叅軍父烜  
信威臨賀王記室兼本郡五官掾以儒術知名野王  
七歲通五經九歲能屬文及長徧觀經史精記嘿識  
天文地理著龜占候蟲篆奇字無所不通仕梁太學  
博士中領軍嘗與瑯琊王褒爲宣城王客野王善丹  
青王於東府起齋令野王畫古賢命褒書贊時稱爲  
二絕侯景之亂野王募鄉黨隨義軍援京邑杖戈披



甲抗辭作色見者莫不壯之後太尉王僧辨淡嘉其  
義使監本縣事語在官師篇陳天嘉中敕補撰史學  
士大建中爲太子率更令尋領大著作掌國史知梁  
史事兼東宮通事舍人與江總陸瓊諸人並以才學  
推重遷黃門侍郎光祿卿卒贈秘書監右衛將軍野  
王少以薦學至性知名在幼無過辭失色觀其容貌  
似不能言其厲精力行皆人所莫及所撰玉篇輿地  
志各三十卷符瑞圖顧氏譜傳各十卷分野樞要續  
洞冥記玄象表各十卷文集二十卷並行于時子安  
饒仕至鴻臚卿

震亨按邑人物收野王自弘治中朱祚志始今考  
野王子安饒墓在吾鹽東北五十里舊爲縣境今  
析平湖野王故宅今爲寶林寺在華亭縣舊亦屬  
縣境據此則朱志收入良有確證矣

唐

顧况字逋翁至德二載進士志尚疎逸頗好恢諧與  
柳渾李泌爲方外友德宗時渾輔政以秘書郎召况  
以詩荅之曰四海如今已太平相公何用喚狂生此  
身還似籠中鶴東向滄溟叫幾聲及泌相自謂當得  
達官久之稍遷著作郎白居易初舉未振以詩謁况



况謔之曰長安百物貴居大不易及讀至原上草詩  
野火燒不盡春風吹又生歎曰有句如此居亦何難  
老夫前言戲之耳因為延譽聲名大振後竟坐詩語  
調謔貶饒州司戶參軍况文詞之外兼攻小筆嘗求  
知新亭鹽監人或詰之况曰余要貌海中山耳仍辟  
畫者王默為副任半年解以去况家縣南五十里之  
橫山宅邊有禪寂寺故有家在雙峰蘭若邊之句劉  
長卿攝縣亦嘗有過橫山顛山人詩後結廬茅山號  
華陽真逸年九十卒人謂尸解去有集二十卷皇甫  
湜為序湜嘗曰自吾為顧况集序未嘗許人也其為

名流歎重如此

皇甫湜撰顧况集序曰吳中山泉氣

亭清嘖與虎丘天竺諸佛寺鈞綿秀絕若出其中間  
翁輕清以為性結冷汰以為質煦鮮容以為詞偏于  
逸歌長句駿發踔厲往往若穿天心出月脇意外驚  
人語非尋常所能及最為快也李白杜甫以死非君  
將誰與哉君以文入仕其為人類其詞章嘗從韓晉  
公于江南為判官驟成其磊落續入佐著作不能慕  
順為眾排為江南郡丞累歲脫縻無復北意起屋于  
茅山意飄然將續古三仙以壽卒湜以童子見君揚  
州孝感寺君被黃衫白絹豁頭眸子瞭然炯炯清立  
望之真白圭振鷺也既接歡然以我為揚雄孟軻顧  
恨不及見三十年于茲矣知音之厚曷嘗忘諸去年  
從丞相涼公襄陽有曰顧况非熊生者在門訊之即君  
之子也出君之詩集二十卷泣請余發之涼公適移  
蒞宣武軍余裝歸洛陽諾而未副今又稔矣生來速  
文乃題其集之首為顧况撰尚書工部郎分司東都  
留守判官睦州皇甫湜持正序况南歸詩老病力  
難任猶多鏡雪侵鱸魚消宦况鷗鳥識歸心急雨江  
帆重殘更驛樹深關鄉殊可望漸漸入吳音閩居



自述榮辱不關身誰為陳與親。有山堪結屋無地可容塵。白髮偏添壽黃花不笑貧。一樽朝暮醉陶令果何人。憶橫山故居詩家在雙峯蘭若邊一聲秋磬發孤煙山連極浦鳥飛盡月上青林人未眠。又況有從兄名長者况嘗有詩哭之云共居雲陽里。轉軻多別離知顧族徙宅句曲不獨逆翁矣。

顧非熊况之子一覽成誦好辯說氣燄凌轢為衆所

抑久不第然名在朝野長慶中諫大夫陳商放榜復

下第穆宗恠無非熊名詔有司進所試卷覽之稱旨

追榜敕賜及第時劉得仁賀之以詩曰愚為童稚時

已解念君詩及得高科晚須逢聖主知非熊累佐使

府大中間歷盱眙尉慕父風棄官亦隱茅山非熊送友人及

第歸蘇州詩見君先得意希我命還道不道才堪並多緣蹇共同鶴鳴荒苑內魚懼夜潮中若問家山路

叨連震澤東姚合送非熊下第歸越詩云失意尋歸路親知不復過家山向城遠日月在船多楚塞數

逢雁洲江長有波秋風別鄉老還聽鹿鳴歌賈島寄非熊詩云知君歸有處山水亦難齊猶去瀟湘遠

不聞猿狖啼穴通茅嶺下潮滿石城西獨立生遙思秋原日漸低觀此三詩非熊未第時居鹽解褐後始

居茅嶺具可證矣非熊重生事見叢記

震亨按徐泰志引劉長卿贈陸澧徐二十七詩因

載之人物云古之人有因人文字見者陸徐二人

是也澧未知即齊望之子否然長卿贈澧詩非一

集又有送澧歸江陰詩則未必果鹽產矣贈徐二

十七詩只有家住橫塘曲一語徐蓋謂是吾邑橫

塘腫耳唐人詩中橫塘甚多豈便是風土的據今



並刪之又唐開元初有褚無量者蘓頌誌其墓曰  
十一代祖盛令海鹽子孫因家遂爲海鹽人或謂  
據此宜收入但新舊唐書並以爲杭州鹽官人家  
近臨平湖幼時有不看龍鬪事誌亦有湖清世平  
語此湖舊屬海昌今屬錢塘以山水證縣界意褚  
令子孫初家鹽後又徙隣境矣未可便以無量爲  
鹽人也且開元時縣尚未復卽欲入之鹽亦恐無  
附隸處耳凡吾邑唐初人物概少亦緣復縣在天  
寶中唐歷二百九十先已失却百三十年人物自  
爾寥寥也今人多疑前志失載要未論及此

### 五代吳越

高彥仕吳越武肅王初與同縣沈夏受王密旨謀誅  
徐及以其首歸王遂蒙信用前後從征悉有功效以  
爲海昌鎮將會湖州刺史李繼徽棄郡奔淮南王巡  
湖州屬意于彥欲委彥牧守忽題詩嬰蘭堂壁云須  
將一片地付與有心人及去語彥曰我以此州付汝  
矣汝宜善撫之彥性淳厚居湖十一載爲政尚簡人  
頗便之奏領費州刺史檢校司空卒于州

高渭彥之子初從彥在湖武肅王巡衣錦城有徐縮  
之亂焚掠郛郭將及內城彥聞變遣渭赴難渭言今



日不利彥曰赴難之急何以吉辰亟促渭行渭不敢

抗遂率所部徑趨靈隱山而來竟為賊伏兵所害後

淮人檻送縮歸王命剖心祭渭

吳越備史載高澧事實云澧高彥第三子

也初彥夢一羽人持刀入卧内彥驚問其故羽人答曰來為君之子報數千人冤耳其母自是而孕不足月而生澧年十三四性即暴虐及嗣父位恣行殺戮將吏侵晨人簡必與妻子訣別而入每登消暑樓眺望則州城東西水陸行人亦皆絕跡澧夜叉精也嘗請太常博士丘光庭校書于樓中澧一日履襪而登光庭不知因迴顧見一青面鬼遂大呼俄而見澧密言曰博士慎勿言是驗之也又召鄉丁為衛軍皆文其面衣青衫白袴以緋抹額凡所指令必躬身仰首如夜叉之狀刀鎗弓矢常居左右又令州人皆黥面約三日當畢過限則誅澧則以畫面而傳之乾粉州人既黥澧乃洗去晚年將敗召郡吏議曰我欲盡殺百姓可乎吏對曰百姓租賦所出殺之無可取與給顧求他可殺者時親紀二丁軍三千餘人會有言其

怨嗟者集于開元寺詒曰將饗汝因閉三門之半而納之入者旋殺迨半在外者方覺因奔逸縱火為亂澧聞盛怒閉城大索戮之無遺王以其竟虐甚將伐之由是謀叛薰淮將李簡等入其境卻將盛師友等閉門不納王遣子元璩禦之淮人挾澧而遁先是道場山僧如訥以高彥將死與其訣別退謂其眾曰高公將殂我亦當逝何者蓋有白面夜叉治此政矣爾輩亦宜避之俄而澧代其父白面者蓋澧未黥面耳澧至淮南屢取娼姬入私室殺而食之為淮人所害又備史載沈夏事實云夏亦海鹽人也初武肅王同董昌討劉漢宏越州徐及遣夏與高彥率本部會我師王見之甚悅延入卧内謂曰我東討之師已衆渡江之役無勞爾輩但徐及平素強梁終非我所蓄以我東討或為後患汝還本營為我殺之當以列御牧汝吾非誨人為逆但境土若于干戈不仁者當盡除之用息生聚耳夏等再拜聽命厚遣之歸及軍下遂分復性强暴不即我歸乃以所得衆七千餘人聚于臨平山下擇幼弱者盡殺之惟留三千餘人徑往嘉興劫吳公約同入海為剽未幾夏以公約庸懦



因放其歸所圖無成始復歸王王優容之累從征伐  
歷奏職官領遙郡至任果以殺戮爲事左右指令少  
不稱意卽加屠害王頗惡之夏一日復構私第于北  
郭制度雄壯侔于公府今北市酒家樓俱夏第也其  
長子有過輒手刃之王以其噬子滋不悅出爲東陽  
淮將陶雅以兵攻其郡王不急救遂爲淮人所執尋  
遇害

屠環智字寶光世居澈浦青山母顧夢抱壁有光而  
生故名環智少負勇畧從吳越武肅王起鄉兵拒黃  
巢與幕府籌畫以謀誅董昌功授指揮使南唐陷嘉  
禾同顧全武從海道救之擒其將楊勝等二十人又  
討平瞿州叛刺史陳岌積功領常州刺史越州都指  
揮使副高彥守湖徐縮內叛彥遣環智與子渭赴難

至靈隱山賊圍數重兩人搏戰身被百創環智奮力  
一呼手搏數賊以援絕同遇害王慟其殉國以衣冠  
歸葬青山贈武康節度使銀青光祿大夫檢校尚書  
右僕射開府儀同三司子龍驤澈水鎮遏使昱節度  
使晟吳興判官

皮光業撰墓志詳前簡

朱行先字蘊之猿臂燕領事高彥屢立戰功彥守茗  
霽從行盪平隣寇多其力焉武肅擢爲左押衙新衛  
都指揮使及彥子澧敗率衆自歸封佐正匡國功臣  
右僕射尋以爲靜海鎮遏使在鎮恩威並行甚著聲  
譽凡十五年卒贈銀青光祿大夫上柱國子元晟節



度使正散將元杲節度使正散將銀青光祿大夫檢校十子賓客兼監察御史元昇節度下將

謝謬撰墓志具前簡

宋

郭三益字慎求父瑑治平初進士三益才高有器識登元祐三年進士以薦為常熟丞時常平使者調蘇湖常秀四州人濬青龍江分地程役三益所部前期告辦使者留之俾助他邑之不如期者三益即引所部歸使者怒檄追甚急三益以為戚其母周曰青龍之役連數郡其分地程役賦廩食宜皆已上聞今我先畢何名復役之使者倘再思行悔矣雖然汝不可

無會第無以所部從也三益如教已而使果檄止丞勿來事遂已後官至試刑部尚書遷中大夫建炎元年二月除同知樞密院事明年九月卒官贈光祿大

夫

三益賀高宗登極表云歷數在躬嗣登大寶天人助順喜屬昌期炎正中興適救九陽之厄真人繼

作實繫萬宇之心恭惟皇帝陛下天開聖哲神授英奇潛邸宣猷已慰兆人之望大橫應卜嗣承列聖之休內殿稟慈皇之言普天曰吾君之子宗社無主以有主何翅付託得人神武得天而應天或借殷憂啓聖從此合夷夏之無外因之識帝王之有真佇歌周宣復古之詩併儼元結齊天之頌於皇聲實橫絕古今臣猥試鳩司適承龍節風雲從而萬物觀占已叶于六龍日月照而九絃明光尤近于四牡

震亨按王文恪姑蘇志宦跡篇載三益家居義興

今考宋武原志安仁橋西十五步為彰慶館館對



門卽郭之故第元姚樂年私語載元末三益裔孫  
貧不能存居天僊湖藏有三益誥身像贊據此則  
知郭氏世家于鹽居義興之說或不足憑矣又三  
益有子曰置生女適雲間葉氏蚤寡因誓節爲尼  
名正覺居法雲寺能詩有一絕云春朝湖上風兼  
雨世事如花落又開退省閉門真樂處閒雲終日  
去還來後人石刻以銀填之樹于覺骨塔前事見  
舊松江志附記以廣異聞

魯嘗字季欽兄詹崇寧五年進士朝散卽提舉兩浙  
市舶嘗同弟登舉紹興五年進士官大府卿言支移

折變事甚悉利弊詔可其奏

隆興二年嘗奏乞下戶部將折帛以匹計者爲

錢有幾以尺計者爲錢有幾自來全折錢處依舊外  
餘下鹽綿絹及下戶不成匹兩者盡折錢蓋零細者  
利于納錢端匹者利于納絹出產去處便于本色不  
出產去處便于納錢若以見價紐折其直必輕則折  
帛之弊可革請下諸路運司條約州縣劾其違者嘗於詩喜杜工部嘗取其

集考其年編次而箋釋之爲十八卷世所傳魯冷齋

杜詩定本是也詹子可封進士烏程令嘗子可宗進

士又中博學宏辭科太常卿詹子可簡可簡子并珏

及從子藝璵璠亦並舉進士世其家

冷齋編次杜詩序曰騷人雅士

同知祖尚少陵同欲樸樾聲韻同若其意律深嚴難  
讀也余謂少陵杜公初不事艱澁立隱以病人其平  
易處有賤夫老嫗所可道者至其深純宏鈔千古不  
可追跡則序事穩實立意渾入遇物寫難狀之景舒



情出不說之意借古的確感時深遠若江海浩茫風雲蕩汨蛟龍龜鼉出沒其間而變化莫測風澄雲霽象綿回薄錯峙偉麗細大無不可觀離而序之次其先後時危平俗熾惡山川夷險風物明晦公之所寓舒句皆可懸見如陪公校履而遊四方數百年間猶對面語何患于難讀耶名公巨儒譜叙注釋是不一家用意率過異說如蠅余因舊集畧加編次古詩近體一其先後摘諸家之善有考於當時事實及地里歲月與古語之的然者辨注其下若其意律乃詩之六經神會意得隨人所到不敢易而言之叙次既倫讀之者如親歷艱棘虎狼之慘爲可驚愕目見當時毗庶被剗刻轉塗炭爲可憫因感公之流徙始而適中而瘁卒至於爲少年輩侮忽以訖死爲可傷也

震亨按元人姚桐壽云杜少陵集自游龍門至過洞庭詩目次第爲此州先正魯季欽編定大都一循少陵生平行跡可以見其詩法升降隨其年自

少而壯而老愈入于細而化也註脚多所補益極爲後學借資第音切類多吳音其他註釋如鐵馬汗常趨空同小麥熟林間踏鳳毛天闕象緯逼江月滿江城赤驥頓長纓及山東李白之類不免可議云云今考宋蔡夢弼少陵草堂詩箋所援引歐陽永叔宋子京王介甫王原叔諸家本不啻數十然一以冷齋所編作詩歲月先後爲定本則冷齋之有功于杜集當與裴之註三國郭之詮南華並垂不朽者區區小誤惡足病之哉

趙汝能字公舉太宗之系紹興末以宗室舉進士知



海陵歲歉民嘯聚爲亂人情洶洶汝能曰是非巡尉可辦卽部勒土兵設方畧擒捕百餘人其黨潰散歸罪渠魁餘悉末減倅舒斬諸司多以滯訟委之剖析平允知鬱林州興學教士士風丕變郡曩爲巨寇根穴掠數州金寶聚焉官軍迫盡藏之沼僚吏或獻發沼之策公笑曰鍾離意以爲何如調守全州過上祝釐之請歷淞西沿海議幕壽八十官朝請大夫汝能清心寡慾甘麤糲若寒士蒞官廉平遇事剛決有仁者之勇

徐泰曰徐一夔崇德趙氏世譜序汝能贅居崇德一占籍故崇德志之一統志因收爲崇德人然常濬孫本縣進士題名記汝能在三十九人之數實海鹽人矣

陸峻軋道五年進士初授江寧縣令累官至刑部尚書峻守衡楊萬里以書屬其孫爲名流倚重如此

姚士彝曰吾邑元祐進士陸周嘗通判杭州峻其從子也兩公舊志俱無傳惟周有東嶽行宮碑文峻有湯山義冢文載在藝文內而東嶽碑今尚完好可揭文亦快徹可喜讀之殊想慕其人

常濬孫其先蜀人祖少師同寓鹽因世爲鹽人軋道



中登進士又舉博學宏詞科爲福州教授教養有法  
閩士祠之

常說孫字宜卿同之孫累辟不就門人稱爲雪溪先  
生所著有雪溪藁天閑雜著櫟齋筆記諸書

魯文謚字子順入太學以策第調丹徒尉薦陞司理  
高郵滯獄多所梳剔攝丞幕府適山陽流移蟻聚贊  
其長極意撫安之任事必究端緒尤好義樂施置義  
庄義塾惠其宗人弟文博姪鐸成進士並其教也

魯應龍文謚族孫著閑窓括異志載吾鹽故實及爲  
家門傳懿皆足副藝圃談資亦著撰一小品也

姚士彝曰按魯氏世居當湖登甲榜者前後十八  
人又有名誼者似與并珏行列不知誰出紹興中  
官鹽官令有救荒療疫全活功記此俟考括異志  
又載其家有名行恕官司法者非負而孤嘗侍母  
徐就醫嘉興留精嚴僧舍值徐明反母子伏于寺  
之複衙默禱于神竟得免禍後其孫秀穎亦登進  
士第云

震亨按魯氏自泠齋兄弟三人連枝同發子若孫  
登第者五人而群從又四人可謂極盛後司理公  
文謚置義塾教其弟若姪相繼成進士者又七人



括異志所云正議一枝仕版尤盛者是矣然諸公爵秩行實多遺佚不傳僅一冷齋公以注釋少陵詩稱于世而布衣之應龍亦以小說家言有聞豈自昔身後名洵不獨在科第耶

趙孟堅字子固別號彝齋系出安定郡王以父朝奉郎與采蔭登寶慶二年進士歷官集英殿脩撰知嚴州平反張均平報父讐獄郡內訟息歲饑發廩賑贍全活民五萬餘戶景定初遷翰林學士承旨拜榮祿大夫孟堅脩雅博識善筆札工詩文宋亡入元不仕隱居廣陳時載一舟中置琴書尊杓泊蓼汀葦岸以

看夕陽賦曉月爲事

輟耕錄曰孟堅性不羈好飲酒醉則以酒濡髮歌古樂府自執

紅牙以節曲

嘗到縣令宣城梅黻造船謁之竟飛棹去梅

佇立岸上言曰昔人所謂名可聞身不可見始謂先

生歟

姚樂年曰公從弟子昂自苦中來訪公閉門不納夫人勸之始令從後門入坐定第問弁山笠

澤近來佳否子昂云佳公曰弟宗山澤佳何子昂慚退公便令蒼頭濯其坐具蓋惡其作賓朝家也余少從婦翁得見子昂自是第一流人物何敢輕議今身當彝齋公里第有想像其鼓棹行吟處致企慕耳

酷嗜法書遇三代已來金石名蹟傾家易之不靳嘗

得白石藏稊序五字不損書喜甚夜歸雪溪舟覆行

李盡沒孟堅手持帖立淺水中大呼曰蘭亭在此餘

不足介意也因題八字卷首云性命可輕至寶是保



又善作梅竹往往得逃禪石室之妙于水仙尤爲奇  
時人珍重比之米南宮孟堅亦自以爲不歎也年九

十七卒臨終賦詩有百年處世欠三秋事業都歸海

上漚之句云

孟堅論書法曰學唐不如學晉人皆能

言之夫豈知晉不易學學唐尚不失規矩學晉不從唐入多見不知量也僅能歌斜雖欲媚而不媚讎成畫虎之犬耳何也書字當立間架牆壁則不骯骯思陵書法未嘗不圓熟要之于間架牆壁處不着工夫此理可爲識者道近得北方舊本虞永興破邪論序變而不知其惡也故爲此說正坐無牆壁也右軍樂毅畫贊蘭亭最真一一有牆壁者右軍一榻直下是也李瑋家開皇帖行書之祖於此最昭昭化度及魯公離堆得此法左右陰陽極明麗丁道護啓法寺碑筆右方直下最具此法學者當垂情知此下筆則妍麗方直端重楷正昧此則癡鈍墨猪矣黃庭賀捷有鍾體雖微歌側隱然亦有墻壁力命表勁利更高學者毋但徇俗而不究本唯遺教經宛然

是經生筆了無神明決非義筆正如率更之玩長孫無忌面無目團團也識此已又識破懷仁聖教之流入院體也其逸筆處世謂之小正書此書官告體蘭亭玉潤霜寒諸帖卽無此逸筆不知懷仁從何取入使後人未做羲帖先爲此態觀之可惡其流于蘭溪經藏記烏龍廟記僧有交之集書極矣又須戒徐會稽之濁戒李北海之狂濁在跋偃狂在歌斜唯張從申得大令之通暢無二公之流弊且世云會稽法自蘭亭出蘭亭卽無偃筆也又云北海深悟大令大令不若是之歌跋也跋偃之弊流而爲坡公歌斜之弊流而爲元章父子矣且如吳傳朋深得諸葛禎瑤臺寺碑筆法的是蘭亭中出矣公又生出一節病每下豎筆不直榻下乃仰筆尖鋒全無氣骨皆清和之弊爲隘不恭學者更切自防之自檢點之朋友相警悟之前修長中之短亦無畏友以覺其非耳故余深信間架牆壁爲要也余自謂學古人當勤媚今人當無心可也中興後未壑巖橫斜顛倒幾若楊少師孫勤川規矩恐下筆不中觀者元章曰奴書耳朱吾所取孫吾所戒更從識者評學隸楷于魏晉之下邈乎無以稽也縱有羲繇之蹟號存世者唯樂毅海宇疎



陵本爾其唐元度魚帖本已非古本文次有德州畫像贊而已若所謂力命表固繇精筆古勁幾不入俗眼然尊之敬之未容而友之也黃庭固類繇欬側不中繩度未學唐人而事此徒成畫虎類犬然則欲得入道于楷何從曰僅有三焉化度九成廟堂耳晉宋啓法最精歐虞之所自出與國龜甚如出兩手天不壽精而壽麤良可嘆也北方多朴有隸體無晉逸雅謂之穉表氣至合于隋書同文軌開皇大業以逮武德之末貞觀之初書石無一可議此古今集本成之時也於是虞歐大宏厥聲始者虞子龍聖道場歐于姚辨等刻亦未臻極詣也及孔子廟堂碑飛來白鶴詩虞爲法于世矣化度九成歐獨步于時矣今求楷法舍此三者是南轅而北轍矣三書之法在乎正恬澹分間布白行筆停勻且如橫書必兩頭均平不可如俗書左低右昂搭手從左原過此在入訣所謂千里陣雲者也起筆旣成冗類如鑿如錐則有泛冗錐則尖旣不尖又不帶冗斯爲妙絕及至書到右方住處捺筆不可向下須擁起向上于下如繩直其左方主筆之豎亦結筆在左穿心豎筆是也捺筆直下到

立筆處微捺使鋒向左如畫之右肩突出鋒在上豎筆則突出鋒在左也又于十字處如中字牛字羊字凡是一橫一直中停者皆當着心凝然正直平均不可使一高一低一斜一欹少涉世俗守此法既牢則凡施之間架自然平均使不俗氣俗之從生始于徐浩也知蘭亭韻致取有映帶不知先自背了繩墨欹斜跛偃雖有態度何取態度者書法之餘也骨格者書法之祖也今未正骨格先尚態度幾何不舎本而求末耶戒之戒之從入之門先敬先戒平平直直輕輕勻勻俗咎率更體爲排算固足以攻其短然先排筭而尚氣脉乃可不排筭而求之是未行而先馳理不至爾分間布白勿令偏側此誠格言每一字爲半筆多筆少不同先須分布勻整若此未調順工何從生又有一般偏旁不可盡律以正者每字必歇歲字必件有字不可破中叢字取居中而又左右皆須以古人所書求其義理執一而論第曰中正此李後主目顏魯公田舍翁又如褚河南如稱入分古雅有韻一切尚之甚有疎拙薛少保發越褚體飄揚透徹一尚不圓幾致迂踈魯公之正其流也俗誠懸之勁其弊也寒古往今來中庸能鮮千古之下一刻心若神詣



其然者要是文章之外唯此足以觀人發揮形容有足尚者不忍息也又嘗妄論文章精到尚可改飭字畫落筆更不容加工求以益之適或壞之此吾知字畫之貴一生眠則畫被坐則畫地將老無工此藝厥爲不易哉 行草宜用聚心筆者以其摺裊婉媚然此筆須出鋒用之須捺筆鋒向左意趣如只用筆腰不用筆尖乃可如真書直豎用尖則施之行草無能度此是要緊處人多未知之姜堯章孫過庭草書言能籠卷橫豎最善發明棗心筆于用之時每難揮運雙鉤懸腕久久得趣其要正在勿使筆尖也 草書雖連綿宛轉然須有停筆今長沙所開懷素自叙乃蘓滄浪輩書一向裊眉無典則北方有一正木不如此或欲或連乃爲正當草極難于抽蘇草不及行晉賢草體虛淡蕭散此爲至妙唯大令縮秋蛇爲文章所譏至唐旭素方作連縣之筆此黃伯思簡齋堯要之晉人之妙不在此法度端嚴中蕭散爲勝耳右軍三卷僅一半真施老子印證簡齋堯章諸公議論去其間偽迹如求屏風帖早乘涼帖止開真帖五卷下海陵當以此爲區處 孟堅又有梅譜詩二首頗

盡盡梅源委詩云逃禪祖花光得其韻度之清麗間庵絕逃禪得其蕭散之布置回觀玉面而鼠鬚已見工夫較精緻雙枝倒作鹿角曲生意由來端若爾所傳正統諒未絕捨此的傳皆爲耳僧花王之工則麤夢良意到工則未女中却有鮑夫人能守師繩不輕墜可憐聞名不識面云有江西陸公濟李衡麤醜惡拙祖弊到雪蓬濫觴矣所恨二王無巨法多少東隣擬西子是中有趣豈不傳要以眼力求其旨鬚鬚正七萼則三點眼名椒梢鼠尾枝分三疊墨濃淡花有正背多狀蕊夫君固已悟筌蹄重說偈言吾亦贅誰家屏障得君畫更以吾詩跋其底 濃寫花枝淡寫梢鱗皴老幹墨微焦筆頭三踢攢成瓣珠暈一圓工點椒粹綴蜂鬚擬笑顰穩拖鼠尾施長梢盡吹花側風初急猶帶枝頭雪未消松竹襯時明掩映水波浮處見飄飄黃昏時候隲隴月清淺溪山長短橋閣裏相挨如有意靜中背立見無聊筆端的際明非畫軸上縱橫不是描頰覺坐來春盎盎因思行過 雨瀟瀟從頭總是湯楊法拚下功夫豈一朝

震亨按舊志並云子固居廣陳晚徙居崇德廣陳



今析平湖宋時爲海鹽地平湖趙公伊謂幼時見  
其地高阜纍纍居人皆指爲趙家王墳樵採有禁  
云

許棐嘉熙中人隱居秦溪于水南種梅數十樹構屋  
讀書因自號梅屋室中於三桁下分四榻中垂一簾  
對懸白香山蘇東坡二像事之嘗自叙其藏書目曰  
予性喜書舊積書千餘卷今不翅倍之人有奇編見  
無不錄以故環室皆書今卽老而貧乎而人不鄙夷  
余之貧鬼不揶揄余之貧皆書賜也所著有獻醜集  
樵談行世樵談中如云畫工數筆術者片言僧道一

經半咒動得千金文士剝精鉢心不博人一笑又云  
擘書覆篋裂史黏窻誰不惜之士厄窮途落冤穽聞  
者不憐遇者不顧聽其死生是賢紙上之字仇腹中  
之文也語大有感慨

常林字長孺自號蒲溪漁叟同之曾孫也淳祐中舉  
進士自常熟尉調婺州推官改知嘉定縣簽書臨安  
府判官所至以公廉稱守廣德值歲饑不候請出社  
倉粟施賑郡守秋苗有例米千石盡以代屬縣償大  
農綱欠不入私橐拜監察御史論巴陵事觸度宗怒  
出爲兩浙轉運使本邑歲被賊潮害稼請捐金發粟



輟已帑修築成新塘三千六百二十五丈害以息邑人德之語具隄海篇尋以宰掾兼刑侍極論檢覆之敝上進故事首論雷雪非時之變帝意不悅丐祠不許以集英殿脩撰知平江值旱復以郡守例繕十五萬爲民食軍餉助蠲苗九萬稅十三萬版帳十六萬及新苗二萬八千大寬公私力旣代有事例餘金萬楮又悉不受吏驚曰人言常侍郎不愛錢果然題平江集

僊宮詩松菊新來入夢頻公餘乘興得尋真紅塵物外長清境白日壺中不老春栢子灰寒煙寂寂桃花風暖水粼粼道遙羽士閒如許愧我浮名役此身改泐東安撫使復捐萬楮

寬新苗數萬恤災民泐東人祀之于家尋以刑侍召兼給事中封還隆國夫人從子觀察使錄黃廟堂傳示上旨令委曲書行楸終始不變遂奉祠歸里德祐元年除吏部尚書二年拜叅知政事宋亡里居六年卒歿後家無餘貲人益嘆服其真清云

震亨按宋史楸本傳云拜叅知後爲夏士林繳駁拜疏出關而德祐帝紀則有貶辭若謂楸因元兵壓境謀去者今考士林紀亦以遁書恰與楸去同日繳駁之有無固不待辯矣余獨憐紀書楸宣麻日文臣在班只六人朝士先已竄盡又八日楸去又五日而瀛國興觀旬日鈞衡自是難支傾廈爲



法受惡知先正有不辭耳舊永樂志載楸以故臣  
歸里中州人士慕之者欲一見不可得其志洵足  
悲其事亦無容深論者乎

崇字召伸亦同之曾孫好學善屬文宋季隱居澈水  
不仕繞庭植竹數十竿自號曰竹窻著澈水志三卷  
又有名槩者崇昆季行也爲文亦工今所傳崇文如  
鮑郎場厲夢龍政績記槩文如福業禪院記並琢刻  
發異彩惜他文罕存者

崇澈水志序曰紹定三年鎮  
尹羅儀甫屬余撰澈水志雖

一時編集大畧而儀甫滿去竟弗暇問逾七八政粵  
歲既久訂正尤詳因日邊孫君來此雖鎮場廢懷非  
疇曩比然才幹有餘趁鞫自足爰割已俸售募鐫行  
水軍袁統制聞而喟然曰是書不刊于鎮稅全盛之

前乃刊于鎮稅彫弊之後其可嘉已銳捐梓料肅贊  
其成噫元和郡縣志丞相李吉甫所制也後二百餘  
年侍制張公始刻于襄陽今余所編澈水誌後二十  
七儼權鎮孫君爲鏤行則是書之遇知音又不大可

耶慶元

楊發先世居浦城以軍功上著鹽之澈浦父春宋武  
經大夫發初仕宋官右武大夫利州刺史殿前司選  
鋒軍統制官樞密院副都統元初內附改授明威將  
軍福建安撫使領浙東西市舶總司事卒贈懷遠大  
將軍池州路總管輕車都尉追封弘農郡侯子梓嘉  
議大夫杭州路總管致仕節俠風流尤善音律卒贈



兩湖都轉運鹽使上輕車都尉追封弘農郡侯謚康  
惠梓子耐翁模耐翁少中大夫湖西道宣慰同知改  
任海道都漕運萬戶模啟武校尉贛州路同知知寧  
都州事模子友直字元坦個儻多才好學不倦官至

常州通守

楊氏世以豪富稱其詳見古蹟及市舶諸篇

沈穀字仲實開朗好讀書後至元間官餘于同知

詳見

流寓姓樂年傳

陸正字行正居武原鄉博學篤行通律呂象數之學  
以家世宋臣矢不仕元侍御程文海薦之不起後復  
與劉容城因同徵俱不赴隱居教授其學以慎獨存  
心為要所著有正學編樂律攷七經補註至治三年  
卒門人私謚為靖獻先生

仇俊卿曰靖獻先生有弟曰唐俊有子曰應禮應  
奇應禔應奇洪武初郡同守劉澤民欲奏官之以  
老疾辭曾孫宗秀未樂末徵至京師會 仁廟御

極召問如何則天下太平宗秀叩頭曰 皇帝親  
賢納善大臣秉公持正自然太平 上喜曰好言

語公卿皆悚然正統間敕獎仍表其門曰尚義後  
縣析為平湖子孫遂為平湖人科第至今鼎盛

屠曾字體軋母樂夢王曾而生故名曾受書于臨川



吳草廬澄延祐中江湖行省薦爲學教諭至治癸亥  
中泐江東榜第一有虞庭慶雲賦爲藝林稱重授建  
康學正不就隱于家

賦見選  
舉志

姚士彝曰曾世居乍浦鎮北里許宜慰楊耐翁僭  
也吳元年籍沒楊氏其家遷避齊景鄉念一都黃  
泥堰曾孫湘字士澄朴茂有義氣好讀書子三樞  
楨機機子勲仕 孝宗朝官至尚書謚康僖行實  
詳郡志今 朝廷五歲遣使恤刑郡國實康僖所  
條奏此昆胤蟬聯科名踵武迄今益盛也

董鎮字仲貞通經術有用世志值元亂隱居海寧泉  
山鎮之先有潮者自越遷澈浦至此又六世矣

仇俊卿曰鎮裔孫從吾道人父子居澈城餘並居

海寧成鼎族矣

過宗一蚤喪父獨與母居至正間僞吳畧地至海上  
宗一負母逃與寇遇欲殺之以身蔽母中數創賊舍  
而去身爲傭以養母母卒六年不克葬寢苦服衰蔬  
食不變語輒泣下白燕巢其室東西相向及葬燕不  
復至

鄭元璠元琰兄弟也以學行知兵顯名官至總管別  
駕時方國珍張士誠往來海中爲寇二人率鄉兵禦



之不能為害鄉人皆信嚮之 明興歸附後時幾及  
於難端簡公曉即其後也

人物篇第六之三

皇明

丁豫字叔寬洪武初以儒術徵聘 聖祖召見問天  
下治否對曰盜賊已息但恐復生願以安民為本稱  
聖意授江西按察司僉事詳刑慎法民頌之不衰

金志剛字大節洪武中為縣三老因公事入都得旅  
見 上應對稱旨拜知府大節為人有口辨友人費  
顯道因食筭戲之曰猶頭筭今大節矣志剛應聲曰

狗尾粟未顯是稱耶其捷類如此

董穀雜存云大節家啟浦入朝上

問曰今天下盜賊平否者民無敢荅者獨大節抗聲曰捕獲已盡惟恐復生 上異之即擢為知府其居與余家隣比余兒時常見其孫名基者基死遂絕按大節對 上語與丁豫同然豫事載戈定遠傳董出於傳聞而戈為永樂中人 尤可信當屬之豫為是

常士昌林之裔孫洪武中以賢良辟為雷州守清介

自持有古循吏風卒官妻隋氏攜孤歸秀水里家焉

生孫麟登成化辛丑進士為兵部郎虜寇火篩內侵

大司馬條畫皆出麟手叅知河南有党雄之亂次第

削平不煩朝廷一旅擢福建方伯入覲逆瑾索賄不

得逮繫錦衣衛獄旋釋官至禮部右侍郎子孫仕版



不絕

曹仁字某淵學精詣應洪武甲子貢即登是秋鄉書

明年成進士寔為吾鹽科貢擢第始選主工部事意

樂閒退旋乞休澣柱門自好絕意仕進自號知止生

按鹽貢額自洪武九年十二年俱選年十四年選容  
貌端正至十七年甲子始定例每歲貢年深成效生

員一人赴禮部考試中式入太學  
備用知止公實首應歲貢格也

詹文字好問太學生授刑部主事再遷郎中為人廉

直在曹二十餘年遇事敢言斷獄明清人莫敢以私

干文廟嘗稱之宣德己酉奉使卒於興濟

黃胤宗生而聰敏人稱竒童父文傑洪武中秦王教

授胤宗登建文庚辰進士辭避榮膺教授汀州彰德

二郡典試陝關者再擢國子博士加翰林院檢討仍

掌博士事居職三十年澹然無營公退閉門罕與人

接惟以詩文自娛弟紹宗鄉貢士

按楊文敏為檢討  
誌載紹宗鄉貢士  
以謂鄉舉之稱乃歷科無紹宗名又以謂貢也  
而貢籍亦無豈紹宗寄籍他貫邪更俟考正

葉春字景暘本姓林幼喪父母鞠于葉遂從其姓性

警敏勤學有才識洪武中自邑史歷事吏部者六年

永樂初尚書李志剛知其通練薦于朝授主客司

主事以勤敏周密為上官所重歷郎中十二年擢兩

淮鹽使改叅政福建仁廟嗣位入朝與廣西布



政使周幹同被 命巡視應天鎮常蘇松杭嘉湖八  
郡訪民利害建革之歲餘歸宣德初 朝廷以八郡  
奸吏土豪肆貪虐毒細民久猶未戢復 命春偕大  
理卿胡槩巡歷訪察後又以錦衣衛指揮任啓監察  
御史賴瑛佐之所至秉公推明行之以果無所屈撓  
氛翳擴清單弱咸有生氣時權雖董于槩然悉鄉邦  
之隱行之無私春力居多焉還朝 上嘉之擢刑部  
右侍郎歲終得疾 上命太醫視療乞歸卒 賜祭

命有司治塋

舊志載春傳甚畧今采楊文貞所撰墓誌入之又國史載春奏湖江土豪為民患郡縣不能制宜遣官巡察蓋自為其鄉請之因而被命也勅文附載 朕祗奉鴻圖君臨兆庶倦

倦夙夜康濟為心而南方諸郡尤厪念慮誠以民眾地遠情難上通今特命爾等巡視應天鎮常蘇松及湖江杭嘉湖等八府其軍民安否何似何弊當去何利當建審求其故具以實聞爾等必公必勤毋徒苟應故事庶副朕憂憫元元之意

戈定遠字尚武工古文辭永樂丙戌貢入成均選河南道監察御史彈劾封駁無少避忌陞交趾按察司副使蒞官清勤平獄訟綏柔有方致仕卒家

仲端字惟正六歲而孤母顧撫教舉永樂辛卯賢書知隨州恤窮達隱民感之有逋寇丁朝龍聚眾流劫至是詣庭待罪調知廣德致政歸

朱侃字志剛少為諸生學官有魅呼其名即滅人異



之永樂七年選貢入太學卽拜監察御史出僉憲廣東入爲通察奉勅巡撫廣西執法嚴肅一時賊吏屏跡有置毒于瓜以獻者毒發瓜裂第刑獻瓜人不窮主者咸服其得大體還朝從上北征旣而兼掌宗人府幕事洪熙中奉使泗州督漕運者再擢通政右使尋轉左仁廟大漸命與平江伯迎宣宗騎行三日夜至南都宣廟知其勞方屬意柄用未幾卒大理卿胡檠贊侃有事上精白公忠敷奏詳明剴切之語今子孫居故第方茂衍云

公遺言與諸子曰予少也貧苦學勵行遂游邑庠旣陞胄監受知聖明得拜顯職嘗奉勅巡撫廣西頗效微勞旣還從駕肅清沙漠艱辛屢歷

尋奉迎儲駕馳不下馬底晝夜有三由是勲階屢進列聖之恩稠疊優渥予衰不能報矣尚當圖之子孫但祿入之餘無長物晚年作室秦溪歷九載而始就緒不亦難乎必觀于幼學之苦則勉講習觀于當官之勤則修職業毋嗜飲毋遊戲毋侈肆毋健訟毋鬻貨毋通俠客父慈而誨子孝而賢兄弟順而義夫媿和而別宗族戚黨睦而有禮減獲恕而不縱賦役以時奉法唯謹他日人稱曰朱氏有後予復何憾

許珣字士章父伯全以鄉舉諭樂安珣博綜載籍爲人靜慎無慢容舉正統丁卯鄉闈明年訓導安溪未暮以母老援例歸養教授于家張給諫寧劉侍御泰鄭提舉延諸名公皆及門高弟也嘗典應天試家居日河南陝西江西復三聘爲考官所至稱得士焉

李孟璿祖衍本河南人元末官嘉興路副總管因家



鹽之苞溪孟璿兄弟三人各占一經孟璿書弟仲璣

易季衡春秋稱儒宿而皆能為詩永樂庚子 詔本

郡採修地志守胡公以孟璿淹博應選事竣薦為嘉

興縣訓導未幾調訓汝寧卒所著有南庄集李于鱗

詩刪不輕進作者乃取其雲深處一律則孟璿詩可

知矣卷舒隨處本無心道者幽居秋自深一片翠微

榻休嬌雨氣侵欲掃氤氳 季衡有西溪集時海昌二

陪杖履重來只恐路難尋

蘇秀州李孟昭皆有詩名每過孟璿兄弟酌和輒淹

旬朔好事者慕之季衡戲馬臺詩曰八千子弟江東

衣樂橫棚戲馬登高臺一朝垓下狂圖靡楚歌四合

兵塵起陰陵失道歎天亡尚聘餘威殲漢騎拔山之

力蓋世雄空餘草樹生悲風有舟不渡亦男子揮劍

直與騅同死銅雀臺詩曰魏家歌姬貯銅雀高棟

凌雲雲漠漠眉嫵爭誇翠黛濃腰纖競妬羅衣薄秦

箏趙瑟無時閑魚鳳烹龍頃刻間綺窻映水月皎皎

朱簾捲雨花斑斑一朝玉匣埋黃土從此高臺罷歌

舞分香賣履屬何人魂斷西陵泣寒雨 凌歊臺詩

曰凌歊高臺吐南國突兀于雲天咫尺朱簾半捲曉

風寒雕欄倒映秋江碧臺邊軋軋金輿來盈盈妓女

花顏開英雄一去不復返朱薨畫棟俱塵埃蜀山雪

消青似洗岷江西來幾千里豪華霸業總成空惟聞

嗚咽墓前水又隴頭牛出春耕雨海上人歸晚負

鹽漁屋半臨滄海側仙家遙隔白雲層鵝鳩啼散村

前雨蹇犢耕殘谷口 季衡子景孟登景泰甲戌進士

雲皆其集中佳句也

知莆田脩潔有聲亦能詩編皇明正音若干卷景孟

樓詩曰莫論無聲與有聲登樓一聽便分明素娥度

曲凌風細丹桂迎秋落子輕玉兔不知霜搗就水輪

元許斧修成夜深坐對山河影贏得窻前兩耳清

又詠書館蘭詩曰年年五月長中庭綠葉參差覆紫



莖自與脩篁同冷淡不隨凡卉共飄零月移清影臨  
書幌風度幽香襲硯屏羸得詩人吟不倦一窻涼雨

誦駢

景孟子滂以鄉舉令蒼梧滂孫儒烈登嘉靖丁

未進士歷僉閩憲景孟兄景南有玄孫星亦以孝廉  
爲績溪長纓綉接武子姓至七百餘爲邑望族

劉鳳字景儀性倜儻好竒畧國初海寧衛官軍調  
往沈家門海洋防倭多遭風溺死每更番哭泣與家  
人別後奏改爲陸守有九里三砦之設寔鳳力也又  
夏稅額少納者苦其零星改于秋糧中併輸亦自鳳  
始鳳先世學正恂從汴寓鹽淘涇語具官師篇恂曾  
孫用元末舉家爲賊所戕用方垂髫身受十八刀不

死後生三子長卽鳳也鳳生九子家饒裕延名師教  
督以故族始昌賢者輩出鳳以子泰貴贈御史而孫  
瑋曾玄孫演木熠烝世埏世教渾泓克世其業科第  
至今盛焉

鄭延字世昌性孝友方正博學能詩文鄉稱東谷先  
生以蔡氏書教授門生以其業顯者三十餘人天順  
中貢太學官廣東市舶副提舉諸番無敢以方物及  
門者白沙陳獻章贈言曰溪魚海舶各歸去明月自  
照芙蓉峯卒于官後以孫曉貴贈刑部尚書

鄭儒泰字亨道延之子也博學有隱行爲遵化司訓



數月即致其仕以歸閉門園居日以課其子曉爲事  
平生不泛交游不苟取予好善如已出惡惡如已病  
習儉服勤始終一節嘗誡子孫以讀書耕田爲世計  
以胥掾商賈星術爲家禁尤寃心史學貫穿數百代  
事可指諸掌所著有讀史備忘若干卷行世以曉貴  
加封兵部主事贈刑部尚書鄭曉家譜曰先君年十  
六時從東谷廣東海寧  
人有爲巡檢者其繼妻攜前夫女嫁巡檢巡檢既滿  
欲污其女不肯從乃挈白金十五斤與女倩居市廛  
官舍乘間泣訴先君曰吾此女并此金付公子幸爲  
我毒此老賊先君不肯曰我留若金爾撫若女巡檢  
妻又百方置毒毒巡檢先君輒先覺止之又不可告  
巡檢巡檢將歸先君謂爾老矣女且少又有囊中物  
道途恐不利盍且寓吾舍移書呼爾子爲爾女求一  
婿來此配爾女奉爾歸可無他慮巡檢意頗悟即泣

下從先君言逾半年子果攜一婿來既成婚先君盡  
出昔所留金付巡檢歸比先君歸巡檢夫妻子母女  
及婿相率來拜先君先君竟不言子家有老媪嫁爲  
栢氏婦者其父母嘗從在廣東此媪生于廣東年且  
八十餘謂予曰即君輩有今日大多積陰隲也媪  
呼先君爲大爹云按舊志謂公有隱行殆指此也  
錢達字景孚半路里人以子琦貴贈郎中性鯁直無  
他勝人有過面折不少借人亦無怨起家勤儉惟延  
師教子弟費不靳長子封君珍珍子薇進士官給事  
中次子即琦臨江太守琦子芹永州守萱儀部郎並  
進士而薇子孝廉與映有子陞以戊午舉蓬州守應  
晉及酉闈之千秋又琦幼子籥之子若孫祥源有濬  
則皆自達始也達本姓何洪武中有名貴四者成都



勺一兒甫生三日托同里錢翁收育長名裕因從其  
姓卽達祖貴四有先塋在鹽人呼爲何長官墓久蕪  
芴一夕忽現光恠鶴巢其樹巔臨江公闢捷至自此  
子姓相繼登顯不絕矣

鍾海字巨川性剛直能詩雖起家掾史而張靖之特  
敬其人與之友爲懷遠丞令梅特甲科陵人海積不  
能平奏與之辨與梅並落職又七年事白海獨起丞  
萬安不數月復飄然賦詩歸歸數年而貧益甚以卒  
後以子梁貴贈刑部主事

海赴懷遠任靖之先生畫  
家山看月圖贈之題以詩

云小山孤月靜流輝石磴高寒酒力微清賞正濃眠  
未穩夜深松露濕秋衣海萬安官舍詩有乏燭樓臺

宜夜月單衣兒女性秋風又有思鄉心似回頭馬游  
宦身如掛角羊何日南臺公事畢釣舟春雨卧滄浪  
諸句鄭少卿履淳云海落職之日妻適  
產子子卽梁也天蓋以報疆直吏矣

徐倫字國明世家于豐山洪武中倫以明經貢入太  
學仕爲濮州知州門閥始著倫孫顯遷居黃湖顯曾  
孫梗官常州通守而族蕃是爲黃湖之徐而倫從弟  
建丑長子秀生曾孫封公煜子曰憲副鷓次子貴生  
曾孫封公澍澍生封公應登子曰德慶州守文治封  
公應奎子曰山東布政使從治仍居豐山之雪水港  
則稱雪水港之徐焉父老言澍嘗攜二子避倭山上  
倭舞刀登山幾得之忽一倭疾呼去獲免應登儒宿



邑諸生治周易者多出其門所得月俸以奉親及字  
撫諸弟而身自衣布素不私一錢誠心質行風範高  
卓應奎則傳其業轉授諸子姪家學蓋有元本嘉靖  
戊子榘舉丁未鷓成進士萬曆戊子文治舉丁未從  
治成進士前後科第歲適符而從治仕宦至二品應  
奎夫婦垂白在堂則歷數鹽前達僅此見爾

朱璣字朝華以茂才入成均內行潔整閑家禮教秩  
然性好施予嘉靖庚辛後歲比不登傾困粟貸貧者  
或折券不取償歲時上墓宗人子有勿率稱大義讓  
責封鬣間不少恕人以比陳太丘有子曰範生學顏

登嘉靖乙丑進士詳後曰篚貢爲清浦訓生正學歲  
貢正學生泰禎登萬曆丙辰進士今官御史篚在浦  
庠甚茂絳帳之譽正學治大戴禮文場尤有盛名後  
拜封罷試朱之先從婺徙有名銳者舉子孫多始大  
其族朝笏先學顏舉壬子學忠先泰禎舉辛卯朝笏  
亦詳後學忠官絳州守致仕其令耒陽均里甲平徭  
賦爲耒人畫永利德政至多封公符字期信敵樸好  
行善朱之有祭田自符創義始朱氏子姓今六百餘  
以才行聞者方繩繩起其畧見學忠所撰譜傳中

傳

尚胥朱氏先婺人也元晦家建陽次子留婺十一傳  
名順者嘉定間任海鹽簿託居聞琴橋因占籍子銘



教授潮陽孫懋卿學正遷尚胥里後有銳娶邑富人  
馮宗本女生三子溥瀚洪各負才行舉孫十曾孫二  
十族始日蕃今幾六百餘博士弟子常數十員家法  
以明經薦學孝弟力田爲主衣冠朴素語步謹飭望  
而識名族也先後科甲若笏若學顏若學忠若泰禎  
以明經舉則若籛若籛若正學地封亦若正學若符  
太學弟子選中翰則士遷補序班則元杰都事則漢  
與珮通府則珊照磨則益謙京衛幕則學憲尚義好  
施崇禮師傳則若洪若松若應箕而松尤豪放  
好客座上常滿賦詩慕古則若斌若簾若瑞若前學  
顏士遷亦若學斌篤行長者則若玘若簪若贊若學  
易皆邑之良也每春秋有事祠墓長幼數百恪恭職  
事進止肅穆雁行不越飲福洗爵彬蔚孔都父老觀  
者如堵族二支畧相亞無枯苑祖墓在甘泉里而符  
倡義集金置祭

田爲碑記云

彭紹賢字孔嘉以世職歷浦口守禦中都留守陝西  
都闡金山叅將後以子侍御宗孟貴晉階昭毅年八

十餘卒紹賢雖由武途奮儼然文儒林居二十載吟  
詠尤富性簡素坦夷與人交和氣可掬好山水每春  
融秋爽輒泛舟虎林姑蘇諸勝處爲樂歸則日坐家  
園得句落子意欣然忘倦素孝友歲時禋祀感先德  
每泣數行下祖業讓兩從父後兩從父家落又周卹  
之至他姻黨罔不霑被者開國勲舊科第復接武起  
顧謙挹自下里社中不知其爲貴人子孫布素出入  
徒步未嘗有疾言遽色僮奴循謹爲鄉黨法世以比  
漢萬石君家而風雅勝之所著有擊壺編若干卷行  
世天啟四年晉祀鄉賢闡績具前簡



吳芸字時美居澉城布衣有隱德生子曰霽曰震霽字惟采性淳厚尤好行善二子長之英蕭縣令次中偉光祿寺卿震之子中任字某俠烈多奇行子二麟瑞麟徵先後成進士今並官節推芸與霽以中偉貴贈庶憲中任以麟瑞滿考封如其官

許聞至字長聖給諫相卿之從子侍御聞造從兄今成都太守士奇之大父爲人孝友當倭寇海上時嘗從父邑中歸道遇賊跣足負父行數十里得免禍居喪哀毀骨立爲弟任役事至破家不靳浙撫有以世誼招之見者終不往惜以青衿終而發祥後裔歿數十年晉祀鄉賢祠潛德彰焉



海鹽縣圖經卷之十三

人物篇第六之四

皇明

張寧字靖之其先德清人幼穎敏絕人

七歲題畫龍有莫點金睛

恐飛去之句

景泰五年進士廷對策弘博剴切大為諸

公所賞

方洲雜錄曰廷試之日屬草未半禮部侍郎姚公夔與尚書胡公濙偕來看相顧有喜色

附耳曰此卷應當讀善自珍重予以紙短告遽命儀司檢測卷得李曰良術紙續卷尾曰第留心毋慮天

晚吾為汝進本依曾榮故事給獨不果命儀司郎中俞欽收卷送宿禮部明且携予入朝候直房下胡姚

二公請內閣請從容足卷者三大學士王公文冕言曰張寧南方人邪若今日騰卷如謂臨軒何胡遂不

復言放榜之晨猶相傳予為第一及唱名乃孫賢也自是喧傳累日聲入禁中尋有旨取進士張寧寫





不了卷及牛倫試策 授禮科給事中七年内閣陳

御覽畢復送内閣收貯 循王文以子不得舉中傷考官劉儼幾得罪寧疏言

元宰私其子陷考官失大臣體乞令罷歸聞者竦然

英皇復辟初曹石陳乞無厭寧疏請裁止 上以

是知寧拔掌科事彈駁稱旨 召對時嘗獨進寧論

事寧從容敷奏多所裨益每對廷臣稱真給事中會

朝鮮誘殺毛憐衛都督郎卜見哈等 朝廷將遣使

責問忽内降以寧與都指揮武忠偕往 方洲雜錄又

華殿太監牛玉宜寧引至内門 上下輦立殿陛寧

邊入叩首俯跪有 旨令近前者 上日聞李景讀

書或有典故問答非武忠所能汝同往坐次在忠上

寧叩首奏請所往事宜皆優賜裁決獎諭再三顧近

侍日有勅諭朝鮮國王須得如此人去寧復頓首寧

謝賜酒飯于春坊明日降 旨有金織襲衣之賜

至遼陽 上以警息惡馳 勅取便進止寧拜 勅

言君仁臣忠不敢自便竟至朝鮮致命事竣還餽遺

一無所受朝鮮為樹亭名却金隨遣陪臣入謝復奏

願遣子弟入國學欵服輸誠咸謂寧此出不減重兵

十萬橫行鴨綠水也尋陞都給事中 憲宗踐祚首

勸經筵講大學衍義又薦起王竑李秉為兵部尚書

都御史諸大臣不悅 皇太后生辰設齋醮禮官欽

大臣金錢祈福寧言人臣當和衷敬德仰贊 聖孝

上綏懿社釋老不當崇奉辦香非可申祝行之祗壞

每鹽縣圖經卷十三



風俗傷名教南京給事中王徽等劾內閣李賢獲罪  
謫邊寧又合六科申救以故諸大臣益忌之適廷薦  
寧及岳正可任清黃侍郎都御史者賢借歷練語擬

旨陞寧知府汀州寧無幾微見顏色至汀先教化

後刑罰盡除厲民弊政興飭學校造祭器八百事表  
節義恤孤獨禁遊惰郡事一新諸上官故忌寧才寧  
為給事中時才高不屑下人人以故輒摧挫寧寧亦

抗志求致仕歸家居三十年卒

寧與同年王用誠書云日吾兄之官湖廣

僕不久即為部院諸大臣謬有卿佐都憲之舉坐是  
出守汀州甫二月患風疾迺還暮年而還後累為浙  
中巡按諸公所薦部文催行緣才力素薄宿疾未除  
至今不能辦此休老之懷諒無所更矣僕自老妻棄

逝繼以先父背養幼子病屢憂喪嬰心齒  
髮日益疎短命之所造一不敢有動於懷寧偉貌修

能雄文直道

重瞳屢回屬意大用顧早智適歸養

高礪壑閑家有則孤踪無玷出其緒餘賡寫烟月繪

染丘林片楮有傳藝苑爭寶如公者出則為天下士

處則稱鄉先生者也所著方洲集三十二卷

漳浦吳原道曰

張公靖之引疾歸部使者薦不起惟日杜門以琴書  
自娛縉紳非造廬不覲其面性好山水歲率一再至  
杭輒攜親朋出遊西湖訪孤山吊岳墳登天竺綵舟  
蠟屐隨意所之興至呼筆大篇短章頃刻立就新意  
疊出士林傳誦焉 四明姚鏞曰先生既歿世而修  
身之化即一二婢妾亦甘守共姜之誓欲從先生地  
下嗚呼是豈一朝夕矯言  
偽行者比事詳列女篇寧無子以弟寬子珙為嗣

珙子嘉秀少有神童稱嘉靖己丑進士歷南比部郎



謫貳饒州途徑鉛山以例謁內閣某公聞者不卽報  
詒曰向投刺誤矣索之拂然去

劉泰字世亨性耿介不屈於物能詩文工行草書尤  
精於法律景泰中以翰林庶吉士授河南南道監察御  
史出按遼東及南畿諸郡風裁凜凜大獄累歲不能  
解者片言決之嘗疏劾內閣大臣江淵不法事卒移  
其官天順初復與同官楊瑄等極論石亨擅權 詔  
獄幾不免後以疾卒於京易箒作詩云清白肯爲兒  
女計疎狂曾爲 國家憂擲筆而逝時三十有八泰  
忠猷直節名滿朝野方以公輔期之而天嗇其年時

論爲之惋惜

倪政字拱德以鄉舉訓興化學終松溪諭初與化生  
王譽者政才之故規砭不少借秋試譽禱夢九鯉神  
曰當問倪先生譽以先生必無好言勉徃一請政怒  
應曰去中解元來譽喜甚疾趨出果發解歸至今傳  
以爲異以子顥貴贈知府

倪顥字廷瞻進士初授工部都水主事改兵部武庫  
治泉山東調兵陝西俱有聲用大臣薦超擢懷慶知  
府弭盜捍災鋤強植善郡有藩府諸王人皆歛戢偶  
中蜚語下西廠窮訊無驗得復官遷河東陝西鹽運



使決去宿滂鹽策大益二年卒官顯孝性純至嘗廬墓白雀來巢

王輔字時佐宣德中隨父戍遼西天順己卯以詩經魁山東鄉試成化丙戌登進士第授刑部主事未幾卒輔少有異質讀書過目成誦臨終語其子獮曰我死必返葬我於鹽無忘首丘也獮因復爲鹽人獮孫家棟遷居郡以易經舉嘉靖甲子浙江第一萬曆甲戌成進士

張敏字時勉曾祖景福官大理遂籍雲南敏父正領解第進士終建寧知府敏以鄉貢知蘭州虜憚威略不敢犯境知馬湖府夔州鄆藍諸賊起敏帥羅洞兵拒戰敗之陞綿州兵備副使鄆藍已就禽其黨廖陳輩復亂敏白制府馳一騎往撫解陳黨三萬人廖黨惡陳先歸劫陳營將并害敏敏曰我不怖死我死大兵至汝輩無噍類矣賊悟出敏敏白計制府悉平廖黨轉山西參政致仕子淮蔭嘉興所鎮撫世職

劉瑋字公奇成化甲辰進士授行人選御史奉勅

督兩淮鹽政兼治河道瑋執法嚴所司有阻壞鹽法者奏擬戍邊遂著爲令時兩浙山東水旱疏請賑以鹽筴餘銀全活者甚衆高郵湖風濤不測時時壞漕



艘築堤四十里別爲裏河通漕名康濟河至今得免  
覆溺患按廣西大去賊吏擢廣東按察副使聲績益  
茂正德初請老卒瑋孝友恭靖終日危坐無惰容論  
者方之叔泰俊爽不及而重厚過之

朱祚字天錫神宇冲融喜獎掖後進其學本于五經  
而獨嗜聚書縹緗至于萬軸志慕司馬公平生可對  
人言舉動必書以自考初應貢後領舉爲尤溪靖安  
令能以所學教化人卒於官及門若顧叅知正徐光  
澤泰吳右轄昂鄭學博儒泰皆人推儒譽也所著有  
拙齋雲谷集海鹽縣志若干卷

祚有孫同生家多書  
卽祚所世積也別有

繭紙宋板杜註左氏春秋爲朱晦翁手硃筆旁註釋  
者裝爲八冊裹以宋錦方四尺許如一幅靶寂世珍  
重好事者噉以重值同生不許忽有借抄詒一冊去  
并欲圖七而費值以償者同生怒索不應至悉緝其  
門幾斃後始懼而還之此  
可作藏書家一段故實

沈衡字平甫祖孟賢嘗以里中良善受 成祖勅獎

其畧曰爾沈孟賢良家子弟資質溫純譬猶平地爲  
山必始一簣之微工女製錦必由寸絲之積朕嘉爾  
至誠好善特賜褒獎爾宜及時努力勉于爲善爲臣  
子而務盡于忠孝爲兄弟而務盡于友愛少以事乎  
長長以慈平幼理家治生務農力穡各安乎已分無  
慢忽於天地無肯棄于祖宗無逾越于王法如此則  
上天爲之昭鑒俾爾身安家泰門戶克榮子子孫孫  
世臻善慶矣爾其欽承朕訓無怠無忽故諭勅方四  
尺上有廣運之寶是槩賜海內  
良善者錄此以存 先朝故實 衡登弘治庚戌進士

授刑部郎欽恤南圻多所全活子奎以神童召見爲



翰林秀才早卒

劉演字文敷舉弘治癸丑進士授南職方主事歷刑部郎中值閹瑾亂政拂衣南還人服其見幾瑾誅薦起四川叅議竟以疾卒

顧正字尚誠登第主兵部政擢刑部雲南司郎中司轄圻甸獄案繁時逆瑾擅政用法者稍持平輒被窘辱政調停多苦心粵西巡守匪人地方騷動詔擇有風力者按問以正往秉公覆奏稱旨叅議四川撫定白水夷人之變未幾卒正樂易不立崖岸復倔彊耻爲依附居官二十年屋圯不能葺子孫貧餒操

可徵也

吳昂字德翼起家進士令宜城廉介自持教民耕織有官莊老畝稅爲民患昂調停其法宜城民感而祀

之

湖廣志云宜城縣民領官莊百畝收三分之入謂之老畝量出加租昂調停之百姓稱便及調縣去

父老流涕攀留建祠立石歲時祀焉

改新建新建人困寧濠索租匿丁

家山以拒濠言民反宜速兵昂勿爲動身入山諭民民立散歲大饑官無儲粟昂立抽補法賑贍全活萬人歷官福建叅政初閩獄有妻殺夫坐死者昂疑而默禱夢一小兒據人腹昂曰殺此夫者必杜福子也捕得之一訊輒服閩人呼爲神明古田礦盜起發兵



躡捕渠魁散其黨去侯官逸囚之變戕潘臬相戒毋  
犯吳公進右轄未幾疏致仕昂幼孤事母孝前後乞  
歸侍養凡三幸履醇篤家居布袍芒履渾跡漁農至  
遇鄉曲大利害又未嘗不抗言有司不得則請于朝  
如論築海塘疏是也積書萬卷徧讀之尤好周禮以  
後儒亂經叅訂諸說附已見爲書凡四易稿而成鄭  
公曉嘗曰明有兩方伯天<sub>台</sub>陳公華亭夏公皆人傑  
也先生學行純固如天台<sub>幾</sub>明哲如華亭而安貞  
履順歛華就實尤不可及亭子孫猶居故第門戶未  
墜戚元佐構李往哲傳昂少時聞海寧祝先生萃履  
方篤行以員外郎家居教授昂袒褐草鞋負書往

從就河濱濯足而進祝先生奇其人欲試之曰生來  
晚書舍滿無所置生惟一牛屋幸無牛生寧得居乎  
昂欣然解衣共先生家人掃除受祝先生書坐牛屋  
中日夜誦不輟冬夜一敗絮袍時解與所從老奴更  
相衣或周走室中跳踊却寒歲暮歸祝先生贈米布  
要明年復來除夕上母壽訖即走百里請祝先生所  
元旦方啟門吳生儼然進謁拜罷復請受書矣後昂  
既貴聞祝先生死奔赴喪次哭踊執心喪三年如子  
又曰昂家居嘗駕舴艋入郡城遇兩措大舟適相  
觸奮怒邀昂止昂布衣擅帽局促舟中舟中又無他  
供具逆揣爲農庄人要挾之欲令出錢償禮昂遜謝  
乞至西門湯別駕家行貸至則別駕大驚顧兩生何  
得辱前輩乃爾兩生慚沮昂貸錢固償兩生謝之愈  
恭徑歸錢懋毅曰吳南溪方伯生平潔介嫉貪如  
讐嘗謂一令此令稍贖筐篚既出門見門外棹楔顏  
曰牧愛吳眇一目故仰視久之曰不佞眇能視者收  
受之義何謂也此令大慚  
遂抹去二字以別顏改之

錢琦字公良幼讀書山寺中一榻十年衣不解帶燈



帳如墨舉正德戊辰進士令盱眙歷守臨江調思南致仕當公在盱眙值北寇劉七南侵民驚竄琦慨然誓死守民感動復歸悉踴躍受兵分據要害擒斬奸謀數人賊知有備不犯去邑以得全臨江屬縣三地廣難治自成化來數議析未決其析新淦為峽江自公始邑居新剗以所釐引稅充費民不勞工集峽江民至今與郡民祀之矣琦淳厚悃愾家居仿家禮祀先置義田惠族遵藍田鄉約教閭里日以讀書賦詩為事老而忘倦有集十四卷行世

按公守淮議曰長淮據中原上游為

京輔咽喉南北有故勢所必窺項劉六劉七齊彥名諸賊分部寇掠淮南守劉祥戰潰被執河南淮北賊

已如入無人之境某承乏盱眙地薄淮之南岸勢極孤懸又德祖諸陵恃為藩捍淮南唇齒郡縣西有鳳陽臨定南有廬州滁和東接維揚並藉之為門戶近雖調發滁州諸處軍兵防守浮山龍窩諸要害悉皆老弱不任介冑倘賊邀截商艘乘間南渡流入大江以窺京輔為患豈可勝言為今之計惟以協力守淮為急計自鳳陽直抵淮安沿河四百餘里地連各境難以臂指而使宜每五里築一墩舍墩置人若干人給利兵賊至則舉烽砲每五墩領以敢死之士一人使彼此相援首尾相應本縣先經委官部署結營分劄墩舍已及百里其浮山迤西屬臨淮管內田村迤東屬山陽清河管內亦須各置營落墩舍發兵防守其泗州北岸及各鎮商船悉驅穢南境不使賊得藉之津濟又邊淮一帶止以本土民兵巡徼而欲遏彼狂逆力寡勢單議將江北橫海飛熊廣武英武廣洋儀真高郵各衛併滁州六合全椒來安天長江浦江都各州縣軍士民快分撥精壯星夜督發于沿河要害列營屯劄協同守禦其鳳陽直至淮安各選驍勇素有機智精揮千百戶等官上下督察庶軍聲振揚賊氣沮喪淮鳳以南有金湯之固矣許聞造口



先生少貧爨糧往師祝虛齋處之外舍有婦夜奔先生毅然却之聲色俱厲如是者再三虛齋微知加禮敬焉遂爲上客令子繼臯師事之陸師道曰先生五言詩如夜涼天有雨秋晚樹無花又云一去隔千里百年知幾逢寺深風度磬山靜樹啼鳥皆深遠可喜至七言詩云江北江南數日程蕭蕭落木送秋聲夕陽滿地鳥飛盡人在亂山深處行又平實而懇到有味其言姚士彝曰先生詩如空塔鶴夢清山深步履遲笠外滿天雪坐久換鳴禽雨濕鷓鴣語起色白頭人諸句真五言長城足爲後來作祖

徐泰字子元性抗直簡率善記誦十二從仲父晟學

詩卽有奇句後舉鄉薦再試不第授桐城學諭爲悲

世賦自廣改蓬州學正入蜀觀峽中山水文益進遷

光澤令未幾解綬歸泰林居四十年手未嘗一日釋

卷卽家殖益落猶讀書咏詩自如文筆華整而健嘗

爲縣令夏公浚修志六卷較前志尤爲簡核所著有

玉池稿玉池談屑春秋鄙見皇明風雅詩談女學諸

書西陵峽歌曰兩山夾江如壁立千尋萬尋青鐵色飛流一道山罅來動地雷聲喧白日山高不見飛

鳥過舉頭青天一尺多蒼藤古樹翳滿目沿崖亂石紛差殺嗚呼峽中之險險莫比昔嘗聞之今信矣商人重利卻輕生吾獨何爲亦來此黃陵廟下不可游空舫塌洞尤堪憂十前九却過一險百夫力盡顛崖頭垂堂遠遊古所戒靜言思之心膽駭中流欲歌行路難哀猿又起寒烟外縣志小序曰夫志者志也其事則實錄其文則史其義則禹貢周禮盡之矣海鹽舊有志世遠吾不能徵于是作志五篇以紀之俾海鹽可攷焉夫王體國經野以地圖詔地事以方志詔觀事以詔地求以知地俗以制其征役是故莫先乎地輿有地則有民人焉有社稷焉民社之寄存乎官官主也民人社稷之主也禮樂政教所由行也故受之以職官官之所職莫重乎文獻故受之以人物物之進也必以正故受之以選舉春秋紀事變其稽



也雜而不越故受之以雜志終焉秦尤好爲小文  
晚患鼻淵作詰鼻文自嘲如云椒蘭芳烈汝若不屑  
臭穢孔惡汝亦聞覺嘉賓在堂發言雖離說古談今  
其聲如鐘我欲答之如語甕中我寡飲量三升已溢  
或因燕饗舒我膈臆醇酸一觸汝卽淳淳抗準拒齟  
臍臍饒突匪峰其中據房釀蜜項焉旣平清鱗漏漏  
沿髯落襟滑若玉液雖語涉  
嫚戲亦頭責子羽之流也

徐咸字子正泰同母弟舉進士知沔陽州歷襄陽知  
府入覲中考功法歸咸坦度高懷與物無忤居官寬  
簡持大體沔多忝咸教民引渠灌泉倣吳地種稻襄  
有妖民惑衆罪其魁餘悉散解性孝友事二親寢食  
飲食省視必躬仲兄衰老迎養於家奉之如父晚歲  
築園城闈名小瀛洲遇勝日邀邑中諸名勝飲酒賦

詩陶然自適時在會者多高年耆宿風流文雅爲一  
時之盛後輩慕悅之者至以白香山司馬君實故事  
比之焉所著有近代名臣言行錄澤山野錄四朝聞

見錄西園雜記東濱三稿咸小瀛洲社會記畧曰嘉

會於小瀛洲之時賞軒維時靈雨初霽凱風自南闡  
藥翻紅林篁挺翠黃鵬載鳴於深樹紫燕偶語於重  
簷物情咸欣衣冠萃止鍾鼓旣設獻酬乃行四美具  
而二難并三壽朋而五福介墨山陳子詢式瞻勝美  
爰付丹青冠服差殊意態惟肖佇立相語者爲西村  
豐厓西臯聚首閱卷者爲東畝南溪勾溪挾童子過  
橋者爲海村欲行且顧者爲古厓坐以待奕者爲石  
林及予也西村姓朱名朴勾溪姓陳名鑑俱海上隱  
君子南溪姓吳名昂福建右方伯東畝姓錢名琦臨  
江守西臯姓鍾名梁南昌守古厓姓陳名瀛龍崑令  
海村姓劉名鏡海寧衛帥石林天寧僧余兄豐厓泰  
光澤令余咸亦泰襄陽守也 踏青至太子廟詩曰



散步出西郭乘風支瘦藤逢人頻問路扣寺欲尋僧  
花落紅雨亂麥搖碧浪層歸來日將暝渡口已漁燈  
鍾梁字彥材才識敏達而稟性端介不以名位屑意

正德中登第爲刑曹郎嘗諫止南巡杖闕下幾死

世宗嗣位錄其忠加俸一級日精門災勅慮囚

江南平反死者百三十餘人有僞以同籍書投賄者

立發而按治之擢知濟南郡平萊蕪反寇邵志多擒

斬功賜金綺乞歸養母仍薦起補南昌裁正湖地賦

役權貴歛戢丁艱歸年僅四十卽疏請致仕築室郊

西與林居諸賢及布衣衲子輩結文酒社又四十年

卒梁進則攄忠砥職退則潔已範俗爲方洲先生後

一人自叙貧不屈身仕不易節隱不干譽老不妄求

可爲實錄而鄭端簡公亦嘗謂國家有若人不應使

老丘園咏宋人得志須爲天下雨放懷聊占洛陽春

句嘆羨其不可及焉子四韶別見夏貴溪丞嘗捐粟

施賑有四體詩刻獲諸生慧捷善談論勺貢士達識

恬退以提舉秩終吳典顧箬溪題梁長春亭詩曰長

不愛齊州乘五馬却來海上狎羣鷗亭中蓄書三萬

軸夜則高眠晝還讀希夷山人西華西少陵野老曲

江曲翠竹蒼梧手自栽四時無日無花開鴻儒下榻

談玄理騷客題詩遲逸才世路風塵競奔走英雄幾

簡能回首富貴浮雲未足論浩歌且進杯中酒梁

孫祖保博學能詩尤精茶理種竹千竿爲一樓臨之

日夕披吟其上不見客近二十年恬素有祖風馬劉

世教嘗贈詩云鸞環清泚帶危樓剝瑤從多嬾未酬

海鹽縣志卷十三



茗戰漸疎三雅舊書淫真擁百城游長年佞佛稱居士小婦生兒字阿侯任是壯心降欲盡可禁如意唾壺愁

鄭曉字室甫生有異資十二編讀經傳諸史父儒泰示以昔人賢不肖事蹟即毅然立志以必爲君子自矢嘉靖初元發解明年登第主政兵部考覽九邊地形及士馬數爲圖誌請討大同叛卒毋輕赦以滋後患甚爲胡大司馬世寧所器重大禮成永嘉用事初曉同諸曹疏諫詔獄賜杖議實與永嘉左至是永嘉以詞林臺省引薦曉欲收爲用曉不可值丁艱歸因家居授徒不赴補者九年後許文簡讚爲太宰始起

爲考功歷文選郎當是時分宜又用事納賄侵銓政曉秉公持鑑一切無所徇有詔考察臺諫分宜意在去異已曉更黜所厚若干人爲子世蕃求璽丞復以故事謝弗予分宜遂大恨會推用謫臣激上怒貶爲和州判徊翔南卿寺十年始以刑右侍改擢兵部拜巡撫鳳陽命時倭寇深入江淮運道艱梗曉先計擒通倭奸魁然後選民兵集鹽場壯勇與倭戰前後斬級九百餘賊挫去東南賦四百萬石得直達無阻奏設楊海兵備分其軍無遠隸彭城剗築瓜埠維揚及如臯海泰三縣城條上漕務便宜十餘事具



有永筭在鎮二年清心約已上下交際並絕故集餉  
鳩工繁費日興而用不詘焉自此世廟簡知謂曉  
可大用再擢南吏部尚書特旨留爲右都御史協  
理戎政又二年改刑部尚書然卒與分宜左復激  
上怒落職歸初總督胡禦倭浙土有功所傷殘糜費  
亦過當曉弗避也會故大司馬楊公博起督宣大分  
宜謀用胡爲本兵曉時攝兵部事疏言用博宜世  
宗從之胡不得入而胡所誘降通倭渠賊上章請貸  
死曉又盡比重典議皆與分宜左旣開隙矣適中允  
郭希賢上疏安儲語侵分宜分宜摘疏中建帝字嚇  
曉云上意不測必坐逆後可曉曰此第可云妖言  
爾當以秋後律足矣上果以爲輕下詔立梟之而  
南都叛卒殺大司農一獄曉引律擬梟決者未幾亦  
讞上上追念前讞怒曰死時君立新帝者罪僅爾  
殺一大吏何問也下詔斬三人餘盡貸之無何與按  
部御史辨職掌上遂斥曉執法自尊坐罷蓋先後  
皆分宜入譖云後分宜敗上覺爲所誤嘗一詢徐  
文貞階欲起爲督臣階曰曉年衰用之內則可無何  
病卒上爲復原官穆宗改元賜祭葬贈太子太  
保謚端簡曉問學淹博經濟宏深持論正而不迂嚴



而不刻剛而不激高而不亢蓋陸宣公司馬君實之  
流居恒儉朴尤審於辭受嘗言士必有伊尹一介不  
取予之節然後可窮可達可常可變亮節貞心沉幾  
密慮避遠權勢不受涅淄雖位躋八座而用若未究  
則亦其守正之效焉所著有吾學編徵吾錄古言今  
言奏議文集史論策學禹貢圖說等書吾學編始洪  
武迄正德首列大政記次遜國記同姓異姓王侯二  
傳閣臣典銓二表名臣及遜國臣二記天文地理三  
禮百官四述四夷北虜二考合六十九卷曉爲郎時  
卽屬稿中感李太宰默私乘中禍輟弗作後又續成  
之其女后樂律儀制兵略茶馬鹽糧運法水利藝文  
隱逸酷伎方技等篇竟廢今觀其書大政記仿春秋  
百官述擬周禮諸傳及論贊大槩學陳承祚遇其典  
言豐藻摹寫生動卽蘭臺令史亦所不讓也方伯劉  
公烝嘗言公老年病瞽屬草字大如升三四竄易不  
休書成得廢稿數十麓其精勤至此子履淳履準別  
見履洵上舍生兄履淳以上疏詔獄冒冰雪走數千  
里往視人高其原上之誼焉

公年譜載居鄉數事皆  
維桑所蒙此者附記於

後嘉靖九年秋海寧衛兩指揮言海中有番船多  
奇貨借米二百交市明日卽利三倍公曰此地方大  
害敢爲禍首力阻之不聽告之尹夏公浚及崔把總  
典山兵防之又不得揭白海道罪兩指揮使人皆嫌公



多事後二十三年海賊果大至邑受其害人始服公  
先見與某縣令論均稅事曰敝縣糧長并押運等  
役往往財囑審官或請寄鄉宦以是千萬金產乃脫  
役使數十金產者代之青天白日下乃如是之與到  
均稅之事極願奉行以爲他日貧弱之地後又三年  
郡守趙公遂均稅至今賴之實公陰贊之力海寧  
衛向無出運船隻衛軍俱留防汛後因承平分派杭  
州等衛船四十七隻本衛代運公督漕運時議將前  
船發還杭州前右寧紹興台六衛衛嚴  
湖三所衛卒得一意防守海邑有賴

錢木字汝冲本姓劉演之姪也祖璠贅里人錢氏從  
其姓公侃侃任氣節沈雄簡實常慕張復之趙閱道  
之爲人登嘉靖癸未進士授威縣令威在燕趙間號  
難治公勤求民瘼先嚴保甲法弭姦盜及鋤藩府佃  
卒之凌民者城燼於劉齊之亂多棄地爲築室十三

百區以居民仍令受厘者區歲出粟一石入社倉備  
賑食亦以足濬隍築外郭立小學創名宦鄉賢二祠  
撰邑誌諸廢墜畢舉其大者在均賦徭威賦薄厚不  
一等版籍絲棼公仿朱晦翁漳州圖帳爲則壤畫界  
遺久遠雖勢有力者請寄不曲聽威有門丁產三徭  
吏上下其手與奸市公復就中裒益令適平又有牧  
種馬一役民最苦度田爲兩科牝畝十七特畝十三  
于是民爭受馬時河北三郡賦役咸苦不均父老聞  
威法良便爭請錢威縣往均受臺檄徧歷旁諸邑盡  
均之惟內黃南和弊尤甚獨留經理三月至今二邑



民建祠祀公如威民也公在威歲蝗旱退公未嘗不涕洟廢寢食所入自常俸外未嘗私一錢蓋實心爲民造福清勤任事以不愧古循良吏所自矢者滿七  
年人覲丁艱歸卽家擢工部主事未赴卒之日家有脫粟二斗棺衾不能備封公以歲制者與之始克殮廉吏不可爲邑人至今歎之

錢芹字懋文琦仲子嘉靖戊戌進士永州知府公宅心坦易壹以至誠待人初官刑曹察獄務曲盡人隱治郡益與民親畧去細故若家人父子然拊恤藹如也與里人處尤敦朴實出語輒傾盡無留藏卽爲人所詒終不忍億逆之居常悒忤思欲建白隆慶改元上疏首陳正始當懋 聖學次及維桑海防捕黃魚上貢非便後黃魚果罷進如其言

錢萱字懋孝琦第三子嘉靖乙未進士由刑部郎改祠部時方稽古秩祀曹牘山積萱討証咸合品宜尋改儀制司以提調試事波累落級德慶州同知地近徭徭大兵數征調民力罷萱至署守事除編徭濫役改運米爲折納審戶籍令丁役相附貧富得均德慶人感之量移之 命甫下染瘴先卒

父琦有招魂詞云萱以清淳溺

若于學早歲通籍寺官中儀未幾獲罪謫守德慶詎期客死歸觀炎方情之所鍾有踰越續父乃長號遠



呼升雷四望而招之曰噫魂歸乎來父兮處家日晏  
之嗟只母兮在土魄將疇怙只噫魂歸乎來寡妻少  
妾室中三人只四兒二女孱弱焉存只哀號遠道行  
路悲辛只噫魂歸乎來德慶不可以久淪只瘴雲靈  
霧正晝如昏只殺人非刀百往一存只况雕題而椎  
結亦何偶于吾人只緊歸來南方不可以託只北戶  
暄蒸毒淫流樂只射工埃影金蠶中虐只飛頭與隣  
青鬼相索只緊歸來北方不可以到只冰天幽曷日  
所不照只凍入窮泉烈火無權只風刀落指沉魂雪  
窖只緊歸來東方迢遙只積水稽天浴日驚濤只巨  
鰲奮鬣箕畫雲霄只齒如連山吞噬莫逃只緊歸來  
西方無際只流沙浩浩白骨記里只火山崔巍毒河  
難濟只鬼教移人非我族類只緊歸來艱難天步只  
不可階升豐隆震怖只縱閭闔之能排如帝閭之齋  
怒只緊歸來積厚無極只空空下天堅不可入只既  
黜昧而無見實陰民之所匿只峽山之東物象闔麗  
只父兄斯憇樂不能已只魂兮歸來間以靜止只峽  
東之春窈窕衡門只揚英曜野調鳥中林只魂兮歸  
來恣所欣只峽東之夏深庭爽榭只牽荷蔭木長吹  
飄灑只魂兮歸來恣所暇只峽東之秋禾黍盈疇只  
無腸闕目佐人拍浮只魂兮歸來恣所羨只峽東之  
冬時和歲豐只伐鼓烹豚送臘休農只魂兮歸來恣  
所從只峽東之旦旭日始闢萬物畢見只峽東之暮  
蛭噬送景幽輝滿戶其樂無度只魂兮歸來尚信汝  
父

賀簡字朝重苦志博學能默誦五經每讀書盡四鼓  
饑則用悅束腹嘗迎醫療母淚數行下猶手一編爲  
之沾漬其篤嗜如此嘉靖壬午舉賢書屢上春官不  
第授恩平令尋卒  
董穀字碩甫澧之子舉鄉試歷安義漢陽二縣令所  
至蕪靖不苛民安之好學工詩文宦歸安貧自怡當  
晝炊煙未舉猶散步澈墅湖濱吟咏自若資絕敏幼



歲卽通禪理後侍父遊陽明先生門識尤大進妙解  
儒釋合一之旨有性論一篇其悟後筆也所著秦龍  
子四存前後集漱水誌嘗自贊其像云泊櫓山下有  
一叟焉穿粗布衣卧白木榻出蟋蟀吟做蝴蝶夢坐  
顏子禪守老氏黑把五柳杯採東坡杞菊使自已賣  
文錢飽兒孫種田飯不知此何人哉或曰卽帝舜所  
封秦龍氏一百三十世裔孫穀者也識者以爲不誣

性論畧曰六合之內有萬不齊其前無始也其後無  
終也不得已求其情狀惟一虛而已矣萬象充塞于  
天地之間卽是太虛舍萬象則無太虛究其實一性  
而已是性也至虛至靈卽體卽用生天生地爲人爲  
物無終無始歷萬古不滅非不滅也子產所謂用物  
弘而取精多則粘新帶舊情親境熟不能滅也人爲

物中之靈然亦非有一定之靈或自靈而蠢或自蠢  
而靈靈謂之善蠢謂之惡惡者以漸爲蠢至於夷狄  
禽獸自夷狄禽獸漸靈而爲人者亦有之善者以漸  
而靈至於大賢君子自大賢君子漸蠢而爲物者亦  
有之萬種不齊無非此心之所成立自非同天之聖  
脫盡習氣無有能免焉者今人所以不信者不悟死  
生之變與晝夜無異雖有久近卽是一道乃爲目前  
景物所亂遂生虛實有無之疑殊不知虛者固虛而  
實者亦非實也無者固無而有者亦非有也萬有皆  
虛無虛無生萬有惟心所運杳無端倪蓋不獨所性  
爲然而貌之吉凶身之窮達命之延促亦皆此心之  
胚胎先儒不悟乃歸咎於氣質不知氣質之不美心  
實爲之無心則無氣質氣質亦是心之別名變化氣  
質者變化其心耳豈氣質自能變化哉聖人言性相  
近習相遠相近者不同也相遠者亦不同也相遠之  
不同既由於將來之習則相近之不同安知不由於  
既往之習乎世有前後而工夫則一今世之工夫亦  
爲來世之根柢故習於善則善而來世之進善也益  
易習於惡則惡而來世之向善也愈難以是存心蓋  
不惟可以明性將見志益堅而修益力未見其詭於



聖矣曰是則然矣極本窮源畢竟何以有善惡之異  
曰是亦可知也愚於釋典見其有顯識之論後讀文  
中子亦曰氣爲上形爲下識都其中於是信儒釋無  
二道也夫識也者神識也卽心性之別名也自其本  
體而言謂之氣自其成質而言謂之形自其虛靈不  
昧根柢品彙而言謂之性只一物也隨在而異稱蓋  
無聲無臭之體不能不聚而成形舍形亦無有所謂  
體矣形之所在知覺生焉故謂之曰心心之體段知  
而無知無知而知鑑空衡平原是無聲無臭則固無  
害於性也惟其閱世既久應酬既熟則又轉而成識  
遂有無形之形於方寸間能分別爾我記憶往事乃  
至夢中追思尋繹飛揚變化曾無寧息人但知日用  
應酬較計利害博聞強記千貌萬態曰此卽心豈知  
已非本然之體矣或超凡入聖或謂賊爲子皆此識  
爲之識出於性而性不能命識由其自昧本體各成  
一家耳然則相近之性其卽有覺之心而漸離之識  
也歟再加之習寧不相遠然則治識之道奈何曰性  
體本虛以虛治之而已識出於無情則爲善而上達  
識生於私意則爲惡而下流大學誠意貴於無欺正  
心戒於有所欺有所識斯爲性病矣愈久愈病則

去人愈遠善惡之分如是而已或靈或蠢無非心所  
自爲而氣質奚罪焉性累氣質非氣質累性也曰然  
則人物之生於天地間只有此數性往來而不絕  
乎孰主張是不亦太勞攘乎曰無數也人物迫塞彌  
滿於天地間雖有往來卽是天地之化育天地之力  
亦不能外此而別有所生畢竟雖天地亦是此虛靈  
建立而無實體捨物則亦無天地矣天地亦一物也  
要皆虛靈自生非真有一定之天地以生之然亦無  
典守之者佛氏所云剗燒春磨亦起於人心妄念妄  
成而非實有妄念膠固自生鬼見卽成實境而實受  
之蓋各生於心則各求其類恩怨勝負與平日無異  
皆由衷之發見豈有他哉蓋不惟幽冥爲然今人生  
於世自縲紲國罔鞭笞殺戮以至安富尊榮飲食宴  
樂亦皆妄心所作妄心自受而妄形無與也不然今  
已死之人其形尚在加之剗割不復痛楚則生而知  
疼者誰歟蓋陰陽晝夜幽明生死原無二理此心之  
外孰爲真實者耶推而至於前代亂離之餘禾黍故  
宮蕭條千里春燕巢於林木此不但感極而衰實由  
惡極而變亦是人心所致故幽明感應之道無有不  
本於心者易曰精氣爲物游魂爲變記曰骨肉斃於



下陰爲野土其氣發揚於上爲昭明蒼蒿悽愴此百  
物之精也神之著也則其不散可見矣季札吳之賢  
公子葬于贏博而曰骨肉復歸於土命也魂氣則無  
不之也莊子林類曰死之與生一往一反故死于是  
者安知不生于彼賈誼能知鬼神之本者其鵬賦亦  
曰化爲異類兮夫又何患凡此皆葱嶺未通時中國  
之說已然矣又何疑哉 穀重修澈水志序曰澈水  
志一卷宋寶祐間里人常棠所編迄今二百六十六  
年舊本無存傳寫多誤余稽質歲月不覺撫卷而嘆  
自開闢來卽有斯地其謂之澈始於何時前此又何  
名也於今按志以索舊跡可指辯者有幾茫然見之  
斷楮爛簡中徒使人動俯仰宇宙之悲耳夫以彈指  
起滅之身上遡二百六十六年瞬息之事猶以爲遠  
而不能知則其上無始而下無終者烏足論哉於乎  
書乎置汝於天壤間焉能爲有無乎而吾之欲存之  
者欲因是以驗大塊之無窮人生之如幻令銅泉藥  
塢之疾庶其少瘳爾志凡十卷文字精細有度蓋衆  
未舉業盛時之筆後益以勝國及我 朝沿革事實  
若干卷則 某所僭云

錢薇字懋垣琦兄珍之子讀書刻苦有大志嘉靖壬  
辰舉進士聞甘泉湛先生講學投贄請業脩詣益深  
授行人使楚藩正相見禮却賜金選給事禮科慨然  
以論列爲已任時夏貴溪以議郊祀進爲禮書與議  
禮舊臣霍爭忤相訐奏臺諫畏顧未有言薇上疏抗  
論其傷體請下詔切責 手批嘉獎繼又論閣臣戚  
里內侍與廟享巡幸戎機屯田章十數上並劄直無  
諱避尋有 敕清查倉儲薇得楚及粵西同時使臣  
以聲勢凌壓外官委簿籍吏胥勾稽滋弊竇而已薇  
獨持法守禮虚心搜覈摘發乾沒萬計又筴擒靖州



士弁宣布威德歸晉本科右是時貴溪已入相分宜  
爲禮書又新被寵 天子齋宮祈年尊信方士陶仲

文以二臣侍玄而莊敬初冊立貴溪薦用宮僚多私  
人政以賄成又翊國公勛恃寵侵朝棟至請復內臣  
鎮守擅署宿衛官不關白本兵薇發憤嘆此吾死仗  
下日矣一疏糾勛再疏糾貴溪三疏乞罷方士毋令  
遠近傳聞謂君相信奉左道語皆中 上深忌當拜

疏時謂必不免勅家人買棺待俄得 旨削職爲民

歸而杜門講學從遊者戶屨恒滿竭孝奉二尊人數  
破百金助伯氏醫藥薦寵下輩施予貧交踈戚下至

橋梁道路亦捐貲薰衆興修孟堰之役師三千經其  
廬爲具餼糧旣而殲焉又爲具槥收塋舍田築哀丘  
郡邑大興革如罷運艘均田則清里甲諸事多所贊  
成朝野倚竚大用剡薦無虛歲亡何卒年五十三卒  
之日自言死生一晝夜無所憂怖也蓋得于學力者  
深已隆慶改元褒卹先朝敢言諸臣 詔復官贈太

常少卿制書有生有令名旣垂芳于百世 當事者建

特祠額曰顯忠焉所著承啟堂稿國朝名臣錄海石

聞草學錄樂律諸書薇星變陳言疏日茶過 皇上

承天門下仰見上天有星如帚光掃內垣中宮軒轅  
之次占者皆云災變非細臣備員諫垣職在論救謹



述四事仰佐銷弭伏惟采擇一日停巡幸邇者陛下遠幸承天固以顯陵所在發于孝思但勞費難供出入宜慎如衛輝火燎行宮襄江鐵散御舟非所以怡神遠危願停車轍深居大內天心可回二日罷方士陛下踐祚以來專用邵元節輩天下以為用一道士為顯官今元節歿不意復有詭誕之徒陶仲文者寵以高士之號畫符遍于宮禁呪水驅手鬼妖又聞大學士夏言左都御史王廷相禮部尚書嚴嵩俱蒙陛下賜以高士之符烟燉金頂之帽行在朝叅必冠符于帽遠近傳聞謂君相一心奉事左道廢聖賢之教將幸天下而從詭誕星變何為而再三日遠奸佞御史胡守中平時貪財納賄賦私盈萬今以奔走微勞左右交為之薦傳奉明旨遽列憲堂復兼宮秩爵及惡德天下從此多貪夫矣河南按察副使劉開始自永平知府以逢迎守中為之延譽于近侍內臣聲望遂入陛下之耳一旦超擢河南按察使人固以為奔競者捷徑矣今守中又薦為巡撫真定都御史不顧公議不畏聖明投功名之會者莫不願為劉開以希薦用故中外多附守中引類呼朋躡據華要剝民膏血以資行賄遺害地方寧

小上動星象四曰寬小過陛下南巡直隸湖廣河以南守土之官皆受恩于朝分職于境孰不願竭智力以効奉迎之心臨時或因精力不前或因智識不足致失事機今有旨提問究治中間邵錫等平時著清白之譽隨在有賢能之望若赦偶然之過以開其自新天度高明有以涵育天下和平之氣惟騰星變不足弭矣請慎選宮僚疏曰恭遇皇太子冊立該輔臣夏言等選補詹事春坊等官吏部題請銓注問隨該給事中周琬等論列選擬非人仰荷陛下高明洞燭立賜處分或歸原職或令致仕中外懽呼慶作臣讀禮有曰凡三王教世子必以禮樂又曰選天下端人正士孝弟博聞有道術者以輔翼之故太子見正事聞正言行正道左右前後皆正人也以此觀之則今日推補必躬有孝弟之行而又博聞今古者然後為有道之士可備禮樂之輔我朝列聖每慎于擇人而未嘗限于所擇成祖時輔東宮者胡廣楊士奇二人仁宗擇東宮講讀尚書蹇義等舉侍郎儀智宣宗以兵部尚書張本兼太子賓客英宗聘布衣吳與弼為春坊論德夫此諸臣考其出身或以歲貢或由學官或自守令或從田



蔽蓋期在得孝弟博聞之才以備禮樂之輔未嘗限于所擇亦不必于備官故能當時無議于今頌功今宮僚方補論劾紛至 陛下復勅吏部選補萬一再選之後衆心難服甲可乙否仍致人言輔臣夏言等納賄招權之迹形于奏章傳布四方有礙觀聽且玃等所論行賄昭然各有指寔以賄進者寧復顧廉耻惜名節既不可爲宮僚又寧可侍 陛下講幄玷清班汗顯秩乎輔臣以賄進人不顧國本大負 聖恩此非細故也伏願 勅下該部查覈周玃所論納賄事跡斥出貪邪輔臣罪首惡以肅人心庶幾黷貨之風從此一新勸導得人 元良懋建在 陛下舉念耳 按鄭端簡蔣道林並云公以宮僚非人上疏未報又以星變上疏遂忤旨郡人支大綸永陵信史謂公削籍旨批于宮僚疏當是 上覽星變疏益重怒始下宮僚疏罷公耳鄭公云又有論五臣疏今考集中無之聞所論五臣中有分宜頗極詆訐豈公家居以其勢方灼畏禍焚草耶

朱佐字思忠祖瑾父暎並貢士瑾授莆田丞以亮直

稱佐治春秋魁嘉靖甲午鄉試諭建德擢令臨川未

赴卒佐負豪氣好爲詩賦疊疊千餘言與王文祿仇

俊卿厚善弟俸字思廉攻字學考訂偏旁訛謬得六

書大旨傲管夫人書七十二篆金剛經人多珍重

沈奎字文明初舉于鄉文縱筆莫可銜楸比試南宮

歛而就于簡則如兩手竟魁尚書爲第四人歷官刑

部郎中江西按察副使奎癯不勝衣而操持介特爲

郎時宗室詔獄衆依違直舉大義斷之在江右與臺

臣執論可否罔巽避家居却埽門無雜客歲時修謁

守令語涉嫌私噤不出吻與人言恒挹損自下人稱



其謹厚焉子騰蛟尤孝友奎晚生子騰龍析箸不及  
較之半使之父事蛟焉奎卒既十年矣一日蛟召龍  
飲割已之半予之妻子不知所出徐曰此吾先君不  
言意也爲田五百畝云

仇俊卿字舜徵霽之子霽字彥光以貢爲硤江訓導  
書過目輒成誦動合矩度卓然典刑嘗書座右云五  
倫之間寧過于厚七情所發惟怒難忍以自警俊卿  
舉鄉薦知惠安縣終國子助教性好讀書至老未嘗  
釋卷感慨時事雖家居未嘗不言倭寇時策戰守機  
宜上幕府多中窾隆萬間海塘圯上疏請修築死之  
歲聞平秀吉將入寇猶憤發貽書浙撫請如漢橫海  
樓船故事張中國威識者壯之壽九十有二所著瀛  
仙集通史它石海鹽縣志曾孫祚熙今舉人

劉熠字元麗父棖英山學諭熠豐願美髯性資爽朗  
受業于鄭端簡公博極群書爲文雄麗尤好吟咏舉  
嘉靖庚子鄉魁署休寧諭釐正祀典日與諸生講析  
經義開發者甚衆典試東省得人爲盛遷南太學博  
士徵爲南臺御史尋卒京邸才不究用善類咸悼惜  
焉子六在塋並貢士餘亦弟子員在孫渾舉人泓進  
士今爲工部郎劉氏有三御史泰絕嗣瑋子姓亦無



幾獨熠孫曾才藻踵武至六十餘輩盛矣

顧霑字少雨參議正之宗人少孤嗜學母莊紡織以資燈帷嘉靖中成進士知禹城調閩縣有闖使暴橫力抗之歷南兵禮二部卽知撫州大中丞有欲築江堤以爲功者霑謂此天險不可以人力爭不聽果敗調柳州進領閩都轉運方擬叅廣藩前卒

徐鷓字鳴川舉進士累官肇慶郡守乞歸不得遷備兵湖南俄中言者罷鷓賦性質直退然溫恭居官未嘗矯飾矜名而所至徐辦動中肯綮以惠及人初爲南都水值島夷事起董繕城垣有勞績 賜金綺治

郡勅條鞭法後諸有卒通行焉鷓諸生時好讀左屈漆園等書爲文可嘲試輒失利年四十落魄尚爲塾師後竟以竒得售邑中言晚達者必稱鷓鷓嘗從村居附載入城手一書讀之艤舟人去而猶不知其篤志如此少子九牧簡朴畝靜稱佳公子尤善繪事

王大猷字伯甫偃倭謙退貌如其心爲舉人遇凶歲饘粥不具縣令魏公遺之金不受舉進士授官中書舍人儻邸委巷跨一欵段了公事歸輒閉門謝一切裘馬遊卽同里二三廳要謁籍終無其名晉工部員外郎出僉廣東按察尋改備兵雲南又改廣西方



陞辭中人言罷躑躅一官以直已取忤然終不能訾  
其守焉家居埽軌避俗蕭然終窶非古所稱廉約君  
子者與

胡憲仲字文徵少倜儻負大志年十六嘗上書督學  
使者求試書千言引韓退之蘇子瞻自況讀者壯之  
二十四舉於鄉又十四年成進士時嘉靖之庚戌俺  
荅犯京師至白河公上議請溝都城外地亟垣之護  
關民廬舍招勇敢令貴戚大閹出蒼頭私屬助軍設  
伏天壇貴人大庄諸處犄角制勝本兵躬擐甲胄出  
視師以戰爲守毋第堅閉國門自弱通州關弁及張  
家灣居民皆招集爲兵自衛虜進犯都城躡其後去  
卽邀擊之便爲款凡十且請自當一面禦虜得報以  
公協巡九門督造戰守器具後當事倉皇版築之役  
不及與虜退關廂殘終築外垣保護壹如公始策又  
二年壬子授南刑部主事時倭又擾浙中流犯南都  
戒嚴南司馬謂公曩在北策備虜是知兵因復以公  
守太平門而公貽書浙帥言備倭策三一籍沿海船  
責令盡歸毋出海以絕其源一禁內地奸民無賣糧  
漏師以困其進一遣間諜懸重購令各艘自相擒併  
以翦其黨帥臣用之又率大驗云公廣額高準負氣



多膂力居恒思以功名顯憤時嫉事輒裂髻髮上指  
冠勇往不顧游鄭端簡之門博覽今古益留心經濟  
釋褐在都手抄列聖史錄搜攬六曹百司掌故奏  
議方乘諸書蘄悉概于中見之行事兼通玄學謂金  
丹可成不死可致而性好吟詩善同年生粵東梁有  
譽引交吳宗徐諸子慕好其體來南都益拈髭鉢句  
諸公贈送慶吊鉅文孤腕責償又構思自苦歲癸丑  
遂邁疾官舍以卒卒之日沐浴更衣題一絕句云每  
念忠臣徒抱恨常懷孝子獨霑襟可憐三十九年事  
不盡當時一片心危坐擲筆而逝時老親尚在故句

及之志業不就歿身有餘恨焉集三卷行世

宗子相贈公之

金陵詩冠蓋同遊日風塵遠別時朱明驚節序紫陌  
感睽離雙劍繁星動孤槎細雨遲才高青瑣客吏隱  
白雲司鳳去仙臺古龍蟠帝宇垂三山天浩蕩六代  
草參差愁入張衡賦情深謝朓詩芳蘭如可折千里  
尉相思吳明卿詩綠鬢為郎初執戟清尊送遠獨  
維舟江迴戴蘂潮聲濶地擁金陵王氣浮六代豪華  
餘水斲三山佳麗倚城樓中原戎馬縱橫在南北風  
煙共隱憂徐子與詩早歲曾傳國士名論交况復  
古人情南嶽裁賦還平子北闕紆籌自賈生赤白三  
吳猶轉餉黃塵六月未休兵艱危念爾難為別倚劍  
風前氣未平梁公寔詩兩都詞賦見才豪此日風  
塵攬佩刀吳楚樹當瓜步圻東南山擁秣陵高湖邊  
春草吟騷客城上秋雲對法曹六代繁華應涕淚况  
堪天地戰征勞公南都秋思詩翠華遙御古幽州  
魚鑰于今鑿鳳樓泉繞舊宮池藻出山迴左闕仗煙  
浮香飄甘露金陵樹寒入清江白鷺洲絳灌侯門多  
少在鷄鳴祠



馮臯謨字明卿儀表奇偉饒智畧登嘉靖庚戌榜授  
刑部郎歷廣東左叅議分守惠潮時賊張璉據饒平  
西聯大埔蕭雪峯程鄉林朝曦而外與倭夷及海寇  
相犄角督府以臯謨行兵備事先計招海寇王伯宣  
協力逐倭復用吳孝廉說降雪峯璉勢孤遂成擒久  
之朝曦亦敗三穴盡平是時督府以兵七哨進攻臯  
謨統烏槎哨居中功寔多乃事寧僅擢為福建左叅  
政未幾復中言者奪職閑住浙臺臣數以邊才薦竟  
不起林居三十年築白鶴園管山進後輩談經藝尤  
好為古文詞邑中碑版巨作多出其手有集十二卷

宿石皇山寺詩青天萬仞插孤峰迴合珠林翠峯重  
秋去夕陽飛葉墮客來清夜老僧逢雲岫佛閣金鋪  
巖山麓仙壇石髓封聽法欲尋龍起處滿空寒嶺  
疎鐘 菊遲林霜昨夜已家家何事東籬未著花香  
魂可堪風雨恨賞心不分酒杯餘移我自歎秋無色  
欲揮虛疑髻有華愁絕此時彭澤令罷官詩賦動天  
涯

劉炳字元白木之子少孤貧篤志嚮學嘉靖庚戌以  
尚書魁會榜登進士歷官清修類其父而端方嚴密  
遇事尤多執持知金谿更定戶籍清影賴役事以平  
守撫州值隣寇初退拊循瘡痍築崇仁樂安宜黃三  
城修千金堤禦水以俘斬功拜金幣賜備兵福州叅  
藩東粵靖山賊及佐擒大盜曾一本多勞績後擢黔



省觀察使轉江西右轄左遷復轉黔觀察告老初黔  
寄治宣慰司安酋數為梗不易控改建郡縣彈壓實  
出公議後公蒞黔安酋名亨者適有殺從兄一獄中  
丞某兵之而敗公謂夷人所爭家事非吾圉事也第  
令一吏往案以賍贖足矣何煩用鉞為酋果感悟就  
訊事得解仍設兵省城讐夷心議亦自公始公以文  
經武達政體威柔有方多此類也公性至孝以蚤喪  
父痛不逮養事母聚百順承歡喪之毀幾滅性後至  
忌日必衰經坐冢傍泣守至暮歸母嘗為製一衾用  
之歷數紀屬纊時敝不棄也宦踰三十年無尺書通  
朝貴還山亦幾三十年無尺牘通有司闔門獨處雖  
過存者謝弗見不設飲不出遊子孫朝夕上問整衣  
冠臨之啜茗而退或默然不交一言蓋門闔之內真  
肅若朝典焉卒之日遺金裁半鎰及敗篋一二事敝  
巾屨滿籠而已姚江趙忠肅錦撫黔中每嘆劉平原  
清白吏不求人知公故清白云不求知更識公深爾  
壽八十有三撫州祀大功祠黔祀名宦今邑中祀鄉  
賢云子世埏世坊世教見後世甄上林署丞

家傳載  
公守撫

事曰撫諸生劉世亨有累世故居隣貴人貴人治第  
侵其界劉泣而庭訟焉公返其牘曰隣而訟柰朝夕  
何生詰且可無出劉意快快去公且日治事畢則駕  
之貴人陽行視其所治而因至劉所指問貴人是敝



廬者誰耶貴人惶恐以姓名對公曰是生也才公善隣哉顧侍吏趨召劉生前曰此生故字耶其善守之貴人大漸沮劉後仕爲吏部郎

湯彬字子宜父誥博學能詩文彬少孤事後母屠曲盡孝敬童年廩于庠爲制舉義清麗典則時流皆推服之士從游者接踵取科第去彬獨困場屋三十年始以貢入北雍成進士令廬江定照畝僉役法迄今稱便晉職方郎僉河南按察當伊庶人虐焰餘下車約法一切解去煩燒滯獄多所平反荆隨巨寇桂六等流劫蔓延掇甲馳義旅俘馘二百餘河洛以安方上功而中忌者言歸數年卒

陳所學字行父生而神穎兒時卽能文十五補諸生嘉靖丙辰登進士授中書舍人選工科給事中歷吏戶右章凡十餘上竝切當世要務後出爲河間太守意恬然安之笑曰汲長孺太戇安得白首長安耶未幾罷郡歸按浙者欲薦之則又笑謝曰仕者嘗鼎一臠足矣奚所屬厭復希再起乎買一椽名其山與亭爲一笑因自號一笑生以壽終生五丈夫子竝才藻

擅稱云

鄭履淳字叔初端簡公長子居平履方陳義斬然自約束人未嘗見有誑言情容嘉靖壬戌成進士對策



語多譏切時政端簡公歎曰此安能達 聖覽祇賈  
禍耳促之歸隆慶初始謁選授比部郎尋改丞尚璽  
而石尚書星時在省中以直諫被榜廢斥遂發憤上  
書論列書凡數千餘言大指歸用賢而中間摩切殊  
厲上自 聖躬下及官府尤嚴其防于庵寺其詞無  
幾微諱孫 上覽之未報傍有嗾之者 上恚甚榜  
之百繫獄逾年釋爲民 神宗登極復官擢光祿寺  
少卿方擬大用丁母憂不勝喪卒當履淳幼時其師  
語以忠孝大節卽鵠立拱聽若有契者爲齋圖諸葛  
武侯文文山像晨夕禮之披書至十居漁父及古奏  
疏胡澹菴論和事等篇擊唾壺再三朗誦至夜分不  
輟成進士卽擬爲疏極譚天下事侃侃中窺其伉節  
卓行素所自許也居鄉有大利害以身任之嘗草築  
海塘疏建白海寧衛駕漕卒宜撤留等事當倭寇之  
薄邑也值大雨城猝崩亟請之母夫人沈出橐金日  
夜葺城甫完而導者以倭至其下倭不能登殺導者  
而去不且城幾屠矣尤其少時保全鄉里盛德事也

擬疏畧曰在內之臣莫要于輔相在外之臣莫要于  
巡按御史二者皆庶官所視爲賢否者也古之任相  
取之版築取之耕釣試之郡縣試之三輔今則惟用  
翰林夫 祖宗時用相未嘗拘此庶吉士之教未必  
皆作相事三年之間其賢者亦惟詩文數卷而已於  
變理經邦何益固不若州縣之良實政可稽實才可



見也臣愚以為嗣今擇相卽勅吏部不拘在內在外在位在野實舉德行才藝文學政事議論勲業堪相任者爲之若復以翰林有限人員挨次推補相缺則是一吏職耳何以相爲御史職司風紀出口代巡激濁揚清典利除害民瘼政體非熟習諳練豈能無謬臣愚謂此獨宜于推官知縣選克爲當其中書行人等官寧選置科勿列於道或雖在道勿差巡按庶彼事體預習奸猾無容欺也至其薦舉得人則必受進賢之賞冒濫舉劾亦宜加罔上之誅使天下是非公于臺憲二者得人則庶官之賢者益勵不肖者自遠矣又曰聞之書曰既富方穀孔子告冉求亦先富後教蓋民殷富而後能勤業自古然也今則反是民有一廛之產數畝之業里甲侵之官吏擾之豪貴凌奪之衣食僅能自辨則數者交至必及于窮絕而後免焉夫迫於不得已無計可以自存乃深思以爲彼之敢于困我而我莫敢與抗者非官府里胥卽讀書豪貴之家也我亦有子胡弗教乎遂至傾家破產結友從師逼使讀書惟冀一得衣冠卽可無侵擾凌奪之患故十餘年間民困益甚讀書益多生儒衆盛數倍往昔甚或重賄要求以希入學然既異于凡民

乃遂以昔之受于人者加于人又或引類聚羣侮官官府則讀書益多民害益衆幼學生儒志圖若此他日登科登第寧肯爲朝廷撫綏萬姓又肯爲鄉里庇恤小民乎臣不識仲尼之徒流弊一至於此東南之民嘗曰倭夷之殘害有限豪右之噬剝無窮額天莫訴復誰恤也至於市井屠販資富之人不能讀書者則又握金抵選部以援例加納遂得冠帶職級衣馬輕肥朝廷資其輸用僅數十金多者數百金耳彼卽自謂已列縉紳亦得冒免差徭乞哀求託有司歲時餽遺鄉人服事使役不三二年朝廷且倍償其值寧非蠹民財損國體之大者乎又曰爾年南北官軍每遇寇來卽堅閉不出俟其將去則躡迹緩追本類送行乃稱截殺僅能不以聞陷沒城堡而跳梁恬然束手殺掠千萬而不以聞陷沒城堡而報無事始也賄活套以規避既焉假扞禦以冒功至賞格所加若非私家子弟卽係權貴親識此弊不懲智勇何勸至武選一科爲弊更甚夫充總兵參將以可鎮守任同頗牧舊制會推才名勇畧超出人表者應選今會推之故事徒在也姦人厚賄請託倚免權貴要索主司雖素稱才望之臣亦未敢悉不聽允如此



用大將可備緩急爲干城腹心之賴耶古之任將責重且專一切行師事體皆得便宜自遂乃可使之展布而責成功今應用錢穀器械進止節制悉稟受于總督又聽裁于巡撫又畏怯于守巡兵備諸臣又受制于府縣點兵查盤等官一一屈已求媚稍不愜意謗議斯興至于理兵文臣亦如之兩司諉諸巡撫巡撫諉諸總督總督聽諸巡按十羊九牧訖無定策又顧慮各言官及各士大夫私議上下畏縮前後掣肘事體愈繁紛擾愈甚何怪乎兵日疲寇日衆也臣又聞近年掌兵之官侵剋兵糧或名耗折或名使用或名空役或名餘銀多者動至數千萬兩放效成風竟爲常例又安望其恩信下乎作士卒之勇敢哉雖或言官論劾然罪惟止罷官臣愚以爲此等貪穢之臣宜加重辟以示深懲非惟俗軍儲亦可省民困也兵法又曰古者戰其地用其人故韓琦經畧關西惟募土兵增守元昊遂不敢入寇今南北客兵千萬之中選精銳僅十之三四坐食冗費農力既竭餽卒亦疲去來紛擾民多不便甚或更調遣戍道路艱險坐失事機尤非長策豈若土兵熟其地地理險要知其聚散出沒物力資產旣切于已父母妻子又繫其心以之禦寇必將內顧家產如報私讐外利賞格勇于公戰人人必勝之將家家節制之師客兵之調可已矣其尤可慮者凡遇客兵召募民之應集動至數千萬夫良民樂于從軍豈盛事哉從軍旣罷而復求其爲良民不可得矣故聚兵易散兵難兵日以增盜日以衆年來稍受其弊信乎土兵宜急舉行可無此患也

沈藻字元明力學工制舉業督學薛公應旂拔冠諸生使行數武相之曰科甲士也但薄于官位耳後隆慶卯辰果聯捷對策初儼鼎甲之三 穆廟親裁更二甲守泰州以廉潔聞臺檄權嚙若將浼焉堅不應任僅二年多惠政乃以折獄忤要路遷河東運副使卽挂冠歸座師李公春芳張公鹵多方憫留曰不久內擢耳藻弗從歸而貧無以給至教授生徒佐二人



甘臙父仁性卞急稍有不懌必泣跪甚至受杖不辭  
一日郡守龔公勉過候藻久之不出值父怒跪不敢  
起迺爾龔知之深歎其孝焉後兩座師復遺書勸其  
出竟賦詩謝有薄業悉讓弟苓勉慰父心易簣之日  
取故所蛻齒含口中曰此親遺體也當全而歸時母  
尚在向母疊誦母氏劬勞句而瞑以子弘遇貴贈階  
奉直天啟初祀鄉賢弘遇字際可登戊子鄉書歷知  
石門信宜二縣擢知邳州所至以清慎勤自勵聲譽  
甚茂以邳當孔道不耐折腰請致歸尋患目青五載  
遇異人更開巖電識者以天爲循良佑遐塗未艾云

長子弘達見後

弘遇乞歸答友人詩曰自昔浪游澤

金闕欲伴綸竿釣水濱高枕清宵憶寤寐檢書白日靜心神一觴一詠從吾好不問崎嶇世路人

朱學顏字子愚放達有異才髫歲時族有祝慶具大  
冊將乞名家數百手冊偶在案自序詩贊跋一手而  
竟父見駭問奴曰大郎一夕揮灑也讀書目過輒棄  
其書詩文生不起草草復不留舉進士授潛山令性  
不受簿書縛取忤上官量移雷陽郡丞歸寄情杯管  
時作白眼向人卽對尊客亦箕踞科跣不爲禮自恣  
青林中數十年卒論者方之嵇阮之流焉

賀南儒字懷珍隆慶辛未進士令閩縣均銀力差民



稱之值大浸履荒構痾不起歸視數千里宦橐蕭如  
有足悲者子萬春官鴻臚序班甫任以母老乞養歸  
母嘗病瞽婦趙舐之復明孝並足稱已

楊春芳字子含舉人選授巴東令性剛直與王世廉  
同稱巴東縣廨奉梓潼神郡節推某過之神見夢于  
春芳曰某此行受賄四百出死囚某天曹奪其祿矣  
密詢之果然嘗稱說以爲世戒

顧所有字謙叔舉壬午鄉試署休寧學博擢令宜黃  
居官務修寔政嘗發偽印革菜戶罷坊長却寧都派  
均糧運置社倉十三儲穀八千有奇敵大司馬譚公

綸有子爲人所侵所有憐而護之失郡理意左遷歸  
貧橐無幾悉以充法喜檀施與求田問舍者大逕庭

矣從兄可耕同舉庚午令蒙城生平不設城府享壽

八十餘而終

姚士彝平所有詩曰貧負心相爲襟期  
不敢忘有天知潔白片月照宜黃橐倒

村南寺兒悲死後殤亂  
雲愁結處泣望是橫塘

鄭復準字叔平端簡公次子以蔭歷順天治中擢南

刑部郎中予告卒履準治獄平恕有僕盜主財捕急  
而列者坐其主逼死律立出之一惡少姦孀婦而室  
之逐其前子不得自經死所司抵子重辟爲駁曰雖  
同居繼父姦合卽非繼父也與未減至豪弁盧受賄



獄諸公力爲請卒論輸城且不撓其執法又如此爲人孝友清謹尤重然諾好施予內外姻及所識知交多沐其惠卒之日有垂涕者子忠材恕材太學生劉世埏字敬修炆長子登萬曆丁丑進士授行人擢南刑部主事卒官爲人沈靜淵默不妄言笑其學主靜嘗扃室瞑目危坐者數日出而自信有得居官恬潔靖恭尤兢兢以禮法自律初第時有以館選餌者謝弗應後考選擬兵科銜客有告之者曰某且以賄入易而名矣請如所賄定而名何如又謝弗應安心閑曹日夜披牘求民冤隱且考定律例爲疏解刊署中眎永久其營職靡懈如此自威縣及廉憲至公甲榜三世矣處鼎盛退然謙畏奉使歸從里中借小輿出入或徒步過尊長家侍父廉憲受訓竦立終宵不奉命不敢退不發私牘不受人餽遺不恃門閥走要津以求速化雖年位未登卓然見先輩風軌焉子祖鐘今國子生

許聞造字長孺父給諫相卿自海昌家鹽因爲鹽人聞造性亢直飄髯脩幹言論慨慷萬曆丙子舉南闈歷河間東昌郡推選授貴州道監察御史在職敢言糾彈無所避初以東封事論劾石尚書欺罔上書蘭



溪相國責其依違無引救誼後復因轉餉事攻澤州  
張少司農疏再上辭涉南樂魏中丞謫判岢嵐州而  
州隸中丞部以屬吏見意怏怏不自得遂辭歸忽一  
日無病卒聞造熟左國史漢莊騷工古文詞尤長于  
尺牘理郡以風裁著請託不入按甘肅嘗勘罰西寧  
失事諸帥因賓酋遠遁築松山寨扃莊浪北門邊事  
大修而賜環未期食瑰先兆不無云亡之感焉五丈  
夫子並孝秀次君貢士敦倬有子令瑜以今辛酉舉  
鄉薦

鍾北斗字秉文梁之孫重厚寡言笑讀書達旦忘寢

爲文好深沈之思以尚書魁鄉闈聯第授中書舍人  
嘗奉命典黔試得人爲盛選給事工科章疏多所建

白後轉外以原官予告歸卒無子

北斗有諫止礦稅疏畧曰礦出於地

稅出於商乃今之礦不曰均派則曰包砂蓋廬墓無可掘宮室無可撻強迫有司設爲額派是礦不在山谷不在地脉而在百姓之膏脂矣豈可謂之礦乎今之稅不曰抄沒則曰首告蓋商販無可追貨物無可抽而禦人國門公行劫奪是稅不在關津不在舟車而在居民之囊橐也尚可謂之稅乎試觀畿輔之地家儲擔石箕歛盈門物值數銖騰價幾兩道路蕭索白晝攫金傷哉小民不知何以堪此言甚剴切文多不具

載

沈孝徵字原萬進士主政水部董漕船清江行河高  
郵擢憲副汝南論調不赴卒孝徵神采溢發意興豪



往而材尤敏于周應分署時與過客賦詩飲酒常丙  
夜不輟在信陽錄囚竒周某文釋之果登薦巨盜丁  
某爲窟室藏子女金帛亡美殲之境以安剗長橋跨  
淮拯光州之病涉者家居好客坐上恒滿信腕裁篇  
嘗頃刻立就數幅有玄暢閣集若干卷行世當孝徵  
易簣前數日浙撫臣擬爲疏薦起之刻未登而訃報  
已聞人爲之歎惋焉父涑喜爲文其稿燼於火涑第  
三子太學生誼徵亦能詩有香雲庵稿孝徵子延銓  
延錄並庠士

王家相字維樞生穎異十歲能文坦直而豪人有急  
難以身赴之無避忌登萬曆庚戌進士主刑部事有  
關縛人馬足馳而死之亟請于上論如法壬子典  
黔試天心程閱得落卷某某悉拔之旣竣事名下士  
無遺者黔錄亦雅則爲諸省冠還京俄病卒兄子廷  
俊先家相鄉舉官知州

鄭心材字敬中少卿公之子性沈默不妄言動少好  
學屢舉不第以王父端簡公蔭拜督府都事歷應天  
治中左遷鹽司不赴卒嘗齋餉密雲竒羨一無所取  
給散時封識宛然戍卒頌之南都劉天緒之獄本以  
白蓮教聚衆無兵仗左驗訛言謀反訊者欲借爲功



心材止案坐渠首取天緒所募名姓籍悉焚之全活甚多署上元篆定浦口渡值掣驗江鹽却諸商例餽脩家規立宗法置義田贍學及族人嘗自序行不求人知之善讀有益世用之書後人至今奉爲教誡焉子端胤文學端濟國子生

徐天麒字仁卿爲諸生有名晚乃舉于鄉官印州守印民有生瘞其婦者天麒夢來訴寃如其言往瘞所發視屍猶含淚如夢中所見由是遠近稱之

陸鰲來字巨元登癸酉鄉闈判泉州郡晉思恩貳守仕不擇官歸無贖俸家居十年卒子六人並邑茂才

薦紳中胤嗣詭振無如陸別駕者

陸廷誥字慎言鰲來姪教授陌之孫舉壬午令英德擢守和州卒官廷誥率真而和理民事尤不愛勤瘁英之政甚有聲已列名考選矣竟不果時多惜之者子二祚昇祚昊並國子生

曹嘉謨字

仁之後舉萬曆辛卯令羅山政持大

體民愛樂之偶失上官意左遷羅人扳挽樹碑志思子履泰丙午舉人

劉世教字少彝炳第三子爲人伉爽豪豁性絕穎於書無不窺每落筆竒藻繽紛可愛自以門地高才情



軼世不屑屑谿刻自苦飾容止服御斥買書籍古鼎彝又慕義聲急人難遇所愜意知交輒傾橐金不問坐此故業漸削庾子舉北闈數下第家益貧不得已謁選授閩清令清僻小才不足展值開府黃公承玄藩司竇公子備在事相器重因益自發舒以清節自厲謝請托搏擊豪彊無畏嘗涉旬決遣積歲淹獄數十案事悉治辦名大起至借攝侯官尤溪二邑懸篆纍纍方冀有峻擢酬所誣而積勞成疾適遘水災邑居湛漂盡疆起視事拯救不數日卒時年五十有三公于詩好李杜嘗取舊集之編年者分體次之爲序

以行世自爲詩尤秀出泚泚唐音文彷彿六朝儼體其

所善卽文通子山不讓也兼工行草尺牘小文更雋

永人至今多寶藏者集十有二卷子三祖鐸憬忱

賦得

池上竹檀藥修竹俯潺湲翠影寒漪桐媚閒嘉實秋  
陰靈鳥下孫枝雲冷蛻龍斑梁園上客能裁賦楚澤  
纍臣怨在山清響未應偏解谷嬋娟終日行誰攀  
過淮南夜夢叔祥有寄倦依叢桂傍淮南夢繞幽蘭  
逐楚潭欲放黑貂羣未沈擬開青眼浪先合詞人約  
畧多陽九世事侵尋入暮三結願相構巖壑去煙蘿

雲正共

虞勳字舜臣唐永興公裔自姚江徙杭者其後有吏

部淳熙徙海鹽者其後有楫生勳勳才思不群天順

己卯以詩舉于鄉母喪摧毀致羸不起臨終爲詩辭



父弟妻子大怖在前語不及亂

商文毅公有詩曰亂臣詩曰論齒我差長

論學子當先胡爲抱沈疴長往不復還白璧嗟已缺明珠竟沈淵仁者遠如此疇能叩清玄

勳曾

孫鳳鳴二子志高志曾高字子孝弱冠蜚聲舉嘉靖

庚子賢書與弟文學志曾友愛殊常共衾出入宴會

不同赴則不下咽志高早折弟亦飲泣餘年卒志曾

生紹唐庠生能詩子廷陞進士今任徽州府節推紹

唐封如其官勲弟烈女適董湄守節有詩名見後

顧莫字子期軀幹偉傑爲文甚奇麗父學訓善患瞽

疾莫相而事之不離側撫兄孤尤有恩舉嘉靖丁酉

鄉試年僅四十六卒子槃字啓碩晚膺歲貢舉順天

鄉闈第二亦未第而卒槃內行淳備孝友尤其天性

讀父莫遺書未嘗不流涕欷歔母性嚴急稍不當意

必長跽色霽乃敢起弟築蚤天厚恤其嫠以經術儒

行推重于時邑人士多出其門兩世天闕不遂令人

致疑天道焉

朱朝笏字期正負才有遠志以尚書擅聲痛父佩註

誤矢得一第冀酌終天壬子舉應天鄉試癸丑下第

發憤誦習過勞竟以病卒執友王文祿憐其志私謚

爲孝恭先生朝笏爲孝廉時嘗謁一上官問某甲麗

大辟外論若何爲力言其寃得釋後其人知之對其



子士遷輒流涕也

錢與映字淵甫薇之子嘉靖甲子舉北闈三上公車不售人有勸之仕者應曰士學先王之道豈必圭組爲榮退而修家政誦前人遺書教子孫無墜業卽以席帽終不愧矣居恒所奉澹泊獨好義施嘗置田贍族繕橋堰便行旅疾者予醫藥死者予槨歲戊子大疫嘗延茗醫凌氏施鍼灸全活者衆所交多名士前輩如豐南禹近如屠長卿沈嘉則來必經旬留欸賦詩飲酒爲樂性孝友撫其弟端喚嚴而有恩弟亦恭而退讓世並美之子四世奎茂才世壺太學周中書舍人陞今戊午舉人孫男十二人

鍾繼祖字希繩居家孝友性侃直諸生從之授經者甚衆晚舉於鄉計偕卒於途繼祖兄繼儒貢爲縣令繼祖孝廉不得霑一命人咸惋歎之

祖重光字涵章泰州守沈公藻奇之字以女重光少孤貧每燃燈夜讀燠則納足于甕以當扇寒則擁被于床以當爐其勤如此後舉鄉薦未第死性孝處家敬睦死一年妾伍早起忽見之哭竟日亦死焉

張季文字質侯舉壬子鄉闈與從子孝廉奇齡齊名比林下二阮天性簡穆謝世務日閉戶讀書或爲詩



歌以寄與與人交澹而能久館于高足劉子元家二十年如一日也未及中壽卒  
王紀字宗憲爲人循飭簡慎正統中由歲貢授徐州吏目徐當孔道酬應百出能以智計束約吏民雖劇役無不立辦嘗奏蠲州之冗稅又奏罷海鹽民兵致仕歸十五年卒

沃饒字文裕幼孤事母孝堅志苦學八試不舉應貢授華容司訓尚書劉東山謂鄉人曰此真吾庠師也又謂諸生曰汝曹宜謹師之不患經術不明致仕歸獨居一室寡交與以詩文自娛子商舟字民濟資穎而氣豪不瑣瑣同于俗爲詩賦頗典麗將貢而卒

彭暉字日華衛官舍嘉靖初貢爲河南學諭家貧苦學兼攻古文詞誨人必以忠孝在昔武胄罕從文塗起推暉爲之倡焉暉弟暉博學尤精命數脉理每與人醫及推算無謝貲輒效遇有謝則否後竟無子而絕其蹇運如此

孫肯堂字以升少負逸才與鄭澹泉錢石屋爲同志友議論侃侃人有過必面折之司訓鄱陽歸老卒家肯堂先世天台以方遜志坐累戍鹽有名浩者正德間輸粟入太學爲浦城丞剛而有守居鄉正直不撓



王文祿重其人

吳宗佑以歲薦授司訓鳳陽孜孜學問老而靡倦弟宗漢能詩子治允斤斤礪名行云

張希良字原忠爲人謙恭謹飭尤深于經學嘗取四子書用硃墨分章摘句標其大旨講習者傳以爲衣鉢以故從遊士甚衆選貢爲臨武丞視篆不施鞭朴而民化以清勤歿官無後

鍾韶字聞叔歲薦諭公安以子兆斗貴封中書舍人韶端重有雅量喜道學家言輯昭代薛陳胡王四氏語錄訓人又撰論語逸編若干卷嘗述父梁遺訓爲

詩誠子孫剴切可誦

於嗟先君乙丑之歲余侍榻前呼我昆弟自述平生惟守四語

令以貽汝憂勤惕勵居官處家持以沒世泣受服膺罔敢或替德憂不修學憂未詣業廣惟勤務躬勞勤惕若乾乾無然泄泄勵志操存日以夜繼讀書貴勤博覽精藝治生貴儉攻苦食糲旨酒當戒善言宜契閑家肅雖力行孝弟改過親賢互相砥礪一涉荒淫自速罪戾勿輕布素勿慕華麗勿逞機械勿嗜財勢勿爲利昏勿以欲蔽寧默毋躁寧拙毋銳燎原焚岡禍起于細防乎其防小心自衛達爲良臣績垂康濟處爲亢宗裕垂後裔勉旃釋思母曰余贅梁易簣之日呼諸子命之曰吾一生居官不要錢居鄉不說事無長物以貽汝等惟有憂勤惕勵四字貽汝以爲持身立業之本故韶述之如此

采九德字常吉衛官舍貢爲教授當嘉靖倭變時九德嘗取幕府日報爲東夷事略二卷談俶擾時事及諸帥功罪頗晰足備海上一時故實子士英字茂舍



邑諸生博覽經史邑大夫箋奏及諸薦紳慶吊文多出其手與沈原萬鍾念之詩筒賡和無虛日晚結茅海上之藍田墅一日忽作詩曰翻飛世事看濤浪瞬息塵緣聚泡漚遂卒所著海寧衛乘十卷

張侃字直卿貢爲河間學訓擢令永福修城郭興學校均里甲民悅政和不動聲色而治卒官

錢葵字懋登琦之少子貢爲於潛訓導葵長厚好行義嘗却妻家寄財收塋門下士何生買妾贈老友程珂生子潛有諸生何龍坐獄葵知其寃餽橐饋焉斷獄者聞而愧謝立釋之輯所見聞事爲厚語行世

劉世維字敬廉坦衷直腸取予不苟膺貢嘗教授湖州有生以爭繼挾百金相干輒麾去比歸食貧靡悔父燿子祖鎔並饒廩以文行著咸數竒弗售惜也祖彭年字賢卿邑茂才以子重燁貴贈行人司行人性慷慨遇事敢言吐音洪亮聽者無不折服嘗白罷首區坊廂名役醵錢歸學師遠視著節俠風晚忽夢人書醉字授之意甚樂因呼醉翁然竟以丙歲卒叶其兆云

謝子貞字吉甫貌修偉而材識尤該練起家掾史丞嘉定察獄著能聲有馬某者家六人盡被殺令捕其



仇周某者繫抵矣子貞曰安知非仇于馬亦仇于周者爲之庶得沈某考有血衣左驗竟怖服自是吳中疑案上官悉下嘉定丞訊矣晉丞京邑加闡僚致仕子貞好讀書當給事掾曹時輒披覽史漢學爲詩文攻苦如諸生卽名秩有以自致矣子錫教今官長沙郡丞以德州奏最晉贈子貞大夫

馮嘉謨字猷卿臯謨之弟爲人剛腸嫉惡見義必爲由上舍選授銅仁府幕郡在萬山中與苗雜處民與苗市互得窳物賸價而利歸市魁嘉謨設法平之苗感激後黔帥以事襲殺苗苗憤群擁侵境嘉謨馳單騎諭之退子振宗今壬子舉人

湯承寵彬之子爲人孝友而氣岸嶄嶄人憚其嚴毅應胄子選爲廷試第一人僅得州貳守一官落落束功令無所見竒遂乞骸歸抑鬱以歿

朱元杰字彥卿以上舍生官鴻臚典客萬曆中充經筵侍班給食大官屢荷寵賜元杰祖簪事後母至孝父學道尤以度勝里中亡賴少年犯之一不較蓋世有淳德云

陳所見字明父給諫所學弟遊成均謁選授鴻臚寺序班萬曆中嘗隨從上陵拜賜後歸隱以年高有



德飲鄉有司爲建棹楔稱穎濱世德衣冠相傳以爲盛事焉

呂元善字季可以太學高第歷山東藩司理官著政聲嘗脩東省通志更創聖門一志自四氏七十二子漢唐宋諸儒宗系祠祀林墓無不攷據明確最於聖學源脉有裨東省人重之後以襄賑勞劇卒官元善與兄元美孿生少有聯璧之譽元美亦官省幕而元善之歿元美嘗大慟曰有同生不同死者耶不三月亦歿

劉傑字季俊幼穎悟讀書工詩通律呂書數與兄達弟泰常及從子珪璋瑋以文字相師友念族屬散遠爲同春會以合本宗至今遵守其遺焉

劉世坊字敬止姪第二子讀書練達世務自處儉約不事華靡事父母婉言下氣曲盡孝敬與人交謙恭動合禮則以弟子員升南國學上舍嘗謂人曰祖宗生我無能展孝思因時出米穀周貧族將易簣又捐米百餘賑之劉本大族自季俊爲同春會至公復創行斯舉益廣義施云妻項見後卷子祖錫太學生沈弘遠藻之子性孝友藻病目達以舌舐復明手足多所賙卹異母弟弘鍵生三日藻歿達受父托與妻



陸慈護備至育之成立嘗還金折券兩臺郡邑並旌孝義達腰大十圍善奕嗜吟好客真佳公子也

湯承憲字懲予彬之季子博洽多聞自朝家典故及星躔地輿陰陽醫卜衆術無不通曉修軀美髯吐音洪暢能令四坐折服事母高甚孝嘗割股肉療其病親戚故舊急難相投力爲援庇片言解紛不居其德邑均田均役兩舉並上議佐其成爲利遠蓋侷儻雄竒好義之士惜以胃監老用不克究也子雲次雲章並茂才

朱觀字國賓選貢生性好學藏書數千卷皆手校讐無訛論說古今事若目見嘗思沾一命委身殉職不辭蓋慷慨有志士惜未遂而卒

崔嘉祥字道徵衛官舍生而孝友博覽群書試諸生輒先其曹耦從之受業甚衆將貢一月先卒嘉祥六經子史皆手自抄寫垂老不倦談經濟甚晰竟賫志歿不得見于用所傳有雜著一卷載萬曆初年時事評議並有關切可採

王元佐字伯輔温恭慎默臨財廉弟子受業者甚衆皆嚴憚之以明經貢入京病不謁選歸父制字從明性孝母怒長跽乞解執禮尤謙雖遇後輩輒偃僂下



之壽九十七終

鍾曉邑諸生少孤家貧事孀母徐甚孝平生非自食其力勺水不飲于人母歿痛力不能揚其節因病瘴以死

仇雲鳳俊卿子博學通禪理與朱良叔友善良叔弟負債家錢爲鬻已屋代償之雲鳳握良叔手呼天曰爾何不仁之甚也或問故曰不爲大舜周公而子子煦煦徒使後人難爲兄或未達曰周公處此必逐其弟大舜亦與弟同其逋耳其見地如此惜屢舉不第卒

鍾鳳彩邑庠生修潔自好不苟取與家甚貧衣冠必整未嘗見憔悴色族多富家施之不屑受士之有志操者

王肇晉字懋宗父之官飲賓肇晉事父甚嚴畏事繼母婉曲承志處朋友忠信無食言邑中糧役變爲官解及幫貼多其議也爲茂才文甚有名九應試而詘一舉命也夫

周至德字岸登庠生性行醇慤事親孝撫兒子有恩析產與已子等嘗拾遺金還主不取友人爭財骨肉間倒橐彌縫之不責償士相從受書甚衆貧不能具



束脩未嘗無誨每自謂生平不作昧心事所自信已  
赴貢試卒

楊學詩字可言精騎射通音律書畫嘉靖甲寅倭警  
有司聘以禦守多所贊畫三試武科咸舉于鄉至老  
持弓躍馬輕捷如少年時所著有兵法通鑑策論諸  
書今之登武舉者多其門弟子也學詩師事王世廉  
先生世廉八十猶計偕北上學詩七十餘集試大司  
馬亦三歲必一行壯志俱不少衰可憫也

蕭孚澈浦人國初澈城盡戎籍罕有通文學者孚學  
于文人劉儼讀書善教人澈有家師自孚始同時康  
浩與孚相友亦授徒澈人稱爲蕭康兩夫子康非法  
不道非禮不履喪妻不娶紙無帟衾獨居者凡三十  
年焉

王洪字宗範居通園容貌修偉能書攻詩善談吐爲  
塾師董蘿石携之游陽明先生門先生竒之後令胤  
子正億從洪授書王世廉嘗對洪嘆蘿石高隱洪曰  
隱與仕對可仕不仕爲隱蘿石原無仕謂布衣可也  
又問仕不如隱之逸人精力有不能堪仕者洪曰否  
嘗見陽明先生講學時多病朝命強之出或不病此  
自朝廷福非一身事也言中窾多類此



聞華卿以經義教授諸生父塋豐山構廬于傍奉母及弟居之母沒讓其居于弟

張天德字自明嘗爲童子師竭修脯養母訓督幼弟嚴而有恩古篤行君子也屢推鄉飲不赴云

馬應龍字飛卿衛左所官舍性剛方不苟言笑終日坐立有定處衣褶剝盡而無纖污非其義雖一介弗予取也壯而喪耦卽不娶爲童子師者五十餘年人咸欽其楷範

胡懋叔字文祉性方嚴臨財無苟取能詩兼通方脉地理陰陽卜筮之書教授里中以壽卒

王裏字本誠能詩善醫卜與張方洲游見其屋破敝醜金新之峻拒不受鄉民以逋稅懼罪責和裏祈方洲爲解弗許已而陰言于方洲方洲憐而解之衆攜錙幣謝裏裏辭不獲則受而建橋焉今西門外順寧橋是也子阡字汝直家貧嗜酒好吟詩有巧思嘗爲救火法及築捍海塘式又製一輿加牛背乘之曰犢舟人慕其達多從之遊者

陸源初家貧傭書給養後力耕致萬金富而好行其德多義施外孫王文祿嘗作古民傳志其遺事云

夏安字世康有義行孫瑋割股愈母以孝聞



曹禎仁之五世孫孝弟力田務爲長者嘉靖甲寅五月戊申倭奴自石墩轉掠大康橋至禎所居與弟袂集衆鳴金擊之賊褫鬼去村里藉以保全邑大夫鄭公茂書扁以旌事具公靖海紀畧中禎孫文學名卿以齒德飲於鄉名卿子憲來貢士

徐藻字子潔本諸生以父緡避倭病沒具奏集鄉兵滅賊雪父恨得旨名曰忠孝軍乍浦沈庄之戰藻在行間功成不受賞歸

張亨家半路亭嘉靖甲寅夏官兵與倭戰於孟家堰死者數千人亨歛殘齒盡瘞之又收甲仗數百餘上之官太守劉公義而旌焉

仇原叟俊卿子慷慨負大志隆慶間海溢石塘圯原叟抱其父疏請于朝興修築功初啓行鬻產爲資終歸途患病先卒邑人惜之

陳允武邑賦長初里甲田畝不均貧民受病允武力控於上得行均甲法事詳前簡役法中同事者李綯沈愛涇陳與李並有後爲諸生而沈竟絕

張中孚幼學舉子業于董穀長學詩于朱朴與人交篤摯而有情友人鍾思孟死醵金爲殮董穀衰落時徒步四十里問候不已晚年窘惋而歿



向昌以詩畫自娛不事生產卒而殮似黔婁

何諒以廢著爲蕪賈誤受人僞銀彙一裹至歲除夕  
罷市出之撒水中陰行善壽八十餘卒

徐黻字廷章指揮恭之子美容儀善談論爲人謀必  
忠慎王指揮勇與縣爭拜賀班具疏奏 闕下代之

行者黻也

王佐指揮軒之仲子孝廉文祿之父性侗儻喜聲樂  
精騎射初爲諸生後謝去居城曲衡門竹徑流水循  
除日招賓客置酒奏伎爲樂人以爲神仙中人弟儻  
善琴好游覽嘗值雨雪衣草蓑挈壺造酒家沽酒獨  
酌發浩歌聲振林越酒酣席蓑卧傲如也

崔綬字廷珮指揮端弟讀書能詩及小令嘗改杜曲  
爲南曲甚工白髮紅顏衣冠整然見者起敬

劉鉢指揮寧之子意興豪放高談壓坐飲雖多不亂  
善弈罕對局者兄子冲弈尤勝號國手矣族孫詔亦  
善弈彭昭毅守澈有倭警詔夜赴之昭毅甚重其義  
白頭交好如一日後以壽終

嚴泰字克安指揮明之子好古善琴操指法取音兼  
劉徐二家之長後得古鐵笛乃前元楊鐵崖牧藏物  
泰疊石爲山構一齋日居其中鳴琴旣歇命鐵笛吹



之聲應空碧因自號爲鐵龍風流可尚惜其賦命不  
永

張毅鎮撫雄之子性孝友嗜吟咏張方洲與遊甚器  
重之善奕與琴得徐劉指法遂號琴樂家藏古器甚  
多一夕爲火所燼恬無愠色

夏正字時寅善鑒別古書畫性孝友親歿廬墓事其  
兄鎮撫宗如父鄉里稱之子霽字德潤好詩工篆隸  
尤工於寫梅

倪翁名仲仁澈浦所人也生正德丁丑至天啓辛酉  
壽百有五歲卒翁頽不甚揚而精神特堅碩以耕爲  
業于世事一無營暇則共群兒角逐爲戲或唱村謳  
自適其斯爲無懷葛天之民而壽過其筭者歟



海鹽縣圖經卷之十四

人物篇第六之五

儒林

董澐字復宗別號蘿石少慷慨慕義嘗割私產讓兄  
還友人所質田且經紀其喪初攻詩從沈周孫一元  
鄭善夫諸公遊放浪山水間日事嘯咏家徒壁立不  
問時年已近七十矣聞陽明先生講良知學幡然棄  
其詩就弟子列焉故所與游者咻之不聽曰吾自從  
吾所好爾因更號從吾道人末復參證內典意見更  
超歎曰乃今客始得歸矣與釋法聚結社海門山寺





爲義集以壽終法聚亦遊陽明門嘗問良知之說者  
也許相卿曰始余見從吾子專于詩遺其家甚難之  
後志于道遺其詩甚愧之終入于佛嗒然自遺也愈  
益恠之莫能窺已益從吾子學三變卒歸于空將所  
謂吾者且見爲妄云

王陽明從吾道人記曰海邑董

羅石者年六十有八矣以能詩  
聞江湖間與其鄉之業詩者十數輩爲詩社旦夕操  
紙吟鳴相與求向字之工至廢寢食遺生業時俗共  
非笑之不願以爲是天下之至樂矣嘉靖甲申春羅  
石來遊會稽聞陽明子方與其徒講學山中以杖肩  
其瓢笠詩卷來訪入門長揖上坐陽明子異其氣貌  
且年老矣禮敬之又詢知其爲董羅石也與之語連  
日夜羅石辭彌謙禮彌下不覺其席之彌側也曰吾  
見世之儒者支離瑣屑修飭邊幅爲偶人之狀嘗不  
屑其所爲以爲世豈真有所謂聖賢之學直假道于  
是以求濟其私耳故遂篤志于詩而放浪于山水今

吾聞夫子忽若大寐之得醒吾非至于夫子之門則  
虛此生矣吾將北面夫子而終身焉陽明子曰有是  
哉吾未或見此翁也今之後生晚進苟知執筆爲文  
辭稍記習訓詰則已侈然自大不復知有從師學問  
之事見有或從師學問者則闕然共非笑指斥若惟  
物翁以能詩訓後進從之遊者遍于江湖蓋居然先  
輩矣一旦聞予言而棄去其數十年之成業如敝屣  
求北面而屈禮焉豈獨今之時未見若人將古之記  
載所傳亦未多數也夫君子之學求以變其氣質氣  
質之難變者以客氣爲患不能屈下于人遂至自是  
自欺飾非長敖卒歸于兇頑鄙俗故凡世之爲子而  
不能孝爲弟而不能敬爲臣而不能忠者其始皆起  
于不能屈下而客氣之爲患耳苟惟理是從而不難  
于屈下則客氣清而天理行非天下之大勇不足與  
于此則如蘿石固吾之帥也而吾豈足以師蘿石乎  
與之探禹穴登廬峰陟秦望尋蘭亭之遺跡徜徉于  
雲門若耶鑑湖剡曲蘿石日有所聞益克然有得欣  
然樂而歸也其鄉黨之子弟親友與其平日之爲社  
者或笑而非之或爲詩而招之返且曰翁老矣何乃  
自若若是耶蘿石笑曰吾方幸逃于苦海揚鬢振羽



雲霄之上安能復投網罟而入樊籠乎去矣吾將從  
吾之所好遂自號曰從吾道人陽明子聞之嘆曰卓  
哉蘿石血氣既衰孰能挺持奮發若少年英銳者之  
爲乎斯可謂之能從吾所好矣世之人從其名之好  
也而競以相高從其利之好也而貪以相取從其心  
意耳目之好也而詐以相欺亦皆自以爲從吾所好  
矣豈知吾之所謂真吾者乎夫父慈子孝忠信篤敬  
真吾之好也天下之所同好也將富貴貧賤患難夷  
狄無入而不自得斯之謂能從吾之所好也矣夫子  
嘗曰吾十有五而志于學是從吾之始也七十而從  
心所欲不踰距則從吾而化矣蘿石踰耳順而始知  
從吾之學毋自以爲既晚也克蘿石之勇其進于化  
也何

陳言字獻可生穎異讀書數行俱下玄覽博綜尤湛  
深經術有得輒蠅頭細書於傍久之或磨敝不可認  
人服其精勤作五經疑若干卷出入傳註酌以己裁

多儒先所未發其序易疑略曰易非聖人卜筮之書  
卜筮以聖人之書爾後世摺而得卦卽以爲卜筮之  
卦初固未以卦爲卜筮設也孔子於易言焉而廣大  
動焉而吉凶制噐焉而網罟舟楫之用卜筮焉而神  
物大衍之策悉舉矣朱氏之易主卜筮嫌於泥作易  
疑序書疑曰吾讀今文何詰曲也讀古文何萎蕪也  
衡觀於二帝三王之異代其文又何較若二體也吾  
茲惑焉姑取蔡傳之不合者竄正之暢未盡之肯序  
詩疑曰先王之詩首商頌繼之者周周宗文王則次  
二南文王末王二南未雅也武王成之次武王之頌



成王治定功成制禮作樂而備矣次之正雅成王有  
疑于周公未純也次幽之變風承成王者康王昭王  
次二王之頌二王之後有宣王之興幽厲之衰次幽  
宣厲王之變幽王弒平王東而不復雅故次王風平  
王而下無詩矣于是有諸侯之詩魯宗國也而無風  
故次魯頌康叔武王之子次邶鄘衛唐叔成王之弟  
次唐鄭厲王之後也故又次鄭異姓而大功者太公  
畢公也故次齊次魏秦諸侯而狄者也故次秦國小  
而極亂亂極必治君子有未濟之思故次之以陳檜  
曹終焉弗稽其世治忽淆弗覈其意辭旨瀉吾說詩  
必論其世而其旨壹本之小序禮疑多宗陳氏稍參  
以鄭孔諸家春秋疑則畧義例主經文有取紫陽直  
書其事自見美惡之說亦並有序蓋言草易疑前後  
二十餘年春秋疑亦十有二年始成今二書並行世  
餘未顯言又精于史學以爲諸史繁則易散約則易  
存編年如司馬通鑑紀傳如鄭氏通志皆病於繁惟  
近代所修通鑑纂要九十二卷簡要有體可爲編年  
總而紀傳一家未見有作宜合併往牒彙爲一編法  
則宗乎子長體則各仍異代凡南北二史分合互異  
新舊二書詳略殊科三國乖舛晉書恠誕宋元猥冗



不綱遼金僭統變正例宜詳於彼代今或可裁事應  
闡乎大義細或可省與夫藻翰掩真傳載濫濫論贊  
之贖圖表之繁一切摭其典要萃爲菁華化其闢單  
益以挺勁務使豐約中程源流周瞻聯屬成編如出  
一手與編年並行萬世而下率爲通例斯則通人之  
大章不世之曠典又論本朝史局叙第循格無以招  
博雅之盛爲函毫之需必有世官而後有世史宜特  
設一科授以世業毋濫竽庸鈍致追修逾遠叢遺忘  
之恨小說鄙俚不經家傳質眩名實沿至他日爲汗  
青之污不淺刪述之難正在于此語皆有裨史事言  
初膺貢入太學嘉靖丁酉登薦辛丑計偕卒于京年  
僅四十有一天性孝友父與叔同爨五十年不分析  
感父意撫其弟有恩爲人和易至臨事卽持論侃侃  
不少奪里中有癡婦節守甚烈以貧故有司莫爲聞  
特倡義白之覃精時務作策數十篇皆切中惜阨於  
年位未疇一二鄭公曉嘗語豐城雷公禮方之賈董  
卒之日友人王文祿私謚爲文邃先生後贈中書舍  
人以子所學貴也

朱元弼字良叔祚之玄孫父用中爲人方嚴元弼尤  
安貧力學言動模則古人在庠屢以文行受學使者



褒賞遠近爭延為弟子師後以年踰六十不應貢格  
遂告隱有司移檄固留或敢請為某山長或欲以應  
漢一級各矢口辭生平孝友事繼母竭其力傍城一  
居種樹成拱將貽息紘為永業聽弟賣償逋債而自  
寄居人廡下時然後出言臨財不苟難進易退至今  
人傳其行通衢稠人中張拱端好無失步居閤室無  
弛容晚年閉關寂照預刻死期神不少亂所著有士  
林密約敬道會編禮記通註等書學者稱為武原先  
生

文苑

陳寶生字彥廉有才名好作恠體詩兼善繪事交往  
多一時名流與雲間黃公望子久尤契密彥廉居破  
石東山終身不至海上以父溺海故也子久來鹽嘗  
拉之到海上觀濤偕至東城涕泣不與同看子久為  
動容亦不看而罷因作仇海賦紀其事

姚士舜曰余嘗見子久畫

二十許幅多題曰大癡道人為彥廉先生畫蓋子久與彥廉友善每作一來必為漬筆點染山水積紙至此之多體勢大校飛筆走墨山骨峻峻無事皴法翠微楮腳澹遠濃樹而幅必以淺藍染空若高穹下冒也此冊神品為世所重往在沈純甫司馬處今歸董太史玄宰矣

丁麟字彥禎豫之子以詩文名貢入太學洪武庚申  
命往荆楚訪求賢良事竣告省歿于家弟麟字彥祥



舉乙丑進士工科給事中改監察御史彈劾百僚風聲赫然俄以事見法臨終作歌徧別家人讀者哀之

麒麟詩稿失傳永樂舊志載其題邑中文筆峯詩影落晴波如醜水勢凌蒼漢若書空琴臺村詩別鶴不聞空外語野鳥時向屋頭鳴及烟寺行吟詩得句便題林下竹牕中常掛塔前松天星湖詩堤畔馬嘶芳草碧沙頭人上畫船輕嘗此可識隸味又王世庶邑文獻志載丁豫求賢醴城道中詩云鳥飛綠樹陰中去人在白雲堆裏行考戈定遠所撰豫墓誌未嘗有此行疑即麒麟詩矣麟別親詩云有親有親怡恃全餅壘依倚期終年我生不辰天怒憚漂鷗化碧雙親前雙親有孫初學笑孫母無夫鏡空照北堂椿瘁萱亦衰憂不忘兮花不開嗚呼一歌兮歌正哀飛翬暗逐東流回餘亦失傳

唐貞字士幹潁浦人嘗從楊鐵崖學詩潁人韓履祥贈士幹詩有

竈遊踰嶺海聲價動京師之句蓋士幹以貢仕為東從貴竹家啟者耶

陸贊字順德宣德間以詩文名兼善篆隸為人嚴毅

莊重以禮法自持鄉人誅之曰貞一先生時有楊復

生張綱皆有詩名復生字繼先居尚胥里震亨按貞一先生詩

不少概見惟朱翰構李英華載其送弟詩有句云春深歸鴈愁無侶日暮啼鵲惱殺人亦爾時風調然矣

莫藏字用行工詩文及真草篆隸八分諸體鐫刻古

印章繪花木禽蟲水仙皆可愛親病嘗割股療之字

弟薦友愛好與賢士大夫交年五十八遭疾占一詩

有三徑菊松秋寂寂一庭風月夜沉沉之句吟已卽

逝所著有佩觿稿詠史詩素軒稿五音字書辨訛莫用



行稿今失傳惟英華載秋日書懷寄崔摠戎詩河橋  
一別柳初垂又見黃花滿故籬落日江樓玉粲賦秋  
風茅屋杜陵詩關山有望天皆樹歲月無情髮欲絲  
見說東南烽火靜轅門正是晏眠時又有送鄭東谷  
之廣東詩津頭貰酒桐花落  
馬首看山荔子垂句尤警

陳善字敬佐博觀群籍好爲古文詩賦每微醺後下  
筆頃刻而就性耿介寡合家貧甚未嘗下氣求人天  
順壬午貢禮部歸卽杜門無出仕意縣令李公雲爲  
勸駕赴選得崇陽訓未幾致仕歸有求其文者非其  
人雖重幣不受人以是益高之

善詩不多見有覺林  
寺夕照詩載前又有

九日詩云蒼花霜滿地楓  
樹錦成林爲藝林所賞

徐晟字公允博涉書史與朱祚並稱浙大叅王公衡  
按部嘗延晟質漢雋數事畢其義王稱爲徐漢書所  
著有左氏摘事燕石存稿門人王文祿嘗述其語曰  
聖人之教達於中國釋氏之教徧於四夷子欲居九  
夷殆欲化夷也以爲知言

王文祿字世廉少舉鄉薦博學淹通古今屢上春官  
不第刻厲愈銳以文章節義自命居身廉峻未嘗以  
私干人遇不平事輒叱罵不避貴要戶田三百請編  
役如民佐邑令成均田法垂鹽永利好佩劔每憤發  
必挺劍喑鳴值有司設宴勸駕酒酣忽拔劔起舞擬  
主席者呼曰此劔能斬貪污其慙直如此年八十餘



猶應試長安不屑就乙科秩灰初志性嗜書聞人有  
異編倒囊構募得必手校縹緗萬軸一樓置之俄失  
火大慟曰但力救書者賞他不必也所著有藝章丘  
陵學山邑文獻志衛志而學山首帙申培子貢兩書  
則其所借撰云族弟文禎善行草挾詩卷游齊魯間  
老爲衡府記室以謹密爲王所重青州志有儒者之

目焉

天啟三年春知縣樊公維城修其墓爲文以祭  
曰讀宋史至陳同父傳憂隻千古真可謂豪傑

不諧于世俗雖至使執政忌之正學非之而不足以  
少固其一時故屢跌而名益彰宋孝宗拔之鼎甲以  
需大用而天斬其年僅五袞而中天論者以爲天不  
祚宋非同父故也先生好學老而彌篤不問生產似  
同父好學劍感慨時事髮指背裂似同父好刺人過  
不畏尊無不避燕席似同父實心任宇宙內事寧迂  
無巧寧激無隨世率賴之似同父才具奇大有可  
能收聲徹禁中宦妾亦知其名似同父所異者先生  
所處之世平世所事之主 聖主所遭之執政賢執  
政故得以容其危言危行而莫之非忌蓋同父終身  
皆其半百而歿適與宋之衰運會而造物但以天子  
之一知酬之先生終身樂年登耄耄優游以歌太平  
之風而無慕于膺仕其視青袍直寄焉耳至今令我  
想見其人憾不得見而識者或謂先生之精神唯在  
其書乃訪求遺書又希有能遍讀之者良由名達  
天朝亂絕 聖世幾于雷電六丁搜挾以去悵然有  
惘于心者久之因先生族孫得一知其墓瀝酒拜奠  
冀九原可作將與先生談王陳之似異一暢其冥漠  
之懷

也

朱朴字元素號西村爲人修挺而矐音琅琅清絕塵  
表少而好詩以至終老八十六年未嘗一日廢聲律  
兼善小幅山水意似出于元人而子久仲圭時或各



檀性閒淡寡嗜欲惟與布衣陳鑑僧雪江石門還往  
最密酒酣興發每弄笛月下作叫霜裂石聲聞者知  
爲諸詩客出遊也一時林下高賢如許台仲鍾彥材  
徐子正兄弟並邀至社中倡和結泉石盟郡太守徐  
白泉公聞其名欲禮致之竟鑿坏遯台仲有父喪舉  
塋題主鄉俗必丐貴宦爲榮比當泥首速客則西村  
老人也台仲曰眼前纓組不乏若年高有德終讓此  
布衣耳其爲時流慕重率若此詩集二卷新警孤清

類其人亦台仲爲立序

暮春言懷詩逢迎無柰嬾枕  
簞有餘安急雨送花事涼風

次竹竿白雲閒掃地黃鳥獨憑闌不解干榮祿何曾

變與夫杖東臯望遠山物華消息與情關

林花風過蠶蛾老麥秀城深雉子斑誰氏墓田荆棘

底斬新亭館畫圖間道旁惟有寒松樹吹盡春風只

舊顏

上巳郊行三月三日出郭行風和日暄天氣

晴御泥補巢舊家燕隔水喚春何處鶯爐頭小姬酒

正熟道傍古墳人自耕勸君行樂貴及早明日清明

花滿城閒坐偶來看青山因對白雲坐此意同一

閒青山白雲我秋山碧樹經霜葉半殷若雲不

雨自飛還瑤琴曲盡無人聽獨上高臺看晚山

陳鑑字用明少年好俠馳駿馬蹴踘擊劒已復棄去

閉門讀書學爲詩人罕見其面者數年與朱朴齊名

林下諸公邀爲詩社長以壽終有勾溪集若干卷弟

金上舍仕爲博野令亦工詩

鑑除夕詩秦皇山北梅  
蔬新展武城西江水春

白髮椒花一杯酒清朝泉石百年身杖藜健在何妨

老茅屋間多不厭貧此夕盤筵共兒女江湖應有未  
歸人書所見倚杖雲江落照中看人舟楫去匆匆  
豈知宰相馬頭日不及牧童牛背風劒米割腸睡強



飽水紋遺世惜虛功波濤滿眼輕生者番笑田更錯  
用工 郊行絕句聽鳥石邊開坐處傍花林外獨行  
時村南水北從來往不踏人間熱路岐 又石潭小  
魚自出沒草閣老樹相因依白雲共我閒何往紅日  
如人急自行並其警聯 金寒食書懷江上客居三  
十年每逢寒食一悽然青山笑人不歸去白髮滿頭  
徒自憐茅簷幾處插楊柳梨花半開聞杜鵑身世畸  
軀杜陵老蓼蘋風水洞庭船 又咏竹奴詩清節有  
情憐病骨虛心無意 鬪纖腰一時傳誦之

胡顏字希仁震亨曾大父也布衣教授里中獨好吟  
詠晚而興益豪年五十大父登薦人爲胡翁喜翁顧  
爲詩自如更十餘年大父成進士無何棄養人爲胡  
翁戚翁益爲詩自如當八十有五之秋病且篤矣勅  
震亨父曰汝何不掖我上新築樓令我預題登高詩

也請待疾愈不可必強起爲會成一詩後罷好設酒  
及餽飪招客飲噉醉卽分韻賡唱以爲常同時布衣  
能詩者朱西村朴陳勾溪鑑王犢舟阡陳墨山詢並  
社友林下鍾徐兩太守招入詩社亦時往有赴犢舟  
家會飲詩云山煙卓午晴不飛草堂邀賓開翠微白  
袍入門主人笑青絲繫壺童子歸流鶯侑觴作好語  
蘿陰上壁搖斜暉紅光溢面我欲去醉矣無勞重挽  
衣生平迥然自得委心去留於世故壹無疑慮也詩

存者七十篇爲一卷行世

辭友人勸巨觥歌高樓買酒搖青幙無錢空自思桑

落相知有酒勸我醉我豈不知醉鄉樂我今髮白量非前非敢推辭立圭角憶昔沈酣馬上駝至今追悔



顏猶作以茲小飲鸚鵡杯不敢大舉鸚鵡杓欲為不  
飲效獨醒秋月春風太寂寞 脫髮行頭髮脫頭髮  
脫曉來把鏡愁難撥一日一梳一百莖千日萬丈刺  
如撮階前柳樹日蕭索朝朝敗葉隨風落葉落還知  
春更生髮脫從來無長藥不羞見客小千螺只愁鬢  
中難結約難結約何愧作古今衰老盡如此天非於  
我分厚薄頭髮脫頭髮脫不搔不櫛反快活寄語同  
年社裏人不知頭髮脫未脫 西湖詩不須湖舫載  
歌聲只任藍輿雅趣情百里好山行恐盡十年塵眼  
洗何清雲教笙瑟爭留酒晴喚管鈿亂出城安得移  
家此中住枕流隄畔避浮名 和鍾西臯初寒詩鴈  
風吹字點秋音自葦蘿房整布衾瘠畝荒來憂稅到  
紙牕穿處怕寒侵衰年虛倚同花甲生意真慚賦樹  
心誰似鳳幃聯碧玉清宵香擁錦深深 王夫人像  
前瓶梅玉容無語傍雲屏月冷虛堂夜不尙瓶水浸  
香情默然壁燈窺影瘦亭亭無根結子根終死有藥  
醫蒐藥始靈看眼看如孤 韻在妻風生怕便飄零

陳詢字士問善之孫能詩兼工篆刻及山水畫飲酣

潑墨巧奪生態為人寄興蕭遠不以貧窶介意蓋胸

中自有丘壑者

詢詩集衛志云失于火嘗見其登天寧寺海月樓一詩宛然唐調附錄于此

此孤城曉日欄杆近萬里春光烟霧開晴樹直從天外見亂山青自海門來翩翩鶴鶴平原下杳杳帆檣極浦迥自惜平生幾圖畫不知曾有此樓臺

徐定夫字士安其詩以風骨勝有次韻沂陽子見懷

之作爲勝流所賞惜他稿多佚

詩曰子夜星臺還獨上天風瑟瑟振衣裾

荒鷄一聲何處起北斗三更東轉餘壯志翩然豈牢落古人逝矣吾何如按劍高歌不成舞滄江寂寞感龍魚 又送錢永州之任詩有梳柳葉外蠻烟淨荔子花深毒霧開之句

祖晟字廷昭膺貢司訓宿州耽嗜吟咏得句往往秀

拔歸林後閉門不出者二十餘年嘗卧病尚書鄭公



就看晟坐黃草蚊幃中見之意恬如也不以為愧重  
然諾散行焉倫有幼弟琬父留金若干托晟分之餘  
十年出授弟封識猶宛然所著詩一卷孫重燁今官  
行人姚士舜曰晟撫髭自娛不屑與藝家鬪艷而詩  
自秀警多句今所傳東歸稿五言如閉山人望  
處江漢雁歸時烟火秋天郭鷄豚曉日墟晚花含蝶  
影秋草出螢光七言如碧山史隱尋松子丹井仙方  
凌木奴人慕荊州求識面誰逢東野不低頭丹陛一  
封驚石顯長沙千里弔湘纍共賞烟霞還對酒只談  
文字不論官皆意高人外巧合思  
前誰謂中原七子始開吟咏也

錢齋字懋毅幼承家學嗜古讀書賦詩與文士屠長  
卿沈嘉則諸人遊待貧交敬愛出肺腑宜與俞安期  
嘗歲暮乞酒米傾所收予之金華吳孺子吳下王伯

稠同邑姚士舜恒經歲主其家飲酒分韻賦咏情  
依依贈遺慰問不絕自齋死詞客過邑者每嘆失賢  
地主焉齋臨江公第五子兄芹萱登進士弟蓼舉明  
經前後皆先齋去世獨齋賢而壽如為芹立後置祠  
堂扶藜喪官下歸葬刊定臨江遺稿傳世置義田瞻  
族並齋任之齋雖以逢掖老真所謂第五之名不減  
驃騎者也有詩集名擊轅草清旨多名篇子應曾太  
學生亦能詩應晉孝廉歷長寧令蓬州守蓬民駭奢  
賊且散去守斷效死民還登陴蓬得完猶臨江公之  
全盱眙矣應會應旨邑茂才

齋鄰翁行鄰翁太愁楚  
淚落不可數窮簷日不



照敗籬風愈怒問之俛致詞催科新政苦昨日追見  
徵今朝索舊負大兒捉拿去見官囊頭餓立西風寒  
小兒納錢稍不足束指敲臂向人哭人皆樂有生我  
生翻自憎不如賣田拆屋拋鋤耕飲水卧看南山青  
題王弇州園壘石粘雲花正繁吳中只數舟州園  
人居林下隻千古家比桃源成一村東朝舊推譜牒  
貴南面今擁詩書尊先生自得泉壑趣俗殺徵車常  
到門新嫁娘蕭娘新嫁倍含羞早起糕成促下樓  
行到中堂紅發面小姑推着向前頭羞婦家野草  
孤墳溪上頭溪邊還似漢時流幾人棄却渾閒事此  
婦猶嫌解得羞應曾問友人病詩行踪兩月不相  
聞鴻鴈于飛各有群採藥欲停何處屐扶藜還看幾  
山雲奇書散漫痴憐我瘦骨稜嶒病憶君安得相逢  
明月夜半窻竹影坐平分有感絕句乾坤許大不  
藏身那得清溪下釣綸卽有古  
書終懶讀願爲千古一痴人

湯紹祖字公孟彬之孫承寵之子七歲通古文詞長  
而耽讀聞有異書必百計購求以故歲帙獨富好駢

麗之文嘗取梁末迄李唐文之可繼蕭選者爲續文  
選昭代徐昌穀黃勉之諸公文亦附焉謂五代宋元  
調與選隔惟唐及我明氣足上下六朝也凡三十二  
卷行世紹祖郊居讀書謝絕人事猶恐客相溷每日  
以舫載書杙着水中央讀之薄暮歸以爲常其勤如  
此有清遠堂文稿藏家子茂先字爾培邑諸生博學  
慕古能文章擬爲續選注未就卒

紹祖續文選序曰  
文選之成于梁昭

明也代自晉宋齊梁而上人繇屈宋賈馬以還包舉  
魏文兼綜史傳採玉崑丘連城畢獲拾珠淵海照乘  
齊珍信文囿之特秀選部之最都也亂是以降齊周  
病于樵樸陳隋傷于浮艷雖遜前古尚存逸軌若李  
唐嗣興斯體大變什一什百僅爾庶幾我明弘正以  
後此道漸闢昌穀勉之子循諸君子後先摘藻郁爾



具體余束髮臨文雅有茲志取例往編甄擷今選遠  
自昭明以後近自不佞以前格稍肖似即為收採洎  
夫五代局于促運宋元淪于卑習併文太纖靡詩涉  
近體以非本旨並從刪黜說者有謂唐後無才曷足  
充選夫荆山之玉豈盡禹會之執豐獄之劍奚皆吳  
鼎之鑄若云在昔可珍于今非寶徒知是古未為篤  
論又有謂此選宜務隨時不應泥格夫意取紹明其  
業自當擬議其體諦觀前選辭約二京篇多六季則  
體固攸尚時未或徇俛從隅見吾亦何敢集成摠計  
三十二卷各曰續文選傳之通都公諸同好踵麟筆  
之素功竊比左史系龍門  
之絕派彷彿蘭臺云爾

朱學斌字幼思偉軀便腹目光奕奕射人資穎敏強  
記提筆數千言立就性不善治生又好收藏古書盡  
彝鼎坐是斥賣負郭殆盡每談鋒捷發四筵咸寂寂  
以是多觸人忌晚歲得蹇疾徙居委巷猶匡坐攤書

無愠色以文學終

劉世教嗜學斌詩曰霜華纈燕鴈  
征秋傷斷城西百尺樓獻賦蚤時

同泣玉繞床終夜對探鈞才名謝去惟尊足客難  
傳來是責頭零落遺編君莫恨猶勝倒屣問從遊

呂兆禧字錫侯生有異才美姿容十二能文章意樂  
千古買書萬餘卷與友人姚叔祥緒誦兀兀丙夜不  
休年十八以溺苦文翰死所著筆記一卷搜彙東方

曼倩潘黃門梁簡文帝任彥升諸集行世

自撰簡文  
帝集曰夫

要說五家空聞定于漢殿典論七篇不復傳于魏石  
雖六御易乘千秋難擅豈臆音有讓庸作浮理自遜  
演爻而文思莫企經緯固殊哉梁簡文帝以雋贍之  
才丁鹵否之運讀書萬卷不救鷄鳴之歎有集盈軸  
幸藉麟趾之藏顛時代禪更兵燹銷盡既淪全壁猶  
見碎金禧以估伴之暇與友人姚叔祥博搜載籍共  
相抄緝都為若干卷以謂翠華不見願遺翰之尚存  
芳藻言凋庶先標之可赴耳胡震亨叙呂氏潘黃



門集曰有晉黃門郎潘岳集舊傳十卷近稍亡逸完  
裘罕覩友人呂錫侯結契遐年深相賞誦九散在四  
部者悉加聯綴絳茲眾班用窺全豹雖復卷殺其四  
而體製畧備亦既斐然時錫侯年甫二九頗擅擲果  
之譽余調之曰君是潘之後身故應有此撰述若白  
首有歸幸勿見同耳未幾疢發死余赴唁之日撫棺  
嘆曰呂生呂生何悟善護乃竟驗邪夫其孕性激朗  
挺藻清令臨哀能誅具體而微斯固可得畧言也至  
于風儀神檢今也則亡亭亭濯濯其狀雖譬兼以家  
本素封裘馬都麗東臯沃壤差擬閭居之樂申以婚  
姻不殊戴侯之族故得袷服匹遊則巷無居人履舄  
合坐則滿堂含睇足使孟陽迴車太冲鑷髮潘令不  
灰允在吾友而安仁既身陷極刑錫侯亦奄從短運  
埋玉樹于玄壤委芳葩于冀土存爲人所艷異歿爲  
世所惋愕古今一揆不其惜乎既而血胤中絕生妻  
大歸總帷罷設若教之鬼長餒泉宮未啓射聲之魄  
永滯余每步出西郊言經故園昔日歌梁舞榭書帳  
譚筵並畫窺蒼鼠宵燭青燐春英被徑而游侵謝跡  
秋月吐照而飛蓋絕景苟人必有心未嘗不煩寃而  
意氣皆矣君死之五年客有錄是集武林者余傷其

賦命蹇促每彼壯志僅托驥德以存姓名故聊因暇  
日援筆論之披牘懷人愧兮在目迫而察之眇焉靡  
矚不圖錫侯遂有此述若其叙騭清  
文勒成定論匪我思存請俟君子

陳昌期字孟起生而凝秀目光湛然父所學珍愛之  
常着膝上扣以所誦無不井然響答弱冠補博士弟  
子不樂制舉推檀左班馬賦騷風什是耽嘗作快賦

其文甚佳以病不良行年二十八卒

賦曰陳王不醒  
竭遊後園應劉

諸雋聯臂承筵絲肉相和觴酌流泉日之夕矣將迴  
輜輶于是陳王蹇然曰參商在天歲晏露晞佳期不  
恒瀾若孤駒寡人欲傾海爲壘列山爲廋伐雲夢之  
竹爲笛斬泗濱之梓爲箏食填大壑飲灌漏卮樂固  
難量快不可支大夫其各抽巨麗慰我澗思仲宣末  
至軒輿而起臣聞觀濤廣陵擊劍燕市乘驥子于屣  
屣校羽獵于原墜駘蕩恢怠古人所諭乃有名墜三  
北割地百里負轡矢而骨勇顏蒸邑而無際束甲登



壇亦挾霸王指天造盟宿耻如洗投匕首之相佯就  
北面之臣禮吹簫郢上行乞盤跚寬欲沈地讐不戴  
天乃彌長欽操吳鉞麗血誰伍兵行無堅膏塗惘彘  
臺殿紫煙鞭墓下而始兼庶草木其回鮮圍恩殘息  
而入相舍綈袍故人肉袒震駭拊思怨之不佞火馬  
食于堂下鼎臠盈望惟蓋成采寡客遞以上壽頽薄  
怒而數擧四海清六王沫張威弧稱帝籍乍虎闢而  
龍屯歛灰飛而電歇宜我憤驕類其官室千門殊形  
網戶朱綴實以吳歛趙舞被以鄭箏齊縷歌鐘華酌  
不移而具斯亦韵士之夸談一時之介福也德祖聞  
之憫然未服臣有微尚异乎汨汨楚兵冠軍轉戰鉅  
鹿萬驥聳耳十壁眦粟盲史記書腐令臆度臣忝司  
馬親歷心目手艸露布傳聲濊陌虞振韶箭協氣輞  
駁崇牙樹羽臣爲鼓人鳳凰承旂而飛軒入鸞鏘鏘  
以和鳴雕虎攫孳以迴步應龍鬣鬣以遊庭玄熊蝓  
蝓于丹杼白鹿攢羅乎紫莖心惴惴而發悸目矍矍  
而喪精仰驕千古俯酬三生若乃炎海無風溫泉水  
覆深壞不辰三星在留有昊兮孔哀雨粟兮三晝春  
相萬里頰拾恐後五侯七嬖批藪方穀秋憲罔射請  
刑英獲固來神羊階產屈屈快靡佞不指靡邪不獨羞

滔天與貝錦終褫紳而失魄陳王願解修爵無算  
曰善哉諱兮二大夫之謂矣爰顧應劉酬以芬體

### 孝義

沈嗣昌字壽康元季居豐山之南性至孝早喪母思  
之未嘗不泣事父曲盡心力時南北騷動歲復大饑  
人情洶洶嗣昌出告入面不敢露幾微憂色惟恐失  
父歡心父歿勺水不入口者三日杖而後起衞哀營  
墓於豐山之麓遷母柩合葬焉構廬其側覆以編茨  
障以土垣日匍匐其間望親壠以泣如是者六年南  
行臺嘗論薦其孝與之官不就洪武元年秋卒又三  
年正月邑令王公文造其廬書孝隱匾以旌之人至



今名其邨為孝隱邨也

祭德程本立曰壽康少時州辟為椽不暇讀書親沒不仕

日取五經四書讀之由是信道愈篤遠識絕人嘗執手告予曰世之學者爭務科舉以經學為名而無實吾所不取子之質近厚年且富當志於聖賢之學云云程大悟篤志力學就師於金華朱克修後為革朝外節名臣果不負壽康言見巽隱集及吾學編遜國臣記 按孝隱先生正德末進祀鄉賢事見董穀啟水志今祠中無其主不知何年失去天啟三年邑侯樊公修舉廢典復補入之一邑盡稱快云

崔永字彥齡七歲喪父母韓改適同邑桑慎慎為御史坐事謫海南攜韓從軍永流落鄉里既長思母不置遂徒步走海南求之誓不見母不還行次瓊州得焉會慎歿力請歸母所司以配屬無放還例不遣永慟哭回走入京哀請于 朝許之復赴海南迎母歸

舟遭風永入水負母母得活永竟感寒疾客歿江西布政使茹大素葬祭之郵致其母歸永往返海南無停足者四歲辛苦萬狀海南人皆稱崔孝子云

徐一夔送

永南海尋母詩云崔生秦川來面有憂戚姿問生何所為念母無已時母今在何方南海渺天涯涉川水增波陟嶺路多岐區區寸草心不敢辭險危晨昏霜露零夕息烟火微去去一萬里視若跬步為人生寄壤問母子故相依胡為若鴻燕南北相背馳白日行中天寧不照所私願言崇令德遠大以為期 海昌胡虛白詩秦川有慈鳥故巢遺一雛鳥飛南海去孤雛繞樹鳴相呼鳴相呼向何處萬里同天不同樹見今日夜思返哺夢中曾識瓊州路願鳥來巢庭樹枝驟雨顛風終不移

胡寬字景灝父繼海為社學師奇張靖之於稚歲不責脩脯時時命室駱為洗沐具食飲寬少孤性敏博



涉經史亦為社學師好談說古今嘉言善行勸迪鄉人鄉人咸喜稱小胡先生以父稱大胡先生故時邑城民居稀授書止寬父子每五鼓開學堂懸一燈高竿諸童子望之為候抱書至相傳迄今名尅蚤學弟宏字景容事實甚謹亦授書里中所得館穀盡以奉寬寬與言移時不命坐不坐寬臨卒取藏書授之曰父所讀也無隕而業涕泣拜授習之終身母孀居敬養不衰按臣䟽母節上聞命下建坊官帑不時給

宏拮据數年得百金卒建坊人稱孝焉

震亨謹按仇公俊卿縣志

王公文祿衛志前以景灝伯高祖與高祖景容府君合為一傳列孝友及高逸中令一遵舊本寫錄其文

稍益以懸燈學堂識張靖之二實事云伯高祖能詩失其稿有送鄭東谷之任廣東詩幸存東谷先生集中謹錄于後一官新拜嶺南行多少山程共水程驛路梅花殘雪盡岐亭楊柳曉烟輕文犀大貝來殊俗獨鶴孤琴識宦情想到羊城春正好滿庭榕葉聽流鶯

胡棻字敬之浹川人性純孝父本富室以性侈損家日以所欲責棻棻極甘旨致賓朋奉之雖家事落甚不少衰後母喪父鰥獨復嗜音以破寂寥而棻益貧不能致乃自學曲娛父夜與父同寢以腋煖父足如是者又十餘年父沒鬻所居襄事簞瓢屢空寓于其媼徐氏以歿

童暉字景文事父孝養備至嘗赴試入郡途遇鮮鯉



買之冒雨跣足持歸烹奉父食之然後又去父或怒  
伏地受杖怒解命之起始起年七十猶戀戀如嬰兒  
後膺貢遙授鎮江衛幕

王儀字汝儀自稱古鐵生詩法陶孟字法懷素卽之  
畫法吳偉夏景性至孝二親歿廬墓側憔悴之色中  
心達于面目見者感歎妻亡不再娶以子托兄無私  
蓄嘗爲君子小人圖題詠于上以警世

卽質父性侈好客質竭力養志時或貸子錢佐之父  
好馬卽買良馬出必隨馬後以爲常子魯事質亦孝  
質歿魯號慟數日不食憂思結癥疾夢中無夕不見  
其父醒必涕泣沾枕席焉

顧薇字子芳事父倫母李以孝稱李歿刻一木母奉  
之日三上食出入必以告壹如真母對之呼號無休  
時一夕木母忽作聲呼顧薇家人盡聞之相傳驚嘆  
母棺在堂隣火延燒將不救薇伏棺大慟火忽飛越  
免後事繼母盛如其母初失愛後爲所感動卒無間

云鄭端簡題顧孝子卷後云余不孝年二十七而喪  
母又四年而喪父當是時不知余之不孝也巳而  
生子男三人乃知余之不孝也蓋余之愛吾父母不  
若愛吾子也嗟乎古人言立身守身亦足爲孝今而  
後敢不自勗以求補過乎讀里人顧孝子詩  
卷書此歸之詩曰孝子不匱顧君其教我矣

胡諱彭述字信甫幼喪比部公育於母仇夫人每向



母問父貌若何居官幾年遺書籍何在輒失聲大哭  
比部詩文多散佚徧購之成帙雖斷行隻字裝潢必  
謹爲室三楹中奉母而身及劉孺人居左夜寢未嘗  
闔其左扉曰吾何忍自隔阿母扉外寘之積久歲  
及捷皆廢事從兄彭年敬愛如同產篤友誼有仇某  
奴經死匿於家力解其難性好書見異冊至典質買  
之不靳吳興書賈每一來欣然予之飲食有一賈病  
疫舟中不能歸命老蒼頭搖櫓送歸去人以爲咲弗

顧也嘗論次所藏書名好古堂書目自立序

序曰晉張華雅

好書籍多至三十乘天下奇秘盡在華所由是稱爲博洽君子信乎書之有益于人也予家世爲塾師自誠齋府君迄仰匡府君凡四世雖隱顯不同而其雅好均類于華以故藏書幾至萬卷亦云盛矣予不幸襁褓失怙乃今讀先世遺書豈不痛哉茲懼卷目煩多易以散逸敬分爲四類曰經史子集而貯之曰古堂中與時取一二玩之以開此心茅塞期無負相傳之意然而未易能也東坡云象犀珠玉珍怪之物有悅人之耳目而不適于用金石草木絲麻六府有適于用而用之則弊反是者其惟書乎予雖不敏將誦此言以終身矣如曰聚書已多必有好學者以爲之子孫則吾豈敢

葉春華海寧衛卒也操力作事其母嗜飲食而性

暴怒不恒春華每朝出暮必市酒肉歸供母稍弗慝

意令別置又復百計賁而進之母叱之跪不命之起

雖達旦不敢起隣人或叩壁教之曰母斲矣何不暫

起應曰吾不敢欺吾母跪自如或勸之娶曰力不任



娶卽娶恐不克一心事吾母吾寧以繆終也嘗供事  
戎府失期被笞哭甚哀人問之故曰吾明將刈薪賣  
之供母今創甚不能往無可供母矣故慟耳帥聞而  
謝焉遺之粟縣令何公早嘗旌其門

陸良父患癥疾百計求療母蔡寒月病痰思食西瓜  
良遍走得之痰頓愈後割股救母復延者三年撫愛

其弟甚至人稱孝友

舊有徐覽近張煥葉方登並  
割股救親邑侯旌之附載

潘允濟者國初人邑捍海塘舊雜用土石易崩洪武

三年海溢淪田一千九百餘頃允濟走闕下請築

塘專用石

上遣宋署丞如法監築邑賴以無患

按舊

海塘志洪武中無淪田一千九百餘頃之說惟錢公  
薇嘉靖庚戌海塘碑中有之父老相傳本縣十五都  
全淪於海今蓋田舖南望一帶皆其地也但田畝至  
十九萬似太多前隄海篇未敢載聊入之此以俟考

陸平者世居邑之西麓富甲一邑里中盡下之有爭

訟就質言出而解洪熙改元歲大歉盡免所貸錢作

粥以食餓者正統壬戌景泰乙亥再饑前後入粟五

千餘石麥八百斛給賑濟詔旌爲義民表其宅宴

之光祿授散官歸年九十卒

顧昂字文顯成化中嘗仕爲新泰典史昂家澉鎮數

上疏請鎮城事皆報可一濬城東南地爲河載土築

黃家吭塘捍海一請豁澉所公佔城池軍營田地稅



糧一請以城濠空地海上新漲沙地爲牧馬場毋令  
鎮軍踐壞民田縱牧一請免所軍運艘減馬軍舊額  
百匹爲六十匹免遠漕及孳牧等苦至今澈人利賴  
之董穀曰昂有仁者心未可以資格概也

仇必達必顯右所人與兄武昂季弟必侃同胞相友  
愛因同居爨不析異四人者晚或聞室人語明發必  
白之無留以故久而無間必顯常路遇暴屍勸必達  
買棺瘞之自此遂施棺及施絮襖濟寒數各五百其  
一爲父母其四爲兄弟植福因也正統七年夏四月  
百戶杜忠率衛卒乘戰艦禦倭沈家門山覆溺依遠

島七日不食爲出粟五十石募漁筏救之得生者七  
十二人歸而羅拜於門求償催值費不許兄弟同心  
尚義率如此

朱文才澈人慷慨多智畧嘗斃六里壩閘興水利築  
文星臺白苧水漾中及支葺海門寺高閣造禪悅諸  
廢寺具有巧思堪垂久醜金首事人或不盡應傾橐  
成之咸目爲朱善士云

郭阿保中所人劉蠻驢前所人正統中以驍勇選從  
彭將軍程征沙處賊彭作木柵與賊相持有賊騎而  
揮斧至柵下兩人忽從內躍出郭一手提刀一手舞



牌蹲而前迎劉以鐵叉黨賊斧郭乘間以刀斬馬足  
賊仆殪之歸同時有右所人杜斌亦善用鐵叉臨戰  
以死自誓先投义城外身隨之下連刺殺三賊真馬  
兒左所人夜負巨砲入賊寨發之賊驚自相殺因擊  
敗其衆後賊平頒賞薄杜斌上功僅得銀牌一方而  
已又正德八年有中所人張裔者從征開化寇王浩  
八亦潛入其巢發銃驚之殺數百人收功云  
陳馬兒者乍浦軍也嘉靖丙午倭犯金家灣指揮方  
泰射中一倭追之墜馬而傷馬兒扶泰上馬與敖鎮  
護從一倭刺馬兒不能中一倭刺鎮仆之馬兒救鎮  
起復有二倭至同刺馬兒鎗及身馬兒以脇夾其一  
以足拉去其一以一人敵四倭戰甚力援絕走至山  
半自擲下足陷石窟中被殺泰爲文祭而瘞之哭之  
甚哀時同戰者有倪軌倪輔李咬住凌義一林岳並  
效勇而凌林二人亦戰死二倪及敖中所人餘未詳  
敖後死于矮婆橋之戰

鮑宣鮑惠胡士澄茅堂並以勇力聞亦死于倭嘉靖  
癸丑四月二日倭船泊演武場海岸衛帥率丘禦之  
宣手抱一倭與俱死士澄以火藥焚其船亦與酋八  
大王者俱盡餘倭走矮婆橋堂追之手梟一倭與惠



及敖鎮血戰良久伏發咸死惠元喪身挺立若赴敵  
然鮑惠亦云舒惠時戰死者十八人名姓多失紀  
沈鸞者訓導孫肯堂之僕也嘉靖癸丑倭掠邑西郊  
突入肯堂室執之將加刃焉鸞以身蔽主請代歿倭  
不忍加害兩舍之

藝術 而彭林王人亦辨及二詩又遠東西人繪未精

宋魯之茂號雪村善畫梅竹寧宗朝仕爲郎  
趙孟淳字子貞子固之弟自號竹所墨竹可觀

周堯敏字禹卿號學山畫竹宗文湖州頗有得處  
王鼎字德新好寫竹學丁子卿深悟筆意子泰之號

竹趣亦能紹父業

以上四人並居當湖載圖繪寶鑑

明陳景初衛官舍善繪事與錢塘戴文進同時筆法  
亦類之蒼老可愛其孫鳳尤善李伯時白描

唐宗祚左所人善傳神景泰間與日者胡日章隨都  
指揮脫綱征金華賊綱戰歿總帥孫問日章曾算脫  
公命否曰命書在公篋中又以傳神屬宗祚曰已爲  
脫公寫之矣孫取篋視命書尅死期一不爽懸寫像  
于堂儼然如生孫泣而祭之二人名遂大振日章詳  
後

朱端後所人正德間以畫士直 仁智殿授指揮俸



賜一樵圖書遂號一樵畫宗馬遠山石水口效呂  
紀居京師甚為時所重同時有曾和者乍浦所人亦  
以畫士直仁智殿筆法甚高惜乎早歿

張紀字文正工士女衣摺矮髻與唐伯虎相上下而  
面龐肉色淺染三停用積粉法三停謂額鼻頰此古

法也今畫家不知矣姚士粦見只編云紀藏名畫甚多嘗見其篋中粉本宋太宗幸

小周后圖有人題其上云江南刺得李花開也被君王強折來恠底金風衝地起御園紅紫滿龍堆今不知落誰家

陳璣字天器初授業陳草庭景初後游錢塘故家多

戴進名跡由此入悟所繪山石雲樹各成一家其寫

照則面部鈎染坐法衣紋皆後來所不及後有湯子

英者傳其術遊茗中亦有名

韓履祥澈川人讀書能詩尤精于醫切脉斷人死生

隔歲輒中洪武中選為御醫成祖尤加恩遇徧

遊公卿大夫間四世孫本亦精其業履祥有懷惟則大帥詩每憶幽

尋到上方銅爐石鼎漫焚香天花滿座雨晴雪空翠撲衣生晝涼龍化老翁求法語鶴如童子守禪房別

來江漢頻回首塵劫茫茫道路長

陸朝者鹽之世醫也其先有名麒者景泰間衛軍征

沙寇以醫術療從行將士有功授醫官子孫遂世善

其業朝尤深于內經本草切脉洞見病源決死生一



一不爽治傷寒更隨手而瘥相傳有病者欲迎朝診  
視聞床頭一鬼相語曰陸朝來矣且暫入空篋避之  
朝至病者以告朝命取篋燒之病者愈然朝治病不  
欲人遲于見功每至女子及癆瘵不卽起者輒推引  
嚴漢漢用藥以和緩取効不峻爲攻補名亦亞於朝  
至今稱良醫必曰陸紹泉嚴陵坡蓋兩人別號也嚴  
無後朝子孫尚多工醫者  
張暉中所人能醫治傷寒有起死回生之功子翰繼  
其業感寒疾者藥一服而愈時稱爲張一帖云

姚能字懋良號靜山善談論好吟詩精於醫理著傷

寒家秘心法小兒正蒙藥性辨疑諸書

賀岳字汝瞻初因母病盡購岐黃書誦之且從四方  
國手講究遂精其術病者圭勺霑口卽奏功郡邑藩  
臬皆延致之加以賓禮所著明醫會要醫經大旨診  
脉家寶藥性準繩諸書業醫者至今宗之

張霆號芝田談寵號玄谷並精小兒醫先後著名嘉

隆間今子孫並嗣其業

霆行誼端方壽九十  
有六歲舉鄉飲大賓

胡日章澍所戎籍也少學祿命術遇異人海上授之

訣因益精每作絕句詩判人一生事無不驗與人言

必依於孝友忠信有後母者尤諄切戒勉之蓋有道



而隱于術者年九十餘死人無能傳其術焉

判虞氏女命詩

云移得名花向畫堂任他門外蝶蜂狂只愁水涸春歸早香冷薰櫳淡月黃後適董涓兩月而涓暴死以節終沈氏命云年年空佩宜男草不見金盆浴鳳雛竟無子杭州一人扣命判云自是豪華多樂事元宵燈下蹴鞦韆果于明年元夕止妻觀燈不從相毆縊死嘉興一人生二子戲水遭同日溺死其妻痛切亦自縊夫檢所批命帖有一雙紫燕入池塘紅粉佳人送畫梁之句又判僧明秀幼命小小魚兒數寸多而今且自在清波待看頭角崢嶸日一跳龍門出愛河後緇維天寧為僧會判海昌一人云苦若若若只恐明年正月五枯竹叢中苦又若其人果以是日乘驢過談家嶺驢驚墜刺竹枝死如是者甚多不能悉記

賀臺字憲卿俞瑤字朝美一精於易課一精於龜卜

有神驗並嘉靖間邑諸生也

相傳邑諸生迎臺使西郊舟已過歟城憲卿課

之云不至別有一憲長來武弁一人不利旺于東方水交合官必閱海眾不信俄而臺使以事返兵使者代行杖千兵之不候門者閱海塘而去一鄉人卜孕以何時產課成憲卿怒曰汝自問豬母試我耳其人愧謝憲卿曰是生十八子土殺勝當戕其四後生豕墻崩壓焉數皆符又學憲阮公鷄按郡歲試諸生亟溫習以應憲卿語人曰毋自苦吾課之終弗試也已而公至試有期矣人以誚憲卿憲卿曰據課勾陳臨上五玄武動于二爻寇且至厥有大殃寧但弗試及入場坐定同儕顧之益笑憲卿默念今日正惡那有試理須臾海上捷足叩院扉報倭夷入犯阮公大啓扉聽諸生歸邑為守備果弗成試而罷瑤號賓山每試諸生問題出何書賓山言之輒驗蓋賓山嘗私卜之故賓山著卜經一卷忽火發帙中燼之遂不傳

王慷者前所人生有神力嘗以指觸破屋壁穿之而

指無傷與人較藝寺廊脫衣挾柱礎壓之始就搏衆

驚拜為師駕漕艘入都遇劫慷佯執爨不顧第取一

大竹用脇夾破之為薪而劫者盡斂手去有徒豪倫



欲盡其藝侯慷飯持鐵义刺之慷手飯甌底當义鋒  
跳入倫懷以二筋貫倫鼻孔仆之地其捷如此萬人

敵惜平世未一試爾

載王文  
祿衛志

流寓

漢施延字君子沛國蘄人也少明五經旁通星官風  
角家貧嘗任作半路亭食其力以養母人不識也山  
陰馮敷爲吳郡督郵過亭延持箒往敷望而知其賢  
者下車謝之推食解衣與之錢不受順帝初徵拜侍  
中位至太尉

晉干瑩新蔡人初仕吳爲立節都尉典午南渡徙家

海鹽有殉葬妾復生事子寶遂爲鹽人後至蕭梁時

尚多顯者詳見前簡

何準字幼道穆章后父也高尚寡欲州郡交辟不就

兄克驃騎使仕對曰第五之名何減驃騎

準行

後克

居宰輔權傾一時而準散帶衡門不與外事徵拜散

騎卽不赴以此自老升平初追封金紫光祿大夫晉

興侯子揆以非父志表辭不受準本廬江潯人寓居

於鹽今烏夜村有其墓也

宋常同字子正臨邛人御史安民之子也登政和進

士第靖康初除大理司直汴京破後辟元帥府主管



機宜文字除太常博士高宗南渡辟浙帥機幕建炎四年召赴行在爲大宗丞紹興元年乞郡得柳州三年召還首論朋黨之禍及補禁旅事除殿中侍御史呂頤浩再相同論其十事罷論知樞密院宜撫川陝張浚喪師失地詔浚福州居住同與辛炳在臺同好惡上皆重之四年除起居郎中書舍人史館修撰請撫實神哲二史上深嘉納俄除集英殿修撰知衢州以疾辭除徽猷閣待制提舉江州太平觀七年秋用趙鼎薦以禮部侍郎召還未數日除御史中丞秦檜請與金人講和同持守備之說忤檜意乞郡除顯謨閣直學士知湖州郡有賢明之謠復召請祠詔提舉

江州太平觀屢空無家寄居邑西郊天寧僧舍凡十年自號虛閒居士卒贈少師謚忠毅史臣稱其才猷可以經邦風節可以勵世云二子秣衿皆典郡有聲

震亨按張九成集有與常少師書云中丞倘早晚還朝庶有承教之幸不然終求遂志小舟訪公于苕霅之上不難也又一書云般居後諸况已定否相望只百餘里稍涼當買舟拜謁張居海寧去吾邑百里據此知少師初寓吳興其後定居海上耳子孫在宋代者一傳爲秣衿之典郡再傳濬孫衍孫賢孫並進士令孫國學免解進士顯孫判曹說孫隱居著書尤知名三傳楷進士林吏部尚書叅知政事官最顯  
楷承議郎兩浙轉運司主棠棊不仕有文名並見前卷入國朝喬孫士昌官雷州知府者始徙居郡城仕版道今稱盛焉常墓多在鹽邑而少師墓在蘇郡之聚塢周南讀書記云常同卒于海鹽其妻方務德



女弟聞僭蘇師德獄起懼禍盡鬻所有護柩之聚塢黃氏墓于水濱時紹興二十年也董穀激水志曰按縣志載同二子祿祿皆典郡有聲終宋之世子孫舉進士海鹽者五內有名楷者今考激水志有參謀官常楷乃悟楷字之訛蓋楷從衣當是同第三子且常棠鎮解題名記稱楷為叔祖則其名必不從木無疑矣姚士奇曰按董公謂楷是同第三子但同卒于紹興二十年至褚為胡應雲作題名記已六十七年矣不謂寓居僧舍十年而有此少子也當以舊志生二子為據蘇師德事錄後吳郡志云蘇師德丹陽人常同友僭也紹興中為樞密院計議官以同僚胡銓上書詆秦檜株連去國久之通判平江周三畏知府事故舊康與之挾秦氏子弟請落妓趙芷籍携去師德言其不可三畏因追還芷與之貽憾師德未幾同卒于海鹽遂誣三畏以庫金二百賻同喪師德為祭文有姦人在位公棄而死之語檜大怒命中丞俞堯弼幼三畏落職併罷師德又鞫之于獄送汀州編管

李正民字方叔揚州人左朝奉大夫徽猷閣待制提

舉洞霄宮紹興中寓此正民善屬文邑中碑記多出其手而修學記尤工後其子直養紹熙中即令吾邑云

趙善禮字敬叔宋太宗八世孫祖士顙朝奉即建炎南渡居臨安父不瑋承節即監嘉興海鹽稅善禮隨侍因寓居以瑤籍授承信即增秩承節即家業甚盛後裔孫公範經兵燹零落為軒于故居顏之曰舊時月色志盛衰之感公範清茂嗜學軒記乃徐一夔筆也

按王世廉文獻志載善禮墓志塋長水鄉余坡嘉靖壬辰為盜所發骨甚巨豈所謂龍種與常人殊者耶今北門尚有趙家街諸生春熙者相傳為有宋王孫其子姓繁衍多青衿殆月色軒中苗裔歟



陸啓禎象山先生後裔宋末任海上巡司寓海鹽之  
當湖鎮江南破後道梗不能歸遂家焉子孫今爲當  
湖畝族

元王濟宣威將軍前南寧州安撫司寓居澈川至元  
丁丑澈鎮招討王熔假軍權決壞永安湖爲田傍湖  
民業多稿濟勇于爲義聞之朝命行省親臨糾勘還  
濟爲湖澈民德之

姚桐壽字樂年桐廬峨谿人博學多才識元末爲餘  
干教授與僚友鹽人沈穀善結姻盟穀死桐壽携子  
就婚值世亂因寓居嘗撰樂郊私語一卷吾鹽宋元  
間故實得畧存者賴有斯編也其叙曰至元壬辰兒  
將逆婦海上遂移家豐山之陽明年二月畢婚事沈  
夫人出拜曰亡人所遺祗一襁中嬰孺門戶衰冷所  
冀翁媪卽君爲我支辦倘云此後終當離異是非亡  
人託契翁媪意矣余悲其言謂吾婦曰世方擾擾桐  
江迫處孔道所必被兵且此州僻懸海上亦自可託  
何必故鄉遂定居州城往來于豐陽別業之間稱此  
州寓公也旣而與新故知交若雲間楊廉夫嘉禾貝  
廷臣潘澤民張子晦本州楊友直時于春林夏澤尋  
討舊蹟遣撥旅懷凡耳目之所覩記有觸于中輒爲



條載數年不覺叢聚成帙聊爲編次就正于後之博  
達君子云

賀傑元末爲嘉興萬戶值革命解所佩金牌投幽蘭  
井中遁居當湖終焉有墓在平湖城內子孫遂爲鹽

人

陸德方字顯叔華亭人至正壬午登賢書授般陽路  
學正未幾群雄蜂起掛冠歸時元平章河南沈炤避  
亂鹽之甘泉鄉德方單貧徒步傭書于其家俄與談  
經史論時政沈大驚詢知所自遂以女妻之 國初  
以逋臣薦不赴嘗爲詩題壁曰我本由拳人何以寓

茲土所恨國步艱一官難安堵沉離坎壈中二天仰  
持祐有妻如孟光有翁如彥甫灌園佐辟纒世事任  
旁午偶出南陌頭易姓知真主微服過故鄉官司迫  
門戶逃名名愈隨披裘釣水滸夫豈蹈洗淵臣自甘  
草莽中冷烹一甌博山燒一炷彈琴伯牙臺聖世容

巢父今梅園陸氏及諸生夢鸞並其後人也

夢鸞云  
德方節

前卷名源者之祖今考源乃王公文祿外大父王輯  
文獻志有古民傳載源家世亦有德方名其時果元  
末也今故居  
在楊橋里

明劉儼字敬先其先真定人父廣文君貞宦於鹽遂  
占籍居澈川儼博學善詩文有古行娶瞽妻終身愛



敬如賓門人蕭孚貧卻其贄且周之粟友人沈德常

死無所歸儼推田三畝鬻以塋之今祀鄉賢

徐泰志曰儼詩

豪邁有久雨詩云百年海內無奇士六月山中尚夾衣又寄楊彥常卽中云髡脚吳霜日漸侵牀頭秦火尚追尋高眠已遂希夷志長嘯徒悲越石心烈士義輕雙白壁故人情重萬黃金朱絃一曲清商調今古寥寥繇賞音志可見已其詩董澐嘗序而刻之

許相卿字台仲本海寧靈泉里人以鹽邑紫雲村山水爲勝卜居村南茶磨山徙家居之因自號雲村老人子孫遂占籍焉初相卿正德中舉孝廉久不第從陽明子講學又與關中孫一元吳下文徵明諸公言詩聚書萬卷讀之不屑以進取爲念後竟登進士嘉

靖初

世皇新政謁選卽授兵科給事中嘗上疏論

罪闡張銳張忠內降貲死非法張欽義子襲緹騎秩爲濫恩著敢諫聲在廷張桂夏三公並與交善而性慕棲逸自以古心直道難於諧世僅三載引疾歸迨嘉遁此邦益散素尚埽軌謝客雖親知罕見其面課耕力食之餘時跨黃犢戴笠披簑行山間覓句爲樂嘗大雪直上雲岫絕頂賦詩人望之以爲神仙其後清名益高薦起爲禮垣終以疾辭舊遊仕者或過山中勸之出則故以農圃桑麻攬其談爲索京師故人書則曰有詢我者君第言厭世去矣聞者絕倒傳之



都下縉紳有不得遠中書率舉此相謔爲口實張桂  
二公亦各遺書勸之不報夏文愍之再出也過郡城  
就相卿商進止相卿不答第曰吾惜李長源受觀察  
判官耳夏起謝曰教我矣卽搥鼓迴船顧視船尾祇  
候者忽散去意憮然不果遂及祠相卿素持介節雖  
一介不妄取官諫院時無方帕之納移老居山中監  
司部使者歲時存問餉之金亦未嘗一受海昌令嘗  
爲相卿樹表邑城中念當一往謝則五鼓伺關入向  
縣門再拜徑去倭入紫雲村趨避傷足家于舟鹽令  
鄭公致書邀入城亦不就曰余久遠城市不敢復入  
也蓋超然塵垢可望而不可親者三十年如一日焉  
所著有革朝志貽謀四則及文集十二卷詩清令多  
丰骨文如柳州特峻潔子卽御史聞造也前見  
查志文字鳴周海寧人仕爲廬郡無爲州守仍晉秩  
本郡丞買山海鹽之角里爲園且爲墓塋焉曰余愛  
鹽風土樂願埋骨于鹽也當志文佩丞印司江防嘗  
行江遇風舟覆拔舷流數十里不沒印亦宛在廬人  
傳以爲異

吳孺子字少君別號雲鐵蘭溪人工詩孤僻矯厲不  
屑與俗諧少喪妻子徧遊天下所至率蕭寺及名流



韵士家好採壽妻櫻株曲瓢爲几杖槃盂罇壺壘洗  
之屬手自摩挲令光澤可鑿列左右玩樂客稍諦視  
輒不聽曰勿令爲俗塵所觸王弇州嘗爲作破瓢歌  
者卽其人也寓鹽邑天寧戒褻慈會斯學禪房及錢  
懋毅家最久各有詩海上僦屋詩云僦居來海上又  
是一家村日落旋吹角天寒早  
閉門無勞遊子恨不盡主人恩更喜南簷敞衰年且  
負暄贈襄上人詩獨憐青竹徑半帶白沙灣羈客  
時時至高僧日日閒飯餘容就榻卧起復看山不盡  
吾師興如何得放還宿學公房詩僧齋閉秋草無  
事應朝眠改座番逢客收書誤觸絃情高雲上鳥心  
定夜初禪不盡江花意還將處處船別錢懋毅詩  
幾月爲歡在君家花滿蹊酒奢泉不竭詩細草能齊  
別去情何限重來路恐迷徘徊江上棹疑是武陵西  
姚士舜撰少君遺事云少君寓錢懋毅別館時適  
臘月家戶祀竈少君僅以銅鑪爲炊亦置酒果手摩

仙釋

晉世有不知姓名道人常齋一杖一箱自隨忽詣縣

向令乞一人給使自選取守鷺鴨小兒形服最醜者

將去時已逼暮道人令小兒捉杖行但聞足下波浪

倏忽之間至一山上山上有屋屋中有三道人相見

欣然共語至中許主人以小甌食與小兒狀如饔

艾食之饑止向瞑道人欲還屋中人作書付道人云

而祝之曰銅竈銅竈聽吾祭告雖煮蕨薇但燒  
有粟必義酌水亦笑保其潔清供此衰毫又士  
少君詩云憶過松院夕容髻念年時能老人  
幽自不知無家依客友有杖當佳兒爲問簾前雪應  
權昨  
支詩



寄廣陵白土埭上史宗道人以書付小兒比曉便至  
縣與令相見云欲少日停此道人在聽事上止眠以  
廂杖著牀頭令欲偷取看何物道人已知輒高懸當  
下而臥未不可得後與令辭曰吾欲小停而君恒欲  
偷人正爾便去耳令呼小兒問知道人先所經并說  
山中所寄書尚在衣帶令開看都不解乃令人將  
此小兒至白土埭訪史宗送之宗開書大驚曰汝那  
得蓬萊道人書耶宗著麻衣身多瘡疥性調不恒在  
白土埭凭埭謳唱引絳得直隨以布施人棲憇無定  
所或隱或顯後遊吳會止上虞龍山不知所之先道  
人與山中三道人共語謂宗謫限當竟矣亦小兒云

事出陶淵明  
梁慧皎記傳

徐夔少有道術能收伏邪精錢唐杜氏女患邪夔爲  
作術召魅卽見丈夫著白帙葛單衣入門夔一叱之  
卽成白龜一旦與羣從兄弟數人登石崎山斫春柴  
日暮夔獨不返明旦尋覓見夔在山上腋挾鎌倚樹  
而不動或向前抱惟有空殼今天僊湖卽夔故居也

張君房雲笈  
七籤洞僊傳

梁陸逸冲字敬游陶隱居弟子誠慤恬澹志遠栖逸  
齊永明中隱居遯跡茅山偕逸冲於西嶺立華陽館



經始道靖七年而後告成盡逸冲之力也隱居嘉其  
勤勤名爲栖靜處士作十賚文策之而許長史碑陰

手書上清衆館弟子亦以逸冲稱首焉十賚文曰隱居先生遣總

事弟子戴坦秉策執簡昧授前學弟子吳郡陸敬游  
建連石之邑爲栖靜處士策文曰咨爾敬游昔我紆  
紱帝闈侍笏梁席雖迹混教塗而心標逸境芝田之  
想無忘曉夜濛穎之志歲月已深至德有鄰風雲相  
會爾之來也爰移兩春於是褰帶青珥掛冠朱闕携  
手東垣劬居茲嶺脉潤通水從石開基登崖斲幹越  
壟負卉筋力盡於登築氣血液乎趨走肌色憔悴不  
以暴露爲苦心慧空懷宰顧饑寒之弊棟宇旣立載  
罹霜暑於時七稔經始甫訖今日之安爾有勤焉君  
子不獨居其榮仁人必與物同泰是用邑爾長阿北  
阪積金山連石之鄉方七十步澗水屬焉茂爾嘉業  
奉爲華陽上賓爾其蒞之其一爾以誠懇爲性恬澹  
爲情質直居本沉重樹志不邀世才高謝接俗權謀  
詭譎非意所欲今故賚爾爲栖靜處士可謂因德立

號克終斯美其二爾基架館境營劃援域堂壇宏敞  
樓路通嚴官私行止並有栖憇繕築之勞莫匪爾力  
今故賚爾四靈飛軒廡廊側屋可以安身靜臥顯祇  
遐福其三爾奉上惟勤接下以惠稼穡艱難備嘗勞  
苦貨殖之宜允瞻糧服手足胼胝未獲告休櫛風沐  
雨於焉尤切今故賚爾蒼頭一人厥名多益可以傳  
代薪水省息劬劇其四爾族惟舊緒身乃邦聞道雖  
一賚事望宜分今故賚爾鋼鐵如意可以揮對賓僚  
卽名立事其五爾崇毅惟善法光偏執器服表用爰  
寄玩習今故賚爾筇竹錫杖可以振動三界精祇憚  
響其六爾期誠玄契遐想靈風至懷所請因心則通  
今故賚爾香爐一枚裏陸副之可以騰煙紫閣昭感  
上司其七爾澡形潔藏肴糧旣去宜導松木實資芳  
醕今故賚爾杯盤一具可以夕挹桂漿朝承菊露其  
八爾敬事經誥遵尚楷模翰墨之用於是乎在今故  
賚爾大硯一面紙筆副之可以臨文寫字對真受言  
其九爾貞心內固清行外彰滌蕩紛穢表裏雪霜今  
故賚爾鑰石澡濯手中爲副可以登齋朝拜出入盥  
漱其十今賚爾十事事準前史可對揚嘉策循言求  
理無或驕惰以騫斯旨援筆申懷敢告處士按許



長史碑陰載上清弟子八人王侯朝士刺史二千石受經法者自齊梁二武下二十人其第一行云上清弟子華陽前館主吳郡海鹽陸逸冲年五十八係隱居手書後又題云普通三年五月五日畧記

五代譚峭字景升游名山得辟穀養氣之術夏裘冬葛狀類風狂嘗著化書宋齊丘欲竊為已有醉之酒縫革囊中投之江金山漁者得而剖之見峭方醒張目曰齊丘奪我化書今盛行矣遂去不復見峭本泉州人國子司業洙之子邑中有譚仙嶺相傳是其煉藥得道處仙鑑載峭有詩線作長江扇作天鞞鞋拋向海東邊蓬萊元是無多地只在譚生拄杖前此尤其寄跡海嶠之證

按王文祿文獻志及仇俊卿縣志載成化間遷善橋居人陸麒樓懸

呂仙翁像一日隣人滕殿見仙翁從樓窻中出冉冉向東北乘雲度海去萬曆五年秋七月巡撫徐公杖築塘海水忽清有不冠不履異人指示方畧云潮且大至嗣果異潮衝入而所築塘竟無恙公上疏言其事見海塘錄中又有沈達者妻滿病瘵不起達夢道人面有二口者曰能救爾妻果有道人從海外至鍼滿立起索酒痛飲忽不見今喜譚玄學士麟者即達孫也是知吾邑仙島不遠異人必從海上來和

吳康僧會本康居人赤烏中為吳大帝祈獲如來舍利由是佛教始行江南茲方金粟亦會所建也會尸解後真身一現末欣再現金粟奇骨瘦露舉手如揖足跨如欲行眉間時放光明顯靈異之跡洪武二十年

詔移歸金陵天禧供養

晉孫綽撰像贊曰會公蕭瑟實惟令質心無近

累情有餘逸厲此幽夜振彼尤黜超然遠請卓矣高出

內



梁釋法寵姓馮氏少有絕俗之志納妻半歲卽捨家入邑之光興寺後出都徧學經論採玄析奧音吐蘊藉名學罕不倒戈嘗預齊竟陵王西邸義集梁武時御講推寵坐首號上座法師賚賜不絕勅都下有法願道人善相術謂寵年滿四十當歿惟禮懺可免遂還海鹽光興禮懺至四十歲暮夕覺兩耳腫痛彌信歿促忽聞戶外有人言曰君歿業已盡開戶無見及審耳痛乃是生骨後壽至七十四歲弟子慧開亦本縣人多從酒謔博奕自娛而演析教義應變不窮復有沙門智果亦住光興清直平簡善諸經術

齊張融與周顒

書云古人遺族故留兒女法寵法師絕塵如棄唾若斯之志大矣遠矣梁武帝命寵主宣武寺救曰法寵法師造次舉動不逾律儀不狹性欲不事形勢慈仁愷雅有君子之風匡政寺廟信得其人矣

唐釋慧因姓于氏晉太常寶之後陳時繼辨法師傳燈長干徐陵毛喜咸歸導首隋仁壽中爲禪定寺知事上座唐初居大莊嚴寺預十大德之選蕭瑀沈叔安皆諮扣焉嘗感冥司召講大品般若經七夕蘇云有兩束絹爲嚙遺學徒檢箱內果得之弟子法仁有名聞學亦邑人也

良準者大中咸通間法喜寺僧也業四分律慧行精通有塔葬本寺棲鳥不止時放瑞光舊志稱其隱顯



不常疑爲聖賢之應化焉

唐司空曙寄準上人詩昨聞歸舊寺暫別欲成年

客應同出隣僧容伴禪後峯秋有雪遠  
洞夜鳴泉豈藉公卿論人間似共傳

後唐釋慧稜姓孫本邑人童齒日於通玄寺登戒後

游閩嶺謁雪峯頓明本性閩主召住長樂府長慶院

號超覺大師得度者不減一千五百衆

師歷參禪院後問靈雲如

何是佛法大意雲曰驢事未去馬事到來師如是往  
雪峯玄沙二十年間坐破七箇蒲團不明此事一日

捲簾忽然大悟乃有頌曰也大差也大差捲起簾來  
見天下有人問我解何宗拈起拂子劈口打峯舉謂

玄沙曰此子徹去也沙曰未可此是意識著述更須  
勘過始得至晚衆僧上來問訊峯謂師曰箇頭陀未

肯汝在實有正悟對衆舉來師又有頌曰萬象之中  
獨露身唯人自肯乃方親昔時謬向途中覓今日看

來火裏冰峯乃顧沙曰不可更是意識著述師問峯  
曰從上諸聖傳一路請師垂示峯良久師設禮而退

峯乃微笑師入方丈參峯曰是甚麼師曰今日天晴  
好普請自此疇問未嘗爽於玄旨天祐三年泉州刺

史王延彬請住招慶後居長慶  
長興三年歸寂王氏建塔葬焉

宋蔣十八居士與其妻念二孺人日誦大乘經斷除

嗜欲積四十年同日洗漱更衣焚香書頌而終居士

頌曰這箇幻身四大合成今日分散各歸其根諸幻

既滅灰飛煙絕如空中風猶碧天月既無障礙又能

皎潔一切未斷無復言說孺人頌曰看過蓮經萬四

千平生香火有因緣西方自是吾歸路風月同乘般

若船  
元僧真諦住德藏寺執樵汲役初未測其異也一日



楊璉真伽率衆過寺將往發陸左丞女朱提舉夫人墓肆淫穢時楊衆百餘各執畚鍤利械蜂擁左右真諦忽現神力大怒叫呼掣韋馱尊者所執杵在手躍身丈許亂擊之狀如隼撇虎騰不可抵禦衆盡傷諸械亦寸段楊以爲神不敢問徑去墓竟得全諦後行脚峨眉不知所終

竹庵禪師可觀雲間戚氏子十三祝髮學天台教歷錢塘南屏車谿等山尋還當湖德藏講寺謝事竹庵置山月池松風臺一日儼然而化春秋九十一有山家義苑菊坡等集傳於世

石屋和尚清珙常熟溫氏子出家本州崇福寺二十祝髮徧遊天目淮陽遇二高僧叅悟禪旨後請住持當湖福源禪寺隱歸天湖至正間詔降香幣皇后賜金襴衣榮之又因高麗國王表達詔謚佛慈慧照禪師有上堂法語山居偈頌行世

上三師所居寺刹今屬當湖但其時縣尚

未析自應采入

明楚石禪師梵琦幼出家天寧永祚禪寺尋依洵師吳興趙松雪爲請牒得薙染受滿分戒偶因閱楞嚴有省詣徑山元叟端禪師諮決叟知其堪負荷不假辭色令自證會元英宗詔徵入都一夕聞綵樓上鼓



聲忽徹見徑山爲人處由是徧主法席名滿夷夏晚  
歸天寧築西齋退老 明興再被詔徵說法蔣山恩  
禮甚隆洪武三年復徵入問鬼神事館天界寺沐浴  
更衣書偈而逝奉 詔閣維歸牙舌數珠葬今本寺  
大雄殿西北塔院卽師所居西齋也元錢惟善曰曹  
溪五派臨濟下妙喜遞傳元叟而師嗣之實妙喜第  
五世的骨孫也五十年間六坐道場有六會錄流布  
叢林電坼霜開金聲玉振而姚少師廣孝亦謂師平  
昔於淨業一門至老力行不懈復立言轉化四衆近  
雲棲宏禪師弘闡往生便門推琦爲 國朝宗師第

一謂所著淨土諸作宜竝入梵夾唱極昏俗至和陶

等詩北游集又其戲墨之餘焉

宋學士濂撰塔銘  
皇帝卽位洪武之元

年端居穆清憫念四海兵爭將卒民庶多歿於非命  
精爽無依非佛世尊不足以度之秋九月 詔江南  
大浮圖十餘人於鍾山禪寺作大法會時楚石禪師  
實與其列師陞座說法以聳人天龍鬼之聽竣事述  
臣入奏 上大悅二年春三月復用元年故事 召  
師說法如初錫燕於文樓下親承顧問暨還出內府  
白金以賜三年之秋 上以鬼神情狀幽微難測意  
遺經當有明文妙柬僧中通三藏之說者問焉師與  
夢堂噩公行中仁公等應召而至館於大天界寺  
上命儀曹勞之旣而援據經論將入朝敷 奏師忽  
示微疾越四日趣左右具浴更衣索筆書偈曰真性  
圓明本無生滅木馬夜鳴西方日出書畢謂夢堂曰  
師兄我將去矣夢堂曰子去何之師曰西方爾夢堂  
曰西方有佛東方無佛邪師厲聲一喝泊然而化時  
七月二十六日也天界住持西白金公法門猶子也  
爲治後事無不盡禮時制火葬有禁禮部以聞 上



特命從其教茶毘之餘齒牙舌根數珠咸不壞設利  
羅粘綴遺骨纍纍然如珠其弟子文晟奉骨及諸不  
壞者歸於海鹽卜以八月二十八日建塔於天寧赤  
祚禪寺葬焉既葬嗣法上晉景獻復偕文晟以仁公  
所造行狀來徵銘仁公博通內外典文辭簡奧有西  
漢風其言當可信弗誣謹按狀師諱梵琦楚石其字  
也小字曇曜明州象山人姓朱氏父杲母張氏張夢  
日墮懷而生師方在襁褓中有神僧摩其頂言曰此  
佛日也它時能照燭昏衢乎父因名之曰曇曜云年  
七歲靈性穎發讀書卽了大義或問所嗜何言卽應  
聲曰君子喻於義至於屬句做書皆度越餘子遠近  
號爲奇童九歲棄俗入求祚受經於訥翁謨師尋依  
晉翁洵師於湖之崇恩洵師師從族祖也趙魏公見  
師器之爲鬻僧牒得羅染爲沙門繼往杭之昭慶受  
具足戒年已十有六矣洵師遷住道場師爲侍者居  
亾何命司藏室閱晉楞嚴經至緣見因明暗成無見  
處恍然有省歷覽羣書不假師授文句自通然膠於  
名相未能釋去纏縛聞元叟端公倡道雙徑師往問  
云言發非聲色不物其意何如元叟就以師語詰之  
師方擬議欲答叟咄之使出自是羣疑塞曾如填鉅

石會元英宗詔粉黃金爲泥書大藏經有司以師善  
書選上燕都一夕聞西城樓鼓動汗下如雨拊几笑  
曰徑山鼻孔今日入吾手矣因成一偈有拾得紅爐  
一點雪却是黃河六月水之句翩然東旋再入雙徑  
元叟見師氣宇充然謂曰西來密意喜子今已得之  
矣遠處以第二座且言妙喜大法盡在於師有來叅  
扣者多令辨決之元泰定中行宣政院稔師之名命  
出世海鹽之福臻遂升主求祚求祚師受經之地爲  
創大寶閣範銅鑄賢劫千佛而毘盧遮那及曼殊師  
利普賢千手眼觀音諸像竝寘其中復造塔婆七級  
崇二百四十餘尺功垂就勢偏將壓師禱之夜乃大  
風雨居氓聞鬼神相語曰天寧塔偏亟往救之遲明  
塔正如初遷杭之報國轉嘉興之本覺更構萬佛閣  
九楹宏偉壯麗儼如天宮下移人世帝師嘉其行業  
賜以佛日普照辯慧禪師之號佛日頗苻昔神僧之  
言識者異焉會報恩光孝虛席僉謂報恩一郡巨刹  
非師莫能居之師勉徇衆請而往尋退隱求祚築西  
齋爲終焉計至正癸卯州大夫強師主其寺時塔燬  
於兵師重成之景獻爲鑄寶壺冠於顛感天花異香  
之祥師舉景獻爲代復歸老於西齋云師爲人形軀



短小而神觀精朗舉明正法滂沛演迤有不知其所  
窮凡所蒞之處黑白嚮慕如水歸壑一彈指間湧殿  
飛樓上插雲際未嘗見師有作君子謂師縱橫自如  
應物無迹山川出雲雷蟠電掣神功收歛寂然無聲  
由是內而燕齊秦楚外而日本高麗咨決心要奔走  
座下得師片言裝潢襲藏不翅拱璧師可謂無愧妙  
喜諸孫者矣師世壽七十五僧臘六十三得法者若  
干人受度者若干人其說法機用則見於六會語錄  
游戲翰墨則見於和天台三聖永明壽陶潛林逋諸  
作別有淨土詩慈氏上生偈北遊鳳山西齋三集通  
合若干卷並傳於世余慕師之道甚久近獲執手護  
龍河上相與談玄因出贖語一編求正師覽已嘆曰  
不意儒者所造直至於此善自護持師之善誘推此  
一端亦可槩見及聞師歿與國史危公哀悼不自勝  
危公亦深知師者也銘曰大鑿密旨餘十傳妙喜起  
蹴龍象筵有如大將據中堅鐵卒十萬佩橐鞬或觸  
之者命髮懸誰欺五世稱象賢佛日曉出瀛海孺紅  
焰閃閃行中邊流光所至無幽玄憶初飛錫來北燕  
彤樓畫閣金星纏一擊三際皆廓然火中新敷清淨  
蓮紺色函空絕蔓牽自茲口噴百丈泉洗滌五濁離  
滯臆內而諸夏外朝鮮紛紛來者人駕肩示以實相  
非空言塔廟赫絕名山山川一佛能變萬與千會萬歸  
一道則全不識誣為有漏緣帝敕中使來傳宣鐘  
山說法超沈綿萬人瞻依曲兩拳一朝入滅同蛻蟬  
西方彈指即見前白玉樓閣琉璃田金鈴寶樹演真  
詮師之往矣神弗遷寂光常定無偏圓我作銘詩翠  
琰鐫昭朗盛業垂年年

惟則字天真本吳興費氏子出家澈川佑聖寺嘗徧

叅名宿皆因緣不契後聞匡廬無極源公為雪巖欽

公法嗣徑往叩之鍼芥忽投豁然大悟初師叩源源不作語值其在

在厠上師趨問云如何是祖師西來意被擒住曰道上師言下頓悟但攜手而巴源曰子有所得耶疾答

云何得之有源又曰子作道理耶師歸佑聖開法席拂袖徑出自此機辯瀾翻不復可禦

千緇圍繞得證者甚眾洪武初嘗薦預法事以足疾



賜歸一日忽告衆曰吾去矣侍者請偈厲聲曰平常  
說底不是耶卽瞑目逝有冰檠禪師語錄行世高足  
景隆亦著有語錄時又有比丘尼宋解者十一歲出  
家因無際禪師引叅師師舉狗子無佛性語言下有  
悟舊志謂其深得圭峯奧旨云

則師髮畱數寸不去  
髭鬚爲頭陀狀初漱  
有胡秋碧者善傳神嘗欲畫師像千幅施人畫將半  
而師化俄而日本夷人至見之皆羅拜曰此吾國祖  
師也安得在此競以金售之秋碧由此致饒黃鶴  
山樵王蒙贊師像口心生心滅種種法種種法隨生  
滅心若人能了生滅心種種法中無有法無心無法  
無縛脫亦無有無及分別無煩惱苦集滅道惟卽與  
非無所著地獄天宮皆淨土有性無性齊成佛放無  
量光照十方此是如來大圓覺天真手提金剛劒劃  
破疑雲震法雷大音徧作獅子吼龍象讐伏魔精摧  
傳敘稱揚及偈頌悉爲隨順清淨諦若言天真說法

者此乃誹謗非真實道人自是門庭別蘿戶松窻總  
竒絕時將無心拈似人笑指寒潭印秋月樊矣維  
城天真禪師語錄序曰自禪唱五宗人殊其旨豈獨  
非不立文字之初且卮言日出因之以窳年矣所以  
古德稱爲風力所轉而徑山判香嚴直謂是肉傀儡  
動作由人至斷仰山推出枕子又謂大瀉隣兒不覺  
醜誤天下學語之流此豈敢謾爲譏訶實欲令人著  
眼也後生眼正者旣難不得不求之行履行履未可  
頓造不得不屬之苦叅卽賢諸往賢巖頭於世無肯  
見地固已自超而况雪峯相隨鰲山且藉其言以成  
道乃法嗣則峯極盛而頭無聞焉安知非三上九上  
之餘功猛而得深也平原天真大師韶歲遭家國亂  
離途有出塵之想茂齡叅學十八返而不投最後乃  
契悟於無極源源雖不爲人師今亦不能推其所得  
何事余則謂此處正可以見天真矣余幼習儒入禪  
膚淺且以儒論之西河篤信之資卽先聖亦謂其不  
及然再傳而爲漆園宗風高峻幾若兩門固知頓漸  
之途不可以形迹論也今天真之言曰道火被火燒  
說水被水溺會禪被禪縛又曰我有一句子文章不  
能該義理不能及總使諸佛祖到來也只得拱手歸



降又曰看教被教縛參禪被禪縛若一面撒在無事  
甲裏猶是儻侗顛頂埋頭過日若也汲汲勤行苦行  
了則順水推舟不了徒自擔枷帶鎖此等話頭寧復  
爲文字滯乎寧復爲風力轉手試讀所錄之中拈塵  
散花五宗皆徹斐然可誦者誰知盡是師之卮言假  
使穿卻牛皮仍是難鑽故紙余固獨贊得道之因以  
使未悟者不逐語言而尋深造況邇師淵源亦徑山  
自出又不敢悖道以稱而隨聲以和也法寶沉埋二  
百年所善信士劉祖錫上舍搜逸拾殘梓行入藏將  
半字成滿乳出醍醐弘教之功於斯大矣昔日本觀  
師遺真號呼我祖乃松枝南指瑞像不行致令未喪  
之文紹隆有在意師化緣住此時節惟今乎苦天真  
取佛國土者上舍固見聞隨喜  
之人也余因其請而爲之序

法聚資聖寺僧嘗結庵澈湖荆山芝產座下人號玉

芝和尚後移錫武康天池示寂聚初投偈於王陽明

先生陽明有荅人問良知詩卽聚也良知卽是獨知  
時此知之外更

無知誰人不有良知  
在知得良知却是誰晚叅夢居禪師於金陵問如何

不落人圈纘居與一掌聚卽大悟開講天池應機接

引與王公畿蔡公汝楠唐公樞董公灃父子共證儒

釋大同之旨雋弱侯與劉祖錫書論其遺集云此門

中眼明第一踐履次之近日叅學者雖多求透脫如

此公者殆不可得樊侯維城玉芝語錄序云儒釋當  
相爲用而先代之學儒者斥釋學

釋者亦畏儒自尊其教不相往來久矣亦有如廣慧  
之於楊學士堯率之於張無盡晦堂之於黃山谷大

慧之於張侍郎雖曰護法實共傳心也但皆以儒資  
釋以釋明儒真若儒門冷澹而其微言妙義反屬之

竺乾者俱緣巨儒立教唯恐片言隻字涉於禪門始  
乎藩籬卒成天塹吁亦大可異矣 皇明聖人興三

教竝峙故雖重儒而原無異端之禁是以耆師宿匠  
得窺教外之旨及乎 武廟乃有陽明管唱良知自

海鹽縣圖經卷十四 四十八



開戶牖於時五葉式微一枝獨秀潯川之側有玉芝  
大師焉不唯紹臨濟之宗兼欲證餘姚之學篇辭再  
見答寄宛然是真殊途之同歸非援儒而入墨也今  
讀玉芝廓然堂銘廓爾知儒不墮衲衣窠曰而於本  
教亦未始有違不意萬古町畦從茲一掃余固喜陽  
明之法門廣大而收拾此人也余尤喜玉芝之願力  
弘深而不失正見也玉芝順世後六十年邑善信士  
劉祖錫上舍始求而梓之劉君固儒而釋者也為感  
宣聖迦文之子孫亦有能相慕若是不獨  
令天日諸人益美有宋庶亦可以解嘲乎

寶珠和尚常遊杭嘉二郡冬夏一衲乞食自活宿無  
恒居平時惟念佛不絕口人喚之纔應對即連聲念  
佛更無雜語後於海門寺忽若顛狂者將半月餘僧  
呵曰爾平生實行當與世人作眼目何得乃爾珠曰  
既如是吾行矣索浴畢安然立化

出雲棲  
往生集

天寧僧秀碧峯者自幼即不茹葷每日五鼓起誦經  
禮佛無間寒暑眾中最名有戒行嘉靖壬寅秋忽得  
疾臥牀月餘終日酣睡自言甚適忽一日起沐浴衣  
新衣跣趺端坐念阿彌陀佛數十聲既而止呼佛字  
亦數十聲與徒眾言別而逝越三日神色不變左手

捻中指作字右手仰開指猶軟頸骨挺然

徐咸西  
園雜記

明堅雲岫庵僧也庵初廢於正德辛未堅以是年始  
生至隆慶辛未堅從百法寺來卓錫於此庵復興堅  
精嚴戒律經年閉關趺坐緇素多敬信之  
如元蕭山史氏子少有室棄之入雲岫投堅公披剃



叅宏法師愛具足戒復歸雲岫力修淨土不窺戶闕者二十餘年所至密跡潛踪人自依依不能去

元山居詩

云枝上兩三聲巧鳥窻前五七片閒雲山翁潦倒無籌算盡把生涯訴與人

釋氏以畫名者元有道隱字仲孺號月澗俗姓李氏蘭石學趙子固墨竹宗王翠岩當湖人也

以詩名者永祚寺為多明秀姓王氏嘗與處士朱朴

陳鑑結社所謂雪江和尚是也後隱錢塘聖果山更

號石門山人有雪江集一卷戒襄姓李氏從文徵仲

游能書兼善蘭竹有平野集二卷四明沈明臣云永

祚自國初楚石倡詩教正嘉間有雪江者出而平

野襄公其耳孫也然襄公前尚有文湛永瑛後有飛

逸斯德而萬曆末年又有廣化者尤工詩化字無期

俗姓王梅溪人初雉染本山尋叅方四遠掛錫郡城

藕花庵最久後復歸本山建古東林社穿池種竹以

吟咏自娛未幾示寂近釋法衡欲彙禪藻集表此山

詩派之盛

楚石將軍行 城頭積雪滿一丈日出天晴馬蹄響將軍面如頰玉梓爛醉那知非

風猛健鷗森森刀劍翎似聞雲際駕鷺腥今朝得肉便可飽喚婦為公開大甌 曉過西湖詩船上見月

如可呼愛之且復留斯須青山倒影水連郭白藕作花香滿湖仙林寺遠鍾已動靈隱塔高燈欲無西風吹人不得寐坐聽魚蟹翻菰蒲 明秀泛舟至桐口

路轉青村合山連赤岸斜夕陽飛燕子茆屋落桐花晚野聞孤笛輕舟閣淺沙前峯望不遠林暝欲棲鴉訪夏雲山詩雲山老翁住南村抱病十日不出門



留客細傾若下酒遣懷閒弄膝前孫  
溪林四月笋成竹古屋百年槐  
露根鄉曲別來無限意白頭相對竟  
忘言  
夜宿勝果寺病置衣裳秋  
欄中石門長嘯倚寒松  
林烟吹斷發孤磬江日到門間  
數峰喜有山泉元詩借倦於塵土  
謝迎逢比來藥裹書囊外已覺心  
期萬事慵  
上竺次邃菴相國韻半空樓閣倚  
崔嵬海色霞光萬里開  
驚起頭陀掃花去傳呼宰相看山  
來旌幢曉日千峰擁騎從春風  
疊嶂迴不向山僧留玉帶恐教  
猿鶴亦疑猜  
顧子重歸青岩草堂喜寄草堂得  
歸喜動春娟娟花竹相鮮新  
矮床地遠坐開卷老鶴天清鳴  
近人客來酣酒弄泉石時違擊  
劒歌鳳鱗長鏡短褐自食力  
卒歲已作無懷民文湛沙村雪  
夜詩殘雪沙村夜衾寒  
抵自憐孤燈耿不滅虛榻自忘  
眠漏斷三更月鷄鳴萬里天  
梅花如有意影落小窓前  
永瑛勝果寺中峰閣古寺梯雲  
磴長松帶女蘿山空秋氣早  
江闊月光多白鳥逾青壁紅霞  
閃碧波西巖昏磬罷猶聽采樵  
歌石門野眺高山日落宋王宮  
獨倚層臺野眺中背郭江山起  
烟霧映碧草樹自霜風羣飛鷗  
鳥迎潮白欲盡殘陽半壁紅  
抱杖閒吟非嘆世  
壯年多病即衰翁  
戒襄雲水僧

老僧倦行脚日暮投山門未知有道否  
貌古氣自温洗鉢臨澗底補衣坐松根  
竟日作諸事不曾施一言  
吳江歌吳江西望水如煙  
青草綠波連碧天舟行半沒  
莽蒼際人家已落虛無邊  
滔滔東流日光冷七十二峯  
秋墮影安得吳箋百尺長  
描取太湖三萬頃初夏舊栽  
岩桂已添枝新聞祇園笋過  
籬息念偶同啼鳥歇談空正  
值落花時年逢閏月春歸緩  
雨積溪山暑到遲不羨北窻  
高臥者白蓮結制有長期  
戒逸山居詩小窻擁被晝偏  
未高枕寂寥聽雨眠匣中古  
鏡有片月壁上素琴無一絃  
春溪何事寒更作花落幾番  
風夜顛東郭美人期不至維  
摩有室空榻懸斯德春日游  
城南園贈主人詩霽雨日  
暎暎佳晨處士園池通九折  
水地接五家邨茂草全迷徑  
高花半出垣知君學桃李寂  
寞自無言郊居九日閒門秋  
草澹霜華斷岸浮橋傍水涯  
空外忽聞先到雁籬邊聊採  
未開花廣化夜宿田家因贈  
相逢不知姓竹榻欵高眠白  
髮人雙口青山水一田  
槿籬浮宿雨步屋濕秋煙  
近說寬租稅牀頭有酒錢  
夜投慧花庵謁師黃昏仍買  
渡一水就南邨路黑人歸語  
天寒僧閉門斷煙橫徑口積  
雪凍籬根感切雲萍語青



燈躬  
夢竟

斯學字悅支慈會寺僧工詩好行脚南陟台雁北至

岱岳清涼歸築道林庵於靈祐樂苦吟遠煩喧也有

幻華集二卷姚士舜為之序云披雲夕露等詩固將

幾庶林遠山行雨夜諸什不必卑遜休已山行詩韻道殊登頓

盤盤百嶠連空林人打栗溪樹鳥驚蟬移盼失佳境

息陰聞暗泉客衣渾欲濕嵐嵐翠滴秋煙雨夜詩客

子久投宿主人還賃春薄余寒入夢深雨遠沉鍾壁

上燈窺鼠林頭鉢隱龍因思故山好雲濕幾株松

士舜又云學公詩肆力三唐句高前宿如雪與月俱

白江因人更清酒盡白日暮賦就青天秋天空寒浪

濶山遠夕陽流客來黃葉雨鬼嘯白楊風雄奇悲壯足開心眼也

徐月汀字湛虛棲真觀道士能詩觀圯壞月汀倒橐

與葺其自述有人愚自墮移山計天漏誰傳補石方

之句題自像我也明知假而何便說真誰教為我者認作是前人氣鬼幽原土丹青古廟塵寒江半

輪月那用更傳神蚤秋山院梧桐陰未稀西風連日撼柴扉水香湖上蓮房嫩雨足籬根荳莢肥愛月

未能捐故扇聽砧因想到寒衣葺鱸味似當時否張翰扁舟不見歸暮春出城飲田家朝曦流彩射踈

櫺睡起披襟步出城山鳥亂啼如有意墅花無數不知名信潮催上風初急細雨欲來詩未成一笑且投

村舍飲坐聽田父話春耕

列女  
吳陸氏鬱生績之女也生於鬱林名鬱生年十三適

同郡張白三月遭罹家禍白遷死異郡陸苦節自終



朝淑婦貞女表迹家閭蓋所以闡崇化業廣殖清風使苟有令性幽明俱著苟懷懿姿士女同榮故王燭建寒松之節而齊王表其里義姑立殊絕之操而魯侯高其門臣竊見故鬱林太守陸績女子鬱生少履貞特之行幼立匪石之節年始十三適同郡張白侍廟三月婦禮未卒白遭罹家禍遷死異郡鬱生抗聲昭節義形于色冠蓋交橫誓而不許奉白姊妹巖巖之中蹈履水火志懷霜雪義心固於金石體信貫於神明送終以禮邦士慕則臣聞昭德以行顯行以爵苟非名爵則勸善不嚴故士之有誅魯人志其勇杞婦見書齊人哀其哭乞蒙聖朝斟酌前訓上開天聽下垂坤厚褒鬱生以義姑之號以厲兩髦之節則皇風穆暢士女改視矣按張白溫之弟也素有才名溫奉使稱美蜀政大帝恨之以事幽溫有司斥還本郡白因坐與俱廢溫姊妹三人皆有節行已嫁者皆見錄奪中妹先適顧承官以許嫁丁氏飲藥而死表云鬱生奉白姊妹巖巖中者此也

宋周氏郭瑒妻三益之母賢明善料事三益初丞常

熟以濬青龍江獲譴常平使者周策使者必悔已而果然三益奉其教官至使相人稱周爲賢母云

明褚泰亨妻周氏洪武初旌表

按周氏舊志並無姚叔祥同郡士陳那俊

檢高皇實錄內載洪武九年十一月初十日海鹽縣民褚泰亨妻周氏夫亡守節旌表其門一事因寄示遂補入之但永樂年所修志去國初不遠亦復失收不曉何故

董淑真董鎮之女贅朱士廉年二十四寡生子敏學

纔九月董誓不易志迎養其姑盡孝焉洪武二十一

年旌表

沈氏淑廉萬衡妻年二十一守節

向氏妙蓮費遠妻年二十三守節並成化中旌表



陸氏妙端海寧衛百戶劉璽妻璽客死陸守節奉舅  
姑教二子成立弘治初旌表

駱氏玉潤士人胡繼海妻繼海死貧無以存苦節不  
可奪孀居六十餘年壽至八十弘治初奉 詔表門

此嘉靖九年志載震亨五世祖妣傳謹錄原文如右

震亨聞先人言駱太母守節時家貧室淺隣有失

雞犬出穢言叫罵者太母聞之輒持錢償所失祝令

勿罵隣人愧謝傳相戒一巷中遂無出穢言詈人者

又比隣乞火不能拒則置盆火門外應之隣人又相

戒勿向胡節婦家取火盆亦廢半時足木嘗一踰門

限賜旌日有司奉 詔臨門出門外伏迎禮成又大

悔恨之語吾高祖曰自汝多事累老母露頭面也孀

守之概如此又聞前輩言 國初奏旌節婦必三四

覆勘始得旌駱太母奏聞時值 朝遣水利僉事某

公修海塘 勅書後附有前到海鹽并體訪某按院

奏討節婦駱氏旌表是否與論允合順帶回奏等語

先朝慎重旌典不輕畀人故人亦以旌為榮此皆不

可不記者震亨謹記 張寧集駱節婦贊曰七年配

合卒世孤孀浮漚幼稚懸罄空堂存亾苦心凍餓餘

事九死一生朝惕夕勵必得之壽可勸之賢保宗全

節皎日

青天

寒香晚翠者太守張寧二妾也寒香高氏寧同邑人

晚翠李氏蘇人並十四五時侍寧僅三年而寧歿歿

時囑劉夫人必嫁高李二妾二妾聞而慟不勝服除

劉夫人與諸妾尚以麻約髮獨令二妾者改飾焉二

妾泣問故劉亦泣謂曰主公臨終之言不在耳乎二

妾大慟曰賤妾蒙主公取憐有年恨不能即死以從

公有他志耶遂剪髮自誓屏居一樓終身家人罕見



其面晚翠先卒寒香八十七歲卒自剪髮距就木七  
十年云嘉靖中 詔表曰雙節寧女恒清嫁爲海寧

衛指揮姚麟妻亦蚤寡著貞操焉

許相卿曰婦貞先於節愛鍾則專昵

稔則重節生焉張先生難子多內方御高氏李氏時年幾七十矣不三四年而捐之情於何有乃皆競節終其身雖質性殊絕得於先生躬修範家之肅然亦可謂難也已

吳寬繼妻鄭氏布政使昂繼母寬蚤卒撫昂顯名拜  
太安人封謹約不改初節人稱其賢嘉靖中 詔表

之

倪氏莊鴻妻年十七歸鴻又二年而鴻死遺腹四月  
生一子曰山與寡姑許氏撫之有成志操皎然嘉靖

中旌表

王氏玉貞諸生銓之女嫁沈國相年餘而寡以無所  
育歸依銓舅死姑無依又歸沈與姑相依後姑死仍  
歸依銓故里中稱玉貞爲貞婦孝女萬曆中 詔旌

其門而沈故無門可坊銓割郊外地爲樹坊掘得古

碑有沈節婦王氏墓銘姓氏適合人異之多傳咏者

姚士奔詩曰怪腰都死瘦比節盡主家匪石心猶我如綸矢不他姓名驕合璧冰雪老雙花咫尺城南地風清草亦嘉

劉世坊妻項氏年十四歸坊逾七載坊歿遺幼孤祖  
錫至戚念氏弱質韶年且姑老子幼勢難倚仗從旁



勸奪者不啻百口氏指天泣血誓無他心謂其姑曰  
婦不卽死者爲劉家一呱呱在非敢偷生也自是毀  
容截髮衣縞茹荼獨處一室卽親隣罕覩其面機杼  
績紡攻苦終身萬曆四十年有司具奏項孺人受賜旌  
旌宇內文章家並有撰述侈其事文多不能具載今  
所載乃直指鄭公奏旌原傳也祖錫事母甚孝嘗割  
股療母疾傾產營葬事至今遇父母忌辰必嗚咽終  
日孺慕不衰樊侯甚敬之以孝經傳屬訂讐而特爲  
其父母贊像焉劉敬止上舍贊儒者論政家信親  
安不於其位矧以其年敬止克家止孝感父周旋廣  
仁遺孤繩武項孺人劉母贊西方慈父淨域接人  
惟貞與惠慈淨之因孺人信心當取佛土生決定生  
去則不去按雲棲廣莫西生傳云項氏暮年從子  
謁蓮池大師乞名廣信領念佛三昧以歸手書法華  
經禮誦冰霜之操益爲凜然由是譽播鄉評旌榮  
帝錫詩從子聞道雲棲者三後聞法華講義有省示  
疾稱彌陀名泊然而逝曰我徑自直  
念去矣樊侯深於內典故其贊云云

雷州太守常士昌妻隋氏文登人士昌卒於雷隋間

關扶櫬歸葬教子孫相繼登科第以家於秀水詔

下秀水旌門乍浦千戶王璽妻馬氏舍餘劉瓌妻李

氏並以貞節旌門於乍浦附志以上係旌表節婦

天一而已故從一而終身婦之義也義生於心不負其心焉耳矣表弗表弗論也必表之樹世坊也

莊氏陳思恭妻本泉南人思恭自海鹽客泉贅焉思

恭嘗賈海三年不返人以思恭死矣諷之嫁莊叱之

又二年而思恭歸未幾復去則竟死於海前諷者

復來曰今固可以嫁矣莊愈罵絕之乃自泉携其孤



彥廉歸鹽守節時年僅二十五彥廉好古能爲詩黃

公望爲撰讐海賦者是也

高季廸節婦行妾家溫陵近南浦嫁得良人業爲賈

良人長年愛遠遊不敢新粧映門戶販寶逢聞去百蠻朝朝海上望青山不仁無柰蛟龍橫漂沒孤舟不得還君非渡河老狂父波濤如山何不顧尋屍便欲赴窮淵膝下嬌兒誰與哺十載空閨守寸心滄溟水淺恨情深願身不化石頭石化

作孤飛精衛禽

載永樂志

魯氏名淑清本海鹽人父彥中徙餘杭而嫁淑清故

里楊氏永樂丙申夏倭夷犯海鹽武原鄉鹵掠男女

淑清亦在虜中抱一子未晬泣而委之曰幸天活我

兒潮至遂躍入水以死時年二十一所棄兒卒全無

恙

沈氏淑寧海鹽人年十九歸崇德方瑄十八日而瑄

死歸依母母潛以許人淑寧覺之給其母往告外氏

遂閉戶沐浴更衣縊死楊循吉爲立傳

以上二傳載趙郡守瀛嘉

典圖記內魯烈婦據王文祿文獻志以爲元至正間人姚叔祥引嘉善周鼎集亦云永樂間人海鹽十三都馬彥彰之妻所棄兒名瞻

瞻生子圭備記之以俟再考

蔣氏妙安御史丁麟妻麟見法蔣時年二十四痛夫

死非命潔守自勵壽九十餘事聞覈實而妙安死格

例不果旌焉

王氏妙貞沈裕妻裕死王年二十一守節奉舅姑生

養死葬不違禮後以無子歸依其弟全有司方具奏



亦以身歿不果旌

張寧撰墓銘曰沈裕之妻王忠之

沒為孤鬼歸葬無依附于考妣嗚呼嗟哉女中君子

姚垂妻周氏福蓮年二十二垂死生一女曰孝孝甫

八月父孟經憐其貧迎歸養之潛諾於里之求聘者

福蓮覺之度不可止撫孝孝哭曰兒安歸乎父亦知

其意潛防之夜更餘起索之不得則已抱孝孝投河

灰矣俄得屍子母抱持如生翼日火葬有一大蝶五

色爛然從火中出向垂家所居方飛去見者無不歎

異時弘治元年二月九日也

沈氏妙智鍾昇妻二十九而昇亾遺腹生子景辰卒

撫以成壽九十三

沈端妻陳氏妙善任丘人二十四守節垂四十年人

無間言

陳氏玉瓊沈珉妻二十四而寡志操始終如一鄭延

嘗稱為女中君子

以上載朱祚縣志

胡氏吳孟完妻完死撫其子允昂長為邑庠生娶楊

氏乃昂亦死婦姑相守一節知府陳琳為撰重節傳

王氏徐潮妻年二十四而寡卒撫其孤晟以成稱苦

節巡按楊御史以聞未下

馮氏徐璧妻嘗與璧割股救親璧蚤亾織絰自活卒



年九十王氏張鎮妻鎮蚤亾而復貧竭力事翁卒年五十俱稱孝節

林氏魏全妻陳氏王軌妻俱蚤寡苦節孀居餘五十年猶一日也

許氏王濂妻少寡卒能撫其遺腹之子終身無間言錢氏屠氏陳立妻妾也立死錢年二十五屠年十八

同心一節知府徐盈以聞未下

以上載徐泰縣志

丁氏張寧母教子甚嚴寧以給事中使歸臨行出金錢與寧曰途中以此爲費毋妄取妨官箴寧妻王氏尤敦尚儉約從寧守汀州有同官妻私會服飾多珍

異旣去語妾輩曰此婦好粧飾適彰夫醜耳豈可慕之耶寧女恒吉適杭州劉舉無子潛買一妾置室中進舉後恒吉卒生子焉寧又有玄孫女六姐嫁某姓遭戚施之辱墜樓殞楊必泰有長歌輓之其事晦而不彰云

鄭安人李氏南莊先生女歸鄭讓生子延卽東谷先生也朱祚云安人以道義相夫故夫爲善人以詩禮勗子故子爲名士

二劉氏一尚書鄭曉元配一繼室也尚書官郎署時以議大禮杖闕下大劉氏調掖獲安後謫判和州次



劉氏爲納貳室隨侍清苦共甘尚書每歎二婦爲患  
難友尚書貳室沈生少卿履淳貳室顧生比部履準  
上舍履洵並有賢德詳家傳

王氏慕貞徐昂妻事昂若大賓教子慈而嚴以咸貴  
受封猶敬戒不衰

沈氏指揮王俊妻教諸子曰士非武非儒則習一藝  
以自養每見紈綺子遇凶歲多死道路不可不戒俊  
之子軒妻黎氏三十孀居有婦節

沈氏指揮王勇繼妻勇早卒子大猷八齡撫之成進  
士陸氏指揮徐恭繼妻孀居嚴肅垂老如初張氏指  
揮嚴震母徐氏指揮崔鼎母屈氏指揮劉銳母並以  
能聞而沈陸以節著

陸氏賽金王文祿母初娠倣古胎教法理絃絲養聽  
就外塾脫簪飾購典策資其淹博後文祿舉於鄉有  
規隱重徭者懷金來請教文祿謝卻之故文祿終身  
不至有司言事文祿嘗述母所語 國初事爲龍興  
慈記一卷行世

李三女者海寧衛卒李政妻敏慧有姿色簡言謹履  
居管伍人罕見其面生一子名雲弘治乙卯政病疫  
自外歸戒李母近我恐相染李應曰夫婦命相連汝



死我决不獨生柰何相遠政死不寢食者六日既送葬歸籍家中資物托政妹撫雲自縊死

向升妻王氏名月妝幼讀書通大義年十六歸升甫一年升卒設一榻于升柩之側舒帷蔽之朝夕坐卧其間欲縊者屢爲姑所覺止居一年姑聽宗老言以十二歲從子來後升王泣曰叔少吾六歲焉能混處吾死今其時矣辟食三日俟姑寢櫛沐具衣于升柩前縊焉嘉靖戊戌冬十一月五日也升卒時以一汗幌遺王曰苟無忘見此則見吾矣婦受幌朝夕持之至是猶在手姑檢其笥得數詩皆自傷命薄誓死不

二之言

沈氏名雲年十七聘同邑張生某未嫁張病瘵死邑中聞其工容且賢爭來求聘父母將許之雲覺投河死嘉靖丁酉春也孫臺嘗爲作傳王寵欲買碑立之

未果孫王皆亡傳逸

朱朴集沈烈女詩曰沈家有女

人死作夫家鬼有眼不識夫君面妾心如石不可轉有足不及夫家門妾心安得如車輪東流之水來胥溪萬年不復流向西妾身願隨水流去直到黃泉葬夫處

七烈女者並嘉靖中倭陷乍城時義不受辱而死者也曰童氏後所郭臣妻投池死曰柳氏軍人暉之女曰一女二女軍人陳起女投井死曰李氏生員金之



女曰沈氏軍人表之女曰周氏舍餘戴鑑妻俱投河  
死又有俞姓者匿承塵上避倭見數倭驅婦人在其  
家恣污有一女亦掠在旁乘間觸門門破頭亦破而  
死後賊退俞姓者義此女不忍易其門嘗指向人稱  
之知是時殉節死失姓名者多矣

虞氏名嫻少慧知書年十六歸泉山董湄董故大族  
而湄年少得惑疾成婚兩月無端自經死嫻傷薄命  
屏鮮華重扃自處瘁瘠如枯禪苾芻尼嘗刻木肖夫  
像事之久而有靈顙忽欽欽出汗兩袖時舉湄父以  
爲怪投之火嫻善吟詩其咏菊者云移種春苗愛護  
周柴桑無主爲誰秋抱香甘向枝頭死羞墜飄風逐  
水流讀者知其貞志焉

邵氏劉鎮妻鎮亡時年十六清苦不渝人難之嘉靖  
己未卒

陳氏澈浦所百戶胡偉妻年十九偉卒子靖方八月  
撫孤襲蔭壽六十三卒

王氏趙子龍妻十六子龍歿子幼且貧紡織養姑訓  
子未奏旌

以上載王文祿文  
獻志海寧衛志

陳籍妻吳氏事姑以孝聞鯉之母也

吳氏獨漚涇吳本女適硤石生員周東舉一子踰年



而東卒子亦隨死吳年十八奉舅姑盡禮雖人子弗如

陳用龍妻王氏年十八歸用龍三年而夫卒卒之五

十日而生子太學生澧抱一節終身壽五十二卒

蔣杰妻翁氏年二十九杰死家貧止遺一歲孤蔣毅

以上載董毅漱水志

苦節自守五十餘年

吳氏李謙妻謙少豪俠早痿而死家業日凋落吳無出筮婺六十餘秋無怨悔年八十九卒正德中知縣朱寔昌匾獎嘉靖中知縣董珪餽粟帛賙之

盧氏張宏妻二十四歲夫亡生子采甫三月家貧矢志撫孤繼姑欲奪其志盧斷髮不從且躬織絰曲事之姑感泣兩臺咸給扁以旌年八十三卒卽舉人季文曾祖母也

徐氏季貞鍾師孟妻師孟勤學瘵疾死徐哭之歐血數升剪髮二握一納之柩置夫手中一以囊盛之自懸臂間窮苦萬端不改節子曉家貧欲揚之未果曉一女亦幼寡剪髮自誓如其大母先曉卒今其後俱斬絕惜已

吳氏指揮姚弘妻弘死於陶宅之戰家匱乏吳紡織充給安葬五喪時稱女中丈夫



步橋妻朱氏海寧朱天弘女嘉靖三十五年正月遇倭寇欲污之不從抱幼子投虞溪橋下倭欲以鎗楛引之起朱罵不絕口倭輪鎗戳之貫其頭顱母子同死

徐氏玉成太守咸長女夫賀訥發武科訥卒子培方四歲撫之成立茹荼苦者三十餘年

仇氏生員徐乾元妻乾元嗜學早喪仇無出依父孀老疾扶侍十數年節而且孝

王氏生員馬如雲妻年二十一夫亡孀居三十四載堅持苦節指揮大邦女也

任氏張桂妻年十六嫁桂甫四十日而桂死矢心同穴不改其操垂六十年卒有司扁以旌之

朱氏生員王復昌妻夫亡歸依弟佐弟事之如母嚴飭閨訓笄守至老後佐妾陳氏復依之以節聞有司旌問

王氏何文謂妻年十六歸何二載夫亡遺孤梅甫八月族人利其貲迫他適王剪髮誓死以守知縣王宗載匾旌之

以上載仇俊卿萬曆志

錢氏朱學行妻嫁甫暮而夫歿時年十九立後存夫祀誓守終身不改



徐氏姜應熊妻初納采夫卽患瘍兩家欲更議氏不可乃婚僅四年應熊死撫孤孟登成立孟登事母孝母喪多年設主出入必告對之語泣如生有時食跪獻主方敢嘗有司給粟帛旌異之

李氏徐鏜妻撫孤守節終身

馬節婦平湖人嫁爲生員劉濂妻十七而寡矢志守節翁貧利其再適必欲奪之至終日不與食而志不改嘗閉門自經繫絕墜地得蘇一日翁陰納沈某聘其姑誘與俱出抱持過沈舟氏叫呼投河不得忽風雨至雷擊沈舟欲覆者數四沈懼廼旋舟還之事聞於縣縣令氏別居時氏父兄歿無可歸假寓一室不完苦壁每雨則危坐達旦以爲常或不能具糜率三四日不食而不死鄰婦強以食進之乃復食今年七十有三

劉氏陶涇里宦族女嫁當湖沈民表十九而寡貧止田二畝而無子母家人欲迎歸養之氏不可有所遺亦鮮受縮衣節口勤紡織自活今八十歲矣當民表死時葬未備積二十有四年得數金始克改葬啟棺自整拭骨骼綿綴成形易新櫬具槨以窆哭絕於地隣嫗救之得甦有一婢阿妹八歲事寡婦長而贅壻



吳良良死卽不復櫛髮人呼之爲鋤頭有感於劉而  
貞也阿妹姓江父家小柵橋

以上沈堯中郡志內劉氏志僅載其名茲采其

家傳及研竇齋集補入

孝婦萬氏者萬炳之女陳允武之妻也十六歸允武  
值姑歿撫允武弟妹三人不啻已之子女其翁受役  
於官輸兵餉軍門道遇倭失餉時軍興法甚嚴翁已  
分必死萬泣謂夫曰寧無家可無翁乎亟鬻嫁裝及  
私產得金踞獻軍門以贖翁得不死人因稱之爲孝  
婦云允武前見

祝氏顧槃繼妻槃登順天賢書歲餘歿祝時年二十  
六撫繼子熙以節著熙先卒祝至今操家秉訓諸孫  
元聞元碩等文有名熙妻徐亦有婦德

潘氏貞玉諸生陸郡繼妻周氏貞姑郡弟部之妻也  
郡死潘欲殉不得刻木爲夫像事之部死周截髮茹  
素終身潘有子夢鸞與周共撫之得成立夢鸞亦甚  
孝於二母云

董氏府椽劉浩妻浩亡董二十四無子一女適俞希  
賢氏撫婿如子教婿子孫如子孫苦節終身邑人稱  
之孝廉之泰卽希賢孫也

周氏童指揮尚斌妻尚斌歿子養初僅四歲優給俸



養薄時若不給周勤儉操家教子成長蔭襲爲松海把總祿養十數年以壽終

吳儒妻蕭氏吳桃妻儲氏並以貞節爲縣令何公所褒儒與桃兄弟也相繼蚤亡而儒無子桃僅一子周歲蕭因抱爲子與儲共撫之迄成立人尤稱兩發貞而慈云

金氏沈弘遠妾年二十弘遠死母欲奪其志終身不見其母弘遠有女嫁朱萬言三年而寡卽屏居小樓不歸寧萬曆中縣並扁旌

陸氏馮春暘妻嫁僅歲餘春暘死有遺腹子又死陸氏哭之慟數欲自盡不得春暘父叅知公憐陸氏單寡以幼女女陸氏長而擇壻陸鏊鏊卽氏之侄後登賢書感念氏恩厚不忘云叅知有貳室顧發節與陸同凜女卽顧所出也

曹氏徐重臣妻重臣讀書攻苦年二十一死止一女又死曹忍死立伯之子逢盛存夫祀而不勝痛瘁僅二年亦死焉氏兄憲來語及之未嘗不淚淫淫下稱幽貞之未獲表也

顧氏宜黃令所有之女字當湖陸僉憲夢韓季子堯俊所有無子以女爲子因贅焉堯俊豪華公子幼孤



家業幾蕩尋得瘵疾蚤死氏抱堯俊弟之子爲子存其祀而身侍養于父若母至終天無闕禮女子之遇如氏者爲最窮而節孝亦最爲兩盡

李氏劉東靈妻東靈死貧無依歸養于弟家斗室經年外人不聞其語

庠生馬孟駿妻李氏年十七守節貞志可尚

董氏海寧舉人成龍之女嫁太學生陳昌胤年二十

九守制孝於舅姑冰霜之節凜然

萬曆四十年縣令喬採輿論給扁旌

楊氏朱守謙妻年二十六夫死守

節四十餘年貞操如一縣令何扁旌

孫氏王廷璧妻年二十夫亡守制無玷天啟

二年縣給扁旌

葛氏上舍朱映璧妻年十九夫死定繼以存夫祀天

啟三年縣給扁旌

以上俱本縣准呈續入

鄭氏端簡公之姊主事錢本之妻布政焮之母也性

端嚴儉約主事歿時布政方八齡撫之成進士時特

舉主事清白勤民遺軌相誠勗嘗曰汝父在威歲蝗

旱退公未嘗不涕洟廢寢食搏頰禱天自俸錢外又

未嘗見汝父分毫取於民汝識此大端庶無忝爾父

布政迄受教成賢宦以此

以下並大家閭懿衍王世廉文獻志例續入

錢氏太守芹之女布政焮之妻主事世埏之母性和而尤儉嘗從焮宦歸舟次其妹沈宜人宜人家宜人邀之



飯女從皆更裝以俟少頃氏綦縞入門單率如寡婦  
女從咸揜口咲沈宜人獨憮然自恨弗如家居賓祭  
外罕聞砧俎聲一榻絺帷夏冬無改氏父舅夫子並  
甲科門閥罕儷而質素踰等足貽世範

徐安人世埏妻聰慧饒智略凡五行醫藥堪輿家言  
並通曉主事葬地所手自定也性尤儉嗇善治生嘗  
抱兒子爲子意若愛之而撫其側室子祖鐘愛之踰  
兄子得大體已

談淑人侍郎相之女幼通經史有丈夫識鑒歸指揮  
彭大年時相方侍直 世皇寵貴赫奕一時氏謙約

自將舅家方食貧奩裝媵僕悉推佐舅游宦而身布  
素操作織紝佐其子昭毅公紹賢讀歲大祿竭力供  
堂上粒食自取糠稗作餅療饑因以一餅識壁間每  
指示子孫無忘此輒作汰也性仁愛聞人疾痛患難  
必拯救持家尤嚴而有恩八十餘猶夜觀書舉古忠  
孝節行事教孫曾輩往往丙夜焉昭毅每進綺繒甘  
旨却御曰吾來汝家時業安蔬布不忍變也其志  
行如此

鄭淑人端簡公之女昭毅將軍彭紹賢之妻御史宗  
孟之母也生有懿德與昭毅莊事如賓而事舅姑尤



善體隱志推恩於其支子及幼女爲養贍奩遣不惜  
費嘗慮世祿家無恒產鮮知學爲買田課耕及購書  
籍俟生子長大教之竟不遂蚤卒然侍御兄弟諸子  
孫並敦本力學科名濟濟成端簡宅相兆實淑人佐  
昭毅開之也

沈氏比部郎鄭履準妻居家營綜精密尤識大體比  
部善病艱嗣百計求宜子者以進生二子忠材恕材  
二子幼孤孱弱旣室又艱抱孫復令二子置勝日以  
比部胤緒未廣延爲憂致生疾殞嫡母字庶子恩篤  
摯無如沈者佗周卹比部故舊內外宗厚德事尤不  
能悉記

趙氏序班賀萬春妻本平湖世家女歸賀事夫治家  
逮下並合禮則尤孝於其姑雖姑之侍婢弗敢訶斥  
也姑嘗病瞽祝而舐之者五歲遂復明人傳以爲孝  
感焉

呂氏指揮崔成俊妻成俊父以領漕失米法當代償  
始免罪呂罄奩資賣之授成俊奔京師買米輸官救  
之歸成俊收養貧宗撫弟姪有恩皆氏相之也

沈拱辰妻宋氏居西門曲尺巷幼喪母卽歸夫家姑  
女畜之長而婚事姑甚孝姑病竭力迎醫未愈氏割



股肉投藥中煮進之姑以爲甘疾遂起氏亦不言無  
有知者其後姑之姊來與同卧見其創知之鄉里因  
聞其事請之邑令王公臨亭表其閭焉

以下孝婦烈女節婦十三

人係續入家傳并附

錢烈女者半邏錢君儀之女許聘於陳陳初裕後貧  
其姑爲所不可爲以自活嘉靖庚寅冬將婚矣有里  
人言其事於君儀者烈女聞之嘆曰盟不可變義不  
可辱吾有以死謝耳先婚期三日縊而死

姚氏沈家亭人幼字崇德潘氏子潘貧姚父欲絕婚  
氏時年十二聞父言卽自扃一室中不復出守至五  
十五歲死

徐氏者學掾鳳之女許字千戶胡獻奇獻奇領漕入  
都約明年竣役成婚竟客死都中訃至徐慟哭不食  
數日縊而死時萬曆甲辰冬十月也

吳貞女者吳泮林之女幼許聘徐尚臣之子某女年  
十五而某死女欲赴喪父不可女給曰姑一視了我  
心非必終守不獲已母率之行至則伏棺大哭誓必  
終守而尚臣諸子多不便同居父迎歸爲別室居之  
聽其守節焉同時有王氏平湖王昌祚女許聘鹽人  
吳中宰未嫁中宰死亦別父母過中宰家守制後哀



至輒絕口不食不數年死縣令何並旌之

陸氏者陸維寧之女四歲許聘朱孝廉國華之子祥符女生而端麗祥符亦美秀翩翩工文善琴書雜藝兩家相誇傳以爲良偶求婚而祥符死女時年十四祥符死之夕女夢見其來別覺而訃至慟哭幾絕卽易服誓守終身不更適維寧憐其志不忍奪久之以淚枯失明卒年僅二十二國華哀之迎柩歸與祥符合葬焉

王氏沈九疇妾九疇艱於子娶王生子夢融方四歲九疇病革語其嫡曰王年少我死必嫁之王曰我必不嫁九疇固以爲言王曰我已言不嫁何弗信我言也立取刀割其舌擲地示信九疇驚起嗚咽書遺命付其嫡囑勿慢此妾然後就瞑後與其嫡相依倚艱苦操作撫夢融成立至五十九而卒夢融讀方書精於佛法家貧度不能請旌以揚其母然亦何待旌後傳乎

康氏以青衣侍孝廉錢與映不數年而孝廉歿誓守以明節康端重自持當孝廉存日未嘗殖私蓄曰爲人妾殖私蓄者皆肉未寒而圖他從者也吾不爲今年五十矣孝廉諸子多敬之



周氏吳士妻士爲諸生以註誤投口外不歸周時年二十三獨居守貞撫一女旣長嫁仇士魁僅數歲士魁又死守一孤兒讀書爲人塾師失其名邑人馮志立嘗稱兩婆苦節可旌惜無人知者

鍾氏王應麟妻應麟貧甚蚤卒遺腹生子士弘鍾艱貧萬狀撫之成立爲諸生最稱苦節而寒儒不能爲母揚邑中人徒有惋歎後侍御彭公宗孟爲言於有司僅得一旌扁之賜未果奏聞

沈氏主事劉世埏妾世埏艱子納沈生子祖鐘未周歲世埏歿時嫡徐操家棟先已抱其姪其爲子矣沈持節嚴操心尤苦時撫祖鐘竊歎曰而父棄我母子時不留一語今此情境而父卽在堪置一語否氏泣祖鐘亦泣如是者二十餘年以爲常卒使孽安於分嫡全於慈保主事公一綫緒功爲大沈凝重寡言足不踰中閫身所衣一補綴衣其初笄侍主事時服也蓋至老不去體以示貞志云發居僅二十今六十有二有司採輿言方擬奏旌

屠氏諸生朱應箕繼妻屠秀水世族氏祖父並鼎貴嫁應箕倍年更善病前又有三女一子俱長而氏甚宜之事姑孝撫前子女慈事應箕敬應箕死欲以身



殉姑禁之不得經紀喪葬教其二子學宣學章爲諸生章尤博學能文辭有名蓋三十有三年氏未嘗一歸於屠曰去秀水七十里而遠往返信宿未亾人不能諸屠來省或不面其貞守孤異如此天啟四年有司爲請旌云

樊侯撰胡氏重節傳

節婦仇氏比部胡公憲仲副室子曰贈文林郎諱彭述孫曰安德守震亨比部初爲孝廉納仇而孕卽北上明年贈君生而比部登第又卽之官南曹歿仇侍比部公無幾何時而孀居至四十有八年終節最苦云當比部棄世時嫡王亦相繼殞仇側貳又年少擁孤筦家政非清操凜如家內外胡以帖然服持門戶存延比部裔至今非偶矣

節婦劉氏贈公彭述妻震亨母也本方伯公烱愛女贈公蚤孤家貧劉來歸盡出奩資給朝夕孝養其孀姑仇生震亨僅十二歲而贈公歿則又與仇同孀守撫震亨仇性孤嚴劉性重默稍和仇或加夏楚震亨劉必泣而解曰爲兩世留人種足矣日携震亨撫夫柩哭震亨無知猶於其旁孫則哭益以悲後震亨成人入仕有祿養歲時悲而哭又如故曰以吾兒今日



養不逮父不逮王母爾震亨至不敢一稱觴上壽傷其心蓋安德守自語於余者云安德守以劉年高不能赴安德自棄其官歸而先在汝陰奏最拜勅書封劉為太孺人勅曰國家旌節維風與推恩錫類兩者並重乃有操勵栢舟而訓單花縣者褒崇尤首及已爾劉氏乃直隸廬州府合肥縣知縣胡震亨之母毓質宦門作述儒彥貴無驕色殫孝養於恩慈貧絕怨言肅莊儀於賓饁青年歌鵠矢一死以靡移白首茹荼効三遷以迪教迨導輿而就養猶却鮓以訓廉是用封爾為太孺人先被彝章之賁佇揚苦節之貞

海鹽縣圖經卷之十四 終

海鹽縣圖經卷之十五

人物篇第六之六 選舉志

海鹽之士其以科目進者代不乏矣雖樹立各殊其與被國榮登於宦路則無不一也前令夏公浚為志例先人物後選舉曰以增地靈關世教不專在此其言太激夫人物則仕隱兼焉選舉僅簪紱一途叙故宜後矣今附之人物合為一篇以示重云

唐進士

顧况 史云至德二載登第

顧非熊 况子長慶中勅賜及第事詳本傳



宋進士

題名記曰吾邑雖介處海壖士雅知力學宋興纔二十載固已肇立學舍講貫薰染非一日矣時未有以決科聞者當慶曆中天下承詔畢立

學校士咸觀感奮發以不預後造之選為恥而獨吾邑建學已素肄業有所士益自勵推移二紀推輪於郭公瑒擢名第者相接也郭氏有子躡世科躋位通顯造兩地為中與樞機臣厥後吾邑之士觀感速効蟬聯桂籍者不可枚舉蓋郭氏父子昆仲亦鄉校友黨豈氣類脉絡然歟有倡之者蓋必有繼之者也鄉里實榮之取以詔告其子弟今維楊李侯直養以佐邑最即選為令政通人和思所以為化道之先亦既修治學宮有廢輒舉一日顧謂諸生曰邑之先達以儒科進者幾何人第而知之亦足為士之勸諸生受教曰宜擇所屬迺以屬濬孫辭不獲輒採摭詢考繇郭公而下得三十有九人焉其有不知者蓋闕如也後乎此者繼自今不絕書之嗟夫三代盛時興賢者能者獻其書於王實助乎鄉大夫然則風厲而陶成之則大夫任其事固宜若李侯加惠於吾邑之士無窮已則士之揭名於此者得特書屢書不一書亦無窮而後河也紹熙三年二月朔從政郎新監行在右

藏西庫常濬孫記

宋令翁縉學記云海鹽自李唐

治平二年郭瑒

熙寧六年梅顥梅貢

顥子

元祐三年陸周郭三益

瑒子

崇寧五年魯詹

大觀三年陸友諒

重和元年趙士坦

建炎二年蔡宿

紹興五年魯詹魯譽

俱詹弟

八年陸之淵十二年陸之



望淵魯藝十五年魯可簡魯子葉利用二十一年魯璵

二十七年趙汝能趙師文趙彥深三十年魯可封魯子

趙希仁中大夫廣趙不愚士坦劉處仁

隆興元年魯可宗言子又舉博學宏詞官至太常卿趙汝明

乾道五年陸峻官至尚書趙希仰希侔弟魯璠璵弟八年常

濬孫又舉博學宏詞趙善懌

淳熙二年趙伯瓚魯开可簡子知五年趙彥清彥深弟

趙彥濟彥清弟十四年常楷朝散郎宗正丞兼江准制置司叅謀官

紹熙元年趙希侔希仁弟兵部侍郎謚文清許興裔魯珏可簡子趙

崇堯汝明子趙彥滄彥深弟趙善毅不愚子李昌宗朝奉郎福建路

轉運司主  
管文字

慶元五年魯秀穎

嘉定元年魯鐸魯策四年常衍孫同孫句容丞監七

年魯文若十年魯文伯十六年魯之大

寶慶二年趙與翊奉議郎知常熟縣趙時勇趙與椽趙孟堅

希仰孫趙垞夫趙漪夫趙彥秘趙澍夫趙津夫趙恣

夫趙與機趙孟敏趙希檜趙與時趙崇治趙善辭不愚

子趙崇愜趙崇愈趙崇昔趙汝堂趙與曾趙崇試趙

汝熠趙與言趙崇侑宗室科第之盛是年至二十五人嘗疑其故考之宋史宗室選

舉故實並不得其說後見周輝清波雜志始知附正奏各南渡後或有特例也輝志云紹興十一年程克



俊呈乞以貢院所考合格宗室善能特令附正奏名殿試以示勸獎云云高宗曰天族之貴溺於燕安往往自陷非法若以邦典繩之則非所以示叙睦之恩置而不問又無以立國家之法唯擇其好學從善者稍加崇厲以風厲其餘是亦教化之術也宗室取應賜出身自此始

嘉熙二年周光龍

淳祐四年常賢孫同七年常林終宋之世常氏舉進士者二十人而居海

鹽者五人 魯鼎卿

景定三年魯天麟

咸淳元年趙孟葆 希葆孫 趙孟琦 與曾子 趙孟華 孟葆弟

元 鄉會題名無考姚叔祥於郡士屠中子家覓得同年錄所載姓名及其祖省試律賦一節記後

至治三年屠曾 字體寧小名一郎住土家山永福巷行省試第一名 臺試二十七名備

康學正 至元四年趙俶 字文靜小名寄官住天女廟東巷 行省試第七名 至

正四年趙俶 行省試備榜第九名 二十二年許徵 字考常小名山兒住永安

橋行省試詞草詔十六名 屠曾虞庭慶雲賦曰湖  
歎皇虞敷天孝德蒸又格姦祗載雙栗當宁升聞班  
寮師錫有鰥登庸側陋皇赫徽典叙揆賓門觀辟左  
禹右臯前稷後高愠解八風教訖四極夫何休瑞之  
氤氳兮殫苞苻之景彰鼓率舞之百獸兮降儀庭之  
鳳凰撫無為之化瑟兮正恭已之衣裳垂天雲之殊  
異兮光絢爛而凝祥若烟非烟若雲非雲郁郁油油  
續續紛紛霏霏颯昭回蕭索輪菌狎獵參差龍從礪噴  
丹霞失麗合譽竊明群真製匣倍色雲君宮廷藻映  
黼座光騰迴環炳煥方貢燁奕非单彩而成純匪三  
色而化霽是日卿霽布伏維五墨如玄圭素如玉禾  
赤絳綃黃如瓊芝青如蒼珂如璧如璋如璣如組  
乍並合或翕或張璀璨離披吞吐爛班舒卷繪空  
雅同順逆遲速錯綜之七政盤旋結綵不讓山龍藻  
火絺繡之五章寫鳳翥之翩翩魏龍旂之央央佐薰  
風之稷稷捧君日之皇皇紺碧朱藍變幻靡常瞻霄



騰漢漾喜起於朝堂被袵彈絃侑色笑於娛媿濟濟  
師師占雲異而味歌明良于于睢睢覩雲物而距踟  
翔翔駐車蓋於封中嚴軒轅之花葩環纓絡於陽舒  
軟王母之朱幡聞之雲者爲運運聚而成山澤通氣  
雲泉相因維斯雲煜孰叶其禎屆茲宇宙元會文明  
圖錄曰帝王有孝德天應以卿雲原夫負罪引慝雲  
之蒙兮克諧底豫雲之開兮受終陟帝雲之升兮神  
享事治雲之應兮揆岳牧伯雲之從兮濬哲重華雲  
之輝兮繼巍乎之成功兮亦煥乎其文章兮有天下  
不與兮聖姓之空洞兮雖鄉雲之有爛兮亦浮翳之  
過太虛兮孝德敷天  
兮永以爲君極兮

### 皇明

明興科舉之制未定時則應聘有江西按察僉事丁  
豫詔拜有知府金大節舉容貌端方有兵科給事中  
曹孚舉賢良有秦府教授黃文杰雷州知府常士昌

同之

舉秀才有同官主簿周德成舉聰明正直有富

平知縣戴仲肅舉文學有醴陵縣丞胡恒性舉明經  
有國子學正沈繼宗翰林院編修桑慎舉孝弟有華  
容縣丞詹仲益舉儒賢士有襄陽知縣梅士進潞州  
通判梅士輝進弟衡州府通判費德昭舉楷書有金吾  
衛經歷王端汝寧府通判戴瓊舉書筭有吏目何亨

舉人材有靈石主簿王彥貞贛州知府朱彥華序班  
呂文忠太平主簿陶真南昌主簿王直舉經明行修  
有訓導李孟璿自科貢之制定士非此弗進今列其  
舉于科貢者如左使後世足覽焉

以上載徐泰志蓋本之縣志



及查永樂志戴瓊何亨雖以楷書書筆取用出身自  
從貢途又以人材取用者尚有江西湖口縣主簿金  
谷用有衡州府潭湖巡檢司巡檢鄒文通有山東嶧  
縣主簿張忠徐志並失載或一時偶誤耳附記此以  
補遺

### 進士

### 舉人

並以科分爲次子卯午酉年舉人丑辰  
未戌年進士內惟永樂癸未改鄉試永

樂甲申辛卯天順甲申正德辛巳俱改會試科分有  
其字與官位可考者附見姓名下有傳者不贅  
鹽縣儒學鄉試題名記學校以得人材爲本人材治  
天下之具也必養於學而後學於鄉貢於禮部試於  
廷皆登名有錄以紀出身之次第擇萊先師又刻  
石於碑以貽榮子永久然則鄉學題名非謹其出身  
之始乎謹其始則重所往以達諸用也大矣海鹽爲  
嘉興屬邑距郡遠而密適於海學舍滋久將入於弊  
成化改元山西楊公繼宗自秋官知府事廉明簡亮  
政教修舉兩至邑學慨其遊居弗稱乃奉巡按監察  
御史劉珂分守參政甯良僉事周正方命有司庀材  
典工不逾年而廟堂齋舍煥然一新復謂方今設科

自洪武甲子抵今成化辛卯二十有七科矣而海鹽  
之七懷牒起者前輝後耀號不乏人然不鏡諸石登  
載其名氏何示勸于方來于是命邑令楊君克敬具  
書幣托教諭陳良辛諸生夏勗沈慶萬釗來請記予  
謂成周論造于鄉務選賢以臻至治蓋有實興之禮  
焉士由實興而起亦豈以是媒利祿哉蓋有德行道  
藝明諸心措諸行以與斯世斯民同底至善之歸其  
後科目雖始于隋盛于唐而極于今然皆不失實興  
之遺意士可不以賢自重乎唐稱得賢必曰陸宣公  
宣公郡人也巋然一代人物固未易跋及然近景泰  
間有劉泰爲監察御史遇大臣巡撫有弗戢者抗疏  
斥之風裁凜凜可嘉而竟以疾卒天順間有張寧爲  
禮科都給事中敷奏封駁允合時議 英宗方屬意  
大用弗果遂爲權奸沮抑僅守汙以病免予昔與之  
同朝喜其有聲于臺諫無忝于科目使皆昌于其時  
則業必大有可觀矣豈止于是耶雖然顯于前者有  
恨而擬諸後者無窮後此而進當思賢者與齊而以  
不賢者爲戒遑遑忠義之是求無負 上之所任使  
學之所當盡雖勒鼎彝銘旌常而昭汗簡亦自茲始  
矣啻鄉學題名之足榮哉罔俾宣公專美有唐敬以



是為勸成化八年某月日賜進士出身翰林侍讀學士奉訓大夫鶴城錢溥撰

洪武十七年甲子科曹仁丁麟盛潛孔昭定陶十八

年乙丑科丁麟曹仁二十三年庚午科蘓忠零縣典

史應求賢夏邑知縣二十六年癸酉科王琛興國州二十九年

丙子科王禮應天三十年丁丑科王禮行人司行人

教榜建文元年巳卯科黃胤宗二年庚辰科黃胤宗四年

壬午科陸淵吏部主事改撫州府通判

永樂三年乙酉科黃彥六年戊子科張麗武清九年

辛卯科江敬肅寧仲端十年壬辰科黃彥未授十二

年甲午科楊經刑部郎中十五年丁酉科許伯全

江西樂安教諭張鶚監察御史王鎬九江府同知沈欽都昌

沈理十六年戊戌科沈理未授二十一年癸卯科孔

衍臨安府周鑑上猶縣李政上猶縣

正統三年戊午科倪政九年甲子科劉泰十二年丁

卯科許珣張寧

景泰二年辛未科劉泰四年癸酉科李景孟倪顯五

年甲戌科張寧李景孟七年丙子科陳侃汝剛安丘

天順元年丁丑科倪顯三年巳卯科虞勳陸廣八年

甲申科陸廣府知

海鹽縣圖經卷十五



成化元年乙酉科陸遠七年辛卯科張秉中

清平東阿訓導

十年甲午科姚禎

世祥饒州府通判

倪璠十一年乙未科陸

遠

僉事 十三年丁酉科莊蕭

汝泰南昌知縣

十六年庚子科劉

瑞二十年甲辰科劉瑞二十二年丙午科朱祚沈衡

用權 劉演李滂

弘治三年庚戌科沈衡

六年癸丑科劉

演十一年戊午科顧正十四年辛酉科錢琦十五年

壬戌科顧正十七年甲子科吳昂徐泰十八年乙丑

科吳昂

正德二年丁卯科徐咸三年戊辰科錢琦五年庚午

科鍾梁六年辛未科徐咸九年甲戌科鍾梁十一年

丙子科董毅

嘉靖元年壬午科鄭曉

元解

錢木葉環錢芹賀簡朱應

雲林相二年癸未科鄭曉四年乙酉科錢薇蔡潮

時信

七年戊子科張嘉秀費滂

子雨 錢萱 徐榘

應天 八年

巳丑科張嘉秀十年辛卯科沈奎王文祿顧霑十一

年壬辰科錢薇十三年甲午科朱佐

思忠江西臨安知縣

李儒

烈十四年乙未科錢萱蔡其潮

卽蔡潮汝南府推官

顧霑十六

年丁酉科仇俊卿顧萇王大猷胡憲

應天 陳言

十

七年戊戌科沈奎錢芹朱應雲十九年庚子科劉熠



虞志高趙黃金楊春芳

子含巴東知縣

二十年辛丑科賈滂

未任

二十二年癸卯科陳鯉

子龍上蔡懷寧知縣劉

炳二十五年丙午科徐鶴二十六年丁未科徐鶴王

大猷李儒烈二十八年己酉科馮舉謨二十九年庚

戌科馮舉謨胡憲仲

郎胡憲

劉炳三十一年壬子科陳

所學

朱朝笏

應天榜

三十四年乙卯科賀南儒

湯

彬

順天榜

三十五年丙辰科湯彬陳所學三十七年戊

午科鄭履淳

順天榜

四十年辛酉科朱學顏

李星

順天

榜四十二年壬戌科鄭履淳四十三年甲子科錢與

映

順天榜

四十四年乙丑科朱學顏

隆慶元年丁卯科沈藻二年戊辰科沈藻四年庚午

科顧可耕顧所有五年辛未科賀南儒

萬曆元年癸酉科陸鰲來

顧槃

順天榜

四年丙子科

錢應晉

劉世埏

順天榜

許聞造

應天榜

五年丁丑科劉

世埏十年壬午科祖重光陸廷誥十二年乙酉科姚

應鳳

來安縣知縣

十六年戊子科沈孝徵徐天麒沈弘遇

徐文治十九年辛卯科鍾兆斗曹嘉謨朱學忠二十

年壬辰科鍾兆斗二十二年甲午科王廷俊二十五

年丁酉科胡震亨

吳中偉謝錫教

順天榜

二十六年

戊戌科吳中偉沈孝徵二十八年庚子科鍾繼祖許



士奇彭宗孟 劉世教順天榜二十九年辛丑科彭宗

孟三十一年癸卯科張奇齡王家相賀萬祚吳之英

徐從治三十四年丙午科曹履泰劉渾 黃守正順天

榜三十五年丁未科徐從治三十七年巳酉科陳祖

苞 陳玄暉順天榜三十八年庚戌科王家相賀萬祚

四十年壬子科朱國華解元張季文仇祚熙俞之泰

馮振宗應天榜四十一年癸丑科許士奇陳玄暉陳祖

苞四十二年乙卯科劉泓彭期生虞廷陸彭長宜朱

泰禎崔培元四十四年丙辰科朱泰禎彭期生虞廷

陸四十六年戊午科沈胤芳祖重燁吳麟瑞吳麟徵

錢陞應天榜四十七年巳未科劉泓吳麟瑞祖重燁

天啟元年辛酉科趙敏學張調元許令瑜錢千秋二

年壬戌科吳麟徵



貢

洪武初生員以年選取充貢九年貢二十五歲以上

生員唐貞

東莞縣縣丞

張信

工部主事

姜良

河南布政司理問所提控案牘

鍾

德華

馬平縣縣丞

十二年貢二十歲以上生員劉昌

泉州府學

訓導 丁麟

見進士 曹樞吳昱十四年又貢容貌端方生員

曹孚

兵科給事中

至十七年始每歲選貢年湮成效生員

一人禮部試中式入太學備用

曹仁

見進士

十八年

鄭思忠

刑部主事

十九年曹旭二十年李恭

淮安府學教授 二十

二年張巽二十三年胡讓

刑部主事濟寧知州復入為禮部主事改應天府通

判二十四年于汶

高州府同知

二十五年戴復

江西上饒縣沙溪稅



課局大使累遷至蕪州知州徐泰志稱其為政仁恕

二十六年徐倫漢州知州二十七年朱名上饒知縣二十八年周汝翼二十九年王禮見進

三十年錢大亨漢中府通判三十一年詹文刑部陝西司主事歷

建文元年王政禮之弟清苑縣知縣三年錢玉清源縣知縣調

末樂三年張壽昌瀧水知縣四年戈定遠拔察副使五年平安

陽武縣六年張彬保定通判七年朱侃左通政使八年張鳳贛州

府同知九年費昭林邑縣縣丞十年馮昭陳留縣知縣十一

年陸貴十二年趙敬十三年何順岷山縣主簿十四年唐

子忠十五年李銘十六年計庸涇縣知縣十七年李勉繁昌

縣知十八年沈政十九年支茂宗衍江西布政司軍需庫大使陞山東樂

安縣縣丞以公事歿廣西慶遠道中子立占籍嘉興中正統甲子鄉試官翰林院孔目今嘉善支大綸其

後也茂在吾鹽云二十年薛安寧府典儀又十年貢楷書楊經

十六年貢楷書戴瓊汝寧府通判十八年貢書筭何亨安福

千戶所吏目

宣德元年董威彰德府推官改真定陞三年王亮營

中屯衛經歷改錦衣衛又改騰驤衛六年沈盛任丘縣學訓導七年章麒八年

孫芳九年呂愷潁州衛經歷改龍驤衛陞寧國縣知縣又八年貢四十

五歲以上生員李玉大隆驛驛丞時貢者

正統三年吳侁建昌府學訓導遷南京國子監助教翰林院檢討六年蔣庸

海國圖經卷十五

十二



常德府 八年王紀 徐州 吏目 十年葉文顯 太和縣 學訓導 十一年

徐德敷 枝江縣 知縣 十三年步澤 京山縣 主簿 又十二年貢四

十歲生員唐禮 四川 知縣 張祚 章丘縣 知縣 王善張鑑黃慶

彭澤縣 知縣 張銘 平陽府 推官 陳謨 上林苑監丞 時貢者八 人其一人考退為民

景泰元年王晟 安福縣 主簿 二年王用 鄱陽廣靈縣 知縣 三年徐

忠 泉州府 經歷 四年王錫 福清縣 水 與巡檢 五年高弘 松溪縣 縣丞 七

年聞穎 德安縣 知縣

天順二年仲順 仙游長 汀訓導 四年孫琮 丘縣 縣丞 六年李尚謙

東平州 判官 八年張寬 栗之寧之弟 騰 驤左衛經歷 又七年貢四十五

歲生員十二人 陳善 訓導 歐海 績溪縣 主簿 沃顯 大足 知縣 鄭延

張彝 晉州 判官 潛瑜 南康民州 府推官 劉琮 鉛山松 溪縣丞 馮紳 揚州 衛經

歷官 姜顯周淵周鶚 寧都連 江訓導

成化二年費琦 建寧 知縣 四年朱瑾 莆田 縣丞 六年向昭 東城 兵馬

司副 指揮 八年許玉十年呂祚十二年沈郁 閩縣 縣丞 十四年

朱祚 知縣 十六年胡昱 阜城訓導 保定教諭 十八年沈慶 惠安 主簿 二

十年萬釗二十二年唐原 光澤 主簿

弘治元年楊信 彭澤縣 姚安 軍民府訓導 二年張維翰四年童輝

鎮江衛 經歷 六年許晉 訓導 八年吳墳 福州府 經歷 九年張振十

年姚宗禮 隆慶州 判官 十一年徐謨 穀城 訓導 十二年吳山 隨 州

訓導 十四年莫綱 通州 訓導 十六年張璿 寧從子 善書 畫番禹 訓導 十八

海鹽縣圖經卷十五 十三



年錢瑤 安慶府經歷

正德二年沃饒 顥子華 四年顧直 東安安平 六年朱暎

瑾子性侃爽好客長汀縣訓導 八年鄭儒泰 訓導 十年陳簡 侃子新 十

二年葉榮 廣信永 十四年劉模 英山 十六年賀家 沛

青神訓導陞故城教諭所著有太極圖解

嘉靖元年仇宗 文敬清 二年周臣 良佐均 三年彭暉

日華德安府學訓導陞河南縣學教諭 五年鍾粹 汝 七年吳宗祐 守

十年祖晟 宿州學 十年鍾祿 思齊光澤 十一年陳言

選貢今 十二年朱觀 國 十四年趙漢 天 十六年仇彝

舉人 文秉常熟縣訓導 十八年仇靈 彥光 徐縉 朝儀

有和風 二十年楊威 遠 孫肯堂 應天府學訓導 二十

二年張滂 大霖太湖縣訓導生平無飾言偽 二十四

年徐忱 仲孚泰和 二十六年滕鳳 天祥順德縣訓導

延坐談 二十八年鍾道 子由祿之孫婺源縣訓導餘

三十年姚緝 吉甫常德 三十二年湯彬 見進 三十四

年吳木 子喬浮 三十六年劉良材 嘉定訓導 三十八

年陳亮采 邦亮上海 四十年徐蘭 子馨宿州訓導事

菊遺妻及子女 四十二年沈遷 子喬 四十四年王

鑰 世準吳縣訓導

隆慶元年潘璠 仲良泰興縣訓導 二年選貢張希良 臨



縣 三年馬如龍化先勳五年顧槃見舉六年劉在敬

梧州府 經歷

萬曆元年褚應張選貢三年采九德餘杭訓導

衛教 五年朱篋青浦訓導七年陸陌臨安訓導九年鍾韶益府教授

金華訓導 十一年張侃河間府訓導十三年張弘化未福縣知縣

臨海訓導樂昌教諭致仕 十五年許徵烏程十七年歸以篤行推重舉為鄉賓

錢菴於潛十九年馬成仙居二十一年吳中偉選貢

士 二十三年鍾勺舉二十五年鍾以賢選貢二十七年

董紹賢二十九年鍾繼儒道之子龍游三十年訓導陸州知縣

顧尚賓恩貢三十二年王元佐三十三年賀自

省恩貢三十五年朱文元三十七年劉世維於潛

湖州府 三十九年陸鳳來岷縣四十一年顧可漁德

教授 四十二年王體國安慶府四十五年朱正

學泰禎父四十七年張炳如青州府

泰昌元年朱浩然恩貢

天啟元年劉鎬選貢陳昌愨陳昌明戴宏祉並以應天

宏社今任盧二年許敦倬三年湯令名

其以本縣人府學貢者李世常嘉靖四年劉稅五

年貢南康府訓導 陳錦十六年貢會陳九疇三十二

德陽山 李儒然三十六年貢王元愷隆慶二年李

教諭 李儒然汶上訓導王元愷貢彭水知縣



逢春 隆慶年選 知縣 李朝縉 隆慶年貢 朱籛 萬曆五年貢

劉璽 年教授 朱綵 教諭建昌府教授致仕 劉世基

二十九貢家貧性孝吾 馬效成 貢教諭 沈錫黃守

正 三十一貢見舉人 湯裔昌 天啟元 徐道禎 天啟三 朱維

曹憲來 三十四 徐可聘

國子生

成化中 沈愚 工部管轄所正 張昕 靖江典簿 王輔 侯官主簿 王玟 南京鎮南

南經歷全州同知 蔣寬 德安府照磨 沈福 安慶府知事 徐世雄

正德中 陳瀛 宛平主簿陞龍岩知縣好學抱遠志與

年與詩人陳勾溪朱西村僧石 朱珊 高州府經歷 孫浩 浦城

林作社會觴奔吟咏風流可尚 沈蒙 武陵縣丞 吳元 同安主簿 姚

紱 高州府經歷 陳金 永平衛經歷陞博野知縣有詩名 顧蘭 威遠衛經歷 朱璣

以行誼敦篤 湯祐倪倣倪俛朱珮沈素沈灑朱球許

梁朱楫朱輅李世樞劉潮陳鏜沈坪錢蓼湯讚張灑

徐濟朱壽朱簪



嘉靖中黃德甫黃陂縣丞陳棟曹縣縣丞呂縞宣化縣丞倪佶

雲南州吏目馬遷慶遠衛經歷祖鶴年連江主簿張嵩景東衛經歷王朝

縉廣南府經歷徐樟宿州判官吳棣連城縣丞賀陞泌陽主簿陸

應暘政和縣丞奉張明復上林苑錄事錢暉光祿寺監事賀陞

南儒父邵武府知事廣昌縣丞呂相周改級授杭州右衛署指揮僉事曹縝除州吏目倪

元夫靈石縣丞朱玘吳安國

萬曆中沈騰蛟錄事玉田縣丞朱有光主簿馮春復署丞湯承寵

同州顧綸經歷鍾夏縣丞陳所見序班張大縉奉祀徐時朝德州

同州朱煒主簿馮嘉議銅仁府經歷朱元杰序班朱學憲縣丞錢周

中書舍人賀萬春序班呂元美布政司經歷呂元善山東布政

問王廷傑監運司經歷吳士翹州同吳淑曾廣昌縣丞朱益謙

常州府照磨吳協曾寧州吏目徐允治和州同張吳江主簿徐秉

赤昆明縣丞劉世甄上林苑署丞王敬賢候選提舉

錢葵錢籛朱學道鄭履洵呂元聲徐九容湯承憲湯

承宇崔梗徐九牧張大有胡彭述劉世坊張卿朱玘

錢日升錢日昌王沾徐可觀徐可達徐可表張士龍

徐洪訓陸應祈顧紳王金鉉孫胤道張寵賈懋亨倪

光道倪光華朱學程戴君祿韓紹芳徐繼祚錢世圭

徐可遵徐振華朱廷訓朱邦佐朱履儋沈弘鍵劉祖錫沈繩元沈紹元朱懋增湯紹祖賀南山賀南極鍾



祖保鍾祖述馮春暉徐繼美錢端喚吳中萃朱學古  
楊茂春韓之策賀南明曹伯驥劉祖鎮朱萬秋徐道  
成何蘊沈誼徵朱豫禎劉祖鍾錢世越曹泰禎錢允  
登楊遇春徐秉衡徐一源沈延銘鄭忠材顧名端徐  
弘文范士麒鄭恕材曹名輔陳梁姚士莽陳昌圖陸  
祚昇鍾壽明吳麟振王綸寰徐光治鍾壽隆李芳白  
邱經邦陸祚吳鄭端濟沈延鎡徐受中朱紹基鄭士  
毅方朝鼎吳啟泰朱欽徐蓋臣  
天啟中王秉鑑光祿寺署丞馮惟恒彭受昌呂兆祥馮鼎  
陳于王徐秉謙

儒士謝錫類徐師貞

承椽

葉春

刑部右侍郎見前

張振

工部主事陞四川重慶知府

全宗

禮部儀制司主事陞

陸斌

山東鹽運司知事

張天與

廣西都司斷事

陸子名

雷州府經歷

張禮

上饒縣丞

陸亮

涇縣主簿

蕭斌

長洲主簿

費恭

巡檢

唐誠

宜德中

簿改順昌庶潔愛民建陽人

王綱

龍泉典史

李朴

吳縣主簿

朱

上疏保雷陞縣丞俸理簿事

璫

陽春縣丞

周密

安溪典史

陸璘

清流典史

趙麟

蕭縣主簿

蔣誠

清平主簿

珪

巡檢

倪可宗

巡檢

鄭相

巡檢

富全

巡檢

周宗顯

巡檢

顧昂

新泰典史見前

卜敏

巡檢

王瓊

信陽場大使

鍾海

懷遠縣丞改

趙原正

吉水縣丞

馮璿

武德衛經歷陞湖廣沔陽州同知

吳瑄

懷遠縣丞改

吳璫

懷遠縣丞改

吳璫

懷遠縣丞改



松潘衛 湯復初大曹敬典沈雲典宣徽太吳濡典吳

宗漢葉英張雲翔宣綬鄭讚許棟褚璠府司張鐔千

所吏張曇千戶所張羽張理奉新沈亨吏陸鳳翱大

張俸典徐燁驛丞曹綺吉安府張奉祖寧曾孫俞滂

監利凌曙澧州張奉先寧曾孫張京巡葉儒卿靖江鍾思

能聲人多以吳鵬稅課張京巡葉儒卿靖江鍾思

包武平倉大蔣洲富池錢應文巡俞臬衛朱龍黃

衛知王家賢汀州衛經歷倪鉞縣姚思舜如臬盧曉

典孫洲重慶衛呂觀光光澤縣何可久平原鍾應亨

常熟董員祁門朱萬里驛丞吳國賓遞運所謝子貞嘉

縣丞陸上元縣丞徐待賢倉大富縉曲江吳廷傑諸

貴州都司斷事 縣丞清丈兩鄉地得隱額 陳元端思明州俞九齡觀

二萬畝築堤禦水有功 典湯策望臬司褚名儒倉大浦上達宿遷陳津淮安

獄張承錫孔家渡王明時東鄉縣丞顧維坊鹽

縣張鳴鳳縣丞謝京山西費和南安吳兆禎蒙城徐廷

傑太平郁儒縣丞陶聖寵福州衛吳希賢黃縣何澄

源龍安府黃中理文安典倪薦太平朱紀澄海王體

坤昭化潛孔嘉天長倪思山東鹽陸萬鍾兵部會同

授將仕郎初朶顏貢夷以光祿供應薄爭鬪萬鍾竟亡 解之光祿顧以為罪臺省交章參論其事萬鍾竟亡 恙亦異數也陞沅州吏目任周兆殷倉大周思忠江



所吏目福  
建巡檢 周道昌 枇杷所 陸從台 劔川州吏目大治主簿皇陵衛經歷

周文昌 廣東巡檢 徐魯卿 隆慶倉大使陞巡檢年九十九歲卒生平為善不倦如待弟待

友却例事皆人所難能蓋以德致壽非偶者 張正純 密雲倉大使陞巡檢 韓守貞 濮州

吏目 何奇英 長沙典史 任杏芳 歸德衛經歷 張汝聽 保昌縣丞南丹衛經歷

沈文棟 公安縣丞陞衛經歷 沈文相 縣丞陞衛經歷 周奇遇 大谷典史陞雷州府

司獄 嚴州 倪履亨 蘇州倉大使 張希閔 建水驛丞 顧玄象 驛丞 徐

待選 鹽課大使陞 王廷相 浪雲典史 錢鳳翔 州稅課大使 顧廷

俊 新昌縣丞 王廷化 驛丞 徐勳 台州倉大使 周元相 倉大使 張效順

驛丞 陞巡檢性剛儻 有大度調元父也 王立顯 封典史 張文桂 瑞州府司獄 董

相卿 界亭驛丞 吳尚義 光山主簿 張士魁 青浦典史 陳其道 北京戊

以將 丘與傳 江西倉大使 徐名佐 候選州吏目歲壬午受事丈田有勤蔡侯

通於督冊賜復除戊子大饑捐粟助賑守道祭以樂義旌李侯杜侯並延為飲賓焉 倪善道 巡檢

王允臧 平原主簿 呂鳴治 候京衛選經歷 倪光緒 候選典史 朱國祥 徐

可成 謝尚賓 王廷璋 劉世幸 董廷策 鍾與聞 俞國俊

楊國相 許紳 張斯奇 宋文美 張景良 倪大受 徐洪懋

徐起 龍顧其志 俞昌言 祝國泰 胡應聘 吳邦其 倪鍾

亨 黃士彪 張明政 周之偉 馮日陞 徐如淵 葉重元 馬

禹 卿 黃閣 彥 俞茂奎 王文魁 吳中儀 孫孟元 朱胤祚

王必陞 吳倫 朱錫元 王肇元 董相臣 並省祭

武科



沈昇 元茂中正德已卯鄉試 陶炳 德明海寧衛左所正千戶 賀齡 汝名

慷慨趨技善 王勳 世榮海寧衛指揮使 陶堂 子正千

戶中嘉靖壬午乙酉鄉試 商霖 起巖指揮僉事 姚定遠 行之並嘉

劉湘 文伯指揮使中嘉靖戊子鄉試 王國賢 應昌勳子指揮使中嘉

會試陞署都指揮同知掌閩潮 王應麟 仁卿指揮同

二都司印貌如冠玉福將也 嚴守中 一之中嘉靖 方泰 吉甫指

兆先指 劉汗 嘉靖丁酉鄉試 崔致遠 道徵指

揮僉事 王國治 應德國賢弟中嘉靖丙午 劉

嘉靖癸卯鄉試 童尚斌 思兼指揮僉事中嘉靖

潤 近伯汗弟中嘉靖 祖述 繼賢中嘉靖

辰會試陞署指揮使斌力學如寒 祖述 繼賢中嘉靖

士弱不勝衣而能以介節自勵 祖述 繼賢中嘉靖

李元律 師吉指揮使中嘉靖壬子鄉試第一 王一初 子復國賢子指揮

乙卯戊申大鄉 元佐百戶應襲中 嚴守敬 簡之守中

辛酉隆慶 楊學詩 可言中嘉靖甲子隆慶丁卯 劉名

庚午鄉試 相 國忠海寧衛右所副千戶中 王應奎 耀卿應麟弟

鄉 王恩春 汝仁應麟子中隆慶丁卯鄉試 仇干城 元宰後鄉子中

崔成俊 朝彥致遠子指揮僉事中 王思問 指揮舍人

子已卯 張效良 中所人 中萬曆丙子鄉試 周文叙 乍浦所人 中萬

李嘉元 千戶加納指揮僉事 郭大忠 左所百



所百戶中萬曆乙酉鄉試 **崔天賜** 指揮僉事 中萬曆戊子辛 潘漢

龍 中所百戶中萬曆辛卯鄉試 **方應聘** 左所舍人 中萬曆丁酉鄉試 戊戌會試 **王明**

翼 中所百戶應襲中萬曆丁酉鄉試 甲辰會試 **郭輔明** 激浦百戶 中萬曆庚子癸卯鄉試 甲辰會試 **周憲明** 浦

子第 一名 **陶堯仁** 乍浦所百戶 應襲中萬曆丙午鄉試 庚戌會試 **周憲明** 浦

所人 中萬曆癸卯鄉試 **周翼明** 乍浦所人 中萬曆丙午鄉試 庚戌會試 **康**

承爵 乍浦所百戶 應襲中萬曆丙午鄉試 庚戌會試 **白于廷** 乍浦所人 中萬曆已酉鄉試 庚戌會試 **張邦**

試 **許岳胤** 乍浦所武生 中萬曆壬子鄉試 壬戌會試 **王景儀** 乍浦所武生 **張邦**

遠 乍浦所武生 並 中萬曆乙卯鄉試 **方象坤** 左所百戶 中萬曆戊午鄉試 **崔文榮**

指揮 **郭啟襄** 激浦所百戶 應襲 並 中 天啓辛酉鄉試

封贈 舊志 晉階不書 今書 毋封 贈不書 惟仇志書 今並妻封 贈書 綸命也 有書不書 惡乎敢 **王氏** 宜人以

錢琦 憲大夫 子 芹 員外郎 晉奉直大夫 **王氏** 宜人以

子 萱 晉封 **胡氏** 芹妻 封 **孫氏** 萱妻 封

錢木 工部主事 以子 焮 **鄭氏** 焮母 封 **錢氏** 焮妻 封

王勇 指揮使 以子 大猷 僉 事 晉階 昭毅將軍 **李氏** 大猷前母 淑 贈淑人 **殷氏** 淑母

人 晉封 **馬氏** 大猷妻 封 宜 人 **徐氏**

劉 按察使 以子 世 挺 主 事 晉階 通議大夫 **錢氏** 世挺母 安人 見 **徐氏**

世 挺 妻 封 安 人 **沈氏** 李氏 造前母 **陶氏** 造

許相卿 給事中 以子 聞 造 推官 晉階 文林郎 **沈氏** 李氏 造前母 **陶氏** 造

生 母 贈 **錢氏** 聞造妻 封 孺 人 **陸氏** 繼母 贈 **彭**

沈藻 知州 以子 弘 遇 知 縣 晉階 奉直大夫 **陳氏** 弘遇母 贈 宜 人 **陸氏** 繼母 贈 **彭**



氏 弘遇妻 封孺人

鄭履淳 光祿寺少卿以子心材都督府都事晉階奉政大夫 朱氏 心材母安人 晉贈宜人

鍾氏 心材妻再 董氏 繼妻再 封宜人

彭紹賢 金山參將以子宗孟監察御史 鄭氏 宗孟母 晉階昭毅將軍上輕車都尉 淑人

贈淑人 劉氏 繼母贈 李氏 繼母封 朱氏 宗孟妻 淑人

彭宗孟 見任 妻 朱氏 孺人見前以子期生工部主事晉封安人 方氏

期生妻封宜人 以上晉階封

鄭延 曉祖贈刑部尚書 劉氏 祖母贈 夫人

鄭儒泰 曉父封兵部主事贈刑部尚書 費氏 母封太安人贈夫人 劉氏 曉妻贈 夫人

劉氏 繼妻封 夫人

吳芸 中偉祖贈廣 李氏 祖母贈 淑人

吳霽 中偉父贈廣 周氏 母贈 淑人 顧氏 中偉妻 封淑人

徐灑 從治祖贈 湯氏 祖母贈 淑人

徐應奎 從治父封 黃氏 母封 淑人 黃氏 從治妻贈淑人 以上二代封

朱顯宗 侃父封通政 賈氏 母贈 宜 陳氏 繼母封 胡氏 侃 妻

封恭 人

葉德祥 春父封禮 莊氏 母贈 宜 王氏 繼母封 吳氏 春妻 封宜 人

楊信 經父再贈 刑部郎中 氏 母贈 宜 氏 經妻封 宜 人

詹公壽 文父贈刑 陸氏 母贈 宜 氏 文妻封 宜 人

海鹽縣圖經卷十五 二十三



戈

定遠父贈河南

氏 母贈

氏 定遠妻

劉鳳

秦父贈河南

沈氏 母贈

吳氏 生母封

宋氏 秦妻

人

張翥

寧父封禮

丁氏 母封

唐氏 寧妻贈

王氏 繼妻封

倪政

顯父再贈

氏 母封

氏 顯妻封

劉顯

瑋父贈廣西

張氏 母贈

戴氏 瑋妻封

劉珏

演父封兵

沈氏 母贈

孫氏 繼母封

葉氏 演妻封

顧章

正父贈刑

林氏 母贈

劉氏 妻贈

陳氏 繼妻封

沈文郁

衡父封刑

陳氏 母贈

胡氏 繼母封

黃氏 衡妻

人

錢達

瑞父再贈

楊氏 母贈

王氏 瑞妻封

吳寬

昂父贈南京

鄭氏 母封

氏 昂妻封

徐昂

咸父封南京

王氏 母封

張氏 咸妻封

鍾海

梁父贈刑

崔氏 前母贈

顧氏 母封

董氏 梁妻

人 胡氏

繼妻贈

胡氏 繼妻封

錢滂

木父封威

朱氏 母贈

鄭氏 木妻封

張琪

嘉秀父贈南京

蔡氏 母贈

王氏 嘉秀妻

錢琬

徽父封禮

鄭氏 母封

孫氏 徽妻封

沈軒

奎父再封

徐氏 母贈

吳氏 繼母贈

袁氏 奎妻封

徐煜

鵠父贈工

湯氏 母贈

俞氏 鵠妻封



馮乾

臯謨父封刑部員外郎

吳氏

母封安人

朱氏

臯謨妻封安人

湯誥

彬父贈直隸盧江知縣

陸氏

母贈孺人

屠氏

繼母贈孺人

氏

彬妻封孺人

人

陳言

所學父贈中書舍人

吳氏

母封太孺人

吳氏

所學妻封孺人

包氏

繼妻封孺人

人

鄭曉

履淳妻復準父尚書

沈氏

履淳生母封太安人

顧氏

履準生母贈宜人

朱氏

履淳妻

封安人

沈氏

復準妻封宜人

顧爾洪

所有父贈宜黃縣知縣

王氏

母封孺人

吳氏

所有妻封孺人

鍾韶

兆斗父封工部給事中

沈氏

母贈孺人

沈氏

兆斗妻封孺人

沈涑

孝徵父贈工部郎中

印氏

母封太宜人

張氏

孝徵妻贈宜人

賀南良

萬神父贈兵部郎中

彭氏

母贈宜人

姚氏

萬神妻封宜人

陸應麟

廷誥父贈德縣知縣

周氏

母封太孺人

賀氏

廷誥妻封孺人

徐應登

文治父贈城縣知縣

金氏

母贈孺人

黃氏

文治妻封孺人

許敦復

士奇父贈刑部郎中

林氏

母封太宜人

吳氏

士奇妻封宜人

朱符

學忠父贈耒陽知縣

賀氏

母贈孺人

袁氏

學忠妻封孺人

胡彭述

震亨父贈肥縣知縣

劉氏

母封太孺人

馮氏

震亨妻贈孺人

李氏

繼妻封

錢箬

應晉父贈寧縣知縣

李氏

母贈孺人

郁氏

應晉妻封孺人

徐氏

繼妻封孺人

王家材

廷俊父贈高郵知州

祝氏

母贈宜人

祝氏

繼母封太宜人

呂氏

廷俊妻封



人宜

虞紹唐

廷陞父封徽州府推官

吳氏

母封孺人

倪氏

廷陞妻封孺人

朱正學

泰禎父再封監察御史

馮氏

母封孺人

鄭氏

泰禎妻封孺人

吳中任

麟瑞父封常州府推官

王氏

母封孺人

朱氏

麟瑞妻封孺人

劉仲鎮

泓父封工部主事

朱氏

母封孺人

崔氏

泓妻封孺人

祖彭年

重燁父封行人

趙氏

母贈孺人

趙氏

守正妻封孺人

童氏

繼妻

黃澤

守正父贈瓊州府推官

趙氏

母贈孺人

趙氏

守正妻封孺人

童氏

繼妻

封孺人

謝子貞

錫教父贈德州知州

沈氏

母贈孺人

朱氏

錫教妻封孺人

呂文遜

愷父贈騰驤左衛經歷

氏

母贈孺人

王伯惠

亮父贈錦衣衛經歷

氏

母贈孺人

向暄

昭父贈東城兵馬副指揮

氏

母贈孺人

馮子安

璿父封武德衛經歷

蔣氏

母贈孺人

徐氏

璿妻封孺人

沈剛

愚父封營繕所所正

氏

母封孺人

王鎮

政父封南京鎮南衛經歷

氏

母封孺人

謝宰

子貞父贈元縣縣丞

鍾氏

母封孺人

沈氏

子貞妻封孺人

王達

家賢父贈袁州衛經歷

劉氏

母贈孺人

許氏

家賢妻封孺人

鄭心材

尚書曉長孫嘉靖三十八年以二品考滿蔭見前

鄭履準

尚書曉次子隆慶元年追錄巡撫鳳陽平倭寇功蔭見前



供奉

趙麟 以工畫直 仁智殿錦衣衛  
帶俸副千戶 見景泰年縣志

朱端 正德中以工畫直 仁智殿  
帶指揮俸 見海寧衛志

朱士遷 朝笏之子 攻詩文  
今 武英殿中書

鹽士寓外舉科目者例得附後

沈欽 以儒士薦京師永樂戊戌進  
士 陳州知州長蘆鹽運副使 朱孟德 維新籍陝西寧夏衛

永樂戊戌進士鄭府審理改 朱俊 時彥籍陝西寧夏  
廣東興寧縣知縣後復還鹽 衛天順壬午鄉試

扶溝縣知縣 陳紀 大倫洪武中先世遷居南  
孟德之姪 京中成化乙酉應天鄉試 沈藻 籍

都護衛中成化乙酉四川 王輔 籍遼東廣寧衛成化  
鄉試陝西西安府教授 丙戌進士刑部主事

還葬 張正 籍雲南大理衛中鄉試第一成化丙  
海鹽 戊進士南京戶部郎中 建寧府知府 薄淳

子原籍貴州普安衛中成化 張渭 籍陝西蘭州衛中  
戊子鄉試鶴慶軍民府推官 成化丁酉鄉試

沈階 遷之寓永平府涿州中 周澤 本姓俞父贅嘉善  
成化癸卯順天鄉試 周氏冒周姓成化

癸卯浙江鄉試第一弘治 戴繼先 籍管州前屯衛正  
庚戌進士贛州府同知 德丁丑進士山東

左叅 朱文質 籍雲南嘉靖  
議 乙未進士 毛鳳岐 鳳儀 籍常德衛嘉  
靖中舉人

葉祺 寓杭州 黃宸 四世祖紹宗任陝西王官因  
府舉人 家咸陽 辰中嘉靖丁未進士 張巽

寓秀水嘉靖戊午 戴鳳翔 寓嘉興嘉靖己未  
浙江鄉試第一 進士寧國知府 陸宗淵

寓貴州中嘉靖辛 王家棟 輔之曾孫寓嘉興嘉靖甲  
百鄉試刑部主事 子鄉試第一萬曆甲戌進

士 張正鵠 寓嘉興隆慶 許成名 籍山東益都中  
戊辰進士 萬曆乙酉鄉試 馮鰲

籍雲南衛 順天治中



海鹽縣圖經卷之十六

雜識篇第七

史志五行書天災物怪歲饑穰示徵監而世俗碎小事堪劄記號說家言者亦洽聞一助不可廢方志體準乎史而義通謹俗邑祥孽兵饑與先民所傳一二雋語佳事闕而弗收胡以存掌故一方稱完撰也茲摭述羣書附以近所見聞為雜識篇殿帙末匪云炫多聊以備異時墜軼爾

吳赤烏五年黃龍見縣井中二

宋元嘉十一年六月乙巳縣人王說獲白鳥揚州刺

其地數士薛州同味共  
突限神玉嶽片第一段  
武習 如外突和龍天齊  
變之寓承平初樂州中  
夫千嶽片龍軍見和龍  
千鳳黃龍普安南中丸分

漢繇夫 魏正五並士山東  
薛營林前中甫五

周 本救命天濟善  
丸分下西嶽精

魏州西嶽南中



史彭城王義康以獻

泰始元年六月丁巳白鳥見太守顧覲之獲以獻

皇明嘉靖十九年四月甘露降凝結如霜樹為之白

三十五年四月又降是秋大稔四十一年夏復降

二麥大熟

萬曆元年四月甘露降

二十六年靈祐寺殿梁芝生

是年有禾生一莖兩穗者野人以獻於縣

四十六年慶壽殿柱有芝生

唐貞元六年大旱井泉竭人暍且疫者甚衆

中和四年旱大饑

天復三年十二月大雪海有冰

宋皇祐二年十一月丁酉地震有聲自北起如雷

紹聖元年秋海風駕潮害民田

紹興二年大饑米斗千錢時餽饌繁急民益艱食云

二十四年四月有海鰐乘潮至羣鰕從之聲若謳歌

閣于沙高齊縣門長百丈海民斃其肉轉鬣壓死

數十人

文獻通考 宋五行志稱其  
抵岸偃沙上猶揚鬣撥刺云

二十八年九月大風水溢

隆興元年七月大風雨水傷稼



二年七月積陰雨水浸於城根

乾道元年大饑殍徙者不可勝計

三年八月雨至於九月禾稼腐

淳熙十四年饑民有流徙者

紹熙四年冬不雨至於五年之六月

五年七月乙亥大風駕潮至時方久旱鹹水暴溢稼

則盡稿民饑

慶元三年螟

嘉泰元年饑二年大旱荐饑

嘉定九年四月大霖雨至於六月

元至元二十四年饑

大德九年八月蝗民饑有相食者

至順元年閏七月大水二年饑

後至元二年饑

至正十七年三月某日晡時天昏黃若霾霧有兩日

交鬪開且合者千百遍窻隙壁竇皆成兩圓影相

盪若重黃卵占書曰日變色有軍急其君無德其

臣亂國

至正二十年秋九月晦初曉西南天裂數十百丈光

焰如猛火照徹原野一時村犬皆吠宿鳥飛鳴裂



處螟螣動中復大明若金融于治少時合是年冬  
十二月州東趙氏家屠豕脫治已竟其腸忽蜿蜒  
疾行追之不及遂出城遇海而止寓公姚桐壽曰  
此蓋國家有心腹腎腸之人歸向寬大容蓄之象  
也

皇明洪武三年海溢

永樂三年大霖雨海溢塘決壞

宣德十年秋大風潮暴湧海岸盡崩

天順元年大旱河竭

成化八年七月十七日海大溢平地水丈餘溺死男

女萬餘人九年十年海連溢十三年正月震雷大

雪十四年海復溢民居多沒者

張寧集有紀事詩云成化壬辰秋七

月海潮騰風石塘決桑田夜變陸成川一望邊沙

煙火絕青苗白屋隨奔流紅顏皓首屍橫丘一身

雖存六親盡至今亂骨無人收今年夏月久不雨

河流作滷難車水可憐枵腹不支勞近海膏腴半

枯死虹霓目斷心空焦炎風吹雲天宇高誰知颶

母肆狂虐平地又投錢塘潮溪騰谷沸雨川逆城

壞隄摧風轉盛犬家浥漏小家漂不顧田疇顧身

命因思去歲初陽逢雷轟電掣當嚴冬如何六月

二十年秋八月有黑青

徐咸雜記曰相傳其物變幻

自城北門入即其物也民間皆鳴金擊柝以警之

或手印石灰於壁以厭之終夕不得寢迄半月始



二十三年秋大旱禾盡稿

弘治十八年九月十三日半夜地震棟瓦皆鳴先是

有黑氣從東來地出白毛有長一二尺如馬尾者

朱朴詩有忽然床席振憂兩搖柱棟燈底翻膏油壁下倒蕭翁傳聞心膽寒目激毛骨悚之句

嘉靖元年二年海連溢

六年三月有大魚乘潮至閣于沙長十七丈有奇海

民饑食之

徐泰志西園雜記云高二丈餘口廣半之膚綠無鱗項有長鬣甚勁海民競

剖其肉聲如虎哮三日乃盡

七年正月甲午夜海上忽見燈火千數若人持以行

者居民大驚為海寇至踰時滅成化十三年嘗一

見之

徐咸雜記曰是夕昏黃時人忽言海上有火

如星漸移而東自教場口移上海塘如燈籠數十點十兩兩成對往東北行直抵獨山而滅似有神主

之者此理殆不可勝

八年六月蝗來時田中水蝗不集

七月黑青至人有為所傷者數日息

十一年六月蝗來忽大風蝗盡入海死漁網多得之

徐咸雜記曰先是八年之四月今上夢黃衣二人陸薛南行次日以語大學士楊一清一清對曰

黃衣者蝗也南方其有蝗乎其秋七月蝗果至大江以南在在皆有吾鹽亦然數日為大風雨漂入

海盡死至庚子六月蝗復自西北蔽天而來數日又為大雨驅逐盡斃然遺種於茲至七月復生初

食草後食禾稼民間祈神賽願張旗擊鼓逐之闕若赴闕懼其害者十四三次年方憂遺種為患幸



初生時大雨連旬盡殄滅民復安業矣吾鄉素無此物百歲老人亦未之見大抵蝗旱物終不利于水鄉也胡公憲仲祛蝗文曰貞維太歲商橫困敦朱明朔馭鷄火霄昇動散潤距五吏淑循萌莖葉華萬寶苞蓐不虞水旱奚及蝗螟邇其首禍東南于征漫濫若雪續緡若雲劍牙戟股豕啄鼠心齧殘良禾卒如暴兵里旅樹匆旄倪用驚鞭金伐華昏旦靡寧思易我吏魯恭宋均將告天子漢括唐吞厥毒滋厚匪神曷徵山川城社龍鬼仙靈聰明正直惠恤慈矜神之聽之端告帝閭上帝憐怒徂救毋凝勾陳肅駕蚩尤帥兵飛廉辟道祝融啟行赤霞鉞豎黑雷斧擎河鼓沸騰慧帚扞撐天馬飛驪龍旂盪晶六丁先驅以報我神我神夙戒共致天刑后稷護稼共工正名巨靈撲扇海若揚旌百示具出陽奮陰叁蔓類直剪妖俗橫敷禁貪戢虐拂穢除腥遺種勿殖腹壤用清無害嘉穀易惡為登穆颺載阜甘澍遂零杭林種稔穰穰滿盈千箱百室蘇此飭民呼雛扶耄左粥右殮南山醉後擊缶鳴鳴既輸太倉亦有梁盛謝爾神功還歌太平小臣再拜敢頌祺禎

### 十五年海溢堤潰漂沒田廬

### 十八年大饑

徐咸雜記曰是秋田禾稿死并蝨食者大半民間收穫十無三四府縣既不奏

荒征歛反急至明年春饑甚民間食糠粃豆餅至草根樹皮採剝殆盡餓殍盈道賣子女妻妾者無美北鄉尤甚長老相傳惟元大德九年鹽邑極荒人相食到今二百餘年來未嘗遇此等歲也予豐厓長公作賣婦謠云東家賣婦江南去西家賣婦江南去肝腸寸斷兩不知血流併作河流注夫囑婦汝且逃生莫回顧賣汝得錢了官府猶勝抱頭死朝暮婦告夫我今此去落何處百歲夫妻一朝撇此生何日重完聚哭聲震天天地悲道傍觀者各淚垂道傍垂淚且勸之人生不幸遭此時休言死別與生離他家食卻親生五歲兒朱西村亦有了一篇云東家少婦價萬錢西家大婦五六千癡兒肚腸鐵石堅不關恩愛無姻緣竈前數日斷火煙放手慟哭聲徹天明朝捉落江南船只有去日無歸年風吹落花江水邊蓬飄梗斷不復聯我今歌此賣婦篇官家早晚開華筵一彈一唱公堂前



二十二年大饑

二十三年荐饑人死徙轉鬻者不勝計

三十一年二月隱馬山有軍馬現遠望甚明即之不

見八月復現未幾海寇至

按仇志載成化弘治間秦駐山屢有金盃甲者

隱現盈山彌谷父老相傳為秦駐山陰兵或云山上有昔人所藏刀仗庫殆其氣也

是年秋九月日將晡時西方有赤氣亘天不散如是

者百餘日明年海寇作民被殺戮者無筭

三十二年五六月地連震生白毛長者四五寸李樹

生黃瓜大如蠶繭而長倍之九月桃李盛花

三十四年五月日將晡有黑日十數在日傍游盪以

水盆映之尤明凡數日止

崔嘉祥紀事曰時方海寇猖熾見天垂異象人

心愈益駭惑不知所措有謝山人鰲者精於古玩語人曰第無恐此不為民害主大臣災當有誅戮之應衆莫之信居無何有旨逮提督浙直軍務尚書張經堤督浙江軍務都御史李天寵下詔獄以玩寇論歾

三十七年二月斷龍橋民家羊乳二羔又一物如人

形仇俊卿有文紀其事

四十年四月七日雨雹大如拳麥盡損至破廬舍激

浦尤甚秋冬大雨水禾不能刈爛田中米薪踊貴

四十二年四月十八日有海馬萬數其一大如樓沿

石塘羣行二十餘里復入海響震非常



隆慶二年正月相傳

朝廷欲括童女充後宮邑中

競相嫁娶倉卒成言貧富長幼多不得其宜者此

民訛也

三年閏六月十五日大風雨海溢

崔嘉祥紀事曰是日颶風驟起瓦石

飛揚且大雨如注天色慘黯向暮風愈烈傾垣倒屋聲四郊相屬終宵弗輟及旦視之河水漫溢平岸遊魚圍圍舉手可收味其水則鹹矣亟往登城而望白浪滔天莫辨河海龍王廟楊公祠竝沿海民廬漂沒殆盡土塘淪于水石塘橫倒其巨石有一二十人不能舉者或板至沙間或推入內地水力雄勁至此吾城不為壑也幸矣

四年三月乍浦湯山陳山發赤光燭天至五年不絕

晴夜尤盛

萬曆三年五月三十日夜大風海溢城中平地水三

尺瀕海德政海鹽甘泉三鄉水丈餘溺死者數千

人壞廬舍亡筭田為鹹潮所淹無秋民大饑

崔嘉祥紀

事曰自隆慶已巳海溢故老相傳以為百年所未經見迺未幾復有此變是夕烈風怒濤浙直閩廣瀕海郡縣靡不為災而鹽為甚今據縣報災之數言之溺死居民無主而官為之瘞者三百二十人有奇其為宗戚所收或逐流而逝墜于魚腹而官不聞者不在其數衝倒民房四千四百間有奇淹沒田禾五千七百六十六頃有奇為禍之烈如此先是四月之朔日有食之既自午盡未昏黑不辨只尺人情大駭忽五月晦夜遭此患因感古人海潮應月之說及張子所云日月朔望其精相感者尤為信然蓋日食者月揜日也自坎離列而月有水象焉月之有朔望陰陽之交也氣以交而感潮亦緣氣而大故朔望前後月行差疾潮勢亦大今海潮之變起于朔之前晦之夜實氣交勢長之會



也其為應月昭昭矣氣從  
類應幾兆變先理或然也

六年秋有蟲傷苗歲歉

崔嘉祥紀事曰春秋書螟志災也螟即今之蝗而噴而賊

而蟲亦其屬爾雅云螟食苗心噴食葉賊食節蟲食根是也萬曆戊寅秋七月有蟲生苗間細若蟬蝻子千百為羣即不食根節不傷心葉而一經其積集遂不復秀實雖螟噴蝻賊之既不是過田氓以苗蟲呼之說者謂是年多澇田間宿水浸漬而生捕之不得驅之不去卒莫知所以治之之術焉

十四年二月晦天雨土即密室中無不颺入几案間

有積厚至一二寸者

十五年七月二十一日大風拔水發屋海潮壞石隄

水大至

十六年米價騰踊大饑秋旱復無年浮齒蔽水

崔鳴吾紀

事曰先是十五年丁亥三吳田土盡没于水米價至冬頗高戊子正月至四月又霖雨為災江淮浙直間森茫一壑歲大無麥遂至歉甚米價益踴有司不達事宜強為遏糶之令富室擁米不售饑民嗷嗷待哺無從告糶朝廷詔解其禁民頗便之米稍稍出有司復報大戶勒其出粟減價官糶米愈不出民益病焉往年有詔令民得輸粟贖過存積備荒有司利罰金之便僅應故事及詔發粟會厥空虛靡可發者即少有所發又不得其術輒為豪有力者得之饑民曾不沾升斗之惠已而四方商運踵至又為牙儉射利者恐嚇而去所在饑民專仰給富室而富室坐索高價益擁米不出價益滋貴米石價銀一兩六錢麥石價銀八九錢膏產產不賤不售鬻妻女妻女以口食貴不售民間多茹糠粃草木以充腹饑而死者相籍日以千百計河渠穢不可濯秋則大旱人情皇皇焦禾殺稼非有力者則楮然稿矣聞諸父老嘉靖乙巳荒歉米價如之然當時止浙中數郡之厄江淮間豐稔處



尚多有司許其通融米商輻輳集所苦不過二三月非若今歷夏秋半歲未有救援之澤也民之困疲視嘉靖間則又甚矣呂元聲戊子紀事詩云少小見人說饑餒壬子兵荒辛酉水此時飽食不關懷老大方知窮戊子兩年田白無草生到處瘟黃哭人死米不滿斛值百千人猶鎖棧等價錢餓夫伸手頭搶地寒士束腹呼高天家稟纔餘二百石一日忍作兩日吃升錢減半周貧闕五日爭門厥底出忽傳湖廣尖新來家戶看看改顏色通商亦是救荒策昔人有言毋過糶

十七年大疫民死者十三四

二十三年八月訛言有青

二十九年四月訛言倭至民入西關避爭門多踐死者

三十六年正月十九日初昏有聲如車馬喧或如礮

有光如火隱現自西南起亘東北人皆奔避爲有寇夜分止

三十七年十月有大魚至閣於東門海灘其長十丈餘

四十四年七月十三日西郊起蜃水從小柵橋出高

丈餘舟多覆近蜃穴民居浸於水者三時始退其穴

土甚燥而鯉蠅集於中遂不去

泰昌元年穀暴貴掠者四起

天啟元年訛言選宮人鄉民多有童男女相配合者

三年十二月二十二日地震



四年正月二十九日初昏空中有聲如礮光燭天自西至須臾息

吳永安三年海賊破海鹽殺司鹽校尉駱秀吳志

晉咸和三年蘇峻遣其黨管商進攻吳郡焚海鹽後

賊平詔復縣租稅三年晉書成帝紀蘇峻傳

隆安五年海賊孫恩犯海鹽劉裕築城於故邑拒之

斬其大帥姚盛裕將虞丘進又敗恩將張驃恩北

走裕與縣令鮑陋率吳兵千人追之陋子嗣之戰

歿恩至滬瀆殺內史袁崧有邑人李祥赴義事恩

後進犯京邑裕自海鹽入援復追恩還至海鹽屢

破其衆前後俘馘以萬計詳前戌海篇

宋泰始中臨海賊田流自稱東海王將黨與出海鹽

放兵大掠通鑑

梁太清中侯景將宋子仙攻錢塘邑人陸黯舉義兵

千人攻吳郡襲殺其偽太守蘇單于子仙走歸宋書

陸黯傳

宋建炎三年金兵南渡據臨安十二月遣騎二百自

黃灣至海鹽諭降時朝議主和吏民遷避有賈機

宜潰卒遇之於彰慶館前碎碑石爲砲以拒之明

年金兵還攻破秀州邑尉朱良禦之境上力戰死



見宋史程俱朱良傳并  
浙江通志永樂縣志

元至正十六年張士誠弟士德攻海鹽乍浦鍾氏拒

之時苗兵過州境民大擾

徐秦志 元至正十六年五月張兵

聲言南下楊叅政完者以數萬眾屯嘉興先鋒呂才以七千眾屯王江涇軍容甚盛張兵不敢取道嘉禾自平望烏墩犯武林達丞相以為楊當扼其鋒不為備遂至破軍殺將達僅以身免楊得破城之問即統苗土官軍分為三路使蔣英從大麻唐栖董旺從硤石長安身率劉震朱鉞從海鹽黃灣而進以呂才呂昇屯守嘉興張軍分應不暇一敗于皋亭山再敗于謝村三戰而敗于夾城巷張軍悉水從德清陸從海鹽遁還初楊過海上余與楊別駕郭大理謁之勸其留兵三千還歸路楊云此行賊且成擒安得有歸者不聽已而竟得縱逸而去按鍾氏之拒士德當在從海鹽遁還之時王鏊姑蘇志載張上誠傳亦有張士德潰後收殘兵攻海鹽為乍浦鍾氏所撓之語可以互證 苗軍之

為吾土害輟耕錄載有趙初心家一事舉此可以槩見詳後今考郡志楊完者本武岡赤水苗也初張士誠侵攻嘉興元兵力不能守江浙行中書省丞相達識帖睦迺以便宜調完者兵來禦完者陰驚酷烈多權詐有苗黨千餘皆趨捷拳勇能赴湯火號曰荅刺罕屢敗張軍嘉興獲全因恃功脅丞相陞已本省叅知政事署官屬淫穢彰聞後敗還杭竟以酷自滅而嘉興郡邑亦陷于張氏又考樂郊私語云完者克肆掠人貨錢至貴家命婦室女見之必圍宅勒取媼汚信宿始得縱還少與相拒則指以通賊縱兵屠害由是部曲驕橫凡屯壁之所家戶無得免焉民間有死不怨泰州張生不謝寶慶楊之誥觀此可以悉苗獠為害始末為後世調用者之戒

十七年八月張士誠遣弟士信復犯嘉興州城晝閉

者二十餘日

姚桐壽私語云張氏以水師數萬復攻嘉興羽檄星馳川陸戒嚴海鹽自

州佐巡場以下皆統兵北屯半邏新豐廣陳以備州城閉塞兼旬民間米穀驟踴薪爨不屬多破斫



簷柱几榻而炊後張軍爲楊完者所敗遁去始解嚴

十九年張士誠歸命拜太尉調海鹽夫萬二千人築

杭州城是年運粟至澈浦入方國珍所具海舟輸

京師

樂郊私語曰張氏既歸命本朝兄弟相繼拜太尉平章之命乃于十九年秋七月大城武

林起平松嘉湖四路官民以供畚築海鹽一州亦發徒一萬二千分爲三番以一月更代皆褻糧遠役而督事長吏復籍之酷斂鞭朴捶楚無有停時死者相望至本年十月始得迄功凡費數十百萬而新城碑記至以肅仲山甫爲譬其辭有曰有嘉太尉克綏我民疇其相之平章弟昆又曰我作我息我出我入變呻爲謳伊誰之力將無慚靦斯言元史云至元中兩浙爲方張竊據貢賦不供海運之舟不至京師者積年至十九年遣官由海道達杭徵粟于江浙時張士誠爲太尉方國珍爲平章政事詔命張輸粟方舟而兩人互相猜忌張慮方之載其粟不以輸京方亦恐張之掣其舟因乘虛襲已也相仗莫爲先行省丞相達識帖睦爾曲爲開諭方氏始率海舟俟于邑之澈浦而張氏平江之粟展轉以達杭之石墩又一舍後抵澈浦乃載于舟海難淺澁甚艱于行爲粟僅十一萬石至二十三年士誠拒命遂絕

皇明洪武五年五月二十一日倭寇澈浦殺畧人民

賈錄

二十六年九月倭寇澈浦明年正月又來寇

以下並見郡邑

舊志及籌海圖編采九德倭變事畧

永樂二年夏有倭來寇

十四年五月倭大掠縣境燬民廬殺守戍驅人畜無

笑



正統七年七月倭寇乍浦八年六月又來寇百戶徐榮戰歿

十四年夏倭夷犯境殺官軍

成化十二年倭寇突至嘉興府同知趙哲戒嚴乃退嘉靖二十五年夏五月漳寇及崇明寇犯乍浦金家灣軍士陳馬兒等死之二十七年復犯黃灣秦駐塢軍兵童欽等死之是年十月又掠鄭家埭包家埭而去

此嘉靖中海寇入犯之始至三十二年後禍益劇矣

三十二年四月倭七十餘人犯新塘嘴我軍焚其舟多死者餘衆遁至乍浦入海去又有倭自金山來至白馬廟指揮滿朝與千戶王繼隆百戶楊臣康綬力戰死進至縣北門教場外指揮馬呈圖采煉千戶姜楫百戶呂鳳王相姚岑等率兵禦之並遇害是月復有倭數百圍乍浦叅將湯克寬引兵救之斬數十級餘衆仍遁入海去

五月四日倭衆二千餘以三十七艘登犯圍縣城五晝夜叅將湯克寬以邳兵禦之退城得完郊外數十里焚掠幾盡男女被擄者亡筭殺溺死者千三百有奇九日轉攻乍浦所陷之千戶王鏜死焉城中被殺戮淫穢者尤不可勝計



三十三年四月倭七百餘人泊舟龍王塘入犯知縣鄭茂乘城禦之進掠至郡城還叅將盧鏜邀擊于孟家堰敗績指揮李元律千戶薛綱把總官劉大仲等俱戰死倭結巢石墩四出焚掠攻澈浦指揮徐行健典史李茂協力固守不能破凡四十餘日掠飽始奪舟而遁我師追之海洋沉其舟衆皆殲焉

三十四年迄三十五年倭結巢柘林衆萬計四出掠諸郡道經海鹽焚燒殺戮之慘不可勝書指揮姚弘以搗巢死徐行健以邀擊遇伏死後總督胡公

宗憲計斬賊首徐海陳東葉麻等又擒王直海洋

倭警始息

崔嘉祥紀事曰海外諸夷無慮數十種惟日本最爲鴛悍我朝建衛屯兵設

舟置堡備之甚詳自四明革互市之司三江斷舟楫之路于是私通溢出與亡命逋播者誘致夷人侵掠郡邑而鯨波數揚氛塵四起矣嘉靖癸丑夏四月二日埃卒報一海舟泊演武場北去城可二三里邑人以為漁船相率觀之城門洞開漫不爲備時則海寧衛總戎王應麟揚兵北出梁莊協總馬呈圖揚兵南出海寧而居鹽者惟掌印指揮李元律團操指揮王彥忠數人耳王即率陸兵逼其舟而鞠之以木匣浮水致書云吾日本人也吾脩舵即返吾國無相害也王揮兵而進舟中人即焚弓矢刀劍起立約可七八十人其人禿髮聲馱舌以紋布爲衣發矢輒斃人衆始駭然謀報南北三總引兵來援是夕天雨我軍無律星散棲于演武場左右賊乘夜逸其半厥明我軍用火攻船擒十餘人燔死者二十餘人火中脫走者又五六人流至牛橋民家爲典史李茂民兵所殲王應麟王彥



忠遂追其逸黨而去又明日有流賊名八大王者四十餘人自金山來經乍浦梁莊過獨山至白馬廟督守梁莊指揮滿朝引兵追之戰死報至協總馬呈圖卽檄指揮采煉徐行健兵次演武場以待六月軍方晨炊賊突至不及陣而馬與采皆遇害徐亦敗賊遂過海鹽逾澈浦直抵海寧界杭州把總陳善道率兵禦之兵潰而死賊乃奪舟浮錢塘復入海王所追逸賊戰于矮婆橋僅傷一二賊至喪二十餘兵遂繞吾鹽及平湖諸鄉出乍浦居海口天妃宮適新至賊百餘與合勢愈熾王不能禦時守巡叅政潘公恩僉事姜公廷願聞報來鎮吾邑而提督軍務中丞王公忬又檄叅戎湯公克寬率邵兵三百來援湯大閱衛兵及湖兵得千餘人出攻乍浦賊賊據高公山湯兵鼓噪而登賊皆就擒焉時四月二十五日也厥明又五船泊鹽之新塘嘴黎明登岸抄掠東北城下民家是時比閩稠密人民富饒瞬息間滿載去莫敢誰何識者知賊得志必大舉也次日湯叅戎命把總王應麟守乍城班師吾邑守巡公郊迎士民夾路觀之方相慶幸乃五月四日賊果大舉船凡三十有七泊龍王

塘邑中人登城眺望皇皇皆若釜中之魚叅戎公卽率兵由南門出拒之民間老稚遮道呼號乞留擁馬足不得前湯遂登城爲守計每城梁一派軍民各一五堞監以邵兵十堞統以甲長一舖督以千百戶各門守以衛指揮鄉之縉紳先生賓造秀士又相與往來協贊爲士卒倡而胥財用給餉饋轉輸不乏則署卽三府鄧公遷也湯親冒矢石往來巡督不已賊之始至先攻北門次東門矢集城上如雨至暮則四郊舉火煙焰蔽空吾城守益堅椰鐸之聲終宵弗撤如是者五晝夜賊乃揚帆而北分其半由陸路趨乍浦湯曰賊之水陸分道無去志也此行不攻乍浦必還襲吾鹽吾謹備之不逾日而乍城果陷把總王應麟不克守僅以身免賊入乍城大掠而去後湯坐玩寇下詔獄先達居要津者曾無一人能以功過爲湯準者崎嶇坎珂數年獲釋是歲冬莆陽鄭公茂來宰吾邑繕敵臺設南北關都指揮張公錢代湯鎮守復濬河隍建土城以爲之備至于處軍餉脩戰具樞機周悉綜理精詳控制吾鹽爲三吳屏障則郡大夫劉公懋之功尤多明年甲寅夏四月六日賊衆八百乘二



船抵龍王塘登岸卽燔其舟襲東門不克退而焚  
小東門及繞城民居數百家公私廬舍一望楮然  
時叅戎盧公鏜鎮乍浦帥師攻南沙賊而括州義  
士劉大仲統坑兵五百專守吾邑盧見其能出死  
力欲藉以立功亦召之去城中遂莫與爲敵賊乃  
繞城而西過興城半邏徑趨郡城郡守劉公督坑  
湖等兵出戰斬首二十餘級賊復還宿半邏盧叅  
戎及丁總戎僅聞報自廣陳引兵來晝夜兼程進  
歷數百里而趨利初八日與賊遇于孟家堰倉卒  
阻河爲陣時方麻麥蒼鬱伏從中起我兵大潰死  
者千餘人指揮李元律義士劉大仲皆戰歿而盧  
與丁以善泅走免是夕賊復至鹽厥明犯宋亭村  
過澱浦據石墩巡檢司爲巢出掠督府檄兵憲羅  
公拱辰盧張二叅將都指揮周公應禎帥兵屯海  
寧是月二十日戰于石墩敗績周馬蹶而死至五  
月十八日賊移輜重奪舟入海爲統兵指揮劉隆  
潘鼎千戶晏繼芳等水兵擊敗斬首二百級餘皆  
溺海死明年乙卯秋九月松江流賊居陶宅鎮指  
揮姚弘奉督府檄討之不克而死又明年丙辰春  
正月賊首徐海擁衆數萬與柘林賊陳東合遂分

兵北掠淮陽京口南掠定海慈谿而海與東居柘  
林總督軍務胡公宗憲遣兵分屯平湖海鹽間相  
爲犄角指揮徐行健奉調截守北王橋與賊遇力  
戰死之是年四月六日也賊據柘林列柵爲城開  
厰爲室爲久駐計分道四出掠其婦女金帛絲綿  
粟米牛羊聚之盤據不動已而率衆侵峽石越皂  
林出烏鎮大掠而西時督學阮公鶚新受提督之  
命倉卒與賊遇于皂林卽退保桐鄉而叅將宗公  
禮禪將霍公貫道奉朝命討賊適至乃張左右  
翼于桐鄉城下麾兵力戰斬首數百賊衆披靡欲  
遁偵知無援縱兵奮擊二將死之遂攻桐鄉愈急  
總督胡公亟還省城檄諸路兵爲援廼設間謀通  
諭使而桐鄉圍解乃與監督尚書趙文華謀遣辯  
士蔣洲陳可願等入海說王直以衆降得免罪拜  
爵蓋直雖久在海島未嘗親犯內境自以罪或可  
原遣養子毛海峯送款胡公待之甚厚復爲假尚  
書報聘直信之遂來謁公公執而誅之又遣謀者  
說徐海海亦執其黨葉麻陳東等謝公公每待之  
優渥海遂無鬪志得遷延歲月徐爲之圖於是諸  
酋疑海謀亂公乘釁率兵三萬次平湖阮公率兵



二萬次海鹽直隸侍御周公如斗督永保兵駐金山分道並進七月二十九日戰于柘林斬首數百溺海死者無筭海復集餘黨據沈家莊我兵圍之八月八日火攻其巢海窘迫沈河死其屬遂無噍類東南始得免于倭患承平至今矣

吳黃龍年中吳郡海鹽有陸東美妻朱氏有容止夫妻相重寸步不相離時人號爲比肩人後妻卒東美不食求死家人哀之乃合葬未一歲冢上生梓樹同根二身相抱而合成一樹每有雙鴻常宿于上孫權聞之嗟嘆封其里曰比肩墓曰雙梓後子弘與妻張氏亦相愛慕吳人又呼爲小比肩出述異記吳郡海鹽軍北鄉亭里有士人陳甲本下邳人晉元

帝時寓居華亭獵於東野大藪中歛見一蛇長六七丈形如百斛船玄黃五色臥崗下士人卽射殺之不敢說三年後與鄉人共獵至故處語同行云昔在此殺大蛇其夜夢見一人烏衣黑幘來至其家問曰我昔昏醉汝無狀殺我吾昔醉不識汝面故三年不相知今自來就死其人卽驚覺厥旦腹痛而卒搜神記

晉干寶父瑩先有所寵侍婢母甚妬忌及父亡母乃生推婢於墓中寶兄弟年少不之審也後十餘年母喪開墓而婢伏棺如生載還經日乃蘇言其父



常取飲食與之恩情如生在家中吉凶輒語之考校悉驗地中亦不覺爲惡旣而嫁之生子又感兒

病絕見鬼神事實以此撰搜神記三十卷嘗示劉

惓惓曰卿可謂鬼之董狐搜神記序曰雖考先志千載籍收遺逸于當時

蓋非一耳一日之所親親聞也亦安敢謂無失實者哉衛朔失國二傳互其所聞呂望事周子長存

其兩說若此比類往往有焉從此觀之聞見之難一由來尚矣夫書赴告之定辭據國史之方策猶

尚若茲况仰述千載之前記殊俗之表綴片言于殘闕訪行事于故老將使事不二迹言無異塗然

後爲信者固亦前史之所病然而國家不廢注記之官學士不絕誦覽之業豈不以其所失者小所

存者大乎今之所集設有承于前載者則非余之罪也若使采訪近世之事苟有虛錯願與先賢前

儒分其譏謗及其著述亦足以明神道之不誣也羣言百家不可勝覽耳目所受不可勝載今粗取

足以演八畧之旨成其微說而已幸將來好事之士錄其根體有以游心寓目而無尤焉

干寶之兄干慶無疾而終時有術士吳猛語慶之子

曰侯筭未窮我爲試請命未可殞歛尸臥靜舍唯

心下稍暖居七日猛凌晨至以水激之日中許慶

蘇焉旋遂張目開口尚未發聲闔門皆悲喜猛又

令以水含洒乃起吐血數聲兼能言語三日平復

初見十數人來執縛桎梏到獄同輩十餘人以次

旋對次未至俄見吳君北面陳釋王遂敕脫械令

歸所經官府皆見迎接吳君與之抗禮卽不知悉

何神也太平廣記 十二真君傳曰吳猛字世雲家豫章武寧縣有道術時縣令于慶死三



日未殯猛往哭之因云令長固未合死今吾當爲上天訟之猛遂臥慶屍旁數日方盛暑屍極壞爛其魂惡不欲復入猛強排之乃復重蘇慶弟晉著作郎實感其兄及親亡父殉妾復生因撰搜神記備行于世與此稍異同

梁長沙王思規爲海鹽令忽見一吏思規問是誰吏云命召君爲主簿因出版置牀前吏又曰限期長遠在十月若不信我到七月十五日日中時視天上當有所見思規敕家人至期看天聞有哭聲空中見人垂旒羅列狀如送葬

甄異錄

壽昌令趙郡李瑩同堂妹第十三未嫁至德初隨諸兄南渡卒葬於吳之海鹽其親兄岷莊在濟源有姊寡居去莊十餘里祿山之亂不獲南出上元中忽見妹還問其由來云爲賊所掠言對有理家人不之詰姊以亂故恐不相全倉卒將嫁近莊張氏積四五年有子一人性甚明慧靡所不了恒於岷家獨鎖一房來去安堵岷家田地多爲人所影占皆公訟收復之永泰中國步旣清岷及諸弟自江東入京參選事畢還莊欲至數百里妹在莊忽謂婢云諸兄弟等數日當至我須暫住張家又過姊別姊問其故曰頻夢云爾婢送至中路遣婢還行十餘步迴顧不復見婢頗怪之後二日張氏報云



已死姨及外甥等悲泣適已而諸兄弟遂至因發張氏妹喪岷言渠上元中死殯在海鹽何得至此恐其鬼魅因往張家臨視舉被不復見屍驗其衣鏡皆入棺時物子亦尋死

廣異記

貞元中蘇州海鹽縣有戴文者家富性貪每鄉人舉債必須收利數倍有鄰人與之交利剝刻至多鄉人積恨乃曰必有神力照鑿數年後戴文病死隣人家牛生一黑犢脇下白毛字曰戴文閭里咸知文子耻之乃求謝言以物熨去其字隣人從之既而文子以牛身無驗乃訟隣人妄稱牛犢有字縣追隣人及牛至則白毛復出成字分明但呼戴文牛則應聲而至隣人恐文子盜去則夜閉於別廡經數年方死

原化記

顧况有子數歲而卒况悲傷不已爲詩哭之云老人哭愛子日暮千行血心逐斷猿驚迹隨飛鳥滅老人年七十不作多時別其子雖卒魂神常在其家每聞父哭聲聽之感慟因自誓忽若作人當再爲顧家子一日如被人執至一處若縣吏者斷令託生顧家復都無所知忽覺心醒開目認其屋宇兄弟親愛滿側唯語不得當其生也已後又不記至



年七歲其兄戲批之忍曰我是爾兄何故批我一家驚異方叙前生事歷歷不誤弟妹小名悉遍呼之始知羊叔子事非怪也此卽進士顧非熊常親訪之涕泣爲言如此釋氏處胎經言人之住胎與

此稍差

酉陽雜俎

紹興二十二年邑人魯璪赴省試納卷畢將出門偶思卷中詩誤押旁韵倉皇反走五幕求之時卷軸山積人語喧闐決謂不可檢尋歎恨憂沮適一老吏問其故曰吾能爲公取之璪許賂鏹二十千吏卽入幕於亂卷中一探得之以授璪乃塗竄其誤

吏囑曰謝鏹幸爲送吳山坊第幾宅卽我家也璪喜謝而去越三日往謁其家則云某人者故太常吏人死已旬日矣詢其狀貌正貢院所見者也璪驚喑因語其故且感其德以鏹付其家已而登第

睽車志 夷堅志亦載此鬼吏爲蔡十九卽在于院中已兩舉與此稍不同

郭二雅妻陸氏秀州海鹽人端靖有志操一日呼其子昭戒之曰我數日後當死切勿卽斂叮嚀且數四昭憂之亦未敢盡信及期無疾而逝心猶微溫奄奄有出入息又十日復生曰姑蘇某龍王嬖一妾遭夫人妬忌箠死鞠訊天獄累年不能決上帝



命我詰其情一問而得之奏牘已上信宿當就刑  
必有暴風雨至已而平江果大風駕潮漂溺數百  
里田廬皆被其害時紹興二十八年也

夷堅志

相傳紹興間有海鹽丞簡傲不羈志輕一世嘗謁一  
鄉大夫主人偶遲遲而出丞故好睡比主人出則  
丞已鼾聲如雷矣主人以客睡不敢呼更復就睡  
如初寃之主客更相臥醒至日沒丞起而去竟不  
交一言趙子固愛其事爲作圖紀其說於上置之  
座右曰此二人大有華胥風氣足以箴世之責望

賓主者

樂郊私語

賣假香者多有罪報海鹽縣倪生每用雜木剉碎炒  
磨爲末號曰印香貨販一夕燒蚊虫藥爆少火入  
印香筐內遂起烟焰方用水澆之而傍有切香亦  
焚又用水澆之在磨上者又燃矣倪見火勢難遏  
欲出戶避遍室烟迷竟不能出須臾人屋一火而  
盡又有黃翁者居東湖楊柳巷每往臨安江下收  
買甜頭甜頭者香行俚語乃海南販到栢木及藤  
頭是也其法斷截如箋香片子與番香相和上甑  
蒸透以米湯調合墨水用茆帚蘸墨水就甑內翻  
灑令其遍斑取出攤乾上市貨賣淳熙年間黃泊



船東湖口金山大王廟前三鼓時忽一人擔起連拳歐之謂曰汝作罪業貨賣假香可速去來過更時許方得蘇醒次日抵舍病月餘斃矣後其妻夢至陰府見二鬼以沸湯兩桶沃一罪人鬼叱曰婆子此汝夫黃某也在世貨賣假香今受此報驚寤悲泣令諸子飯僧設功德追度其夫遂改業別爲

生理

閑憲括異志

秀州海鹽縣漁戶楊刺旗嘗寢漁舟夜夢被人擒去刺其面爲旗驚寤而面頰猶痛俄而天曉亟起就缸舷照之初無迹第見魚蝦擁出水面團結成塊

擲網盡得之中有一物如鼎狀持歸刮洗泥垢則

純金也因是致富秀人至今呼爲楊刺旗家

聯車志

去東湖三四里村曰楊墩有楊四九以養鴨爲生數百爲羣人有鬻之者楊爲之打併斫其頸然後付之又得燐治法沃以熱湯令氣未絕燐之毛易脫晚年得一疾甚怪每浴須湯極熱皮膚皆浸爛始快人以爲活受鑊湯地獄報云

當湖酒庫有四聖廟前後交承祀奉甚謹初到上兩幡旣解印復兩幡酬神庇以爲定例丙辰丁巳間有姑蘇姚承節應瑞者董糟丘取幡染黑色雜用



無知者及去任未數里其子爲神所憑曰我立祠  
福汝坊場久矣安得擅取新舊幡以爲兒服歷道  
所以衆皆驚愕姚懼亟禱於神許以謝過子遂甦

開窓括  
異志

慶元間有宿儒以文名入菴掖爲承旨朝議謂且大  
用會韓平原有歸子曰葦先鈴吳門兵時出妾方  
娠鬻海鹽當湖魯氏得男焉葦也旣貴無他子遂  
以重幣請于魯歸之始至而平原適有恩制當降  
麻偶不詳知遂於廷綸中用魯公拜後事意蓋指  
忠獻耳有欲進者忌之摘其語謂含譏刺平原讀  
之見其姓之偶符大怒不踰月遂去國終其身不  
復用當其下筆時初不自覺轉喉之觸謂禍福不  
可以智力勝當於此乎占之

程史

元貞元中張與材襲掌江南道教爲龍虎山正一天  
師三十八代孫時潮嚙鹽官海鹽兩州爲患特甚  
與材以術治之一夕大雷電以震明日見有物魚  
首龜形者磔於水裔潮患遂息

元史

州著姓常氏自忠毅公與秦檜不合退居海上遂家  
焉其後有號蒲溪者亦官叅知政事其子孫嘗言  
有厥祖遺像一幅以兵亂失之後復得之民間因



出以示余其像瘦惡而髯帶貂蟬冠上有贊曰佑  
時生甫同德暨湯治格一隆力成再造長樂溫清  
遂明王孝理之心海宇阜豐躋斯民仁壽之域公  
功斐迥帝庸作歌列辟具瞻謂相君之形惟肖睿  
辭敦獎見王者之制坦明郁郁乎其文哉皜皜不  
可尚已其後題曰紹興龍集壬申仲春穀旦門下  
士武原魯瓌拜贊余甚疑之此贊似宰相兩常公  
皆不得柄國柰何有此後檢宋范茂明集有代賀  
秦太史畫像啟乃知此贊是摘啟中數語爲之耳  
此蓋檜像而子孫愛重此啟摘去和戎等語而借  
以爲贊也年代既久淪落民間爲常氏所得復以  
魯瓌爲本州人益信而不疑耳不知魯中紹興甲  
午趙逵榜檜方柄國故稱門下第不識茂明何故  
代瓌作啟余備錄以示常氏不以爲然愈益珍重  
嗟嗟是忘乃祖之仇而拜其仇也子孫誠不可不  
學如此

潘從事澤民嘗爲余言本州達魯花赤也先不花本  
北人以至正三年至海上時方八月秋濤大作潮  
聲夜吼震撼城市不花初至聞此夜不敢卧起問  
門者熟睡呼之再三始從夢中荅曰潮上來也及



覺知是官問懼其答遲連聲曰禍到也狂走而出  
不花誤聽遂驚跳入內呼其妻曰本冀作達魯花  
赤榮耀縣君不意今夕共作此州水鬼遂夫婦號  
泣合門大慟外巡徼聞哭傳報州正佐官皆顛倒  
衣裳來救以爲不花遭大變故也因急扣門不花  
愈令堅閉庶水勢不得驟入同寮益急遂破扉倒  
墻而入見不花夫婦及奴婢皆升屋大呼救我同  
寮詢知不覺共爲絕倒乃知唐人潮聲偏懼初來  
客爲真境也不花今爲叅知政事

樂郊私語 按元史張楨傳載

李羅察罕二將構兵朝廷遣也先不花同樞副脫脫木兒治書侍御奴奴往諭值盜阻迂回退怯枉

道繞數千里而行坐使兩軍日夜仇殺民被荼害始知畏怯潮聲伎倆畢見監州時矣

宋寧國教授俞長孺有道士也而無子嘉興人顧德

玉字潤之嘗遊其門長孺每語人曰吾昔寢疾於  
杭德玉侍湯藥情猶父子醫爲感動弗受謝今我  
行且老必寄之以死旣而訪醫吳中病且革促舟  
赴德玉家死焉德玉執其喪衰絰就位答吊者拜  
塋之海鹽歲時享祀惟謹

郡志

州民有朴知義者家翁莊堰幼生而不慧至八歲不  
語一日俄謂其母曰今日墻外牛鬪孃可避之舉  
家駭而且喜已而鄰人之牛果鬪墻外是後復不



言數日復言有官兵來未幾張軍從雲間來自此  
言無不驗四方挾錢帛來問者如見神明家至驟  
富有凶事者輒指而告之如嚮人始見之多面如  
死灰惟恐其有惡言也母因戒之其後惟母告之  
言則言年十九始娶與其妻一接而殞此雖人妖  
亦似乎保真通靈故能前知如此及少近婦人忽  
焉滅没殆真泄而神與之俱亡無足怪也

樂郊私語

至正丙申寒食趙初心率子姓婦壠忽老鶴聲憂憂  
不絕注聽乃一柏樹頃則衆樹同聲和之移時方  
止至八月苗軍火其居明年六月紅軍掠其家姪  
善如死焉

輟耕錄

金大節者澉浦鎮人洪武初爲鄉老人例隨計吏入  
覲大節侵曉出門行里許欲登廁有鬼自廁中出  
指大節曰此人好個金肚皮忽不見時國法甚  
嚴大節憂怖曰此行必腰斬矣旣入朝應對稱  
旨卽擢爲知府果腰金云其居與余家隣比余兒  
時嘗及見其孫名基者基死遂絕

碧里雜存

宣德三年十二月巡撫浙江大理卿胡槩等械強賊  
平康之黨三百人至京康海鹽人初名史慶真有  
罪遣戍復逃改名平康居崇德縣交結豪橫多畜



童奴強奪民田劫掠財貨以是家富造居室器用  
僭擬王公鄉人忤其意者輒殺之其怨家訴於巡  
按御史尹崇高遣人捕之康孳家逃會赦還糾集  
流民并千戶范信等凡八百餘人奪民舡五十餘  
艘備弓矢銳砲鉦鼓嚴號令夜劫怨家執其親屬  
隣里盡掠其家財燒其廬舍驅逐其子女以去遂  
大肆劫掠旁近民皆驚走郡縣莫能制檄奏請捕  
之 上命錦衣衛遣官與檄督巡按御史浙江三  
司捕之康復逃至是獲其黨至 上諭三法司官  
曰平康罪必不宥但一人之惡累眾如此其中豈

無誑誤卿等宜辨之無令濫刑仍令御史三司捕

平康七年獲康及其妻子悉械繫至京伏誅

實錄

宣德四年海鹽豪民馮本及郡民張謹等以殺人奪

人妻女侵盜官糧等事罪皆當死都御史劉觀嘗

為嘉興知府嘗受本等金各千數陰庇之皆得脫

免而通賂皆出其子輻之手事發 上曰刑不上

大夫觀雖負朕朕終不忍加刑以輻與其黨皆戍

遼東俾觀隨子以居

實錄 朱學忠曰鹽之鄙諺有曰金鏡胡三老家裡有金

寶馮本蘇元吉朝中有相識四人皆國初富室也聞長老云金胡二氏閩富至以銀磚作寵相誇胡之子孫不聞金有後裔父曰盛時子曰章皆為諸生餘亦有散之隣邑者馮則於宣德中籍沒死于



京蓋胡絜諸公巡視時也然馮之子孫今最繁至數百吾先世有諱瓊者乃其婿以奩資致富爲尚胥宗之鼻祖宅相未央豈本故無辜偶陷羅網耶蘇氏則化爲猷歆之動不復振矣

宣德七年海鹽吏曹奉吏部辦事告司務不應遣其往支官鹽又告知縣屬肅宣德三年率吏民運糧縱糧長盜所運糧通政司以聞上曰遣吏支官鹽何過知縣四年前事今始告此姦吏必挾私憾不聽事載實錄鹽乃有此黠胥然先皇明聖因是益章不可不記

正統七年九月海鹽縣民沈興進漆一萬斤禮部請給與時值之半上曰小民不遠數千里効勤宜照時價給之不可減事亦載實錄中他日有以官價買鹽民物者援此例乞全給當無詞也

正統丁卯予年二十二初赴鄉舉中場之日老父於中庭得桂一枝葩葉新茂不知所從來因寘瓶沃以水祝曰儻吾子獲薦花其發榮淹宿盛開香氣滿室是年八月二十四日揭曉先一夕余母又夢一老叟持筆如椽蘸毫書孫字於粉牆字崇廣專堵翼日報書至後兩試春官並絀至甲戌始登第爲孫賢榜下士蓋數定久矣

景泰中一日晨出暮歸抵家天色盡暝入室更衣遂



解下裳暗中火星星星自裙帶中出轉摺至梳上  
晶熒流落凡三四見荆婦相顧失色不敢言忽憶  
張茂先積油致火之說而余所爲裳乃吳綾俗所  
謂油段子工家又多以脂發光潤况余被酒體氣  
蒸鬱或因以致火亟呼婢令於梳後力曳裳以手  
摩之及手熱幾不可忍火星星星至矣以此知事物  
異常者必有所自不可遽爲驚駭傳惑人也

並張芳洲

雜言

媼某者海寧衛前所軍士也景泰初鄧茂七反於台  
州某寔從征焉戰敗逃匿積屍下夜半見燈火熒

煌訶道而至乃一神官也據簿點名驗屍至媼某  
曰此人乃板閘之數豈應死此遂去天明逃回固  
無恙恒以告人後十餘年運糧至淮安板閘墮水  
死媼音綽忘其名

董穀雜集

吾鄉景泰天順間有張澤民者居董家巷西家僅温  
飽瀟洒好事畧知文墨嘗理小舟具琴書茶竈一  
蒼頭舉棹隨意所之遇清絕處卽樹陰下橫琴自  
鼓興味翛然嘗折梅一枝貯瓶內命童子捧之訪  
天寧瑯僧童子上月臺失脚碎其瓶徐顧曰興已  
盡矣卽返步家有問月樓時與鄉彥李孟璿陸順



德蘇雪溪雲壑輩觴詠其上如澤民者今不可得而見之矣

西園雜記

陳世章者以易經補邑庠弟子員嗜酒尚氣人皆以狂目之生子曰乾亦庠生嘉靖乙酉世章醉死四年矣吾友蔡時信與乾及諸生扶鸞召仙降者乃朱晦翁也衆皆驚拜質以易經疑義數條一一剖析詳明益信無疑也已而忽書曰時信汝以色病我以酒亡衆方疑駭又書曰陳乾兒過來衆始悟其爲世章也因問陰世所謂地獄者有諸曰有然則公何以在此曰我無罪不往也又問輪迴有諸

曰有然則公當何如曰三年後在光澤徐知縣家爲男諸生因紀其言於壁後三年邑有徐豐厓先達以蓬州學正陞光澤令婦孕將育夜夢遠客至門自稱陳姓覺而異焉遲明而子生偶陳氏召仙者言其詳且示以壁記因大嘆異名所生兒曰應

陳云

碧里雜存

嘉靖九年秋予內姪張有守夢人持示一籍如試錄者揭視之見有守名第一吾見清孺次之張悌徐子龍又次之明日有守以所夢告諸三人四人者年相若皆邑庠有志者私相喜謂他日當偕登科



第是冬有守得疾卒次秋予見病卒又二年悌疾作遂驚歎曰吾不起矣人問之乃述前夢至秋果卒子龍固無恙見悌卒亦咤曰吾其能免乎次年

亦得疾卒

徐咸雜記

雪江秀和尚出家天寧巨目潤吻面骨巉巖肖枯木怪石無一毫澤媚態少時卽好爲詩煨煉吟鳴日課夜繼晚年縛茆勝果山之石門郭公泉側地旣孤迥人跡殆絕居久之夜夢陳姓者揖曰西有月巖請觀前生所爲詩旦乃求之藁莽中果得月巖巖刻元人詩題曰雪江陳天瑞與和尚號政同因

悵然若有所悟始知釋氏輪迴之說不誣也

董穀撰明

秀行業記

吾鄉有三黃門咸以敢諫著聲朝廷垂譽簡冊若張芳洲先生以見忌時宰出知汀州棄官而歸許雲邨先生以知時不可掛冠神虎而歸錢海石先生以犯顏觸忌削籍而歸歸雖不同而絕意巖廊終焉丘壑者如一揆也

長老言朱處士西村能詩而貧一介不苟以教授生徒自給七十年如一日也許九杞將葬父擬得名輩題主人舉當時尊貴者爲問九杞云公等特論



官耳世間高官自不乏顧無若西村老布衣無軒  
冕罪過耳卽爲嚴禮泥首其門懇其臨喪次成禮  
賢舊舉動與流俗不同如此九杞臨歿自爲墓誌  
前此鍾太守梁亦然賢於乞人諛墓者尤遠矣  
許九杞先生以敢諫肥遯最爲夏文愍所重文愍召  
起道經嘉禾以書致先生與決進止于時藩臬郡  
縣臧舟祇候道相望也先生葛巾荔帶刺一小舸  
詣夏夏問許僕此出何如許不答第言可惜李長  
源却受觀察判官夏正襟起謝曰便當疏辭以奉  
明教須臾撾鼓迴帆顧諸祇候一時星散去夏撫  
然遂不果辭卒及于難嗟乎剝削炎冷能轉善爲  
敗如此乃知炎冷二字是一進退關隘文愍打不  
破遂令長媿于先生耳

鄭端簡家規雖宴貴客不使粉墨粧場雖給用有羨  
不營子母之利雖子姓繁衍卒無一人入歌妓之  
室者此規至今行之誠縉紳家久遠之藥石也

姚  
錄  
雜

劉方伯烱居官最廉余嘗見其手錄私記自縣令以  
至藩司每官識其所積蓋守令積俸亦有數百金  
若臬副至方伯每任不過百金而已又嘗讀鄭端



簡公撰方伯父威縣公墓誌以縣令進部郎尋卒  
益中止餘脫粟數斗不能具殮清白門風亦其流  
傳有素也

王沂陽先生家多藏書所萃丘陵學山中有子夏詩  
傳申培詩說云皆出其手也俄失火被髮狂叫諸  
壯兒曰筐篋不煩救第得一囊書者當酬一金也  
火甚熾卒不能得一書大呼曰祝融不仁忍殲我  
千秋知契邪爲蹋地號哭此政可與有書癖人道  
之並見  
尺編

秦川沈公奎與余外祖吳半山先生總角交沈掛冠  
最早每午飯必待余外祖至而共之隆慶初余館  
一縉紳家一日邀公郊遊余亦在焉酒半問余知  
外祖與我交厚否余曰知之公曰秀才但知讀書  
今日之酒近於佚遊雖謝主人可也前輩風範方  
嚴如此朱元弼  
猶及編

馮公臯謨未舉前夢跨馬從小柵橋土神祠前過忽  
顛仆而覺應試至武林夢一節推手其卷跪一大  
叅前云此卷未稱大叅曰是可中後揭榜卷果在  
節推硤江邊公房爲亞卷大叅內江高公世彥拔  
之錦旋時馬至小柵橋祠前果蹶而仆如夢中今



於其處樹棹楔表功名所自兆焉

朱元弼雜記

嘉靖中軍人陳霖以金銀首飾數事用帕裹之令婢持往銀工修整有一鷹於中途攫其帕出城去婢歸告霖霖亟登城望之見鷹啣此直往東北下海塘去以爲必失矣無何復啣之盤旋而上入城置霖屋上而去取視之一無所失蓋鷹初以爲可食之物故攫去旣而知其誤遂復還之物之有靈如此不可謂爲偶然也鶴林玉露載宋婺州州治古木上有鷹巢一卒探取其子郡守王夢龍方據案視事鷹忽飛下攫一卒之中去已而知其非探巢

之卒也啣而還之復徑攫探巢者之中以去與此事畧同其亦異於人之遂非者多矣

西園雜記

嘉靖戊申有虎從海上來匿劉侍御墓草間數日樵者見而駭走城中人聞而往觀者無慮數百相距步武環立熟視虎亦堅臥不起衆方以爲可狎也拾瓦礫擲之有陸堯者擊虎中目虎怒奮而起獨爪堯於稠人中傷其胸腕流血數斗死餘人披靡竄自相踐傷者不勝計虎遂東走海上揭竿相逐者數十百人虎亦失勢窘迫赴海浪湧不得前返而登岸倉皇以頭觸石陷石罅中不得出有褚姓



者乘勢鞭之數百虎亦狼狽垂尾不動褚意其已死利其皮欲全而取之舉杖轉石石繆開虎固亡恙也忽躍出大吼噬褚擲地兩脇骨如斬立死衆踉蹌奔命虎亦不顧北走出境而去莫知所之鹽山中無虎虎忽至不妄傷人所傷必與犯之人若擇焉而施皆事之可異者

海寧衛使劉銳忠信人也有家奴名木者善射物靡不應弦獲一日有鶴集資聖禪寺木弋之貫其左翮鶴帶矢而翔盤旋良久竟集銳庭中悲鳴如泣訴者顧視其翼中矢血津津出銳曰噫此必木也

詰之服命拔其矢縱之不去乃命木啖以魚鱗十有餘日創愈向銳鳴舞翱翔去夫此一鳥耳胡然而識弋之爲木胡然而識木之有家主爲銳又胡然而識銳之不木若也創則依人愈則颺去其來也似智其去也似禮卽人類不是過亦異矣

事

崔鳴吾紀

嘉靖中指揮李振夜夢綠衣百數乞命於前覺而異之晨往郡舟次遇籠蛙百數閣閣鳴若哀救者李憶所夢贖之歸放家池中因囑曰蛙可生特憎其聒耳吾救汝生汝毋聒我後蛙果不鳴

仇志



楊公瑄官按察使以築塘功祠海上萬曆乙亥潮溢塘圯奉勅修築則水利僉憲晉江陳公詔董其事陳公至鹽入公祠不揖又背其像而坐居無何陳口咕咕誦公語云我堂官也汝敢無禮我將殺汝歸而病遣官禱於祠稍愈會按院巡浙東陳送至錢唐江上復見公率甲士擊之亟呼救按院命都指揮某以兵送歸公署濱死者幾撫按爲請新其祠宇大享於鹽陳亦尋愈公有功於鹽况忠義天植精爽宜其常存匪曰迂怪爾

萬曆丙子澉川有張某兄弟者嘗以廉值取其叔某之田叔貧無以爲生乞貸不已張患苦之謀殺焉而憚其子也先以計延致其子於家強之飲至醉幽諸別室殺而沉於河卽其夜潛入其家并叔孀而縊之其孫脫走有親韓某者以去草須去根之說進復追而殺之盡焚廬舍以匿其迹里中人咸不平相與訟諸令令不信鞭而遣之已而坊總入首朴之如初焉群情洶洶不已令乃拘張至訊之不服笞之俄有蛇從梁下墮令案前忽化爲三繞張兄弟啜其血擊之不去令曰此必冤獄也往其所殺處驗問盡得其情狀於是并其父子兄弟及



與謀之人盡致之辟人情大快而蛇亦莫知所之  
陸生宇懷邑庠生不得志遂以醫術行海鹽平湖間  
爲人安貧謹厚澹如也萬曆癸未九月二十六日  
得疾不起至十月十三日卒乃其外舅張月川氏  
入邑寓曹姓者家其弟出遭生於道見其冠履一  
新翩然而來相揖與偕至曹見之叙寒暄畢諄諄  
皆家人語在坐五六人亦與飲茶酬禮而罷乃十  
月二日事時則生臥床已六日矣及卒張往哭之  
詢其終始張大駭爲異通都白晝顯然神遊曠古  
所未經見

國家墾田有定額比來狡僞萌起避重就輕互相影  
射浮糧遂多萬曆八年冬言官建議量田於是  
詔諭天下墾田通行丈勘計畝核實當辦糧差一  
時有司務以額外增田爲功乃立扇長圖長弓正  
計筭知因人役先令民間自報原額若干今丈出  
若干或丈缺若干編號插籤然後各役到田再三  
覆丈每至一鄉鳴鼓擊柝號召業主業主則簞食  
壺漿蒲伏道左承奉惟謹而此輩猶然紳縮其間  
水涯草塹盡出虛弓古塚荒塍悉從實稅至於田  
連阡陌者力足行賄智足營奸移東就西假此託



彼甚則有未嘗加弓之田而圖扇人役積尺積寸  
皆營私窟遂使數畝之家稅愈增而田愈窄焉夫  
田間形勢以四圍通水爲一圩而圩之大小不齊  
不可以計畝限也法當每圩立一圩長通計圩內  
田并若干每并實田若干某戶田若干庶便稽查  
可無隱漏今各役不論圩頭止限田數一圩之田  
數人分文一人之役數圩分量互相推託實生弊  
孔小民重困職此之由立法不善其弊一至於此  
惜當時未有爲上人告者

葛山在海鹽縣治西南二十里其山卑猥而所踞地

亦僻陋人罕至惟石獨堅白與秦駐豐雅諸山所  
產不同萬曆丁亥秋有築塘之役議者遂欲開此  
山採石業設官鳩工矣明年己丑正月中忽傳山  
有銀礦翕然聚觀然其石皆碎小銀星而實無礦  
脉重不滿分釐煎之十無一二有司以礦砂微薄  
不欲開利孔爲民害閉不以聞并採石而禁之事  
遂寢因記之以杜他年之妄覲者

崔嘉祥  
紀事

海鹽翁學訓嚴之壽昌人爲人嚴正而接士寬厚官  
貧齋冷苜蓿自甘未嘗與寒生計束修已上一日  
獨坐忽有怪風從牖下起蓬勃掀播震蕩無已因



起步庭外則階草不動也入室復然食頃而止心怪之疑牖下有異未敢發是夜夢一婦人自稱前訓樊某妾爲悍妻所殺葬此今已訟之冥司寃白矣乞爲我改葬明日命僮奴向風所起牖下持鋤鑿穿砌土三尺許得兩缸合一婦人屍色生如新因以詢之齋役皆吐說果有此殺妾事當種朴時號楚聲達外人盡聞第未知埋處爾爾也翁遂具棺殮葬之郊外夜復夢此婦來謝未幾聞樊死其子某新舉孝廉亦死而悍妻單窮老無所倚鬼所云寃得白者殆謂此樊處之縉雲人

見只編

九都歸氏兄弟同居家頗富有耕牛甚馴一日兄弟交訟而兄勝其弟以歸兄將至家舍舟先入將以其訟勝語家人也牛忽起觸之死弟與衆至而後知之枕其股而哭焉

朱元弼猶及篇

鍾秉文以萬曆乙巳自省中引疾歸蓄一鸚鵡甚狎

歸七載病瘖晨昏念佛懺悔鸚鵡亦未嘗不應聲

相和丙辰冬秉文捐館家人舉哀鸚鵡亦自籠中

躍出大鳴叫者三遂卻食而死又有夾竹桃一株

是中官所贈秉文甚愛之至是亦竟枯死其弟念

之有二絕紀其事

幾年鬻養喚聲頻燕邸携來到海濱一自主人乘鶴去羞將言



語向他人 露井仙桃別樣花枝枝穠艷吐  
奇葩忽然而凋萎非無意怕到尋常百姓家

余舊隣有朱姓者業簞舂自給方破竹有豕從門入俗忌謂害入門必割其耳禳之朱遂割豕兩耳未幾其子婦產一女無兩耳也

余同縣有軒岐家李怡春者凡貧病乞藥未嘗責錢

俄市火三面獨李屋不焚人皆以爲冥報

見只編

尚胥朱上舍玘同里有宋姓者不欲著其名嘗逋官錢困篋楚貸玘金數十貧甚無償理臨死泣曰吾負朱公死有作犬犢耳踰年玘忽夢宋至曰昔欠公恩債公家明日犬乎生有純白左股橫黑點者

卽我也且起視犬生子其一毛色果如夢中所說不覺驚歎家人共知後此犬輒依依其身傍每夜羣犬嗥此犬或否迨此犬嗥必有警矣一夕賊二十餘來劫其家方抵門此犬先繞室嗥人得盡覺復嚙玘寢室扉悲鳴若哭玘知有異急開戶携妻孥走呼僮奴伏屋外邀賊殺其一人生擒其一乃是東陽人爲戍卒在鹽者獻之戍將訊得餘黨盡伏辜時隆慶丁卯六月十八日也明日此犬長嗥不食數自投堦下若欲死者玘曰若報我竟殆欲去我耶吾非若家人數十口且血賊亦矣犬似側



耳聽卒悲嗥數聲躑躅死玃泣下累日爲文以祭

之其孫茂才學章作義犬記樊侯立序焉序曰聖人知鬼

神之情狀而後世儒者撥無因果豈欲矯其說駕先聖之上乎又何如信其有者之尤足警世也余

讀此記感朱公之爲善不德與宋生之受恩不忘真足以發明唯心之旨矣夫三界輪迴獨此一真

如性往來其間人與旁生總若出治之金隨其模範著地之水任彼方圓亦何必優劣爲而况不昧

因果更有靈於血肉心知之屬又詎宜以情識限量測乎吾友朱禪翰述此事而記之審只以闡祖

德將令世儒知神不滅而性共合其禪于聖教不淺也噫俗人少見多怪以爲性莫貴于生民儒已

盡于宋代安信有三世六道之昭昭者乎則必如西竺金仙所言而後足以盡其情狀也實如古先

生書余又不敢以人論宋生即謂之菩薩行于非道可爾

海鹽縣圖經卷之十六終



張菊生太史文數十載所搜吾塩邑前賢遺著忠數

捐貯合家圖書館卷帙美富集一鄉文獻之大成國內

未有出其右者近承館中見於張氏涉園藏書目錄

展閱一過多疑皆備而地志中加考韓先生所纂海塩

縣圖經一書為邑乘之祖尚付闕如因思先翁祖雪廬

公所遺藏書中有之輒貯合家圖書館歸入張氏涉

園專藏藉表景仰之忱

顧文凱謹誌



胡職方海鹽

圖經四冊

按圖經共十六卷當為每卷一冊

今併裝四冊所存亦藏一條佚名

跋文一紙陸定曾祖雪廬公手寫

書籤并粘附之又記



嘉興府伊志云，桑谷水源委，鄉道元水經注，所載古水，自小湖東南出，逕由卷縣故城，曰又東南，逕嘉興縣城，西曰又東南，逕鹽官縣故城南，曰谷水出，澱浦通海，以地勢狹，則今長水，宜即古谷水中間一節，而首尾久不可考矣。其由卷故城後世，雖莫指其處，大要在今府城之西北，而小湖在由卷之西北。太湖又在小湖之西北，可桑方而知也。又桑谷者，水名也，故吳記云：謂之谷水，神異傳云：日為水，若夫長谷，則長乃谷名也。華亭谷，則華亭乃谷名也。谷名水名，必有辨。至元志所引谷水諸條，皆因長谷華亭谷連及稱，其水自近崑山，與水經注所述，分流於太湖，入海於澱浦，谷水本無涉，惟志誤引，鄉善長說，改一江為松江，而臆斷之曰：南接三泖，未免牽混。故錄而正之。又桑末丕基，東江考一篇，力辨鄉說，其詞古辨，但究不能確指谷水所在。又浙江通志引貝瑄說，謂谷水為天日分流，尤屬臆斷。

海鹽縣圖經十



明刊海鹽縣圖經

壹

明刊海鹽縣圖經

貳

明刊海鹽縣圖經

叁

明刊海鹽縣圖經

肆